

# Ala wene Nggem enane vaga dirup warek

Nggem New Testament

© 2003, 2004, 2007,  
2008, 2013 Tim Penter-  
jemah Bahasa Nggem  
(The Nggem Transla-  
tion Team)

This Bible is copyrighted by Wycliffe Bible Translators (Wycliffe.org) and is printed with permission by the Digital Bible Society (dbs.org) for non-commercial use.

This Bible is available for free download in a variety of digital formats at [dbs.org/bibles](https://dbs.org/bibles).

Mark .....	4
Lukas .....	31
Lakbogogi .....	79
1 Tesalonika .....	121
2 Tesalonika .....	125
1 Timotius .....	128
2 Timotius .....	134
Titus .....	138
Yakobus.....	141
1 Yaya .....	146
2 Yohanes.....	152
3 Yohanes.....	153
Wayu.....	154

# Mark

**1** At Yesus Keretus † Ala abut en o endak ogagagi wene sek menda ako yusogon.

**At Yaya ima wombabisaliga menda yonggo endak lakbagagi wene**

(Matius 3:1-12; Lukas 3:1-18; Yaya 1:19-28)

<sup>2</sup> O endak erogo, Yesus ao wagatek hegek, at navi Yesaya Ala wene yugirigya lagagi ako en sek wene yugirigya dugwit,

“At Ala en ‘Hat laup sup yarupwak yiluk,

Anen ap ambi yonggo endak lakbagya hil neyayogon’, ††

<sup>3</sup> Ap ambi o harumu ap akwa dekma andoma dugwit, yanggup iri dugwit,

‘Nenasin inis ombok At warup sup sek erogo yagu dogwes,

At lagya dogop sup amot erogo yagu dogwes’, yagagi,” ‡

Yesaya en dirup watigi.

<sup>4</sup> Dirup watigi ako wane-wane ap Yaya ap akwa ima wombabisaliga menda o harumu ap akwa dekma andoma wagagi. Wagya lagagirik, ap akwa yugirigya dugwit, “At Ala en hit weyak ogasagwi ako dek erogo bigigapwak en yiluk henendawi wenggebaluk weyak ako nggelabisines. Nggelabugu hiniselok ima wombabigigayogon,” yiluk, yugirigya lagagi. <sup>5</sup> Yugirigya akoma, werekma, it yi ap ndi ap o Yudeya inim, Yerusalem menda inim, ovok erogo at Yaya adema wagu lagagwarik it weyak ogagu lagagwa ako vagangu-selok at Yaya en is Yoredan ima wombabugula-  
gi.

<sup>6</sup> At Yaya ako wam unta iris vaga asum manggadogo yikhidigya, eke agamut vaga mboranis yikhidigya lagagi. At agarom ako idam inim, nggin owangga inim, ninggya lagagi. <sup>7</sup> It ako yugirigya dugwit “At havis nam-beta-ga warisogon andi, ap ombok aro. Eke an andi maduk. Maduk atma, At isok sepatu sovalek dugwit anen nggolalup andi meyan. <sup>8</sup> An un i-vaga wombabigaliga ovara, At andi, Averiniki vaga henovaga bigigagiluk warisogon,” yugirigya lagagi.

**Yaya en Yesus ima wombabagagi wene**

(Matius 3:13-17; Lukas 3:21-22)

<sup>9</sup> At Yaya en ima wombabuguma, At Yesus o Galilea kota Nasaret en adema lagagi. Lagya lagagimu at Yaya en is Yoredan ima wombabagagi. <sup>10</sup> Wombabagya lagagimu At Yesus ima en mondok iri dugwit, mbogot elo heyarogo Averiniki swa suwa wane-wane wigak yagan At ovaga wambu wagya hagagi. <sup>11</sup> Higya lagagimu, At Ala ane mbogot vaga en iri dugwit “Hat nabut nendawi hunik atma, nendawi adenggen ogagya heyagi o,” yagagi.

**Sile en Yesus avut mbanggigi wene**

(Matius 4:1-11; Lukas 4:1-13)

<sup>12</sup> Iri lagagimu, Averiniki en Yesus o harumu ap akwa dekma wolok lagagi. <sup>13</sup> Werekma, at sile en endawi avut mbangu hegek, ndugwis 40 hudi, swa bagas inim enamwa andoma welagagi. Inim werekma it malaikat mbogot vaga yonggo nelagwi menda en wagu lagagwarik, inim dugwit endawi aik watbagwi, yonggat hugwi, ogagu lagagwa.

**Yesus o Galilea lagagi wene**

(Matius 4:12-17; Lukas 4:14-15)

<sup>14</sup> Andi okbaluk, at Yaya ako heda magago lembaga mabagagwa. Mabagu lagagwama At Yesus o Galilea At Ala wene sek wene ako yugeregek nagu lagagi. <sup>15</sup> Yugirigya dugwit, “At Ala ogarup endawi imbitigi ako vage atma ari waga o. At Ala avema bigigaup ako vage vanggo yagaliga. Hit weyak ogasagwi ako henendawi wenggebaluk nggelabisines. Nggelabugu dogo-mundik sek wene ako henendawi avyarat umbutu dogwes o,” yiluk, yugeregek nagu lagagi.

**Yesus en ikan wasagwi menda eneyave 4 yanggup yugeragagi wene**

(Matius 4:18-22; Lukas 5:1-11)

<sup>16</sup> Yugeregek nagu lagagirik is Galilea namut imbilimu lagya dugwit at Simon aot Andreas inim ikan wasagwi menda, yum yarin ikan wasagwi menda ikan waruguluk ima wombabagusim At Yesus en il enegegi. <sup>17</sup> Wombabagwi il inugu lagagirik, yugirigya dugwit, “Ikan wasagwi hak, ap akwa belalivit nagu dogovovok yiluk yukherayogon. Andi halok An ninim lasogon omanes o,” yiluk, <sup>18</sup> yugirigya lagagimu yum ikan wasagwi menda hekbaluk mbikit Yesus inim lagagwa.

† Inis Keretus andi adem andi Ala en ap akwa enagap wendarumwak yiluk enogo lakba wagagi. †† Maleakhi 3:1 ‡ Yesaya 40:3

<sup>19</sup> Horok andoma At lagya lagagirik at Sebedeyus aburi Yakobus aot Yaya inim, enasin inim, mburi-vaga dugwit yum yarin ikan wasagwi menda ako mang-gatwis sek ogagwi il inugu lagagirik <sup>20</sup> "Ninim lasogon o," yiluk, yanggup yugeragagi. Yanggup yugirigya halok it enasin Sebedeyus eyaganggom inim mburi-vaga andoma hekbisiluk Yesus inim lagagwa.

### Madis ako Yesus ane hobaluk ap endawima en winggi-wene

(Lukas 4:31-37)

<sup>21</sup> It ako inim lagu lagagwarik, o Kapernaum nonggagagwa. Nunggugu lagagwarik, it Yakuri samban ogasagwima akoma At Yesus samban ogagwi vaga nunggwigya lagagirik, wene mamuleragagi. <sup>22</sup> It At ane enaruk hunggu lagagwarik, 'Ap yi wii' yiluk, vok yagagwa. "At ap yi it guru-guru agama en yagalagwi wane-wane dek o, ata At endawi anye vaga mamuner-aliga wii!" yiluk vok yagagwa.

<sup>23</sup> At wene mamulirigya hegek, ap ambi madis agoda werek endawima nonggagagirikmu it ap Yakuri samban ogasagwima akoma nunggwigya lagagirik, <sup>24</sup> naik hunik iri dugwit, "Yesus wai, Hat ap Nasaret menda nggarogo okbininaguluk wagen? Hat dek okbininaguluk wagen a?" yugugu lagagirik "Ala abut weyak ogasigadek mondok sek adigat denek menda heyave an nilup," <sup>25</sup> yugugu lagagimu At Yesus ako en "Hat hane dek, wii!" yiluk <sup>26</sup> yugugu lagagimu, at madis ap endawima nonggagagi ako en eyave wuruk-wuruk dede iri dugwit, naik iri lagagirik, nggigilogo winggigi.

<sup>27</sup> Wunggu lagagimu, it ovok erogo "Ayai" yiluk, enalon wisane agu lagagwarik, at ambi en yegek, at ambi en yegek yugu dugwit, "Avyak. Nggarogonggan winggas? Wene adik swi mamulik vaga ane anye vaga 'Wii' yugugu halok, madis ako endawi hobaluk ap endawima en winggas," yagagwa. <sup>28</sup> Yugu lagagwarik, Yesus ogagagi wene ako wolok o Galilea avilis ambot akoma inilup ogovit lagagwa.

### Yesus ap akwa wisane sek okbogogi wene

(Matius 8:14-17; Lukas 4:38-41)

<sup>29</sup> It Yakuri samban ogasagwima en wulu wagu lagagwarik, Yesus inim Yakobus Yaya inim, it Simon Andreas enamwa nonggagagwa. <sup>30</sup> Nunggugu lagagwama, at Simon ogwa isa aup edup en nggilik werekma Yesus yugogogwa. <sup>31</sup> Yugugu lagagwama At Yesus hwa ako adema lagya lagagirik, inggis vagago mondok okbagagi. Vagago mondok okbagya lagagimu, hwa ako sek agya lagagirik enake ogagya lagagi.

<sup>32</sup> O howam mo huruk irisim it ap akwa andoma en it aup werek menda inim, madis enendawima werek menda inim woginiviluk Yesus adema lagagwa. <sup>33</sup> It ap akwa andoma menda ovok erogo sup mbanggutmu mbumbumu homagagwa. <sup>34</sup> Homagu inigik, At Yesus en ap akwa yi aup ndi aup adik-adik menda akoma ovok erogo sek okbogogi, ap akwa madis enendawima

werek menda akoma nggigilogo wibogogi. It madis At Yesus inilup atma At Yesus en "Hit henane dek mbup erek dogwes!" yugirigya lagagimu enane dek mbup erek dugwit wungugwa.

### Yesus o Galilea sek wene yugeregek nagu lagagi wene

(Lukas 4:42-44)

<sup>35</sup> O yanggo yigiluk o hwis okbaliga andi vaga, Yesus iluk agya lagagirik ap akwa dekma andoma samban ogari winggigi. <sup>36</sup> Samban ogagya akoma werekma at Simon aswei inim belalit lagu dugwit At eyave hagagwa. <sup>37</sup> At eyave hugu lagagwarik, "Hat ako aroma heyagek it ap akwa ovok erogo Hat heyave belalhetek nelagwi!" yugogogwa.

<sup>38</sup> Yugugu lagagwama, At Yesus en "Ap enawi o adik-adik andoma yugeregek lagiluk wagirikmu, lasogon," yiluk yugirigya lagagirik, <sup>39</sup> o Galilea yi awi ndi awi andoma it ap Yakuri samban ogasagwima yugeregek lagya dugwit, madis enendawima werek menda halok, nggigilogo wibisilin nagu lagagi.

### Yesus en ap amu hunik werekma sek ogagagi wene

(Matius 8:1-4; Lukas 5:12-16)

<sup>40</sup> Ogarit naguma ap amu hunik welagagi ambi erambo yunggulogo Yesus avema hora yi lagagi. Hora iri lagagirik "Haren an sek okbanup imbitya heyalok sek okbanin o," nggino yugogogi.

<sup>41</sup> Yugugu lagagimu At Yesus en abwa imbitya dugwit inggis ovaga vagago, "An sek okbagaup himbitirikmu sek okbagagi o," yiluk, <sup>42</sup> ao yugu hegek amu ako dek agagi. Dek agya lagagirik sek agagi.

<sup>43</sup> Sek agya lagagimu At Yesus endawi vaga ane anye erogo yugugu dugwit "Ap akwa yugerabuk. At ap imam † ako hat avyarat sek aga andi il heyapwak yiluk adema elak. Hat sek okbagagirikmu, at Musa en 'Ala ake anderogo baup o' yiluk yagagi ako †† it ap akwa heyapwak yiluk Ala ake ba lak," yiluk lakbagagi. <sup>45</sup> Aruk warogo lakbagagi ovara, ap ako amwa akoma en wunggu lagagirik, at sek okbagagi wene ako ovok erogo yi awi ndi awi vagalogo yugeregek lagagi. Vagalogo yugeregek lagya lagagimu, At Yesus ako ap akwa enanggelekma selekma nagu dogop andoma dek halok, ap akwa dek werekma, ap akwa yi awi ndi awi en At adema homari lagek adigat ogagu lagagwa.

### Ap isok weyak sek okbagagi wene

(Matius 9:1-8; Lukas 5:17-26)

**2** At Yesus ap akwa dekma akoma welagagirik, o Kapernaum wagagirikmu "Amwa wagya lagarik agarik o," yugu lagagwama, <sup>2</sup> ap akwa wisane homari wagagwa ako amwa o hobo-hobo agya lagagimu, sup

† It ap imam-imam ako Agama Yakuri vagago welagagwa. It ap akwa Yakuri menda en wam ndomba a, kambing a, swa a, Ala ake baguluk wolok waguselok, it ap imam-imam ako en, Ala ake yiluk, warogo hali napwak yiluk hali hunbagu lagagwa. †† Imamat 14:1-32

mbanggut vaga inim werekma At Yesus en Ala wene sek wene ako yugeragagi. <sup>3</sup>Yugirigyama, ap ambi isok weyak, ap eneyave 4 en yo durogo wolok Yesus adema ba wagagwa. <sup>4</sup>Ba wagu lagagwarik, ap akwa wisane wagu lagagwarik sup nggolo dek halok, o viril vaga wolok ungu lagagwarik, o wake mbeyatbaluk o viril ndendalogo ap ako yo durik wolok wagagwa ako vaga nggilik hegek, mbauk erogo Yesus amor-amot wom-babagagwa. <sup>5</sup>Wombabagu lagagwama, At Yesus ako en it enendawima At ovaga avyarat umbutu dugwit wolok wagagwa, yedok inugu lagagirik, ap isok weyak ako yugugu dugwit, "Nabut wai. Hat weyak ogagya lagen ako dek erogo bagagi o," yugogogi.

<sup>6</sup>Yugugu lagagimu, it guru agama andoma horaik dugwit enendawima umbutu dugwit <sup>7</sup>"Ap yi nggarogo yiluk, anderogo yagaliga embetep? Nit weyak ogasagwi dek erogo biniliga ako At Ala adigat agarik. Ambi im dek. Ala weyak-weyak erogo baliga yi," it enendawi vaga umbutugwa.

<sup>8</sup>It enendawi anderogo umbutwi ako, At Yesus en-dawima yedok inugu lagagirik, "Hit nggarogo yiluk, henendawi anderogo winggilisagwi? <sup>9</sup>At ap isok weyak yi ako, 'Hat weyak ogagya lagen ako dek erogo bagagi o', yugerup andi iya a, ata 'Hat hagone ndalek nogoliga menda hedelok elak', yugerup andi iya a? Yukneres!" yugirigya lagagirik, <sup>10</sup>"An ap at endaklagagis wen vaga yoma dugwit, ap akwa weyak ogasagwi dek erogo okbisapwak en yiluk, Ala en An at mon-dok okbaninggigi hinilup erogo yukherayogon o," yiluk, yugirigya lagagirik, at ap isok weyak ako yugugu dugwit <sup>11</sup>"Mondok iri dogomindik, hagone ndalek nogoliga ako hedelok, hamwa lanok yiluk yukisiga," yugogogi.

<sup>12</sup>Ap ako ao yugugu hegek, mondok iri lagagirik, at agone ndalek nogo yiliga ako hedelok, it ap akwa ovok inil vaga wasim wunggu lagagimu, "Nit ninil hegetek menda, At ovok ogaga yi, wii," yiluk, At Ala inis siyabagu dugwit vok yagagwa.

### Ap Lewi yanggup yugogogi wene

(Matius 9:9-13; Lukas 5:27-32)

<sup>13</sup>Vok yugu-sigik Yesus ako wunggu lagagirik, ndugwis ambi vaga ambi inim is Galilea namut omban vaga lagya lagagimu, ap akwa ovok erogo At adema wagwi, Ala wene yugirigya, ogagu lagagwa. <sup>14</sup>Ala wene yugirigya lagagirik, suvaga lagya dugwit ap ambi inis Lewi, Alepeyus abut, at it pemerintah enake yoparip wonggalisagwima horaik dugwit, yavup ogagya il hagagi. Il higya lagagirik, "Ninim lasogon, oma," yugugu lagagimu, mondok iri lagagirik, Yesus inim lagagi.

<sup>15</sup>Andi okbaluk havis Yesus inim, At eyaganggom ane welagwi menda ako inim, it pemerintah enake yoparip wonggalisagwi menda inim, it weyak ogasagwi menda inim, it wisane Yesus inim nagu lagagwa ako at Lewi amwa lagu lagagwarik Yesus inim erom nunggusim, <sup>16</sup>it ap Parisi menda guru agama nin akoma en Yesus

it weyak menda ako inim At erom nunggwi inil inugu lagagwarik, At eyaganggom yugurugu dugwit, "It pemerintah enake yoparip wonggalisagwi menda inim, it weyak ogasagwi menda inim, Yesus nggarogo yiluk inim dambulik dugwit erom naliga?" enavok mbalogo yugeragagwa.

<sup>17</sup>Yugurugwi ako At Yesus aruk hunggu lagagirik, "It ap aup edup dek halok andi, dokter adema laup ombasagwidek. Ata, aup edup halok enadigat dokter adema lendagwi. Andi ndatak, Anen it ap 'an sek' ombasagwi menda enake ogarigiluk wagatek o, ata weyak ogasagwi menda enake ogarigiluk wagagis," yiluk, At Yesus en it Parisi menda enadema yugeragagi.

### Erom nenggetek enelagap moga hak dogop wene

(Matius 9:14-17; Lukas 5:33-39)

<sup>18</sup>Ndugwis ambi vaga o akoma dugwit, it Yaya ane welagwi menda inim, it Parisi menda ako inim, samban ogagu dugwit, erom nenggetek enelagap moga hak welagagwa. Werekma, Yesus ane welagwi menda erom ungu nunggu-selok, ap akwa Yesus adema wagu lagagwarik, "It Yaya ane welagwi menda inim, it Parisi enane welagwi menda inim, samban ogagu dugwit, erom nenggetek moga hak agarwik ovara, Hat hane welagwi menda andi nggarogo yiluk, ungu erom nelagwi?" yugogogwa.

<sup>19</sup>Yugugu lagagwama, At Yesus en, "Ap ambi en hwa hedigyama, owa-aot isogo isagu dugwit, enendawi anggin vaga erom nenggetek enelagap moga hak, dogop sek embetep? Andi dek o. Agun inim dugwit, enendawi adenggen vaga naup sek o. <sup>20</sup>Hivis owa aot inigik, agun ako heda magago wolok laup horok vango yi wagya hegek, enendawi anggin vaga erom nenggetek enelagap moga hak dogosogon o," yiluk, yugeragagi.

<sup>21</sup>Yugirigya lagagirik, "Yum endak yugup digi swi dalwogo monggatu halok, digi swi dalik werek hegek, yum endak yugup ako ombok erogo libik asigama, digi swi dalwogo yum endak atok hunogo monggadisagwidek o. Swi yugup endak yugup vaga lombalogo monggadisagwi halok, swi yugup lombalek werek ako libilagya dugwit, endak yugup libilik ako ombok erogo at libis yagaliga o," yiluk, yugeragagi.

<sup>22</sup>Yugirigya lagagirik, "Wam kambing agamut ogovak higirik is owak endak menda atma, yo enggen anggur amburup swi menda nudisagwidek o. Nudup halok andi, amburup ako en is owak endak menda yanggalogo maklagya dugwit, yo enggen amburup inim, is owak inim dek arisogon. Wam kambing agamut is owak swi ogovak higirik ako andi yo enggen amburup nudup sek o," yiluk, yugeragagi.

**It Yakuri samban ogasagwi vaga ogagagwa wene**

(Matius 12:1-14; Lukas 6:1-11)

<sup>23</sup> Andi okbaluk, ndugwis ambi vaga it ap Yakuri samban ogasagwi vaga At Yesus gandum yagoma suvaga lagyama, At ane welagwi menda ako inim, lagu dugwit, gandum enggen hoda atma, naguluk mbalit lagagwa. <sup>24</sup> Mbalit lagusim, it Parisi menda ako en inugu lagagwarik, "Yesus wai. Ala en, 'Hit samban ogasagwi vaga yavup anderogo ogarubuk o', yagagi hegek, nggarogo yiluk ogarit lendagwi?"

<sup>25</sup> Yugugu lagagwama, At Yesus ako en, "Wene at Daut arwi inim, erom dekma, erom uvup dugwit, ogagagwa wene ako, Ala wene vaga hinil dibagatek dugwit yagalagwi?" <sup>26</sup> Andi o endak ap Abyatar it imam-imam enasin werekma, at Daut ako at Ala awi valekma nunggwigya lagagirik, erom roti Ala ake bago ako, ninggigi. Erom roti ako it ugun naup dek o. It imam-imam adigat nunggu dogopwak yiluk, yugeragagi hegek, at ninggigi. Ninggya lagagirik, it inim welagagwa ako wogirigya lagagimu, it ovok nungugwa o, yiluk, wene ako hinil dibagatek dugwit yagalagwi?" yiluk, yugeragagi.

<sup>27</sup> Yugirigya lagagirik, "Ala en o samban ogasagwi vaga yi yavup ndi yavup ogarubuk o, yagagi ako nit ap akwa nenake okbagagi o. Eke, nit ap akwa samban ogasagwi vaga yi ogarubuk ndi ogarubuk ogarupwak yiluk, okbininggitek o. <sup>28</sup> Andi atma, samban ogasagwi vaga ogarup andok andi, An ap at endaklagagis yi aro," yiluk, yugeragagi.

**3** Hivis it Yakuri samban ogasagwima umwa akoma ap inggis wenak weyak werekma At Yesus nonggagagi. <sup>2</sup> Nunggwigya lagagimu, ap akwa ambetap akoma en, "Samban ogasagwi vaga yavup moga hegek At Yesus ap inggis weyak ako sek okbagya hamwi a dek a?" yiluk, enane wonggalogo ovaga baguluk, inil vikvak welagagwa. <sup>3</sup> Inil vikvak werekma At Yesus ako en, ap inggis weyak ako yugugu dugwit, "Mondok iri dogomindik, o ilim yenam oma," yugugu lagagirik, <sup>4</sup> it ako yugirigya dugwit, "Samban ogasagwi vaga sek oginivup andi sek a, eke, weyak oginivup andi sek a? Eneyave inidi yup andi sek a, eke inirup andi sek a?" yugeragagi ovara, enane dek at, mbup yagagwa.

<sup>5</sup> Yesus mbet iri dugwit il dombalinivit lagagi. Il dombalinivit lagya lagagirik, "Enendawi lakot ai," yiluk, endawi burup iri dugwit, ap inggis weyak ako yugugu dugwit, "Hinggis welalhanen," yugugu lagagimu, inggis welalhagagi. Inggis welalhigya lagagimu, inggis ako sek agagi. <sup>6</sup> Sek agya lagagimu, it Parisi menda ako en wulu wagu lagagwarik, it Herodes menda inim homakbaluk, "Nggarogo waruk o?" yiluk wene mbangguguwa.

**Yesus en ap akwa wisane erogo sek oginipigi wene**

(Matius 12:15-16; Lukas 6:17-19)

<sup>7</sup> At Yesus ane welagwi menda ako inim inamut Galilea omban vaga lagu lagagwama, ap akwa wisane o Galilea en At inim lagagwa. <sup>8</sup> It At Yesus ogarit lagya ako enaruk hunggu lagagwarik o Yudeya en, Yerusalem en, o Idumeya en, o Yoredan elavikit en, o Tirus Sidon yi awi ndi awi andoma en ap akwa wisane At adema homari wagagwa. <sup>9</sup> Ap akwa wisane homari wagu lagagwama, At Yesus en At eyaganggom yugirigya dugwit, "It ap akwa wisane hobo-hobo erogo okbanunggusawen, mburis ambi An hora yumenda amot okbomanes," yiluk, yugeragagi. <sup>10</sup> At Mburis ambi amot okbomanes yugeragagi ako, it ap akwa wisane erogo sek oginipigirikmu, it aup warera ako en Yesus ininggis vagaruguluk horok-horok nonggagagwa. <sup>11</sup> Horok-horok werekma, it madis enendawima nonggagagwa ako it madis ako en Yesus inil hugu lagagwarik, Ala abut Hat aro, yiluk, na yugu dugwit, yeve-reve yagagwa. <sup>12</sup> Yeve-reve yugu lagagwama, At Yesus en ane abet vaga it madis ako yugirigya dugwit, Hit yedok neyagipikmu ap akwa mondok yonggo yugerabuk! yugeragagi.

**Yesus en ap eneyave 12 yanggup yugeragagi wene**

(Matius 10:1-4; Lukas 6:12-16)

<sup>13</sup> Yugirigya lagagirik, At Yesus ako hulikmu inggya lagagirik, akona en inim dogoguluk endawi hologo bagya lagagirik, warupwak yiluk yanggup iri lagagimu, adema homari wagagwa. <sup>14</sup> Homari wagu lagagwama, it ap 12 ako mondok okbugu lagagirik, wene yugirigya dugwit, "Ninim dambulik dogoguluk, mondok okbigigis o. Eke Ala wene yugurugwi, madis ap endawima nonggagagi halok, An ninis vaga nggigilogo wibugwis, ogagu dogovovok yiluk, lakbigigaliga o," yiluk, enogo mondok okbogogi.

<sup>16</sup> It enogo mondok okbogogi ako yi:

at Simon inis hivis Peterus sanggigi ako inim,

<sup>17</sup> Sebedeyus aburi Yakobus aot Yaya inim, ininis andi it enane vaga *Boaneges* sabogogi, eke nit nenane vaga 'Unggul Ane Aburi menda' sabogogi, ako inim,

<sup>18</sup> Andreas inim,

Pilipus inim,

Batolomeyus inim,

Matius inim,

Tomas inim,

Alepeyus abut Yakobus inim,

Tadeyus inim,

at Simon ap Selot † menda inim,

<sup>19</sup> at Yudas Ikariot 'Yesus warup' avok mbanggigi ako inim,  
ako at enogo mondok okbogogi.

† Ap Selot andi it Yakuri menda enadik dogop ogagu lagagwa menda.

**Sile Belesebul wene**

(Matius 12:22-32; Lukas 11:14-23, 12:10)

<sup>20</sup> Enogo mondok okbisiluk, havis umwa nunggwigya lagagirik, andoma werekma, ap akwa wisane At adema homari wagu lagagwama, Yesus At ane welagwi menda inim 'Erom naup dek higyo' yugu lagagwama, <sup>21</sup> ap akwa en "Ap yi nenek yagan naliga yi, wiii!" yugu lagagwama At owa aot enaruk hunggu lagagwarik vagaruguluk lagagwa.

<sup>22</sup> Vagaruguluk ogagusim, it guru agama ako o Yerusalem en wagu lagagwarik, "Ap yi sile Belesebul endawima nonggagagi. Sile ako vaga At madis nggiligo wibisaliga," yiluk, yugu lagagwa.

<sup>23</sup> Yugu lagagwa ako, At Yesus en it ap akwa warupwak yiluk, yanggup yugirigya lagagirik, At adema homari wagu lagagwama, wene wakhegek yugirigya dugwit, "At sile atma, ap akwa enendawima nonggagagi andi, at sile nggarogo wibaup embetep?" yiluk, yugeragagi. <sup>24</sup> Yugirigya lagagirik, "It ap ako enavema bisaligama, ir-it ogotbaluk, adik-adik wunggu-selok andi, sek dogosogon dek o, weyak dogosogon o.

<sup>25</sup> Eke, it o yapwi ambiat agarwik atma, ir-it ogotbaluk, adik-adik wunggu-selok andi, enawi yapwi ambi atma, andoma sek dogosogon dek o, o ako um asogon o.

<sup>26</sup> Andi halok, at sile inim at avema agarwik menda inim, ir-it ogorek dugwit halok andi, dambulik dogosogonbuk. Ovok dek at arisogon o," yiluk, yugeragagi.

<sup>27</sup> Yugirigya lagagirik, "Ap ambi aninis wisane heda magatek hegek, at angge ndiyali nunggup andi dek o. Heda makbaluk andi ndiyali nunggup andi sek o," yugeragagi.

<sup>28</sup> Yugirigya lagagirik, "An wene avyarat ambi yukherayogon o. Ap akwa yi weyak ndi weyak ogasagwi inim, ap enavok weyak-weyak erogo biselagwi inim, At Ala en mbo baluk, dek erogo bisaup ndak ovara, Averiniki avok weyak-weyak erogo belagwi halok andi, At Ala en enomaluk ako andi dek erogo bisayogon mondok dek o. Andi vaga weyak enovaga dinggilik hegek mondok dogosogon o," yiluk, yugeragagi. <sup>30</sup> (Andi yugeragagi ako andi iren, "Madis endawima nonggagagi o," yagagwa halok, anderogo at yugeragagi.)

**Yesus isa inim, arwi inim wagagwa wene**

(Matius 12:46-50; Lukas 8:19-21)

<sup>31</sup> Anderogo yugirigya, At isa inim, arwi inim, wagu lagagwarik, wamu andenam mendek dugwit, "Yesus wulu warupwak yiluk, yugeres," yiluk, yugeragagwa. <sup>32</sup> Yugurugu lagagwama, it ap akwa wisane At adema homago horaik agarwik ako en, "Yesus wai. Hisa inim, harwi inim, wamu dugwit, habyam agarwik," yugogogwa.

<sup>33</sup> Yugugu lagagwama, At Yesus ako en, "An nisa, An narwi andi sa embetep?" yugirigya lagagirik, <sup>34</sup> At adema horaik welagagwa ako il yambenipu dugwit, "Dek o. An nisai, An narwi, hit heneyave yi aro. <sup>35</sup> Hit Ala en-

dawi ombasiga wane-wane ogagu hiniselok andi, nisai narwi andi hit aro," yiluk, yugeragagi.

**Ap awi lisilit lagagi wene**

(Matius 13:1-9; Lukas 8:4-8)

<sup>4</sup> Havis ambi inim is Galilea namut yanggadekma omban vaga wene mamuleragagi. Wene mamulirigya werekma, ap akwa iya erogo At adema homagagwarikmu, inamutmu mburi-vaga hora yi nonggagagi. Mburi-vaga horaik dugwit, it ap akwa horok is omban vaga ombok homago wisane at inigik, <sup>2</sup> yi wene ndi wene ovok at wene wakhegek vaga mamuleragagi. Wene mamulirigya dugwit, <sup>3</sup> "Henaruk holek dogwes, wene ambi yisogon!" yugirigya lagagirik, "Ap ambi en awi lisililuglagagi. <sup>4</sup> Lisilit lagya hegek, nin suvaga wombagagi. Suvaga wombagagi ako andi, swa wagu dugwit, ovok nenggek lagagwa. <sup>5</sup> Nin andi wen helep iri vaga wombagagi. Wambigya lagagirik, helep iri vaga wombagagi ako andi, wen ambukumat halok, avuduk inggigi ovara, <sup>6</sup> helep iri vaga atma, omanggan sek erogo yago dekma, mo en dis iri lagagirik, mbuk agagi.

<sup>7</sup> Eke, ambitap iringga adok werek angelekma wombagagi. Iringga angelekma wombagagi ako, vudanggigi ovara, iringga adok ako inggya dugwit, mbalogo wombanggigirikmu enggen yigitek at welagagi.

<sup>8</sup> Nin wen mudis vaga wombagagi. Wen mudis vaga wombagagi ako vudanggu lagagirik, adem mudis-mudis inggya lagagirik, andi okbaluk, enggen at yikli-gya dugwit, adem ambi en 30 yugu, adem ambi en 60 yugu, adem ambi en 100 yugu, ogarit lagagi o," yiluk, yugeragagi.

<sup>9</sup> Yugirigya lagagirik, "Henaruk werek halok andi, des erogo at henaruk hunggu dogwes o," yugeragagi.

**Nano yiluk Yesus wene wakhegek vaga yugeragagi wene**

(Matius 13:10-17; Lukas 8:9-10)

<sup>10</sup> Yugirigya lagagirik, adik werekma, At inim agarwik ako inim, it ap 12 inim, it ako en Yesus hemetugu dugwit, "Hat wene wakhegek vaga yukneregen ako, des erogo yuknerano," yugogogwa. <sup>11</sup> Yugugu lagagwama, At ako en, "At Ala avema bigigaup wene ako At endawima hwilago welagagirikmu, vagalogo yukheraliga ovara, it ugun andi, yi wene ndi wene wakhegek vaga yugeraliga o.

<sup>12</sup> Andi,

'Nil helagwi ovara, dibagatek agarwik o.

Enaruk hulisagwi ovara, enendawima en wegetek agarwik o.

Enendawima wenggenggu iniselok, it yi weyak ndi weyak ogasagwi ako hekbaluk,

At Ala en dek erogo bagya hawen', †

† Yesaya 6:9-10



yiluk, wene atok wakhegek vaga yugeraliga o," yiluk, yugeragagi.

### Wene awi lisilit lagagi ako adem wene

(Matius 13:18-23; Lukas 8:11-15)

<sup>13</sup> Yugirigya lagagirik, "Wene wakhegek vaga yukhirigi yi, wegetek dugwit, yagalagwi? Wegetek hiniselok, hivi wene wakhegek yukhirigya halok nggarogo waup embetep?" yiluk, yugugu lagagirik, <sup>14</sup> "Wene wakhegek ako adem yerogo: At ap awi lisilisiga menda ako en, awi lisilit lagagi ako hak andi, Ala wene sek wene yugeregek nelagwi andi aro. <sup>15</sup> Eke, awi suvaga wombagagimu swa nenggek lagagwa ako hak, it ap akwa ambetap sek wene ako hunggu lagagwama, at sile mbikit wagya lagagirik awi Ala wene ako enendawima lisilik agarik ako henogo wolok wilisiga aro. <sup>16</sup> Awi wene helep iri vaga wombagagi ako hak andi, it ap akwa nin sek wene ako enaruk hunggu dugwit, enendawi adenggen vaga welagwi ovara, <sup>17</sup> hivi en enendawima omanggen yagatek dugwit, ndugwis ambi dukluk, wene wagas ako vaga aninggin-mbaninggin erogo oginipwis, edup-mbedup erogo bugwis, ogaguselok, "Wene andi, nenanggon o," yiluk, helabisilik wilisagwi. <sup>18</sup> Awi iringga adok werek anggelekma lisilogo wombagagi ako hak andi, ap akwa nin sek wene enaruk hulisagwi ovara, <sup>19</sup> wen vaga menda adigat enendawi anggin vaga wenggelit lagwi, yi menda ndi menda dekap hegek enendawi wenggelit lagwi, yi menda ndi menda enendawi hogop ombarit lagwi, andi ogarit lendagwi vaga andi, awi nin ako iringga en mbalogo wombagagi ako hak, wene ako sovalogo belagwima, andi vaga enggen yigitek aro. <sup>20</sup> Eke awi wen mudis vaga lisilogo wombagagi ako hak, andi, ap akwa nin wene enaruk hobaluk, wogogwarikmu, enggen yugu dugwit, adem ambi enggen 30 yugu, adem ambi enggen 60 yugu, adem ambi enggen 100 yugu, ogasagwi o," yugeragagi.

### Lambu wulilogo belagwi wene

(Lukas 8:16-18)

<sup>21</sup> Yugirigya lagagirik, it yugirigya dugwit, "Lambu wulilogo sogolowak avema baup embetep? Mbanggu avema baup embetep? Dek o. Sigam wulilogo baup andi sek. <sup>22</sup> Anderogo hak, yi menda ndi menda hwilago agarik andi sigam arigiluk, agarik o. Yi wene ndi wene endawima sovalek agarik ako andi, sigam arigiluk agarik o. <sup>23</sup> Henaruk werek halok andi, des erogo at henaruk hunggu dogwes o."

<sup>24</sup> Yugirigya lagagirik, "Hit henaruk hulisagwi ako, henendawi dibagu dogwes. Wakhegek ako vaga wakelok, ap akwa wogerelagwi ako ndatak wakelok wokirigya hasogon. Andi halok, ambi inim ovaga ndulogo wokirigya hasogon. <sup>25</sup> Hit menda ambi agarik halok andi, ambi inim ovaga ndulogo wokirigya hasogon. Eke, hit menda ambi dekap halok andi, ambukumat

agarik ako ndiyalogo hedigya hasogon o," yiluk, yugeragagi.

### Enggen yiliga wene

<sup>26</sup> Yugirigya lagagirik, "Ala avema bisaup ako andi, ap ambi awi lisilit lagya lagagirik enggen yiliga hak aro.

<sup>27</sup> At ako o hup agya halok nogo yugu, eke o yanggo iri halok, yi ogagek ndi ogagek ogagya hegek awi angge ako avuduk inggya lagarik, adem ombok asiga. Adem ombok asiga andi, nggarogo ombok asiga? At unggut. <sup>28</sup> Wen vaga lisilik atma, endagen enggen yiliga. Endak andi avuduk dagasiga. Avuduk inggya lagarik, angga mbigalisiga. Angga mbiganggu lagarik enggen yiliga. <sup>29</sup> Enggen yugup sok agya halok, mbalup hudi agarikmu, ap en yaga vaga mbalisagwi ako hak andi, At Ala avema bisaup wene andi aro," yugeragagi.

### Vudok enggen wakhegek yugeragagi wene

(Matius 13:31-32, 34; Lukas 13:18-19)

<sup>30</sup> Yugirigya lagagirik, ambi yugirigya dugwit, "At Ala avema bisaup ako andi, nano ndatak wakaup embetep? At Ala avema bisaup ako ndatak wene wakhegek ngga yukheraik?" yugirigya lagagirik, <sup>31</sup> "Dek o. Ala avema bisaup andi vudok enggen hak aro. Yi awi ndi awi enggen ombok ovara, yo vudok andi enggen maduk. Awi yagwi halok, <sup>32</sup> enggen maduk ovara ombok yiliga. Ombok yugu lagagirik, abwak mbiganggu halok, yirwa ndirwa avema andoma enawi valheda nunggwisagwi hak andi, nit Ala avema bininaup wene andi ndatak aro," yiluk, yugeragagi.

<sup>33</sup> Yesus ako yi wene ndi wene nggarogo inilup arupwak yiluk, Ala wene wakhegek vaga yugirigya lagagi. <sup>34</sup> Wene selekma vagalogo yugeregetek, wakhegek adigat yugirigya lagagi ovara, it At ane welagwi menda ako andi At inim enadik dugwit, yi wene ndi wene yugeragagi ako vogalogo yugirigya lagagi.

### Havut endengga "Havolok mbup iru," yugogogi wene

(Matius 8:23-27; Lukas 8:22-25)

<sup>35</sup> Yugirigya lagagirik, o howam agya halok, At Yesus en At ane welagwi menda ako yugirigya dugwit, "Is ambo elavokot lasogon en," yiluk, yugeragagi. <sup>36</sup> Yugirigya lagagirik, it At ane welagwi menda ako ap akwa wisane akoma hetbisilik, At Yesus mburi-vaga werekma, adema nunggu lagagwarik, At inim lagagwa. Mburis nin inim lagagwa. <sup>37</sup> Lagusim o havut endengga ombok wagya dugwit, is legamuk ogagya dugwit, mburis elola akoma is yanggadi nonggagagi. <sup>38</sup> Yanggadi nungwigya hegek, At Yesus ako mburis atokma yum unggul didibaluk, nogo yuguma, it akoma en iluk okugu lagagwarik, "Nenasin guru wai. Is vage ndokalninivisiga en, Hat nano yiluk nenabwa haligadek nogo yiliga?" yiluk, yugogogwa.

<sup>39</sup> Yugugu lagagwama, iluk agya lagagirik, havut ako, "Moga," yugugu lagagirik, is ako "Havolok dek mbup iru," yugugu lagagimu, havut inim, is inim avolok dek agagi. <sup>40</sup> Dek agya lagagimu, "Hit nggarogo yiluk henalon yagalagwi? Hit henendawi An novaga vanggalbaluk, avyarat nembetetek dugwit yagalagwi?" yiluk, yugeragagi. <sup>41</sup> Yugirigya lagagimu, it ako enalon agu lagagwarik, ap ambi en ap ambi yugigik yugu dugwit, "Eya! Ap yi is inim, havut inim, At ane hulisiga yi sa?" yiluk, vok yagagawa.

### Yesus en madis nggigilogo wibagagi wene

(Matius 8:28-34; Lukas 8:26-39)

**5** Inamut yanggadek ako ambo elavikit ap o Gerasa menda werékma lagagwa. <sup>2</sup> Lagu lagagwarik, mburi-vaga en ao wunggu lagagwama, ap madis nenek endawima nonggagagi menda ap hambuguselok wimu biselagwima akoma en, Yesus adema wagagi. <sup>3</sup> At ap ako, hambugu-selok wimu biselagwima akoma welagagi. Welagagirikmu inggis isok mbusi heda magek adigat ogagu lagagwa ovara, heda mabagwi, libinggu, heda mabagwi, libinggu, hunik ogagu lagagwa. <sup>4</sup> Inggis isok inim, mbusi heda magek adigat ogagu lagagwa ovara, yimbi-mandok iri dugwit, inggis isok mbusi heda mago ako libik-ndendok erogo lakbagek adigat ogagya halok, it ap akwa ovok en ap ako vagarup meyan hagagwa. <sup>5</sup> Hup dingga hunik wimu biselagwima akoma inim, hulikmu inim, naik yagan, helep vaga wakhedegék nagu lagagi.

<sup>6</sup> Akoma dugwit, o adumu en Yesus wagya il hagagi. Il higya lagagirik, At adema vupuk lagya lagagirik avema seve yiluk, <sup>7</sup> "Yesus wai. Hat Ala mondok siyalek agarik ako abut yi an nggayok okneragiluk wagen?" yiluk ane ombok vaga naik iri dugwit "Ala inis vaga mondok narubuk," yiluk, yugogogi. <sup>8</sup> ("Ala inis vaga mondok narubuk" yagagi andi At Yesus en "Hat madis yi ap yi endawima en wilin," yugogogirikmu at ap ako at "Ala inis vaga" yagagi.)

<sup>9</sup> "Wilin," yugugu lagagirik, "Hat hini sa?" yugugu lagagimu, "An ninis Wisane salek agirik, neneyave wisane halok," yiluk, <sup>10</sup> "Nasin ai! An nendawima yoma en eneyave nggigilogo o isugut o hunogoma andoma wibisabuk," yiluk, ane ambi inim nggino yugogogi.

<sup>11</sup> Yugugu lagagirik, hulik avema andoma wam wisane buris yilin nagusim werékma, <sup>12</sup> it madis ako en "Ai, wam enendawima nungguguluk lakbininin," yiluk yugogogwa.

<sup>13</sup> Yesus ako yugugu lagagwama, At ako en "E o. Elales," yiluk, yugeragagi. "Elales," yugirigya lagagimu, madis ap endawima en wunggu lagagwarik, wam enendawima nunggugu lagagwama, wam wisane 2000 hudi o lapik-lapikmu akoma en yulup yagan, inamutmu nunggugu lagagwama, is ako en ndokalipigi.

<sup>14</sup> Is ndokalipu lagagimu, it wam wogenaviluk nelagwi menda ako hoda sak yagan wunggu dugwit, wam is ndokalipigi wene ako o ombokma im, madukma im,

yugeregek lagagwama, it ap akwa ako en, "Nggarogo agamu?" yiluk bigisa wagagwa. <sup>15</sup> Yesus adema wagu lagagwarik, ap madis endawima nonggagagi ako, eve ap endawi sek agya lagagirik, yum yikbetaluk werékma, andoma at horaik hugu lagagwarik, enalon agagwa. <sup>16</sup> Enalon agu lagagwama, it endak oklagagi inil hagagwa ako en madis at endawima nonggagagi wene inim wam ako is ndokalipigi wene inim, mbilino-gu yugeragagwa.

<sup>17</sup> Yugurugu lagagwama, it ap akwa akoma en Yesus it enamwa en wulupwak yiluk, yugogogwa.

<sup>18</sup> At Yesus mburi-vaga nunggigiluk ogagya lagagimu, ap madis endawima welagagi ako en, "Ninin lasogon o," yiluk, yugogogi.

<sup>19</sup> Yugugu lagagimu, At Yesus en, "Dek o. Hat hamwa howa-hasin werékma lagya dogomindik, hat Hasin habwa en sek oketas ako yugerelak," yugogogi.

<sup>20</sup> Yugugu lagagimu, lagya lagagirik, o inis Dekapolis akoma, Yesus ogagagi wene ako yugeregek nagu lagagimu, ap akwa ovok erogo vok yagagwa.

### Yairus abut inim, hwa Yesus asum vagatigi inim, sek oginipigi wene

(Matius 9:18-26; Lukas 8:40-56)

<sup>21</sup> Mburi-vaga At Yesus ako is ambo elavikit en eyami vaga wulu wagya lagagirik, is embet vaga werékma, ap akwa wisane At adema homari wagagwa.

<sup>22</sup> Homagu lagagwarik werékma, it ap Yakuri samban ogasagwima vagenombogo agarik menda ambi inis Yairus wagya lagagirik, Yesus avema seve yiluk, <sup>23</sup> abwa edik abwa edok iri dugwit, "Yesus wai. An nabut hwavyak edup en hambup atma, hinggis vakbaluk sek iluk ogaitnok en yiluk, oma o," hunik adigat yugogogi.

<sup>24</sup> Hunik adigat yugugu lagagimu, At inim lagagwa.

It mberen lagusim, it ap akwa wisane inim lagu dugwit, linggiluluk lagagwa. <sup>25</sup> Linggiluluk lagu lagagwama, hwa ambi amep ogagya helan, 12 tahun welagagi ako, <sup>26</sup> angge-angge ovok erogo dokter-mandiri it ap sek oginivisagwi menda ako wogirigya lagagimu, sek oknerapwak yiluk ogagu lagagwa ovara, edup ako dek agatek evenuk agya lagagi. <sup>27</sup> At hwa ako en Yesus sek oginavit nagu ako aruk hunggu lagagirik, ap akwa wisane enanggelekma Yesus ambutmu nunggwigya lagagirik, asum inggis vakbagagi. <sup>28</sup> "Asum ninggis vakbagya neyalok, sek oknerayogon o," imbitya lagagirik, inggis vakbagagi.

<sup>29</sup> Asum inggis vakbagya lagagirik, amep ogagya lagagi ako dek agya lagagimu, "Namep ogagya lagi ako yogak andi sek oknitya highi o," yiluk, imbitigi. <sup>30</sup> Imbitya hegek, At Yesus ako en, "Anen ambi ogagi highi," yiluk, yedok higya lagagirik, ap akwa linggiluluk wagwi ako, avilimu ambutmu dagalogo bigupu dugwit, "An nasum sa en inggis vagatas?" yiluk, yugeragagi.

<sup>31</sup> Yugirigya lagagimu, At eyaganggom ako en, "Ap akwa linggiluk welagao inigin ovara, Hat nggarogo

yiluk, sa en vaketamu yiluk, yagaliga?" yiluk, yugogog-wa.

<sup>32</sup> Yugugu lagagwama, At Yesus il yen woginipu dug-wit, "Sa en nasum inggis vagatas?" yiluk yugeragagi.

<sup>33</sup> Yugirigya lagagimu, at hwa ako "Sek oknetas higi," imbitya lagagirik, alon en owak wuruk iri dugwit, At avema seve yiluk at ogagagi ako vagalogo yugogogi.

<sup>34</sup> Vagalogo yugugu lagagimu, At Yesus en, "Ai, naot o. Hat hendawi An novaga vanggaluk, avyarat nem-beten vaga sek agen o. Sek dogosogon atma, hendawi ugun elak o," yugogogi.

<sup>35</sup> Ao yugugu hegek, ap Yairus amwa en wagu lagag-warik, "Yairus, habut ovok hombagas helan, Yesus un anggodo wolok wandiga o," yiluk, yugogogwa.

<sup>36</sup> Yugogogwa ako Yesus aruk hunggigi ovara, enane sovalogo bagya dugwit, at Yairus ako yugugu dugwit, "Hendawi An novaga vanggaluk, avyarat nimbitya dogwen. Halon ombarubuk," yiluk <sup>37</sup> yugugu lagagirik, "It ap akwa ugun ninim warubuk," yiluk, at Peterus inim, Yakobus aot Yaya it mberen inim, Yesus inim enadik lagu lagagwarik, <sup>38</sup> ap Yairus ako amwa wagu lagagwarik, ap akwa nane-hane yugu dugwit, de wene yugwi, yup yagwi, inugu lagagirik, umwa akoma nong-gagagi. <sup>39</sup> Umwa nungwigya lagagirik, yugirigya dug-wit, "Hwavyak yi hambegetek, un nogo yiligama, ng-garogo yiluk nane-hane yup yagwi, ogasagwi?" yuger-agagi.

<sup>40</sup> Yugirigya lagagimu, it ako en At agonda yagagwa ovara, ap akwa ovok nggigilogo wasim wibisiluk, hwavyak asin-isa inim, At arwi henggam ako inim, At wogenombolok hwavyak werekma akoma nongga-gagwa. <sup>41</sup> Nungguu lagagwarik, inggis vakigya dug-wit, " *Talita hum* ," † yugogogi. Eke, nit nenane vaga "Hwavyak i. Mondok yinok yiluk yukisiga o," yiluk, yu-gogogi.

<sup>42</sup> Yugugu lagagimu, at hwavyak ako mondok iri la-gagirik, amwa akoma nagu lagagi. Hwavyak ako sawe agatek hegek, umur 12 tahun welagagi. At nagu la-gagimu, ap akwa ovok erogo "Wii," yiluk, vok yagagwa.

<sup>43</sup> At Yesus en ane avuput vaga ap akwa enadema yu-girigya dugwit, "At hwavyak sek ogagi yi, ap akwa yugerabuk," yugirigya lagagirik, "Erom napwak yiluk wogeres," yiluk, yugeragagi.

#### It ap Nasaret menda en "Yesus nenanggon" umbutug-wa wene

(Matius 13:53-58; Lukas 4:16-30)

**6** O andoma en Yesus At ane welagwi menda ako inim, awi adem vaga lagagwa. <sup>2</sup> Lagu lagagwarik, samban vaga it ap Yakuri menda samban ogasag-wima, nungwigya lagagirik, wene mamuleragagi. Wene ao mamulirigya hegek, it At ane enaruk hung-gugwa ako en, "Ap yi wene nggoma en wagas vaga ya-galiga? Ap endawi werek hak yagaliga yi, nano wene

† *'Talita hum'* andi Bahasa Aram. O andi vaga it Bahasa Aram yugu lagagwa.

wagas vaga yagaliga o? Ogarubuk menda ogasiga ako, nggarogo erogo ogasiga embetep? Wii," yiluk, vok yagagwa. <sup>3</sup> Vok yugu lagagwarik, "At hwa Maria eyak o valisiga menda yi arwi Yakobus inim, Yoses inim, Yudas inim, Simon inim, At arwi hwavyak inim agarwik yi ako, dek?" yiluk, At Yesus enanggon umbu-tugwa.

<sup>4</sup> Enanggon umbutu lagagwama, At Yesus en, "It ap navi-navi Ala wene yugerelagwi menda andi yi awi ndi awi en siyabiselagwi ovara, at awi adem vaga menda inim, enowa-enaot inim, avuk agarwik menda en ininis siyabiselagwidek o," yugeragagi.

<sup>5</sup> Yugirigya lagagirik, ogarubuk menda andoma en ogarup meyan halok, un ambitap-ambitap, aup idu-mu, inggis inunggul vakbisiluk, sek okbogogi ovara, <sup>6</sup> it enendawi At avyarat embetetek halok, Yesus "Wii," imbitigi.

#### Yesus At ane welagwi menda ako lakbogogi wene

(Matius 10:5-15; Lukas 9:1-6)

Yesus yi awi ndi awi yanonggwegek-ndanonggwegek wene mamuleregek nagu lagagi. <sup>7</sup> Nagu lagagirik arwi 12 menda ako warupwak yiluk, enyanggup yugeraga-gi. Wagu lagagwama, madis agoda werek menda ng-gigilogo wibigik nagu dogopwak yiluk, wene yugirigya lagagirik, mberen hondok lakbogogi.

<sup>8</sup> Lakbugu dugwit, "Erom inim, yum inim, yoparip in-im, wolok labuk. Un hit henowanggun adigat hedelok elales. <sup>9</sup> Hinarupato yikedau, andi sek ovara, heneyave atma yum mberen yirup dek o," yiluk, enaruk watigi. <sup>10</sup> Enaruk watya lagagirik, yugirigya dugwit, "O ambima lamundikmu, wokinupu-selok, hin-im andoma dogomundik, elalo. <sup>11</sup> O ambima en hit wokinapitek halok, hinane inim enaruk hunggitek halok, inil vaga hinilamundinek hinisok vaga mupak hak horogo baluk, andoma en wilitalo o," yiluk, lakbo-gogi.

<sup>12</sup> Lakbugu lagagimu, lagu lagagwarik, "Hit weyak ogagu lagep ako, henendawi hobaluk, mbo bas o," yiluk, yugeregek nagu lagagwa. <sup>13</sup> Nagu dugwit, yi madis ndi madis wisane nggigilogo wibigik, aup edup enovaga amburup minyak zaitun ndibisiluk sek oginip-wis, ogenavit nagu lagagwa.

#### Yaya avup mbanggugwa wene

(Matius 14:1-12; Lukas 9:7-9)

<sup>14</sup> Oginavit nagu lagagwa ako vaga, At Yesus inis yi awi ndi awi inaruk hunggugwarikmu, ap inis ombok Herodes ako inim aruk hunggigi. Inaruk hobagu la-gagwarik, it nin en, "At Yaya ima wombabugu lagagi ako hambisagwima en iluk akluk, mendok yagas ako vaga, ogarubuk menda ogarit lagya higyo o," yiluk, ya-gagwa. <sup>15</sup> It nin en, "Dek o. Eliya aro," yugwi, eke it nin en "It endak Ala wene yugurugu lagagwa navi-navi ako hak, yogak yagaliga o," yugwi, yugu lagagwa.

<sup>16</sup> Yugwi ako, at Herodes aruk hobagya lagagirik, "Avyak. Yaya avup mbanggigis ako, iluk akluk, mendok yagas highi o," yiluk, yagagi.

<sup>17</sup> Andi, hwa Herodiyas at Herodes aot Pilipus ogwa hegek, at Herodes en hedagagirikmu, at Yaya en Herodes yugugu dugwit, "Hat haot ogwa hegek, wegindikmu hinim dogop moga o," yiluk, yugugu lagagi. Yugugu lagagirikmu, at Herodes en hwa ako endawi sek arupwak yiluk, Yaya heda marupwak yiluk, ap enayegen werek lakbugu lagagimu, lagu lagagwarik, heda makbaluk, lembaga mabagagwa.

<sup>19</sup> Mabagu lagagwama, at Yaya yagagi ako vaga at hwa Herodiyas ako endawi aninis wisane agagi. Endawi aninis wisane agya dugwit "Yaya watbaup," imbitya hegek ap Herodes ako en "Yaya ako weyak ogagetek, endawi sek atma warup dek," imbitigi. At Yaya en wene yugugu hegek, ap Herodes aruk hunggu dugwit endawi anggini ovara, hulup endawi adenggen imbitya dugwit, "Watya hawen," yiluk Yaya hwilakbagagi. Hwilakbagya lagagimu, watbaup ako dek agagi.

<sup>21</sup> Warup dek agagi ovara, at Herodes endaklagagi hudi ari wagagirikmu, at arwi, kepala-kepala mondok okbogogi inim, it enayegen werek menda inim, it ap Galilea menda enasini ap ombok-ombok inim, adenggen isogo isagusim, hwa Herodiyas ako en, "Ee! yogak andi nanonggal homagaoma," imbitigirikmu, <sup>22</sup> at Herodiyas eyak ako nunggwigya lagagirik, vilinoveleno iri halok, at Herodes aswei enayonggo lakbogogi wagagwa ako inim, "Hwa yi yagaliga a, wii," yiluk vok yugu lagagwama, at Herodes en hwavyak ako yugugu dugwit, "Hat nano menda nggino yuknugu heyalok, an wokirisogon o." <sup>23</sup> Yugugu lagagirik, "Hat an nano wokirup embeten? O yoma an nandok agirik atma, 'Hudi mbalogo banin', yuknugu heyalok, anen venak higiroyo bagasogon o, Ala inis vaga avyarat yukisiga," yiluk, yagagi.

<sup>24</sup> Iri lagagimu, wunggu lagagirik, hwavyak ako isa hemetigya dugwit, "An nano menda nggino yugirik?" yugugu lagagimu, isa ako en "At Yaya ima wom-babisaliga menda unggul mbalhirumwak yiluk yugiri elak," yugogogi.

<sup>25</sup> Yugugu lagagimu, at hwavyak ako vupuk lagya lagagirik ap ombok adema, "Yogak Yaya ima wom-babisaliga menda avup mbalogo unggul walup vaga mbo erogo wokniri omano," yiluk, yugogogi.

<sup>26</sup> Yugugu lagagimu, ap ombok Herodes ako endawi weyak agagi ovara, it isogo isagusim inil vaga at Ala inis vaga yagagi halok, hekbaup anggon embetek, <sup>27</sup> ap yegen werek ambi Yaya avup mbalogo unggul wolok warupwak yiluk, lakbagya lagagimu, lagya lagagirik, lembaga nunggwigya lagagirik, adonggop mbalogo <sup>28</sup> unggul walup vaga mbo erogo wolok wagagi. Wolok wagya lagagirik, hwavyak ako wogugu lagagimu, isa wogogogi. <sup>29</sup> Andi en at Yaya ane welagwi menda ako en, Yaya avup mbanggugwa inaruk hobaluk lagu lagagwarik, eyave wolok wimu balagag-

wa ovara Yesus yagan nagwis ako Herodes aruk hunggu lagagirik "Yaya iluk akluk mendok yagas highi o," yiluk, yagagi.

**At Yesus en ap eneyave 5000 erom wogeragagi wene**  
(Matius 14:13-21; Lukas 9:10-17; Yaya 6:1-13)

<sup>30</sup> At Yesus lakbogogi ako eneyami vaga At Yesus adema wagu lagagwarik, it ogarit nagu lagagwa wene inim, mamuleregek nagu lagagwa wene inim, wene mbilinogo yugiri wagagwa. <sup>31</sup> Mbilinogo yugiri wagu lagagwama, ap akwa wisane erogo At adema lagwi-wagwi ogagusim, erom naup dek agya lagagimu, At Yesus ako en, "Sat yanggalhedaguluk, nenadikmu ap akwa dekma lasogon en omanes," <sup>32</sup> yugirigya lagagimu, it ako mburi-vaga nunggugu lagagwarik, enadik ap akwa dekma, andoma lagagwa.

<sup>33</sup> Yesus asweimuni inim lagwi ako ap akwa wisane yedok inugu lagagwarik, o yi awi ndi awi en it wen vava vupuk enendak enabyam ari lagagwa. <sup>34</sup> At Yesus ako mburi-vaga en is embetma wulu wagya dugwit, ap akwa wisane homago ako il inugu lagagirik, "It wam ndomba vagenombogo dek menda ako hak, it yi anderogo at inigis o," imbitya lagagirik, "Enabwa o," imbitya dugwit, yi wene ndi wene mamulirigya lagagi. <sup>35</sup> Wene mamulirigya hegek, o vage hup agya lagagimu, At ane welagwi menda ako At adema wagu lagagwarik, "O ovok hup agya halok, o yoma ap akwa dekma wagyoma, <sup>36</sup> ap akwa yi enagarom onngo hunhedapwak yiluk, o ombokma inim, o adik-adik valekma inim lakbisino," yugogogwa.

<sup>37</sup> Yugugu lagagwama, At Yesus en, "Hiren at enagarom wogeranes," yugirigya lagagimu, iren, "Nit erom hunogo menageraup andi onngo andi onngo ombok yoparip 200 *denari* † baup embeten?"

<sup>38</sup> Yugugu lagagwama, At Yesus en, "Hit henagarom maren agarik? Yokanes." Yugirigya lagagimu, yokugu lagagwarik, "Erom roti un lima, eke ikan mberen at agarik," yugogogwa.

<sup>39</sup> Yugugu lagagwama At Yesus en it yugirigya dugwit, "Ap inarwi dombok mbeyambup vaga andena bisam ndalogo hora yi elales," yiluk, yugeragagi. <sup>40</sup> Yugirigya lagagimu, it ap homago ako, nin 100 vaga ambima hora yugwi, nin 50 vaga ambima hora yugwi, ogarit lagagwa. <sup>41</sup> Hora yi lagu lagagwama, At Yesus ako en erom roti lima ikan mberen inim, wigya lagagirik, il mbogot vaga iligik dugwit, "Ala Nasin wa!" yiluk, samban ogagagi. Samban ogagya lagagirik, erom roti ugurogo ap akwa ako sumburerapwak yiluk, At ane welagwi menda wogeragagi. Wogirigya lagagirik, ikan 2 wogogo it ovok erogo napwak yiluk, sumbureragagi. <sup>42</sup> Sumburirigya lagagimu, it ako ovok nunggu lagagwarik, enagaum agagi. <sup>43</sup> Enagaum agya lagagimu, erom inim, ikan inim, nin higiroyo bagagwa ako, mburin yum 12 vaga yedogo mbin erogo bagagwa.

† *Denari ambiat andi yavup onngo satu hari ndatak.*

<sup>44</sup> It ap erom roti nunggugwa ako, eneyave dambulik andi 5000 nunggugwa.

**At Yesus is iri vaga lagagi wene**

(Matius 14:22-33; Yaya 6:16-21)

<sup>45</sup> Erom roti nunggu lagagwarik, At Yesus en At ane welagwi menda ako yugirigya dugwit, "Mhuri-vaga nunggugu dogomundik, o Besaida henendak lagu dogwes," yiluk ane avuput vaga yugirigya lagagirik, lagu-sigik, ap akwa ako enamwa lakbigigi. <sup>46</sup> Ap akwa ako lakbugu lagagirik, hulikmu andoma samban ogari inggigi.

<sup>47</sup> Akoma samban ogagya lagagirik, o hup agagirikmu, mburis ako is namutmu ilim ari waga lagagimu, At Yesus ako wambu waga lagagirik, adik is omban vaga welagwi. <sup>48</sup> Is omban vaga andoma dugwit, o havut elavokot en waga dugwit, mburis ndililhagagwa ndililhagagwa meyan at hagagwa, Yesus en il inogogi. O hup o yanggo yigiluk ogagya hegek, At Yesus is iri vaga isok yabagek-ndabagek enadema lagagi. Lagya lagagirik, it mburi-vaga inigik mbikit lagiluk ogagya lagagimu, <sup>49</sup> iren is iri vaga isok bagek lagya inil hugu lagagwarik, enendawima en "Yi isawi ai!" umbutu lagagwarik, na yagagwa.

<sup>50</sup> It ovok At waga inil hugu lagagwarik, enowak wuruk iri lagagimu, "Henanggela wulubuk. An neyave at wandiga atma, henugut habuk," yugeragagi. <sup>51</sup> Yugirigya lagagirik, mburi-vaga enadema waga lagagimu, o havut ako avuput dek agagi. O havut ako dek agya lagagimu, "Wii," yiluk, enalon iya erogo hugu lagagwarik, vok yagagwa. <sup>52</sup> It vok yagagwa andi, At erom roti ugureragagi ako adem dibagatek dugwit enendawimu obak ugun welagagwa.

**Yesus en o Genesaret aup warek sek oginipigi wene**

(Matius 14:34-36)

<sup>53</sup> Is elavokot o Genesaret wunggu lagagwarik, mburis is omban vaga andenam heda yidilogo baluk, <sup>54</sup> weram wunggu lagagwama, it ap akwa akoma en At Yesus waga ako mbikit yedok hagagwa. <sup>55</sup> Yedok hugu lagagwarik, yi awi ndi awi andoma yonggo vupuk lagu lagagwarik, "Yesus nggenam agarik, yugusamwi?" yiluk, it aup warek ako yo vaga agone ndabaluk Yesus adema wogenombolok lagu lagagwa. <sup>56</sup> O madukma inim, o ombokma inim, o adik-adik andoma inim, nagu hawen, it aup warek ako vasat vaga bisa wagu lagagwa. Bisa wagu lagagwarik, un Yesus ayum atok ininggis vagarupwak yiluk, nggino yugugu lagagwama, vakugu-selok, Aren ovok sek oginipu lagagi.

**It ap Yakuri enombawi ogagu lagagwa mamulik wene**

(Matius 15:1-9)

**7** It ap Parisi menda inim, it guru agama inim, Yerusalem en Yesus adema wagagwa. <sup>2</sup> Wagu lagagwarik, At ane welagwi menda ako ininggis adat va-

ga horekdek, un ugun dugwit erom nunggwi inil inogogwa.

<sup>3</sup> (It Parisi menda ako inim, it Yakuri ovok erogo inim adat it enombawi ogagu lagagwa mamulik ogagu lagagwarikmu, ininggis adat vaga horekdek halok andi erom nenggetek wulugu lagagwa. <sup>4</sup> Erom hunisagwima akoma en wagu dukluk, ininggis adat vaga horekdek dugwit, erom nelagwi dekma. It enombawi ogagu lagagwa mamulikmu ogagu dugwit manggok inim, sogolowak ombok-mariduk inim, <sup>†</sup> adat vaga hurisagwima.)

<sup>5</sup> Anderogo ogasagwi atma, it Parisi menda ako inim, it guru agama ako inim, Yesus yugugu dugwit, "Hat hane welagwi menda yi, adat nit nenombawi ogagu lagagwa ogasagwi hak, ogagetek, nggarogo yiluk ininggis adat vaga horekdek ugun at erom nelagwi?" yiluk yugogogwa.

<sup>6</sup> Yugugu lagagwama, At Yesus en it yugirigya dugwit, "At Ala en yagagi ako hit henendawimu sek ovagada erogo at Yesaya en endak avyarat dirup watigi:

"Hit ap akwa yi, henane vaga An Ala siyabanilagwi ovara,

henendawimu andi adumu erogo agipik o.

<sup>7</sup> Hit mamulrelagwi ako andi, ap akwa enane yugup hegek, mamulrelagwima,

enam warogo nggarogo yiluk An ninis adup ogasagwi o." <sup>††</sup>

<sup>8</sup> Yugirigya lagagirik ambi inim yugirigya dugwit "Ala wene yugup ako sovalogo baluk, hit henombawimu ogagu lagagwa mamulik atma ogasagwi hinigis o," yiluk yugeragagi.

<sup>9</sup> Yugirigya lagagirik, "Hit henombawimu ogagu lagagwa mamulikmu ogagu dogoguluk, At Ala yagagi wene hekbelagwi atma, hit sek at hinigis o. <sup>10</sup> At Musa en iri dugwit 'Henasini hinisai enane des erogo hunggu dogwes'. <sup>‡</sup> Eke, 'Enane mbidarogo bamwi halok, mondok mondok inirup aro' <sup>††</sup> yiluk, yagagi ovara, <sup>11</sup> hit andi henasini-hinisai yugurugu dugwit, 'An nange wokirup imbiti ovara, *Kurban*. Andi, Ala ake betagagis o', yugurugwi halok, <sup>12</sup> andi okbaluk, henasini hinisai enake okbisaup andi dek yugu hinigis o. <sup>13</sup> Adat hit henombawimu ogagu lagagwa mamulik vaga, ap akwa yugerelagwi ako ogarit lagwi vaga, Ala wene andi dek erogo baguluk ogagu hisaliga o. Hit ogasagwi ako andi, iya erogo at ogasagwi higi o," yugeragagi.

**Nano vaga nenendawimu weyak oknininisiga wene**

(Matius 15:10-20)

<sup>14</sup> Yugirigya lagagirik, it ap akwa ovok erogo yanggup yugeragagi ako, wagu lagagwama yugirigya dugwit, "Hit ovok erogo An nane henaruk hobaluk, des erogo ogagu dogwes o," <sup>15</sup> yugirigya lagagirik, "Nelagwi menda andi vaga weyak okininisigadek ovara, henen-

<sup>†</sup> Sogolowak ako andi gelas inim, piring inim, belanga inim, nin wisane inim adat vaga hutu lagagwa. <sup>††</sup> Yesaya 29:13 <sup>‡</sup> a: Keluaran 20:12; Ulangan 5:16 <sup>††</sup> b: Keluaran 21;17; Imamat 20:9

dawima en weyak menda wenggelogo baluk wilisiga ako vaga weyak okinivisiga. <sup>16</sup> Henaruk werek halok andi, des erogo at henaruk hunggu dogwes o," yiluk, yugeragagi.

<sup>17</sup> Yugirigya lagagirik, ap akwa ako hekbisiluk, umwa nunggwigya lagagimu, At ane welagwi menda ako en, "Hat wene atok hwilagago heda yukneregen ako andi, des erogo yukneran o," <sup>18</sup> yugu lagagwama, At Yesus en iri dugwit "Hit ogo henendawi obak dugwit, yuknis-agwi? Yi menda ndi menda nelagwi menda ako henendawima nunggwisigadek. Ata, yi menda ndi menda nelagwi ako henagaum elola en wilisiga andi, henendawi weyak okinivisigadek, yi hegep?" yiluk, yugeragagi. (Wene yugeragagi andi, nelagwi menda ovok erogo moga dek yiluk yugeragagi.)

<sup>20</sup> Yugirigya lagagirik, ambi yugirigya dugwit, "Henendawima en wenggelogo baluk wilisiga ako vaga weyak at okinivisiga. <sup>21</sup> Henendawi weyak wenggenggis; wanggis wugwi; henonggop wugwi; ap watwis; <sup>22</sup> ap ogwa werekma inim hwa agun werekma inim ogagwi; ap enangge hogop-hogop umbutwi; yi weyak ndi weyak ogagwi; henane agil-amok vaga ap enendawi wugwi; henendawi hwa vaga adigat wenggelek dugwit, ugun-ugun ogarit lagwis; henendawi enaninis umbutwi; ap enavok mbangwis; an iya umbutwi; ap wes okidugwi; <sup>23</sup> andi menda henendawima en winggas ako vaga, ogarit nagu dugwit weyak okinivisiga o," yiluk, yugeragagi.

#### Hwa ambi Penisia menda avyarat imbitigi wene

(Matius 15:21-28)

<sup>24</sup> Yugerelok, o andoma en lagya lagagirik, o ambi inis Tirus nonggagagi. Nonggagagirikmu, o ambiat valekma nonggagagi, akoma dugwit, "Ap akwa inil neyagusawen yiluk, hwilaklarisogon" imbitigi ovara, dek agagi. <sup>25</sup> Dek agya lagagimu, hwa ambi eyak hwavyak madis endawima nonggagagirikmu, Yesus wagagi ako aruk hobaluk, Yesus adema lagya lagagirik, avema seve yiluk ane yugugu dugwit, "Ai, Nasin o," yiluk, yugogogi. <sup>26</sup> Hwa ako en abwa edok erogo Yesus adema yugugu dugwit, "An neyak madis endawima nonggagagi andi, nggigilogo wibanogen yiluk, yukisiga," yugogogi. At hwa ako eyave Yakuri menda dek. At Yunani menda ovara, o Penisia, propinsi Siria vaga endaklagagi.

<sup>27</sup> Yugugu lagagimu, At Yesus en it ap Yakuri enavok iri dugwit, "Avyak enagarom enendak enagaum erogo napwak yiluk iya erogo wogeraup o," iri lagagirik, it ap weram menda enavok iri dugwit, "It avyak ako nenggetek inigik it enagarom ako harwogo it eneyangge wogeraup moga," <sup>28</sup> yugugu lagagimu, at hwa ako en, "E o Nasin. Yo mbangu ndalek vaga avyak enagarom nunggu dugwit enggen liso-liso wambisiga andi eneyangge at nelagwi o," yugogogi.

<sup>29</sup> Yugugu lagagimu, Aren, "Harenen wene sek anderogo yegen vaga heyak madis endawima nongga-

gagi ako vage nggigilogo winggarikmu hamwa elak o." <sup>30</sup> Yugugu lagagimu, hwa ako amwa lagya lagagirik eyak ako madis endawima nggigilogo winggigirikmu nggilik werekma il halagagi.

#### Yesus en ap aruk nggulup ane dek menda ambi sek ogagagi wene

<sup>31</sup> Andi okbagya lagagirik, At Yesus ako o Tirus het-baluk, sup o Sidonggan en o Dekapolis andoma nunggwigya lagagirik is Galilea omban vaga nonggagagi.

<sup>32</sup> Andoma nunggwigya lagagirikmu, it ap akwa andoma ako en, ap aruk nggulup ane dek ambi wolok At Yesus adema ba wagu lagagwarik, At Yesus en inggis ovaga vagarupwak yiluk, enabwa edok erogo dugwit, yugogogwa.

<sup>33</sup> Yugugu lagagwama, it ap akwa ovok homago ako hetbisiluk, Yesus en at aruk nggulup ako wolok lagya lagagirik, aruk elola inggis mabagya lagagirik, waris inggis-vaga suvutbaluk abya vaga lombabagagi. <sup>34</sup> Lombabagya lagagirik, elose mbogot vaga iligik dugwit, "Ai" imbitiya dugwit, " *Epata* ," † yugogogi. Yugogogi andi nit nenane vaga "Haruk hutlaru o," yiluk, yugogogi.

<sup>35</sup> Yugugu lagagimu, aruk hutlagya, ane dek ako ane werek agya, agya lagagirik, ane sek agagi.

<sup>36</sup> Ane sek agya lagagimu, At Yesus en ap akwa andoma ako yugirigya dugwit, "Ap akwa mondok yuger-abuk, moga!" yiluk yugeragagi ovara, hegek, ane sova-baluk, yugeregek adigat nagu lagagwa. <sup>37</sup> Yugeregek nagwis ako enaruk hunggu lagagwarik, "Enaruk nggulup ako enaruk hurogo bugu, enane dek ako, enane werek erogo bugu, oginavit lagya dugwit, yi ogagek ndi ogagek sek adigat ogarit naliga yi, wii," yiluk, enalon agu dugwit, vok yugu lagagwa.

#### Yesus en ap eneyave 4000 erom wogeragagi wene

(Matius 15:32-39)

**8** Andi ogarit nagu lagagirik, werekma ap akwa iya erogo At adema homari wagagwa. Homari wagagwa ako, enagarom naup dek atma, At ane welagwi menda ako yanggup yugeragagi. Yanggup yugirigya lagagimu, wagu-selok, it ako yugirigya dugwit, <sup>2</sup> "It ap akwa homago yi, ninim dugwit, ndugwis henggam erom nenggetek nogo yigao yi, enabwa o. <sup>3</sup> It nin enawi adumu en wagaorikmu, enamwa lakbugu neyalok, lagu dugwit, erom uvup en inuvuput basogon ombasiga."

<sup>4</sup> Yugirigya lagagimu, At ane welagwi menda ako en, "O yoma ap akwa dekma, erom nggomava woger-amwima it ndatak nasogon embeten?"

<sup>5</sup> Yugugu lagagwama At Yesus en iri dugwit, "Hit roti werago maren vagago agipik?" Yugirigya lagagimu, "Dek. 7 at vagago agurik," yugogogwa.

<sup>6</sup> Yugugu lagagwama, At Yesus ako en ap akwa iya erogo homago ako wema hora yupwak yiluk, yugirigya

† Bahasa Aram.

lagagirik, erom roti 7 inggimu dugwit, "Ala Nasin wa," yiluk, erom ugurogo ap akwa sumburerapwak yiluk, At ane welagwi menda ako wogirigya lagagimu, sumbur-eragagwa. <sup>7</sup> Sumbururugu dugwit, ikan mariduk mberen at werekma, "Ala Nasin wa," yiluk samban ogagya lagagirik, "Ikan yi inim sumbureranes," yiluk, wogeragagi. <sup>8</sup> Wogirigya lagagimu, nunggu lagagwarik, enagaum agagi. Enagaum agya lagagimu, erom ugurik nin inim higiurogo bagagwa ako mburin yum 7 hudi yedogo bagagwa. <sup>9</sup> It nunggugwa ako ap eneyave 4,000 hudi nunggugwarikmu, enamwa lakbugu lagagarik, <sup>10</sup> Yesus At ane welagwi menda ako inim, mburis vaga nunggugu lagagwarik, o Dalamanuta lagagwa.

**It Parisi menda en "Ninilup arup menda ogagya heyasogon o," yugogogwa wene**

(Matius 16:1-4)

<sup>11</sup> O Dalamanuta lagu lagagwama, it Parisi menda Yesus adema wagu lagagwarik, inim wene mbanggu dugwit, "Ninilup arup mbogot vaga menda ambi ogagya heyasogon o," yiluk, At ogagya avut mbaluguluk yugogogwa. <sup>12</sup> Yugugu lagagwama, At Yesus en, "Ai," yiluk, yugirigya dugwit, "Hit ap akwa yi, nggarogo yiluk, ninilup arup mbogot vaga menda ambi ogagya heyasogon adigat yuknisagwi? Hinilup arup menda ambi ogagya neyasogon mondok dek o, An avyarat yukheraliga."

<sup>13</sup> Yugirigya lagagirik, it ako hetbisiluk, mburi-vaga nunggwigya lagagirik, is ambo elavikit lagagwa.

**Ragi roti virisiga menda avok wene**

(Matius 16:5-12)

<sup>14</sup> It mburis vaga lagu dugwit, Yesus ane welagwi menda ako roti werago ako enunggut akluk, ambiat wolok lagu lagagwama, <sup>15</sup> Yesus en yugirigya dugwit, "Avyak wai. It ap Parisi menda inim, at Herodes inim, enane andi, ragi roti virisiga menda ako hak, henendawima nunggwigya hawen, henendawi hwalogo dogwes o," yiluk, enaruk watigi.

<sup>16</sup> Enaruk watya dugwit yugeragagi ako, it wene mbanggu dugwit, "Nenagarom dek halok, yagas higi," <sup>17</sup> it yugwi ako Yesus inugu lagagirik, "Hit nggarogo yiluk roti dek andi yagalagwi? An yukhirigi ako ao dibagatek henunggut dugwit, yagalagwi? Hit henendawi obak ugun dugwit, yagalagwi? <sup>18</sup> Hit hinil werek ovara, hegetek dugwit, yagalagwi? Henaruk werek ovara, henaruk hunggitek dugwit, yagalagwi? Roti 5 vaga ap akwa 5000 homago ako ugurogo wogeragagis nogo, henendawi henunggut akluk, yagalagwi? Roti ugurik higiurogo bagagwa ako, wonggalogo mburin yum maren yedogo bagagup?

Yugirigya lagagimu, it ako, "Dek o. Mburin yum 12 hudi yedogo bagagup."

<sup>20</sup> Yugu lagagwama, "Hivis andi, it ap akwa 4,000 homago ako roti 7 ugurogo wokirigya lagagimu,

ugurik higiurogo bagao ako, hiren mburin yum maren yedogo bagep?

Yugirigya lagagimu, it ako en, "Yum 7 at bagyo."

<sup>21</sup> Yugugu lagagwama, Aren yugirigya dugwit, "Yogak ogo hit henendawi An ao dibanenggetek agipik?" yiluk, yugeragagi.

**Yesus en ap il muk sek ogagagi wene**

<sup>22</sup> Hivis, andi okbaluk, it ako o Besaida andoma wagagwa. Wagu lagagwama, it ap akwa andoma en ap il muk werekma At adema wolok wagu lagagwarik, At Yesus en at eyave inggis vagarupwak yiluk, enabwa edok erogo Yesus yugogogwa.

<sup>23</sup> Yugugu lagagwama, At Yesus ako en o kampung andoma en inggis vagakluk wolok, werama winggigi. Wunggu lagagirik, Yesus ako waris ap il vaga suvut-bagya, eyave inggis vakbagya, okbagya lagagirik, "Yogak yi menda ndi menda vage hil hegen a dek a?"

<sup>24</sup> yiluk, yugugu lagagimu, at il venggenlagya dugwit, "Ap akwa inisialiga ovara, yovagak nagu-siliga o," yiluk yagagi.

<sup>25</sup> Iri lagagimu, At inggis il vaga lombabagya lagagimu, ap ako il yokigya dugwit, avyarat il venggenligya lagagirik, yi menda ndi menda ovok erogo selekma il hagagi. <sup>26</sup> Il sek okbagya lagagirik, "O kampung andoma nunggubuk, hamwa elak," yiluk, yugogogi.

**Peterus en "Hat Keretus aro," vagalogo yugogogi wene**

(Matius 16:13-20; Lukas 9:18-21)

<sup>27</sup> Yesus At ane welagwi menda inim o andoma en o Kaisareya-Pilipi o desa-desa kampung-kampung andoma nagu lagagwa. Suvaga lagu dugwit, Aren "It ap akwa yi An sa numbutu dugwit, yagalagwi?" yiluk, At ane welagwi menda ako yugirigya lagagimu, <sup>28</sup> irenen yugu dugwit, "It nin en, Hat Yaya ap akwa ima wombabugu lagagi ako at yugwi, eke it nin en, Hat Eliya o endak erogo welagagi ako yugwi, eke, it nin en, ap ambi Ala wene yugurugu lagagwa menda navi-navi ako at, yugwi, yagalagwi o," yugogogwa.

<sup>29</sup> Yugugu lagagwama, Aren it yugirigya dugwit, "Hiren, An sa numbutu dugwit, yagalagwi?"

Yugirigya lagagimu, at Peterus en, "Dek. Ala en ap akwa enagap wendarumwak yiluk enogo lakba wagagi Keretus ako andi, Hat at," yiluk, yugogogi.

<sup>30</sup> Yugugu lagagimu, "An navok andi ap akwa enadema mondok yugerabuk!" yiluk, enaruk watigi.

**Yesus "Narusogon o," yugeragagi wene**

(Matius 16:21-28; Lukas 9:22-27)

<sup>31</sup> Enaruk watya lagagirik, wene yugirigya dugwit, "An ap at endaklagagis ako, mondok nova anggim-banggin erogo banusogon. It ap ombok-ombok inim, it imam-imam enasini inim, it guru agama inim, An it enanggon numbutu dugwit natu dogomwima, hambi-

gya dogomindik ndugwis mberen dukluk ndugwis ambi vaga niluk arisogon o," yiluk, <sup>32</sup> wene sigam erogo yugeragagi. Sigam erogo yugirigya lagagimu, at Peterus en Yesus inggis lirogo wolok lagya lagagirik, yugugu dugwit "Anderogo yubuk," iri hegek <sup>33</sup> At Yesus en At ane welagwi menda ako il ambutmu dagalogo yogenugu lagagirik, Peterus mbet yugugu dugwit, "Hat Sile yi, Ala endawi ombasiga ako ndatak ombasigadek, ovara, ap akwa enendawi ombasagwi ndatak ombasigama, mondok-mondok wilin," yiluk, mbet yugogogi.

<sup>34</sup> Mbet yugugu lagagimu, it ap akwa homago ako inim, At ane welagwi menda ako inim, eneyanggup yugeragagi, ako, wagu lagagwama yugirigya dugwit, "Hit An ninim nagu dogop umbutu dugwit halok, yi menda ndi menda ogarup ombasagwi ako hetbisilik, agyo winik lombalek ako hedelok, An ninim at nagu dogosogon. <sup>35</sup> Heneyave idi okedasogon halok, heneyave yelemele yusogon. An ninis inim sek wene inim, ombok arupwak yiluk, heneyave idi dek okbetamwi halok, hinidi erek dogosogon. <sup>36</sup> Hit yi menda ndi menda ovok erogo hedugu dogomundik, heneyave yelemele yusogon halok, nggayoklarup embetep? <sup>37</sup> Heneyave yelemele yusogon halok, aveloma nano betaup ombasagwi? <sup>38</sup> It ap akwa ovok erogo Ala mbo baluk, weyak adigat ogarit lendagwi ako enanggelekma dugwit, ap ambi sa en An ninis An nane inim, alon en yegetek dogosogon halok, An ap at endaklagagis yi An Nasin iris ovagangge yikedelok it malaikat mbogot vaga Ala ayonggo lakbisa wendagwi menda ako inim, wagu dugwit, An ap ako inis yisogonbuk o."

<sup>9</sup> Yugirigya lagagirik, "Dibas! Hit ap akwa yoma agipik ako, nin ao hambegetek hinigik At Ala anye iya atma, ap akwa At avema bisa wagya ako hinil hasogon o," yiluk, yugeragagi.

#### At Yesus ndom vaga en elose adik agagi wene

(Matius 17:1-13; Lukas 9:28-36)

<sup>2</sup> Nogo enam yikbaluk, At Yesus en it Peterus o, Yakobus Yaya inim, wogenombolok ndom adup vaga unggu lagagwarik, it enadik andoma werekma, inil vaga At elose adik agagi. <sup>3</sup> Eloase adik agya lagagirik, asum mudu amumulip digavok ovagak ogagagi. It yum mudu amumulip arupwak yiluk, hurisagwi ako hak andi dek o. Mondok mudu amumulip agya lagagimu, <sup>4</sup> at Eliya o, Musa o, Yesus inim avuk agu lagagwarik, wene mbanggwis inogogwa.

<sup>5</sup> Wene mbanggwis inugu lagagwarik, at Peterus ako en Yesus yugugu dugwit, "Nasin Guru wai! Nit yoma agurik yi sek atma, eravo henggam ambi Hat, ambi Musa, ambi Eliya at valogo bigigasogon," yugogogi.

<sup>6</sup> At ako, "Wii," yiluk, enalon iya agya lagagimu, endawi apik agya dugwit nggarogo yubuk halok, anderogo yagagi.

<sup>7</sup> Yugugu lagagimu, hena hwilak inipu lagagirik, hena anggelekma akoma en ane iri dugwit, "An Nabut nendawi hunik yi atma, At ane henaruk hunggu dogwes o," yiluk, iri hagagwa. <sup>8</sup> Iri lagagimu, inil bigya baga erogo bikugu lagagwama, it mberen ako dek Yesus adigat inil hagagwa.

<sup>9</sup> Ndom vaga akoma en wambu wagu dugwit, At Yesus en, "An ap at endaklagagis yi, hambuluk lendagwima akoma en ao iluk akluk mendok yegetek neyagek, ogagya hinil neyagep ako, ap akwa mondok yugerabuk." <sup>10</sup> Yugirigya lagagimu ogagya hagagwa ako ap akwa yugeregetek ovara, enadik dugwit, "An hambuluk lendagwima en niluk akluk mendok yisogon o' yiluk, yukneraga ako, nggarogo yiluk yagas embetep?" yiluk, wene mbanggu lagagwarik, <sup>11</sup> Yesus yugugu dugwit, "It guru agama en, 'Mesias ako ao wagatek hegek, Navi Eliya endak mbogot vaga en warisogon o', yagalagwi ako, nggarogo yiluk warisogon yagalagwi?" yiluk, Yesus aigwakma wogogwa.

<sup>12</sup> Yesus en yugirigya dugwit, "Navi Eliya endak warisogon yagalagwi andi, yi ogagwi ndi ogagwi nggeraligiluk warisogon ovara, An ap at endaklagagis ako novaga anggin-mbanggin erogo banunggwii, weyak-weyak erogo banunggwii, ogarup dirup watugwa ako andi, nggarogo yiluk watugwa embetep?" <sup>13</sup> Iri lagagirik, "At navi Eliya vage wagagi. Ninim hegek navi-navi o endak dirup watugwa ako ndatak ap akwa en it enendawi umbutu dugwit at weyak okbalin nagu lagagwa, An yukheraliga o," yugeragagi.

#### Madis avyak endawima werekma wibagagi wene

(Matius 17:14-21; Lukas 9:37-43a)

<sup>14</sup> Wene anderogo at yugeregek wambu wagusim, At ane welagwi menda nin bisilik lagagwa ako inim, it guru agama inim, ap akwa iya erogo homago inigik, winimuk yugwi inil inogogwa. <sup>15</sup> Inil inugu lagagwama, it ap akwa ako, Yesus At wagya heyakbagu lagagwarik, "Wii," yiluk enendawi adenggen umbutu dugwit, vupuk At adema "Wa" yugiri lagu lagagwama, <sup>16</sup> Yesus en "Hit ap yi hinim nano avok yagalagwi?" yiluk, yugeragagi.

<sup>17</sup> Yugirigya lagagimu, ap akwa iya erogo homago welagagwa ako, ap ambi en At yugugu dugwit, "Nasin Guru wai! An nabut madis endawima nunggwigya lagagirik, ane dek ogagagirikmu, Hat hadema wolok wagi o. <sup>18</sup> Madis endawima dugwit, eyave yagavet-yagavek ogagya, elagapma olan hauk-hauk iris, aik hambunggu ogagya dugwit, endawi anyedek agya dugwit, eyave habop ogagya, anderogo ogagya halok, Hat hane welagwi menda ako madis nggigilogo wibapwak yiluk, yugirigi ovara, iren wibaup meyan inigis o," yugogogi.

<sup>19</sup> Yugugu lagagimu, At Yesus en, "Hit ap akwa yogak avyarat nembetetek agipikma, avyak! An hit hinim ndugwis maren dogop, eke An ndugwis maren hit hin-



im nendawi sagain erogo dogop?" yiluk, yugirigya lagagirik, "Avyak andi, wolok omanes," yugeragagi.

<sup>20</sup> Yugirigya lagagimu, avyak ako At adema wolok wagu lagagwama, madis at endawima agarik ako en, Yesus il higya lagagirik, avyak ako inggis isok irup-wadok ogagya dugwit, legogo wen vaga wombabagya lagagirik, ena enden-vanden ogagya dugwit, elagapma olan hauk-hauk yagagi.

<sup>21</sup> Anderogo ogagyaim, At Yesus en avyak asin ako yugugu dugwit, "Hat habut yi o mera hudi yerogo ogagya lagagi?" yiluk, yugugu lagagimu, asin ako en, "At madukma en, itok arerogo ogasiga. <sup>22</sup> Madis ako ovaga agya dugwit, ndugwis ambi vaga hali hunikmu mabagya, ndugwis ambi vaga ima mabagya, ogasigama, Hat yi ogagek ndi ogagek ogasiga menda halok, nenabwa imbitiya dugwit, okbininin o."

<sup>23</sup> Yugugu lagagimu, At Yesus ako en, "Hat nggarogo yiluk 'Hat yi ogagek ndi ogagek ogasiga menda halok' yuknigin? Avyarat umbutwi vaga yi menda ndi menda hogop ombasagwi ako andi atma asiga," yugogogi.

<sup>24</sup> Yugugu lagagimu, avyak asin ako en ane ombok vaga yugugu dugwit, "Avyarat imbiti ovara, nendawima en ambi im avyarat ombarigiluk okbanin o," yiluk, yugogogi.

<sup>25</sup> Yugugu lagagimu, andena en ap akwa wisane vupuk wagwi ako il inugu lagagirik, Yesus en madis ako mbet yugugu dugwit, "Madis enaruk nggulup enane dek oginivisiga menda yi wilitak! O baluk wilimi andi heyami vaga mondok nunggu warubuk!" <sup>26</sup> yiluk, mbet yugugu lagagimu, madis ako na iri lagagirik, avyak ako inggis isok irup-wadok ogagya lagagirik, winggigi. Wunggu hegek, avyak ako nggorak ovagak werekma, it ap akwa wisane akoma en yugu dugwit "Wii! Avyak yi nogo hombagas," yagagwa ovara, <sup>27</sup> At Yesus en inggis vagago lekbagya lagagimu avyak ako mondok yagagi.

<sup>28</sup> Mondok iri lagagimu, At Yesus umwa nonggagagirik werekma, At ane welagwi menda wagu lagagwarik, enadik dugwit, "Nit nggarogo yiluk madis nggigilogo wibaup dek welagyo, embeten?" <sup>29</sup> Yugugu lagagwama, At Yesus en yugirigya dugwit, "Madis anderogo menda andi nano vaga wibaup erek ovara, samban ogagu dugwit halok, ndak wibaup," yugeragagi.

#### Yesus ambi inim "Narusogon o," yugeragagi wene

(Matius 17:22-23; Lukas 9:43b-45)

<sup>30</sup> O andoma en hetbaluk, sup Galileanggan nonggagagwa. Nunggugu lagagwarik, At ane welagwi menda ako mamulirigya dugwit, "An ap at endaklagagis yi, Ala endawi imbitigirikmu neyave vagago ap akwa ininggimu agya neyalok, natu dogomundik, ndugwis henggam vaga niluk arisogon o," yiluk, wene andi mamulirigyaim atma, At Galilea nonggagagi ako ap akwa inilup arup anggon imbitigi.

<sup>32</sup> Yugeragagi ako dibagatek dugwit At aigwakma waup enalon en mbup yagagwa.

#### "Ap ombok dogop andi sa," yagagwa wene

(Matius 18:1-5; Lukas 9:46-48)

<sup>33</sup> O andoma en o Kapernaum lagagwa. Lagu lagagwarik, umwa dugwit, At Yesus en it yugirigya dugwit, "Hit suvaga wagu dugwit, nano wene yagan wagu hinigis?" yugirigya lagagimu, <sup>34</sup> it suvaga wagu dugwit, "An iya, hat iya?" yagan wagagwarikmu, enane dek mbup yagagwa. <sup>35</sup> Mbup yugu lagagwama, At ako hora yiluk, At aburi 12 menda ako yanggup yugeragagi. Wagu lagagwama, yugirigya dugwit, "Ap ambi sa en 'an ap ombok dogosogon o', imbitiya halok, ap akwa ovok enavema dugwit, enayeloman at dogop." <sup>36</sup> Yugirigya lagagirik, avyak ambi wolok it enanggelekma ba wakluk, elola okbagya lagagirik, it yugirigya dugwit, <sup>37</sup> "At avyak yi hak, An ninis vaga wugu hiniselok, An at woknerasogon. An nadik woknerasogon dek ovara, An lakbani wagagi ako inim at welagwi o," yiluk, yugeragagi.

#### Ap ambi Yesus inis vaga madis wibagagi wene

(Lukas 9:49-50)

<sup>38</sup> Yugirigya lagagimu, at Yaya en iri dugwit, "Nasin Guru wai. Ap ambi nit ninim nagu lagatek ovara, aren Hat hinis vaga madis nggigilogo wibagya ninil hugu lagurik, 'Moga' yugugup," yugogogi. <sup>39</sup> Yugugu lagagimu, At Yesus ako en, "'Moga' yugurubuk. An ninis vaga ogarubuk menda ogagu dugwit halok, andi okbaluk, weyak okbanusogonbuk. <sup>40</sup> It ninim ogorekdek halok andi, nit menda aro. <sup>41</sup> It ap akwa en, Keretus aburi at yiluk, is nudik wokerugu-selok andi, avyarat ongo andi hedasogon, avyarat yukhirigi o," yiluk, yugeragagi.

#### Weyak wene enendawima asiga wene

(Matius 18:6-9; Lukas 17:1-2)

<sup>42</sup> Yugirigya lagagirik, "It ap akwa sa en avyak mariduk ambi endawi novaga vanggabuluk avyarat nombasagwi menda yi, weyak ogarumwak yiluk enendawi nomalogo yugerelagwi vaga, it avyak ako weyak ogagu-selok, ap ako avup vaga helep ombok yidibaluk is namut agurutmu wombabiselap en andi sek o.

<sup>43</sup> Hininggis vaga en weyak ogarup okinipu halok, venak mbalogo lakbas. Hininggis mberen hegek, hali munukmu nagaup yagaligadekma akoma nunggu andi weyak. Eke, mbalogo lakbaluk, venak mbalek hegek mondok iniluk agarwikmu andoma nunggu halok, sek o. <sup>45</sup> Hinisok vaga en weyak ogarup okinipu halok, venak mbalogo lakbas. Hinisok mberen hegek, hali munukmu akoma mbo lakbigigaup andi weyak. Eke, mbalogo lakbaluk, venak mbalek sidakduk yagan mondok iniluk agarwikmu akoma nunggu halok, sek. <sup>47</sup> Hinil vaga en weyak ogarup okinipu halok, venak

hulirogo bas. Hinil mberen hegek, hali munukmu mbo lakbigigaup andi weyak. Eke, hinil ambi hurilogo ok-baluk, venak vaga adigat Ala avema nunggup halok andi sek o. <sup>48</sup> O hali munukmu akoma 'nggot enggen logovik-logovek adigat yagaligama, hali nagaup yagaligadekma', † lakbisaup dek o."

<sup>49</sup> "Ikan vidis arugwi en yiluk, garam ilivuli erogo be-lagwi ako hak, anderogo at Ala en hali vaga walok hinisayogon o."

<sup>50</sup> Garam sek ovara, edup dek agya halok, nggarogonggan en edup werek ogarup? Garam edup werek henendawima dugwit, hinim henendawi dambulik at dogwes o," yiluk, yugeragagi.

### Ap hwa hetbiselagwi wene

(Matius 19:1-12; Lukas 16:18)

**10** Yugirigya lagagirik, o andoma hekbaluk, sup o Yudeya vaga en is Yoredan mbalogo elavikit lagagi. Lagya lagagirik, ap akwa iya erogo At adema homari wagagwarikmu, At wene mamuleraliga ako wane-wane, mamuleraagagi.

<sup>2</sup> Mamulirigyaim, it ap Parisi menda ako At adema wagu lagagwarik, avut mbaluguluk yugugu dugwit, "Ap ambi ogwa wogoma nanggon o, yiluk, hetbaup andi sek embeten?"

<sup>3</sup> Yugugu lagagwama, At Yesus en iri dugwit, "Musa en wene nggarogo yukheragagi?" yugeragagi.

<sup>4</sup> Yugirigya lagagimu, it ako en yugugu dugwit, "At Musa en, 'Surat watbaluk hwa andi hetbisaup sek o', †† yiluk, yagagi o."

<sup>5</sup> Yugugu lagagwama, At Yesus en, "Henendawi lakot hiniselok, wene andi dirup warogo yukheragagi ovara,

<sup>6</sup> 'At Ala en o endak yi menda ndi menda ogagya dugwit, ap ogagya, hwa ogagya', ‡ ogagagirikmu, <sup>7</sup> andi halok

'Ap en asin-isa hetbisilik ogwa inim dambulakluk,

<sup>8</sup> it eneyave mberen ovara ambiat arisogon o', ††

Ala wene warek atma, it eneyave mberen dek, ambiat dogosogon. <sup>9</sup> Andi halok, At Ala en mondok mondok hondabigirikmu, ap akwa en werologo bisaup andi, mondok dek o," yugeragagi.

<sup>10</sup> Yugirigya lagagirik, umwa nungwigya lagagimu, At ane welagwi menda ako en wene yugeragagi ako, ambi inim hemetugwa. <sup>11</sup> Hemetu lagagwama, Yesus en yugirigya dugwit, "Ap en ogwa hetbaluk, hwa adik ambi hedigya halok, ap en hwa endak ako alyak waliga. <sup>12</sup> Eke, hwa en agun hetbaluk ap adik ambi hedigya halok andi, hwa en agun endak ako alyak waliga," yugeragagi.

### Yesus en avyak mariduk adenggen enovaga bogogi wene

(Matius 19:13-15; Lukas 18:15-17)

<sup>13</sup> Yugirigya lagagimu, avyak mariduk At adenggen enovaga bisapwak yiluk At adema woginiviluk wagu lagagwama, At ane welagwi menda en ap akwa ako mbet yugeragagwa. <sup>14</sup> Mbet yugerugu lagagwama, At Yesus en aninis wisane agya lagagirik, "Hit nggarogo yiluk yagalagwi! Hekbisines! Ala avema dogop andi, it avyak mariduk yi hakma, An nadema wagusim moga yugerabuk. <sup>15</sup> Dibas! It avyak mariduk Ala avema dogopwak yiluk nunggwisagwi anderogo hak, hit anderogo nunggegetek hiniselok andi, nunggusogon dek o," yiluk, yugeragagi. <sup>16</sup> Anderogo yiluk yugirigya lagagirik, avyak mariduk ako elola okbugu lagagirik, inggis vagupu dugwit, adenggen enovaga bogogi.

### Ap inggis werek wene

(Matius 19:16-30; Lukas 18:18-30)

<sup>17</sup> Enovaga bugu lagagirik, sup ambi inim lagiluk ogagya lagagimu, ap ambi At adema vupuk wagya lagagirik, erambo yunggubaluk Yesus yugugu dugwit, "Guru. Hat sek adigat agindik yi, an niluk mondok mondok dogop menda andi nggarogo ogarik?" yiluk, yugogogi.

<sup>18</sup> Yugugu lagagimu, At Yesus ako en, "Nano yiluk An sek adigat agirik yiluk yuknigin? Ap ambi sek adigat agarik andi dek, Ala adigat sek agarik," yugugu lagagirik, <sup>19</sup> "At Ala en wene yagagi ako hat ovok hilup.

'Ap warup moga.

Ap ogwa werek hegek, hwa agun werek hegek, ogarup moga.

Ap enangge enonggop waup moga.

Henane huluk ap enovaga bisaup andi moga.

Ap enangge nomalup moga.

Henasin-hinisa enane henaruk hunggu dogwes o', ††

<sup>20</sup> Yugugu lagagimu, at ako en, "Dek o, Nasin Guru. Wene andi an madukma en des erogo ogagya lagagis," yiluk, yugogogi.

<sup>21</sup> Yugugu lagagimu, At Yesus il vu erogo yokigya lagagirik, abwa imbitya dugwit, "Wene ambiat andi ao ogagetek heyagi. Hat hangge-hangge ongo hunogo it ap enangge dek menda ako wogerelak. Wogirigya heyalok, hat hangge eyave andi havis mbogot vaga en ombok at hedayogon. Andi okbagya dogomindik, ninim nagu dogoguluk, omano," <sup>22</sup> yugogogi menda, angge iya erogo werekma, endawi "Ai" imbitya lagagirik, endawi burup yagan lagagi.

<sup>23</sup> Lagya hegek, At Yesus ako ilambutmu dagalogo, At ane welagwi menda ako yoginipu dugwit, "It ap inggis werek menda ako, At Ala avema dogop andi nggarogo nunggup erek highi o," yugeragagi.

† Yesaya 66:24 †† Ulangan 24:1 ‡ Kejadian 1:27; 5:2 †† Kejadian 2:24

‡‡ Keluaran 20:12-16; Ulangan 5:16-20

<sup>24</sup> Yugirigya lagagimu At ane welagwi menda ako en vok yugu lagagwama, At Yesus en yugirigya dugwit, "Naburi. At Ala avema dogop andi nggarogo nunggup erek higi o." <sup>25</sup> Yugirigya lagagirik, "Wam ombok unta dirup yarum elo maduk andi ndak nunggup ovara, ap ininggis werek halok ako andi, Ala avema dogop, nggarogo nunggup erek higi," yugeragagi.

<sup>26</sup> Yesus ane yagagi ako enaruk hunggu lagagwarik, vok yugu dugwit, "Andi halok, ap sa maren enagap wendarup embeten?" yiluk, yugogogwa.

<sup>27</sup> Yugugu lagagwama, At Yesus ako en il yoginugu dugwit, "It ap akwa ogarup dek ovara, Ala andi yi menda ndi menda ogarup sek adigat agarik."

<sup>28</sup> Yugirigya lagagimu, at Peterus en iri dugwit, "Haruk hulu! Nita, yi menda ndi menda ovok erogo hetbaluk, wagyo, Hat hinim nagu dogoguluk," yiluk, yugogogi.

<sup>29</sup> Yugugu lagagimu, At Yesus en, "An wene avyarat ambi yukherayogon o. An nabwa en sek wene ako ombok arupwak yiluk, henawi valek inim, henowa-henaot inim, henasin-hinisa inim, henaburi inim, heneyavup yago inim, ovok at hetbisiluk wagu hiniselok, <sup>30</sup> yogak aveloma henawi valek inim, henowai-henarwi inim, hinisai inim, heneyavup ogarek inim, 100 hudi hedasogon, anderogo ovara, ap akwa en anggin henovaga bigigasogon, okbigigamima havis andi hiniluk mondok menda hedasogon o," <sup>31</sup> yugirigya lagagirik, "Ap iyarogo enendak lendagwi ako andi, havis arusogon. Eke, havis lendagwi ako andi, enendak arusogon o," yiluk, yugeragagi.

**Yesus ambi inim "An narusogon o," yugeragagi wene**  
(Matius 20:17-19; Lukas 18:31-34)

<sup>32</sup> Yesus At ane welagwi menda ako inim o Yerusalem suvaga lagu dugwit, At Yesus endak lagyaim, it At eyaganggom ako enendawi anggin agya, it ap akwa nin enambetaga lagagwa ako enalon agya, agya lagagimu At Yesus en it ap 12 ako sup alilimu wogenombolok laga lagagirik, At havis nano arup wene ako at yugeragagi. <sup>33</sup> Yugirigya dugwit, "Avyak. Nit ako vage Yerusalem dagasagwi atma, An ap at endaklagagis ako, it ap imam-imam enasini inim, it guru agama inim ininggimu asogon, ininggimu agya neyalok, wene mbabaluk, narupwak yiluk, it ap weram menda An wogerasogon. <sup>34</sup> Wogurugu dogomwima nanggadi watbanunggi, enowaris novaga suvurogo banunggi, nabirok natwis, okbaniluk, mondok narusogon. Natu dogomwima, ndugwis henggam vaga, niluk arisogon o," yiluk, yugeragagi.

**Yakobus Yaya mbet yugeragagwa wene**  
(Matius 20:20-28)

<sup>35</sup> Yugirigya lagagimu, at Sebedeyus aburi, Yakobus Yaya it mberen At Yesus adema wagu lagagwarik, "Guru wai. Nit nenendawi hobaluk, yukurusogon andi okbininanok yiluk, wagyo," yiluk yugogogwa.

<sup>36</sup> Yugugu lagagwama, At Yesus en, "An nggarogo okbigigaigiluk wagep o?" <sup>37</sup> Yugirigya lagagimu, it ako en "Hat havis hiris hovagangge yikedelok wagya heyalok, nit Hat hinggis venak-venak vaga hora okbininanok yiluk, yukhiri wagyo," yiluk, yugogogwa. †

<sup>38</sup> Yugugu lagagwama, At Yesus en, "Hit yuknisagwi andi, henunggut dugwit yuknisagwima, An nagas nudik nayogon andi, hit hinim naup sek embetep? An anggin-mbanggin okbanusogon ako andi, hit hinim okbigigaup sek embetep?"

<sup>39</sup> Yugirigya lagagimu it ako en, "E o. Ninim naup andi sek aro," yugugu lagagwama At Yesus en iri dugwit, "An nagas nudik naup hit ninim naup at. Eke, An anggin-mbanggin okbanusogon andi, hit hinim okbigigaup ovara, <sup>40</sup> ninggis venak-venak bigigaup ako andi, Anen yukherayogonbuk. An ninggis venak-venak hora okbisaup ako andi At Ala en yukheragwi," yiluk, yugeragagi.

<sup>41</sup> Yugirigya lagagimu it eneve 10 ako enaruk hunggu lagagwarik, it Yakobus Yaya mbet yugeragagwa.

<sup>42</sup> Mbet yugeragagwa ovara, At Yesus en it ovok erogo yanggup yugeragagi, wagu lagagwama, yugirigya dugwit, "Hit hinilup, it ap weram menda enasini ako ap akwa sovabiselagwi, eke ap ombok ombok enavema akoma enane avuput vaga yugerelagwi, <sup>43</sup> ovara, hit andi anderogo ogarup moga. An ap at endaklagagis yi hiren An nake ogagu dogovovok en yiluk, wagatek. Anen henake ogagya dugwit, hit ap akwa ovok erogo heda visilogo bigigagiluk, neyave henonggo ba waga-girikmu, hit ap yi ambi ombok arup ombasagwi halok, enayeloman at arupwak o. Hit yi ambi en, 'An nadik ombok dogosogon o', imbitya halok, hit ovok henayeloman dogopwak o," yiluk, yugeragagi.

**Yesus en Batimeyus il sek ogagagi wene**  
(Matius 20:29-34; Lukas 18:35-43)

<sup>46</sup> It ako o kota Yeriko ari lagagwa. Havis, Yesus At eyaganggom inim, ap akwa wisane inim, o andoma en wunggusim ap ambi il muk ambengginog yagaliga menda suvaga horaik welagagi. Ap ako inis Batimeyus, at asin inis andi Timeyus. <sup>47</sup> At Yesus Nasaret menda wagya, aruk hunggu lagagirik, "Yesus wai. Daut ombao wagen yi, an nabwa nombaru," yiluk, ane ombok erogo yugogogi.

<sup>48</sup> Yugugu lagagimu, it ap akwa en "Mbup iru," yiluk mbet yugu lagagwama, aren iri dugwit, "Daut ombao wai. Nabwa nombaru o," yiluk, ane ombok vaga ambi inim yugigik adigat ogagya lagagimu, <sup>49</sup> At Yesus ako mbup iri dugwit, "Eyanggup eres," iri lagagimu, iren ap il muk ako eyanggup yugugu dugwit, "Heyanggup yukisigama, halon dek, mondok iru," yiluk, yugogogwa.

† It Yakobus Yaya ako 'Nit ap ombok dogop' hogop umbutugwa. It Yesus venak-venak hora yilpmu en, ap akwa ovok erogo Yakobus Yaya enavema duklip.

<sup>50</sup> Yugugu lagagwama, asum sogwes-yum menda nggolalogo hetbaluk, yiluk-wuluk mondok iri lagagirik, Yesus adema lagagi.

<sup>51</sup> At adema lagya lagagimu, At Yesus en, "An hat nggarogo okbanupwak yiluk, embeten?" Yugugu lagagimu, at il muk ako en, "Nasin guru, nil sek okbaninok yiluk, yigi," yiluk <sup>52</sup> yugugu lagagimu, At Yesus en, "Hat hendawi avyarat nembeten ako vaga, hil sek agindikmu, hamwa elak."

Yugugu lagagimu, il muk welagagi ako sek agya lagagirik, At Yesus inim suvaga lagagwa.

### Yesus o Yerusalem nonggagagi wene

(Matius 21:1-11; Lukas 19:28-40; Yaya 12:12-19)

**11** At Yesus inim lagagwa ako o Yerusalem horok ari lagu dugwit nungguguluk o Betepage inim, Betaniya inim, ndom Saitun andi avema ari lagagwarik, andoma en At ane welagwi menda mberen lakbugu dugwit <sup>2</sup> "O valekma akilisim ari lamwira, wam keledai eyak ap ao ovaga hora yegetek menda ambi hugu dogomundik, yunggwi yidugup akom veralogo wolok omano. <sup>3</sup> Eke it ap akwa andoma en, 'Hit nggarogo yiluk wam keledai veralisagwi', yukuruguselok, hiren 'Nit nenowa wam keledai dekma, welales o, yukneragamu, wolok lagu dogomundik, aveloma ba warusogon', yiluk, yugerano," yiluk, yugeragagi.

<sup>4</sup> Yugirigya lagagimu, it ako lagu lagagwarik, wam keledai eyak o mbanggutmu sup alilimu yunggwi yidugup inil hugu lagagwarik, veranggu lagagwama <sup>5</sup> it ap andenam un mendek werékma, "Hit wam keledai eyak nggayok ogaruguluk veralisagwi?" yugeragwa.

<sup>6</sup> Yugu lagagwama, it ako en At Yesus en anderogo yugerano yugeragagi ako at yugurugu lagagwama, iren "E o," yiluk yugu lagagwama, wolok lagagwa.

<sup>7</sup> Wam keledai ako wolok Yesus adema lagu lagagwarik, it ako enasum nggolalogo wam keledai ambot vaga ndabagu lagagwama, Yesus ako andi vaga hora yagagi. <sup>8</sup> Hora iri lagagimu, it ap akwa iya erogo enasum mbigalogo sup ombok vaga ndalit lagwi, it nin en yo angga yavup wadimu en mbalogo ndalit lagwi, okbaluk, <sup>9</sup> At ako lagya hegek, it nin enendak lagwi, nin ambetaga lagwi, ogarit lagu dugwit,

"Hosana!" †

"Nenasin inis ombok en, At lakba wandiga yi, inis siyabasogon o!" ††

<sup>10</sup> "Nenombao Daut avema sek welagagup ako wane-wane At avema bininagiluk wandigama, inis siyabasogon o."

"Ala o mbogot vaga agarik ako, wa, wa, hosana," yiluk, amikmit yagan lagagwa.

<sup>11</sup> Amikmit yagan o Yerusalem nunggu lagagwarik, o Ala awi valekma nonggagagwa. Nunggugu lagagwarik, At Yesus ako yi menda ndi menda yenaga

wegek nagu hegek, o hup agya halok it ap 12 menda ako inim, eneyami vaga o Betaniya lagagwa.

### Yesus en yo ara vudilogo bagagi wene

(Matius 21:18-19)

<sup>12</sup> Nogo yikbaluk hutun o Betaniya en suvaga lagu dugwit, Yesus erom uvup ogagagi. <sup>13</sup> Ogagya lagagimu, andenam en yo ara † ambi angga savulik il higya lagagirik, yo ako enggen yugup a, dek a, yiluk adema At lagya lagagirik, enggen yup yiligama ao ari wagatek atma, angga adigat hagagi. <sup>14</sup> Angga adigat halok, yo eyave ako yugugu dugwit, "Yogak yi hudi en, hat henggen ap akwa ambi nunggu dogosogon mondok dek o," yugugu At ane welagwi menda ako, enaruk hunggugwa.

### Yesus en Ala awi valekma nggabunggi wene

(Matius 21:12-17; Lukas 19:45-48; Yaya 2:13-22)

<sup>15</sup> At Yesus ane welagwi menda inim o Yerusalem ari lagu lagagwarik, Ala awi valekma nunggwigya lagagirik, it Ala awi valekma yi menda ndi menda onggohunggik yagalagwi menda akoma, silogo wibugu dugwit, it yoparip onggohunggohunggu ogagu lagagwa menda ako, yo ndalek inim, it swa suwa onggohunggu lagagwa menda, yo hora yugu lagagwa menda inim, avut enden-vanden erogo mbombo hagagi. <sup>16</sup> Mbombo higya lagagirik, "Hit Ala awi valekma yi, yi menda ndi menda wolok nunggugwi, wunggwis ogarubuk o," yugeragagi. <sup>17</sup> Yugirigya lagagirik, wene mamulirigya dugwit,

"An nawi valek yi, yi ap ndi ap ininis unggul adik-adik menda en 'Samban ogasagwima yi at' yugu dogosogon o," ††

yiluk dirup warek ako dek embetep? Dirup warek ovara, hit andi, 'o yi ap enonggop wokbaluk, hwilaklari lendagwima ovagak' †† ogagep o," yiluk, yugeragagi.

<sup>18</sup> Yugirigya lagagimu, it ap akwa ovok homago ako Yesus wene mamulirigya ako vok yugu-selok, it imam-imam enasini inim, it guru agama inim, Yesus yagagi ako enaruk hunggu lagagwarik, enalon agya dugwit, "Nggarogo heda okbaluk warup embetep," yiluk, avok mbanggugwa.

<sup>19</sup> Andenam en, o howam agya halok, Yesus At ane welagwi menda inim, o Yerusalem en wunggugwa.

### Yo ara mbuk agagi wene

(Matius 21:20-22)

<sup>20</sup> Wunggu lagagwarik, nogo yiluk, hutun suvaga lagu dugwit, yo ara ako omanggen inim eyave inim ovok erogo mbuk agagi inil hagagwa. <sup>21</sup> Inil hugu lagagwarik, Peterus en yo yugugu hagagi ako, endawi wenggeligya dugwit, "Nasin Guru wai. Yo ara vudilogo bagen ako ovok mbuk aga yi, hil yokanen."

† b: Nit nenane vaga andi "Wa, wa!" yiluk yugu lagagwa. †† c: Mazmur 118:25-26

‡ Yo ara andi yo widis wanewane ovara enggen ai weyak. †† a: Yesaya 56:7 †† b: Yeremia 7:11

<sup>22</sup> Yugugu lagagimu, At Yesus en iri dugwit, "Henendawi Ala ovaga vanggaluk, avyarat umbutu dogwes o. <sup>23</sup> Henendawi yunggup yegetek, henane yugwi, ndatak arisogon umbutu dugwit, 'Ndom ombok yi legogo is namutmu nunggwilak' yugu hiniselok, andero-go at okligya hasogon o, yiluk, avyarat yukhirigi o. <sup>24</sup> Andi halok, hit samban ogagu dugwit, yi menda ndi menda Ala nggino yugugu dugwit, vage hedigi o, yiluk, avyarat ombasagwi andi vaga wokirigya hasogon o. <sup>25</sup> Hit mendek yiluk, samban ogagu dugwit ap ambi inim ogorek agipik halok, henasin mbogot vaga agarik ako en, hit weyak menda dek erogo bigigapwak yiluk, at inim ogorek agipik ako weyak menda andi hiren henunggut akluk dogwes o," yiluk, yugeragagi.

### Sa inis vaga ogasiga? yugogogwa wene

(Matius 21:23-27; Lukas 20:1-8)

<sup>27</sup> Andi en, o Yerusalem nunggu lagagwarik, At Yesus ako Ala awi valekma nunggwigya lagagirik, naguim, it imam-imam enasini inim, guru agama inim, it ap ombok-ombok inim, At adema wagu lagagwarik, <sup>28</sup> "Hat yi ogagek ndi ogagek ogasiga ako sa inis vaga ogasiga? Sa en yukigamu ogasiga?" yiluk, yugogogwa.

<sup>29</sup> Yugugu lagagwama, At Yesus en iri dugwit, "Anen ambi hemekinisayogon. Onggo yuknugu hiniselok andi, sa inis vaga ogasiga ako yukherayogon." <sup>30</sup> Yugirigya lagagirik, "At Yaya ima wombabugu lagagi andi, mbogot vaga en yugogogi vaga wombabugu lagagi a, ata ap en yugogogwa vaga wombabugu lagagi a? Hit yukneres!" yiluk, yugeragagi.

<sup>31</sup> Yugeragagi ako, wene mbanggu dugwit, "Niren 'Mbogot vaga en yugogogi vaga ogagagi o', yugu niselok, Aren 'Nggarogo yiluk at avyarat embetetek welagagup', yuknerayogon. <sup>32</sup> Eke, niren 'Yaya andi ap akwa en yugogogwa vaga ogagagi o', yup andi nggarogo yup erek," umbutu lagagwarik Yesus yugugu dugwit "Nit nenunggut o," yugogogwa. It 'Nggarogo yup erek' umbutugwa andi it ap akwa ovok erogo en Yaya andi navi Ala wene yugaliga menda avyarat umbutugwa atma, enalon wisane welagagwa.

Yugugu lagagwama, Yesus en "Andi halok, An ogo sa inis vaga ogasiga ako yukherayogonbuk," yugeragagi.

### Yavup anggur awi yago malogo welagagwa wene

(Matius 21:33-46; Lukas 20:9-19)

**12** Yugirigya lagagirik, it imam-imam enasini inim, guru-guru agama inim, it ap ombok-ombok inim Yesus en wene il wakhegek yugeragagi. Yugirigya dugwit, "Ap ambi en anggur awi yakbaluk, leget wigya, owangga mbetalogo yanggatarumenda walup mendagya, eke, suwam watu dogopwak yiluk, mbeda leyanggya, okbagya lagagirik, at eyavup yagoma ap malogo dogomwak yiluk bisiluk, o adumu andoma lagagi.

<sup>2</sup> Lagya lagagirik, andoma dugwit, anggur enggen yugup ako mbalup agya lagagimu, at eyavup ogasag-

wi menda ambi angge enggen mbalogo wogurupwak yiluk, it at eyavup ogarekma malogo welagagwarikmu akoma lakba wagagi. <sup>3</sup> Lakba wagagi ako wagya lagagimu, it at eyavup malogo welagagwa ako en vakbaluk, yo yawi vaga wakbagu lagagwarik, enggen wogigitek at eyami vaga lakbagagwa. <sup>4</sup> Warogo lakbagu lagagwama, havis aveloma ap ambi enadema lakba wagagi. Lakba wagya lagagimu, it ako en yo yawi vaga unggul nggalogo wakbagu lagagwarik, anggadi watugwa. <sup>5</sup> Anggadi wakbagu lagagwama, ambetaga ambi lakba wagagi. Wagya lagagimu, mondok watu lagagwama, andi okbaluk, iya erogo lakbisa wagagirikmu, it akoma en nin un yo yawi vaga initwis, nin mondok initwis ogarit lagagwa.

<sup>6</sup> Ovok initu lagagwama, abut ambi at endawi hunik ako lakbagatek, it mberen welagagwarik, 'An nabut yi, agayuk wutu dugwit, 'Wa' yugugu dugwit wasogon higi o', yiluk, enadema lakba wagagi.

<sup>7</sup> Lakbagagi wagya lagagimu, it at eyavup yago malogo welagagwa ako en wene mbanggu dugwit, 'Mavorangge hedaup ako at abut yi atma, mavorangge nit hedaugen mondok warusogon o', yiluk yagagwa.

<sup>8</sup> Yugu lagagwarik, eyave vakbaluk, watu lagagwarik, wolok anggur yavup ogarekma awakma weram andoma at ba wungugugwa," yiluk, wene andi At Yesus en wakhegek yugeragagi.

<sup>9</sup> Yugirigya lagagirik, "At anggur yago andok ako en nggarogo oginivisogon embetep? Dek o. Lagya dogomindik, yavup malogo welagagwa ako enarogo bisiluk, enaveloma ap adik menda malogo dogomwak yiluk, mondok bisayogon o. <sup>10</sup> Ala wene yi,

'It helep o valisagwi menda ako o vanggu dugwit, helep ambi hetbagagwa ako andi, mondok-mondok owanggi ndalaga o.

At Nenasin inis ombok ogagagi ako ninil hugu lagagurik,

'Wii!' yiluk, vok yagalagwi o', †

yiluk, Ala wene dirup warek ako hinil yokegetek dugwit, yagalagwi?" yiluk, yugeragagi.

<sup>12</sup> Yugirigya lagagimu, it ako en, "Wene wakhegek yi nit niniselok, yagaliga yi," yiluk, yedok hugu lagagwarik, vagaruguluk ogagagwa ovara, ap akwa wisane iniselok, enalon en hetbaluk lagagwa.

### Ap Kaisar ake baup wene

(Matius 22:15-22; Lukas 20:20-26)

<sup>13</sup> Hekbaluk, lagu lagagwarik, it Parisi menda nin inim, it Herodes menda nin inim, Yesus ane yupumndupum iri halok ovaga yidilogo baguluk lakbogogwa.

<sup>14</sup> Lakbogogwa ako, At Yesus adema wagu lagagwarik, "Guru wai. Hat andi avyarat adigat ogasiga menda atma, Haren ap enelosema dombabigitek, ambi sek ambi weyak embetetek dugwit, Ala wene avyarat des erogo yugirigya heyagyo. Ap inis ombok Pemerintah

† Mazmur 118:22-23

Kaisar andi ake baup sek a weyak a? Hekbaup sek a, weyak a? Haren yukneran!" yiluk, yugogogwa.

<sup>15</sup> Yugugu lagagwama, it enendawi lakot dugwit, yugwi ako yedok inugu lagagirik, "Hit nggarogo yiluk, heda magago banilagwi? Yoparip mbusi ambi An nil hagiluk, wokneres."

<sup>16</sup> Yugirigya lagagimu, wogogogwa. Wogugu lagagwama, At ako en "Yi sa elese ovagak helagwi? Sa inis dirup warek helagwi?"

Yugirigya lagagimu, it ako en, "Dek o. Andi Kaisar aro," yiluk, yugogogwa.

<sup>17</sup> Yugugu lagagwama At Yesus ako en, "Andi halok, Kaisar angge halok andi, Kaisar at wogugwis, eke, Ala angge halok andi Ala at wogugwis, ogagu dogwes o," yiluk, yugirigya lagagimu, it ako en "Wii" yiluk, vok yagawa.

**Ap akwa hambisagwi ako, "Hivis iniluk arusogon a, dek a," yiluk, yugogogwa wene**  
(Matius 22:23-33; Lukas 20:27-40)

<sup>18</sup> Vok yugu lagagwama, it Saduki menda ako, it ap akwa hambuluk, iniluk akluk mendok yusogon dek yagalagwi menda ako en Yesus adema lagu lagagwarik, hemetu dugwit, <sup>19</sup> "Guru wai. At Musa en dirup watya dugwit, 'Ap ambi hwa wokbaluk abut endagetek dugwit hambigya halok, at owa aveloma, aburi endarupwak yiluk, aot at hedaup o', † yiluk, dirup watigirikmu, <sup>20</sup> ap ambi aburi eneyave 7 endaginipigirikmu, at manggum ako hwa ambi wigya lagagirik, abut endagetek dugwit, hombagagi. <sup>21</sup> Hambigya lagagimu, at aot ambetaga menda en hwa ako wigya lagagirik abut endagetek dugwit hombagagi, hambigya lagagimu, at aot ambetaga menda ambi wogogi ako, anderogo at endagetek dugwit hombagagi.

<sup>22</sup> It eneyave 7 ako enaburi endaginipitek dugwit adigat hombagagwarikmu, at hwa ako eyave hivis hombagagi. <sup>23</sup> It ap eneyave 7 ako hwa ako wugwi, hambugwi, adigat ogagu lagagwarikmu, ap akwa hambuluk iniluk erogo mendok okbisaup hudi vaga, hivis ap sa ogwa arisogon embeten?" yiluk, yugogogwa.

<sup>24</sup> Yugugu lagagwama, At Yesus en, "Hit Ala wene warek inim, At Ala avuput inim, dibagetek dugwit, wene andi adigat umbutu dugwit yagalagwi? <sup>25</sup> Hivis ap akwa hambuluk lendagwima en iniluk erogo mendok okbugu vaga, ap en hwa hedugwi hwa en ap hedugwi ogagu dogogubuk. It mbogot vaga yonggo nelagwi menda malaikat ako hak at dogogup o. <sup>26</sup> Eke, it ap akwa hombagagwa ako iniluk erogo mendok okbisayogon ako andi, mbuku Musa wene mbalek yo aik werek adema hali abya hagagi wene ako vaga Ala en Musa yugugu dugwit,

'Hat hombawi endak hombagagwa ako, Averaham inim, Isak inim, Yakup inim enasin inis ombok Ala An aro', †

† Ulangan 25:5 †† Keluaran 3:6

yagagi dirup watigi ako yokegetek agipik a? <sup>27</sup> It Averaham inim, Isak inim, Yakup inim, hambuluk dek aklipmu en, Ala en 'It enasin inis ombok Ala An aro', yilipuk. At Ala andi it ap hambuluk dek agagi menda enasin dek o, ata, it ap hambuluk iniluk agarwik menda enasin inis ombok At aro, yiluk, hit henendawi apik hinalaliga o," yiluk, yugeragagi.

**"Wene adem ombok eve yi" yiluk yugogogi wene**  
(Matius 22:34-40; Lukas 10:25-28)

<sup>28</sup> Yugirigyama, ap guru agama ambi enadema wagagi. Wagya lagagirik, it wene mbanggwis aruk hobaluk, At Yesus en wene onngo sek erogo yugirigya il higya lagagirik, "Yesus wai. Ala wene yerogo ogarup, nderogo ogarup avok wene ovok dambulik yukneragagi ako wene adem ombok ngga haliga?" yiluk, hemetigi.

<sup>29</sup> Hemetigya lagagimu, At Yesus en yugugu dugwit, "Wene adem ombok ako yi o,

'Hit ap Iserali yi, henaruk sek erogo hunggu dogwes o.

Nenasin inis ombok Ala andi, Ala adigat At agarik.

<sup>30</sup> Heneyave henanye inim, henendawi henanggela inim,

ovok at henasin Ala adigat henendawi hunik ogagu dogwes o.' ‡

Wene adem ombok ako andi, andi aro. <sup>31</sup> Eke, wene aswe ambetaga andi,

'Hit heneyave henendawi hunik okedelagwi ako hak, it hinim agipik ako anderogo at henendawi hunik oginipu dogwes o', ††

yiluk, wene mberen yagagi yi nin ambi iya heda agarik dek o," yiluk, yugogogi.

<sup>32</sup> Yugugu lagagimu, at guru agama ako en, "E o Guru. Sek at yegen o. Ala adigat agarik. Ala adik ambi mondok dek. <sup>33</sup> Eke, neneyave nenanye inim, nenendawi nenanggela inim, ovok at nenasin adigat nenendawi hunik dogop o. Neneyave nenendawi hunik okedelagwi andi hak, ninim agurik ako anderogo at nenendawi hunik oginipu dogop andi, mondok ombok o. Ala anggom warogo hali ovok napwak yiluk, hali hunbagwi, Ala ake bagwi, ovok erogo ogasagwi andi, maduk atma, Hat yegen andi avyarat," yugogogi.

<sup>34</sup> Yugugu lagagimu, At Yesus en ap ako endawi werek en iri higya lagagirik, "Hat heyave Ala avema vanggabetaliga highi o," yugugu lagagimu, it ovok ako en, ambi inim At hemetaup enugut agagi.

**"At Keretus andi sa?" yugeragagi wene**  
(Matius 22:41-46; Lukas 20:41-44)

<sup>35</sup> At Yesus ako Ala awi valekma andoma en Ala wene ambi inim mamulirigya dugwit, "It guru agama ako en 'At Ala en enogo lakba wagagi Keretus ako andi, Daut ombao', yagalagwi andi, nggarogo yiluk yagalagwi

‡ Ulangan 6:4-5 †† Imam 19:18

ombasagwi?" yiluk, <sup>36</sup> "O endak, at Daut en At Averiniki endawima en iri dugwit,

'At nenasin inis ombok en an nasin inis ombok yugugu dugwit,

It hinim ndup ogorek agindik menda, An sovalogo havema bigitek neyagek,

ninggis amot vikit dogenyok yiluk, oma', † yiluk, at Daut en yagagi. <sup>37</sup> At Daut ako en, At Keretus ako 'An nasin inis ombok' yagagi ako, nggarogo yiluk irenen At Keretus ako 'at ombao adigat' yagalagwi embetep?" yiluk, yugeragagi.

It ap akwa wisane homago adema ako en wene iris ako enendawi sek umbutugwa.

### It guru agama henambutmu unggu sawen, suwam watu dogwes yugeragagi wene

(Matius 23:1-36; Lukas 20:45-47)

<sup>38</sup> Enendawi sek umbutwi werekma, mamulirigya dugwit, "It guru agama ako henambutmu unggu-sawen, hit henendawi suwam watu dogwes o. Enasum adup segedok yikbetaluk, ap akwa vasat ogasagwima andoma en vok yuknerapwak yiluk nagwis, <sup>39</sup> it Yakuri samban ogasagwima akoma ap ombok-ombok hora yagalagwima hora yugwi, isogo isugu dugwit, ap ombok-ombok hora yagalagwima hora yugwi, ogarup adigat enendawi sek ombasagwi. <sup>40</sup> It ap andi, akwa sogwa enangge ovok erogo wugwi, ap akwa sek enombarupwak yiluk, samban adup at ogagwi, ogasagwi andi vaga anggin mondok ombok at oginivisogon o," yiluk, yugeragagi.

### Hwa sogwa en Ala ake bagagi wene

(Lukas 21:1-4)

<sup>41</sup> Yugirigya lagagirik At Yesus Ala ake yoparip belagwima akoma horaik dugwit ap akwa wisane yoparip belagwima, ba wagwi il enegegi. It ap ininggis werek menda yoparip wisane bagu-sigik <sup>42</sup> hwa sogwa ambi inggis dek menda yoparip enggen maduk mberen Ala ake belagwima bagya hagagi. Ako andi seratus angga ndatak ovagak bagagi.

<sup>43</sup> Bagya il higya lagagirik Yesus At eyaganggom "Omanes" yugirigya lagagirik, wagu lagagwama yugirigya dugwit, "Dibas! It ap akwa enangge wisane hegek ba wagao ovara, hwa sogwa inggis dek menda yi, at agarom hunogo naup dek hegek ovok erogo beta-garikmu, it ap akwa ininggis werek menda un horok maduk at bagao ovara, at hwa sogwa angge dek dugwit ba waga yi verak eve ombok at bagas o," yiluk yugeragagi.

### Ala awi valekma masalasogon wene

(Matius 24:1-2; Lukas 21:5-6)

**13** At Yesus Ala awi valekma akoma en wunggwiam, At ane welagwi menda ambi en, "Guru

wai. Helep ombok inim, o valek inim, mondok sek yi hil okanen, wii," yiluk, vok yagagi.

<sup>2</sup> Vok iri lagagimu, At Yesus ako en iri dugwit, "O helep vaga valek yi iya helagwi ovara, helep ovaga dambuk ogarek iligik andi ambiat ogo dogosogonbuk. Ovok erogo masalasogon o," yiluk, yugeragagi.

### Hivis anggin-mbanggin okninvup wene

(Matius 24:3-14; Lukas 21:7-19)

<sup>3</sup> Yugirigya lagagirik, hivis, Yesus ndom Saitun vaga hora iri lagagirik, Ala awi valek amokmot werekma, it Peterus Yakobus inim, Yaya Andreas inim, enadikmu en hemetu dugwit, <sup>4</sup> "Hat yukneregen ako, o mera oklarimi? Anderogo ogarup yukneregen ako, horok ari waga hegek, nit nenendawi dibamunda, eyave ngga menda ogarumwi yukneran o," yiluk, yugogogwa.

<sup>5</sup> Yugugu lagagwama At Yesus ako en, "Ap akwa normalhinipusawen, henendawi suwam watu dogwes. <sup>6</sup> It ap akwa wisane An ninis vaga, 'Keretus ako an arat o', yiluk, ap akwa wisane enendawi nomalinivusogon.

<sup>7</sup> Ndup nggaganggis, ndup sumbutwis ovok henaruk hulumi ovara, henendawi dek arubuk o. Andi avyarat oklarisogon ovara, 'E ako vage horok ari wandiga', yiluk avyarat ombarubuk. <sup>8</sup> Yi ap ndi ap ininis unggul adik-adik ndup sumbutwis, o negara adik-adik ndup sumbutwis, o nggoma-nggoma o wadok iris, erom uvup agya, andi ogarisogon andi, akwa avyak baguluk yavul wasagwi wane-wane aro.

<sup>9</sup> Wene owak dilisagwima enadema wokenombolok lagwi, it ap Yakuri samban ogasagwima en yawi hinitwis, it ap ombok inim, it ap ininis ombok inim, An ogagagis ako inil vaga vagalogo yugeravovok yiluk, wokenombolok enadoma bigiga lasogonma, henendawi suwam wakedugu dogwes. <sup>10</sup> O hivis ogarup ao hegek, sek wene yi endak akwa ap ininis unggul digosek yugeregek lagu dogop. <sup>11</sup> Wene owak dilisagwima wokenombolok lagu-selok, wene ngga yup henendawi anggin arubuk. Hit henadik henendawi hobaluk yugeragupuk. Ata andi hudi At Averiniki en yukhirigya hegek yugeragup.

<sup>12</sup> Aswe en aswe at warupwak yiluk, vagago wogirigya, asin en abut warumwak yiluk vagago wogirigya, eke enaburi en enasin-inisa inim ogotbaluk inirupwak yiluk, wogurugwi, ogarusogon o. <sup>13</sup> An ninis hit avyarat wegep vaga it ap akwa ovok erogo enanggon henombarusogon ovara, o hivis vaga henendawi wadok dek okbaluk, dogomwi halok henagap wendakinivisogon o," yugeragagi.

### Ala aburi enovaga anggin-mbanggin arup wene

(Matius 24:15-28; Lukas 21:20-24)

<sup>14</sup> Hit Ala wene dirup warek yi yokelagwi menda andi, henendawi dibagu dogwes!

Yesus en iri dugwit "Alon werek adik menda weyak adigat okbisaliga menda" †† o mogama mendek hinil hugu dugwit, 'Wii' yiluk, it Yudeya menda ndom vaga

† Mazmur 110:1

andoma hoda wunggu dogomwak. <sup>15</sup> Eke hoda wunggu dugwit enangge enangge umwa heda nung-gubuk.”

<sup>16</sup> “It yavupmu agarwik ako, eneyami vaga enasum enamwa heda labuk. <sup>17</sup> O andi vaga akwa enavula inim, eneyagi ao idyak wogerelagwi inim, nggarogo vupuk labuk atma, enabwa o! <sup>18</sup> O musu hunik ninggyaim, ogagya hawen samban ogagu dogwes. <sup>19</sup> At Ala en yi menda ndi menda bagagi hudi en yogak yi hudi ap akwa enovaga anggin-mbanggin okbugu lagagwa ovara, andi horok at okbugu lagagwa. Yogak ogo maduk at okbiselagwi ovara, o andi vaga enovaga anggin-mbanggin adik mondok iya erogo okbugu hasogon. <sup>20</sup> O andi vaga Ala en anggin-mbanggin ako dek erogo balipuk en ap enagap mondok wendaklaklipuk ovara, ap akwa mikbaluk enogo bogogi ako enake hudi bayogon.”

<sup>21</sup> Yugirigya lagagirik, “O andi vaga ap ambi en ‘Yokanes, Keretus ako yoma agarik’, eke, ap ambi en ‘Yokanes, Keretus ako andi ilmu agarik’, yukiruguselok, henendawi avyarat ombarubuk. <sup>22</sup> It huluk wene yukurugu dugwit, ‘An Keretus aro’, eke, ‘An navi Ala wene yukheraliga menda aro’, yiluk, yagan wagu dogomundik, ap akwa Ala aburi enogo bogogi ako nomalhinivuguluk, enalon werek menda inim, ogarubuk menda inim, ogarusogon ovara, dek. <sup>23</sup> Andi halok, henendawi suwam watu dogwes. Ogarup ako ao ogagetek hegek, wene endak ovok erogo vagalogo yukhirigi o,” yiluk, yugeragagi.

#### An ap at endaklagagis ako warugwis wene

(Matius 24:29-31; Lukas 21:25-28)

<sup>24</sup> Yugirigya lagagirik, “O andi vaga anggin-mbanggin ako okbaluk,

‘Mo il hwis iris,

saut abya dek agya,

<sup>25</sup> dadiwap mbogot vaga en wema wambu wagya, mbogot vaga enanye werek menda ako wadokwadok iris,

ogarugwi o’, †

<sup>26</sup> ogagya hegek An ap at endaklagagis ako niris novagangge yikedelok, nagayuk werek dugwit, hena anggelekma wambu wagya neyagup. <sup>27</sup> Wagya dogogurik, it malaikat mbogot vaga yonggo nelagwi menda ako o adem venak-venak lakbugu dogogurik, it Ala en enogo bogogi ako o atok-atok andoma en wonggalogo bisaguluk warugup o,” yiluk, yugeragagi.

#### Yo ara wakhegek yugeragagi wene

(Matius 24:32-35; Lukas 21:29-33)

<sup>28</sup> Yugirigya lagagirik, “Yo ara anggup savuligiluk ogasiga ako wene henendawi dibas. Anggup savunggya lagarik, angga savuligiluk ogagya halok, o adem o hivi bagiluk ogasiga o, yagalagwi ako hak, <sup>29</sup> ‘anderogo

ogarugwi o’, yiluk, yukhirigi ako ogagya hinil hugu dogogupik, horok vanggo yagas highi o, yiluk, ombarugup.”

<sup>30</sup> “Hit yogak agipik ako, ao dek agatek hinigik hivis ogarup avok yukhirigi ako, ovok erogo atma agya hagup o, yiluk, avyarat yukheraliga. <sup>31</sup> Mbogot inim, wen inim andi, dek arugwi ovara, An nane andi mondok-mondok dek arisogon dek o,” yiluk yugeragagi.

#### Enendawi suwam watu dogop wene

(Matius 24:36-44)

<sup>32</sup> Yugirigya lagagirik, “An ap at endaklagagis ako o ngga vaga warup inim, mo il ngga vaga warup inim, ap akwa ovok enunggut. It mbogot vaga nelagwi menda ogo enunggut. Eke, An Ala abut ogo nunggut at agirik. Ilup andi, An Nasin Ala adigat agarik,” yiluk, yugeragagi.

<sup>33</sup> Yugirigya lagagirik, “O mera hudi oklarup andi hit henunggut atma, henendawi dibagu dugwit suwam watu dogwes o. <sup>34</sup> Ap ambi o adumu lagiluk, ogagya dugwit at ayeloman o malogo dogopwak yiluk, yavup adik-adik ogagu dogopwak yiluk vulogo bugu, at sup mbanggutmu dogopwak yiluk, yugugu, ogarogo bisiluk wilisiga ako hak, <sup>35</sup> at awi werek ako howam warimi a, hup agako warimi a, o yanggok swa ane irisim warimi a, mo nggao irisim warimi a, o andi vaga warisogon henunggut atma, henendawi anggin vaga dugwit suwam watu dogwes.

<sup>36</sup> At warisogon ako hit ambi ugun nogo yugusim supuk erogo wagya hawen, henendawi dibaluk, suwam watu dogwes, <sup>37</sup> yiluk, An wene henendawi suwam watu dogop yukhirigi yi, ap akwa ovok erogo yugeragagi o,” yiluk, yugeragagi.

#### Yesus warup avok mbanggugwa wene

(Matius 26:1-5; Lukas 22:1-2; Yaya 11:45-53)

**14** Isogo ambi inis *Pasika* inim, isogo ambi inis ‘Erom roti virisigadek menda’ ako inim, adenggen isagu lagagwa hudi vage ndugwis mberen dukluk isaruguluk ogagusim, it imam-imam enasini inim, it guru-guru agama inim en, “At Yesus nggarogo hilagago at vakbaluk, warumwi?” yiluk, avok mbanggu dugwit, <sup>2</sup> “Ap akwa war-wat yugwi inisao, isogo isagwi vaga vagarup andi dek,” yagagwa.

#### Hwa ambi en amburup Yesus ovaga ndibagagi wene

(Matius 26:6-13; Yaya 12:1-8)

<sup>3</sup> At Yesus o Betaniya ap ambi inis Simon o endak amu wisane hunik welagagi amwa hora yiluk, erom ninggyama, hwa ambi amburup inis *narwastu* amben sek onngo ombok menda iwak helep menda vaga nudik wolok nunggu wagagi. Nunggu wagya lagagirik, iwak ako atok hedalogo “Wa” yiluk amburup Yesus unggul vaga ndibagagi.



<sup>4</sup> Unggul vaga ndibagya lagagimu, it ap akwa nin en yugu dugwit, "Yo amburup nggarogo enam warogo ndibagas embetep? Amburup iwak yi ako andi onngo ombok yoparip 300 *denari* † vaga onngo hunogo it ininggis dek menda wogeraup sek ovara, ogaga yi hinil yokanes," yiluk, enaninis en hwa ako mbet yugogogwa.

<sup>6</sup> Mbet yugugu lagagwama, At Yesus ako en "Mondok sek oknetarikmu, nggarogo yiluk mbet yugisagwi? Hekbas! <sup>7</sup> It ap ininggis dek menda andi, hinim mondok mondok dogosogonma, yi menda ndi menda wogeraup umbutu hiniselok, wogeraup sek ovara, An andi, hit ninim mondok dogosogon dek. <sup>8</sup> Hwa yi An okneraup atma, oknetas highi o. An kubur okbanup horok vanggalek atma novaga amburup ndibenanggas. <sup>9</sup> Hivis sek wene wolok yi awi ndi awi yugeregek lagu dugwit hwa yi oknetas ako enendawi wenggelek dogomwak yiluk yugeregek nagu dogosogon o, yiluk avyarat yukheraliga o," yugeragagi.

#### At Yudas en Yesus wogeragagi wene

(Matius 26:14-16; Lukas 22:3-6)

<sup>10</sup> Yugirigya lagagimu, Yesus ane welagwi menda 12 ako ambi inis Yudas Ikariot ako Yesus warupwak yiluk wogerayogon imbitya lagagirik it imam-imam enasini Yesus wogeragiluk enadema lagagi. <sup>11</sup> Enadema lagya lagagirik, yugirigya lagagimu, it ako enendawi adenggen umbutu lagagwarik, "Onggo wokurusogon o," yiluk, yugugu lagagwama, "O ngga hudi selekma agya halok wokerayogon?" yiluk, sok highya lagagi.

#### Yesus At eyaganggom inim isogo Pasika nunggugwa wene

(Matius 26:17-25; Luke 22:7-14, 21-23, Yaya 13:21-30)

<sup>12</sup> Adenggen 'Erom roti virisigadek menda' ako ogagusim, ndugwis endak vaga wam ndomba warogo isogo Pasika isagu-sigik, Yesus eyaganggom ako en, "Yesus wai. Hadenggen wam ndomba warogo Pasika vipuk-vapuk okbaluk, nggoma isagago belamwi embeten?" yiluk, yugogogwa.

<sup>13</sup> Yugugu lagagwama, At eyaganggom mberen lakbugu dugwit, "Hit o kota andoma nunggugu dogomundik, ap ambi sogolowak is nudik wolok lagya hinim avuk agu dogomundik, hinim at elalo o. <sup>14</sup> Umwa andoma nungwigya halok, ap awi werek ako yugugu dugwit, "At nenasin Guru en, 'An nane welagwi menda ninim isogo Pasika naguluk, o hamat nggoma vokot benanggao o', yiluk, yagas," yugurup. <sup>15</sup> Yugugu hiniselok, at ako en o handimen hamat ombok ogorek ovok vipuk werek, yukhirigya halok, andoma at isagago ba elalo o," yiluk, yugeragagi.

<sup>16</sup> Yugirigya lagagimu, At ane welagwi menda ap mberen ako, lagu lagagwarik, o kota andoma nunggugu lagagwarik, yugeragagi ako ndatak at inil hugu

† *Denari ambiat andi yavup onngo satu hari ndatak. Andi halok, 300 denari andi onngo wisane.*

lagagwarik andoma isogo Pasika isagago ba nonggagagwa.

<sup>17</sup> Isagago ba nunggu lagagwarik, werekma, o hup agya lagagimu, At Yesus arwi 12 ako inim, wagagwa. <sup>18</sup> Wagu lagagwarik, hora yiluk, erom nunggu dugwit, At Yesus ako en "Hit An ninim erom nelagwi yi, at ambi en narumwak yiluk, An neyave wogerayogon highi o, avyarat yukhirigi o," yiluk, yugeragagi.

<sup>19</sup> Yugirigya lagagimu, it enendawi burup agu lagagwarik, iren Yesus adema yugugu dugwit at ambi en yugigik at ambi en yugigik ogagu dugwit, "An dek ai," <sup>20</sup> yiluk, yugugu lagagwama, At ako en, "Hit narwi 12 yi en at ambi roti ambi ninim virin ambiat vaga eralogo ninggya halok araro," yiluk, yugeragagi. <sup>21</sup> An ap at endaklagagis yi Ala wene dirup warek atma arisogon ovara, at An neyave wogerayogon andi adigat abwa o. Eyave endaklaklipuk en, at sek duklip o," yiluk, yugeragagi.

#### Roti inim anggur amburup inim nunggugwa wene

(Matius 26:26-30; Lukas 22:14-20; 1 Korindus 11:23-25)

<sup>22</sup> Yugirigya lagagirik, erom nunggu dugwit, At Yesus ako roti ambi inggimu wigya lagagirik, "Nasin Ala wa," yiluk samban ogagya lagagirik, "Yi An neyave atma, womanes o," yiluk, ugurogo wogeragagi. <sup>23</sup> Wogirigya lagagirik, anggur amburup nudik inggimu wigya lagagirik, "Nasin Ala wa," yiluk, wogirigya lagagimu, it ovok at nunggugwa. <sup>24</sup> Nunggu lagagwarik, "Ala hinim dambubigagiluk yukheragagi ako, hit avyarat ombarovovok yiluk, hit ap akwa wisane henake namuya wilisogon ako yi aro. <sup>25</sup> An yogak yi hudi en hivis Ala avema bisaligama andoma en anggur amburup swi menda naup ako hudi ao ari wagatek hegek, An nayo-gon mondok dek o, avyarat yukhirigi o," yiluk, yugeragagi.

<sup>26</sup> Yugirigya lagagirik, it ako ndawi wakbaluk, wunggu lagagwarik, ndom Saitun vaga unggugwa.

#### "Peterus en 'Yesus an nunggut' yisogon" yugogogi wene

(Matius 26:31-35; Lukas 22:31-34; Yaya 13:36-38)

<sup>27</sup> Unggu lagagwarik, At Yesus ako yugurugu dugwit, "An Ala en At wam ndomba vagenombogo agarik ako watya dogomima,

wam ndomba hoda wulusogon o', ††

yiluk, Ala wene vaga dirup watigirikmu, hit ovok at

henanggon en hekbaniluk, hoda wulusogon ovara,

<sup>28</sup> An niluk erogo mendok okbaninggya halok, nendak o Galilea ari layogon o," yiluk, yugeragagi.

<sup>29</sup> Yugirigya lagagimu, at Peterus ako en "Dek o. It ovok, nenanggon o, yiluk, hekbagaluk hoda wilisogon dek o," yiluk, yugogogi.

†† *Zakharia 13:7*

<sup>30</sup> Yugugu lagagimu, At Yesus en “Yogak o hup swa ayam ane mberen ao yegetek hegek, hat ‘Eyave an nunggut’ hane henggam vaga yisogon, avyarat yukisiga o,” yiluk, yugogogi.

<sup>31</sup> Yugugu lagagimu, at ako en, “An Hat ninim narup andi sek ovara, ‘Heyave an nunggut’ andi mondok yisogon dek o,” yiluk, ane avuput vaga At yugugu lagagimu, it ovok en anderogo adigat yugogogwa.

#### Yesus o Nggesemani vaga samban ogagagi wene

(Matius 26:36-46; Lukas 22:39-46)

<sup>32</sup> Yugugu lagagwarik o inis Nggesemani lagagwa. Lagu lagagwarik, At Yesus ane welagwi menda ako yugirigya dugwit, “Hit yoma dogwes. An samban ogari landiga,” yiluk, yugeragagi. <sup>33</sup> Yugirigya lagagirik, it Peterus, Yakobus, Yaya inim, wogenombolok laga lagagirik, At ako alon iya agya lagagirik endawi anggin wisane agagi. <sup>34</sup> Endawi anggin agya lagagirik, “Ap yoma, An nendawi burup iri dugwit, hambup okneraligama, hit yoma dugwit suwam watu dogwes.”

<sup>35</sup> Yugirigya lagagirik, horok lagani laga lagagirik, elese ape somalek, Ala yugugu dugwit, “Ai *Abba* † Nain. Yogak okneraup ako, dek okbaup imbitya heyalok, dek okbain. Hat yi menda ndi menda ambi ogarup ovok sek adigatma, it anggin-mbanggin oknerasogon ako dek okbain. Ovara, An nendawi ombasiga yi, Hat ‘Dek’ imbitya heyalok asugen. Hat hendawi ombasiga ako ogaitnok,” yiluk samban ogagagi.

<sup>37</sup> Samban okbaluk, it enadema wagya lagagirik, nogo yugusim il inugu lagagirik, Peterus ako yugugu dugwit, “Simon wai. Hat nogo yiliga a? Un satu jam suwam warup meyan embeten?” <sup>38</sup> iri lagagirik, “Weyak ogarup henendawi nggagali wagya hawen, suwam watu dugwit samban ogagu dogwes. Henendawi en sek ogarup ombasagwi ovara, heneyave en ogarup dek okinivisiga,” yugeragagi.

<sup>39</sup> Yugirigya lagagirik endak samban ogari lagagi ako havis ambi inim ogari lagagi. <sup>40</sup> Havis samban okbaluk, wagya lagagirik, it ako nogo yup oginipigirikmu nogo yugwis il inugu lagagirik, nogo mumu nggarogo yuguruk yiluk, enane dek mbup yagagwa.

<sup>41</sup> Mbup yugu lagagwama samban henggam hudi samban ogari laga lagagirik wagya dugwit, yugeragagi. Yugirigya dugwit, “Hit sat yanggalhedugwi, nogo yugwis adigat ogasagwi. Ovok aro! It weyak ogasagwi menda An ap at endaklagagis yi neyave narupwak yiluk wogeraup hudi mondok vanggo yi waga o.

<sup>42</sup> Hodorogo hiniluk ares. An neyave narupwak yiluk, An nonggo mbarangas ako wandiga atma, lasogon en,” yugeragagi.

#### Yesus vagatugwa wene

(Matius 26:47-56; Lukas 22:47-53; Yaya 18:3-12)

<sup>43</sup> Ao yugirigya, it 12 menda ambi Yudas ako it imam-imam enasini inim, it guru agama inim, it ap ombok-ombok inim it ako en ap ambi homago veram wugwi, yo yawi mbalek wugwi, ogakluk, lakbisa wagagwa ako wagu lagagwama, at Yudas ako inim at wagagwa. <sup>44</sup> At Yesus warup avok mbaranggi ako en endak it yugirigya dugwit, “Yedok havovok yiluk, ap eyave “Wa,” yugugu neyalok, ap ako andi at umbutu dugwit, vagakluk, des erogo wolok elalo o,” yiluk, wene inim mbaranggugwa.

<sup>45</sup> Wene mbaranggugwarikmu, at ako wagya lagagirik, mbikit Yesus adema laga lagagirik, “Guru wa,” yiluk, wa yugogogi. <sup>46</sup> Wa yugugu lagagimu, it ako en yedok hugu lagagwarik mbikit ininggi-vaga vagatugwa. <sup>47</sup> Vagatu lagagwama, ap ambi ugun welagagi ako en veram nggigilogo ap ombok Ala wene vagago agarik menda enasin ayeloman aruk sobalhagagi.

<sup>48</sup> Sobalhigya lagagimu, At Yesus ako en, “Ap enonggop hwilarisagwi menda vaginipi lendagwi ako hak An anderogo at vaknerapwak yiluk, veram inim, yo yawi mbalek inim, wolok wagep ye? <sup>49</sup> Hutun-howam ninim At Ala awi valekma mamulhirigya neyagek, vaknetetek welagep ovara, yogak Ala wene dirup warek ako atma des yumwak yiluk, vaknera wagep andi sek aro,” yiluk, yugirigya lagagimu, <sup>50</sup> At arwi ovok erogo at hekbaluk, hoda wungugwa.

<sup>51</sup> Hoda wunggu-sigik, apsawe ambi Yesus inim lagagi ako asum eyave vaga adigat veralekma, vage vagatu lagagwama, <sup>52</sup> asum nggolalogo baluk, agap sigam hoda winggigi.

#### Yesus owak dinggugwa wene

(Matius 26:57-68; Lukas 22:54-55, 63-71; Yaya 18:13-14, 19-24)

<sup>53</sup> Hoda wunggu-sigik, Yesus vagakluk at imam-imam enasin ap ombok adema lagu lagagwama, it imam-imam enasini inim, it ap ombok-ombok inim, it guru agama inim, it ovok erogo at adema homagagwa. <sup>54</sup> At Yesus wolok lagu inigik, at Peterus enambetaga yalambok laga lagagirik imam-imam enasin awi mbumbumu mbikit nonggagagi. Nunggwigya lagagirik, at ap ako ayeloman inim horaik dugwit, hali hunikmu sogwes isakedagagi.

<sup>55</sup> Sogwes isakedigya werekma, it imam-imam enasini inim, it wene amburup mbaranggu lagagwa menda ovok inim homago dugwit, “At Yesus waruguluk, At ogaga adem sa en dibagen o?” yugogogwa menda, dek at hagagwa. <sup>56</sup> It ap iya erogo en huluk wene ova-ga bagagwa ovara, it ambi en wene des erogo yegetek un nadok-hadok erogo bagagwa.

<sup>57</sup> It nin ako mondok yugu lagagwarik, huluk at ova-ga lombalogo bagu dugwit, <sup>58</sup> “At ako en, ‘Dek o. Ala awi ap akwa ininggis vaga vanggugwa ako, An masalogo baluk, ndugwis henggam vaga aveloma ap ining-

† ‘Abba’ andi Bahasa Aram. Adem andi, ‘Nain’.

gis vaga ogarup dek menda ambi valugwis', yagas o," yiluk, yagagwa ovara, <sup>59</sup>wene yi ogo adem ambi en des erogo yegetek hagagwa.

<sup>60</sup> Amba en des erogo yegetek at ogagu lagagwama, at imam-imam enasin ap ombok ako enanggelekma ilim mondok iri lagagirik, Yesus yugugu dugwit, "It ap yi enane hovaga lombalogo bagalagwi atma, Hat wene onngo yugeraup ombasiga a, dek a?"

<sup>61</sup> Yugugu lagagimu, At Yesus wene onngo ambi yegetek mbup erek at welagagi. Mbup erek welagagimu, at imam-imam enasin ako en "At mondok sek adigat agarik ako, abut ap akwa enagap wendarumwak yiluk enogo lakba wagagi Keretus ako andi Hat at ai?" yiluk, aigwakma wogogi.

<sup>62</sup> Aigwakma wigya lagagimu, At Yesus en, "Andi ako An aro. An ap at endaklagagis ako, hivi An At avuput iya erogo agarik menda ako inggis amot vikit horaik dugwit, mbogot vaga en hena anggelekma, wambu wagya neyagup," yiluk, yugeragagi.

<sup>63</sup> Yugirigya lagagimu, at imam-imam enasin ako at asum libilhidigya lagagirik, "Nit ambi inim ovaga lombalogo baup dek! <sup>64</sup>At Ala weyak-weyak baup atma ovok henaruk hunggip halok eres," yugirigya lagagimu, it ovok en "Mondok warup aro!" yagagwa.

<sup>65</sup> Yugu lagagwama it nin ako en waris ovaga suvutbagwi, il hwilakbaluk ininggis vugut vaga watwis, ogagu dugwit "Hat sa en hatas hegen? Hodorogo iru," yiluk yugugu lagagwama, it imam-imam enayeloman ako en ogo ininggis obak vaga watugwa.

**At Peterus en "Yesus an nunggut o," yagagi wene**  
(Matius 26:69-75; Lukas 22:56-62, Yaya 18:15-18, 25-27)

<sup>66</sup> Watu lagagwama, at Peterus ako olakma wena-men vikit andoma werekma, hwavyak ap imam-imam enasin ap ombok ako ayeloman ambi wagagi.

<sup>67</sup> Wagya lagagirik, at Peterus sogwes isakedigya il higy lagagirik, yokigya dugwit, "Hat ogo Yesus Nasaret menda hinim nagu lagagin ako heyagi o," yiluk yugogogi.

<sup>68</sup> Yugugu lagagimu, at ako en, "Hat yagaliga andi an mondok nunggut," yiluk, sup mbanggutmu nunggwisagwima akoma winggigi.

<sup>69</sup> Winggigirik werekma, hwavyak ako il higy lagagirik, it ap akwa ugun welagagwa ako yugirigya dugwit, "Dek o. At ap yi At arwi ako menda aro."

<sup>70</sup> Yugirigya lagagimu, at Peterus ako en ambi inim "An mondok dek hegek yuknisagwi," yiluk, yagagi. Iri lagagimu, akoma dugwit, iya erogo welagatekma it ugun welagagwa ako en, at Peterus ako yugugu dugwit, "Hat Galilea menda atma, it menda avyarat heyagyo."

<sup>71</sup> Yugugu lagagwama, at ako en, "Hit ap yegep andi, an nunggut atma, Nasin hanum o," yiluk, Ala hanum mbanggu hegek, <sup>72</sup> ayam ane ndugwis mberen vaga yagagi. Iri lagagimu, at Peterus ako, "Swa ayam ane ndugwis mberen vaga yegetek hegek, hane henggam

vaga 'Yesus an nunggut' yisogon o," Yesus en at yugogogi ako, endawi wenggeligya dugwit, endawi burup iri lagagirik, yup yagagi.

**Yesus ako Pilatus adema wolok lagagwa wene**  
(Matius 27:1-2, 11-14; Lukas 23:1-5; Yaya 18:28-38)

**15** Hutun erogo it imam-imam enasini inim, it ap ombok-ombok inim, it guru agama inim, it wene amburup mbanggu lagagwa menda ovok inim homagu lagagwarik, wene mbanggugwa. Wene mbanggu lagagwarik, At Yesus ako heda makluk, wolok at Gubernur Pilatus adema ba lagu lagagwama, <sup>2</sup> at Pilatus ako en, "It Yakuri enowa inis ombok Hat at ai?" yugugu lagagimu, Yesus ako en, "Hat yegen andi aro," yugogogi. <sup>3</sup> Yugugu lagagimu, it imam-imam enasini ako en yi wene ndi wene ovaga lombanggugwa.

<sup>4</sup> Ovaga lombanggu lagagwama, at Pilatus ako en "Yi wene ndi wene Hat hovaga lombalogo bagalagwi yi, hil yokanen. Hat wene onngo yugeraup ambi ombasigadek a?" yiluk, yugogogi.

<sup>5</sup> Yugogogi ovara, At Yesus ane dek mbup erek welagagimu, at Pilatus ako, "Wii, nalon," yiluk, yagagi.

**"Yesus mondok warusogon o" yagagwa wene**  
(Matius 27:15-26; Lukas 23:13-25; Yaya 18:39-19:16)

<sup>6</sup> Eke, it ap Yakuri isogo Pasika isagu dugwit adigat, "Ap heda mago ambi andi visilogo woknerano," yuguselok, at Pilatus ako en visilogo wogirigya, ogagya lagagirikmu, <sup>7</sup> akoma dugwit, it nin, "Pemerintah enane hulup nenanggon o," yiluk, ndup ogagu dugwit, ap watu lagagwama heda magago lembaga mabogogwa ako ambi inis Barabas inim welagagi. <sup>8</sup> Ap Barabas heda mago werekma, ap ombok homago Pilatus adema homari wagu lagagwarik, isogo ombok isagu dugwit, "Ap heda visilogo wokneraliga ako hak, yogak ambi visilnerano."

<sup>9</sup> Yugugu lagagwama, at Pilatus ako en, "Hit Yakuri henowa inis ombok ako visilogo wokeraup umbutu dugwit yagalagwi a?" yiluk, yugeragagi. <sup>10</sup> Yugeragagi ako, it ap imam-imam enasini ako enaninis umbutu dugwit, Yesus wolok wagwi, yedok inugu lagagirik, anderogo at yugeragagi ovara, <sup>11</sup> it imam-imam enasini ako en "Yesus aveloma Barabas heda visilogo woknerapwak yiluk, yugeres o," yiluk, it ap akwa homago welagagwa ako enendawima molanggu lagagwama, <sup>12</sup> andi okbaluk, at Pilatus en ambi inim iri dugwit, "Andi halok, hiren, ap Yakuri henowa inis ombok yagalagwi yi, an nggarogo ogarik? Yukneres."

<sup>13</sup> Yugirigya lagagimu, it ako en, "Yo winik vaga lombalogo wakbas!" yiluk, enane ombok vaga yugugu lagagwama, <sup>14</sup> at Pilatus ako en, "At weyak ngga ogaga vaga yagalagwi o?" yugirigya lagagimu, it ap akwa yandyak-handyak yugu dugwit, "Yo vaga lombalogo wakbas!" yiluk, evenuk enane ombok vaga at yugogogwa.

<sup>15</sup> Enane ombok vaga at yugugu lagagwama, at Pilatus ako en it ap akwa homagagwa ako, enendawi sek arumwak yiluk, Barabas ako heda visilogo wogirigya lagagirik, At Yesus andi, yo nabirok nggoralogo wak-baluk, yo vaga lombalogo bapwak yiluk, ap enayegen werek menda wogeragagi.

**It ap yegen werek en Yesus weyak-weyak erogo bagagwa wene**

(Matius 27:27-31; Yaya 19:2-3)

<sup>16</sup> Wogirigya lagagimu, it ap yegen werek ako en it enasin ombok werekma, wene amburup mbalisag-wima akoma, wolok nunggugu lagagwarik, it ako ovok homari warupwak yiluk, enayonggo bagagwa. <sup>17</sup> Enayonggo bagagwa ako homari wagu lagagwarik, At Yesus ako yum mudu elokwe ndimbup-ndimbup enggen hak yikbagwi, waren-waren adok-adok werek menda unggul vaga walinogo danggubagwi, <sup>18</sup> bagu lagagwarik, enane lakot vaga heyaga watu dugwit, "Wa. It ap Yakuri enowa inis ombok Hat at heyagyo o," yiluk, <sup>19</sup> yo yawi vaga unggul nggagalogo bagwi, enowaris ovaga suvurogo bagwi, okbagu lagagwarik, enerambo yunggubaluk, enendawi lakot dugwit, agayuk wutugwa.

<sup>20</sup> Anderogo at enda hambugu lagagwarik, yum mudu ako nggolalogo baluk, aveloma At asum yikbagagwa.

**At Yesus yo winik vaga lombalogo bagagwa wene**

(Matius 27:32-44; Lukas 23:26-43; Yaya 19:17-27)

Ayum yikbagu lagagwarik, eyave yo vaga lombalogo baguluk, wolok lagagwa. <sup>21</sup> Wolok lagu lagagwarik, ap ambi inis Simon awi Kirene menda Aleksandet Urupus enasin ako andi, kampung en endawi ugun wagyama inim dambunggu lagagwarik, "Yo winik ogarek yi woman," yiluk, enane vanggalogo yugugu lagagwarik, <sup>22</sup> Yesus wolok, o inis it enane vaga *Nggologota*. Eke, nit nenane vaga andi Unggul Owakma, hulikmu akoma unggugwa. <sup>23</sup> Wolok ungu lagagwarik, anggur amburup inim, nggami inim, nanggelek-hanggelek ok-baluk, napwak yiluk, wogogogwa ovara, hekbagagi. <sup>24</sup> Hekbagya lagagimu, it ako en yo winik vaga lombalogo bagagwa. Lombalogo bagu lagagwarik, "At ayum, sa hedigya hami?" yiluk, helep enggen vaga avut mbanggu dugwit, "Avut endenogo ligya halok, an hedayogon o. Eke, avut endenogo lagatek halok, hat at hedoman o," sumbukedagagwa.

<sup>25</sup> At Yesus yo winik vaga lombalogo bagagwa ako o hutun yam 9 vaga At lombalogo bagagwa. <sup>26</sup> Lombalogo bagu lagagwarik, "Yakuri enowa inis ombok ako yi aro," yiluk, wene At ovaga lombanggugwa ako dirup warogo Yesus unggumu winimen yo vaga lombabagagwa. <sup>27</sup> Lombabagu lagagwarik, ap enonggop iya menda mberen Yesus eyave venak-venak inim yo winik vaga lombalogo bogogwa.

<sup>29</sup> Venak-venak inim bugu lagagwama, it ap akwa nin lagwi-wagwi ako, lagwi-wagwi ogagu dugwit, enut wadok yugu dugwit, "Inyagot! Nabirok ale. Hat 'Ala awi valek masalogo baluk, havis aveloma ndugwis henggam vaga valugwis', yegen ako heyave yo winik vaga lombalogo bagagao andi, yo winik vaga en hagam wendakedelok, soklok wambuma," yiluk, weyak-weyak erogo bagagwa.

<sup>31</sup> Weyak-weyak inim bagu lagagwama, it imam-imam enasini inim, it Ala wene mamuleraliga menda inim, it ako ogo inim At Yesus weyak-weyak ogagu dugwit, "Aren it ap akwa enagam wendarenavit lagagi ovara, At eyave agap wendakedaup andi, dek at higyo. <sup>32</sup> At Keretus nit ap akwa Yakuri menda nenowa inis ombok yi nit avyarat ombarugen yiluk, ninil vaga yogak At yo winik vaga en wambuma," yiluk, enda hambugu lagagwama it ap mberen At inim yo vaga lombalogo bogogwa ako inim Yesus anggadi wakbagagwa.

**Yesus hombagagi wene**

(Matius 27:45-56; Lukas 23:44-49; Yaya 19:28-30)

<sup>33</sup> Anggadi wakbagu lagagwama, o dingga yam 12 vaga yi awi ndi awi andoma, o hup agagi hegek, mbikit yam 3 howam vaga o awiya agagi. <sup>34</sup> O awiya agya lagagirik, o howam agya helan, yam 3 vaga At Yesus ako na iri dugwit, " *Eloyi, Eloyi, lama sabakatani!* " † yagagi. Andi nit nenane vaga, "Nasin Ala o! Nasin Ala o! An nano yiluk hekbanenggen o?" †† yagagi.

<sup>35</sup> Anderogo iri lagagimu, it nin enendawi ugun welagagwa ako en ane iris enaruk hobagu lagagwarik, "Avyak wai. At Eliya ako yanggup yugisiga o," yiluk, yugu lagagwama <sup>36</sup> ap ambi en vupuk lagya lagagirik, suk wombamok yo atok vaga anggur amburup eda menda inim, yomarogo Yesus napwak yiluk, ndaun okbagya lagagirik, wogugu dugwit, "Yogak hekbas. At Eliya en visilogo wombaba wagya hawen sokhugu dogosogon o," yiluk, yagagi.

<sup>37</sup> Iri lagagirik, At Yesus ako en na iri dugwit, endawi weranggigi. <sup>38</sup> Endawi weranggu lagagimu, yum At Ala awi valekma ilim amot sivinik welagagi ako, winiminggan nggagalogo wambu wagagi. <sup>39</sup> Eke, at yegen werek enowa Yesus elesema mendek dugwit Yesus anderogo endawi weranggu il higya lagagirik, "Ap yi Ala abut avyarat highi o," yiluk, yagagi.

<sup>40</sup> Eke it akwa wisane Yesus o Galilea welagagi hegek eneyak heda okbaluk Yesus avuk Yerusalem lagu lagagwarik, Yesus yo winik vaga lombanggugwa ako o adumu en inil lakagagwa. It akwa wisane ako enanggelekma hwa Maria awi Makdala menda inim, hwa Salome inim, hwa Maria Yoses Yakobus ao sawe it mberen inisa inim, inil lakagagwa.

**Yesus wimu mabagagwa wene**

(Matius 27:57-61; Lukas 23:50-56; Yaya 19:38-42)

<sup>42</sup> At Yesus ako hambigya lagagimu, heveret hutun samban ogaruguluk vipuk-vapuk erogo bagwi vaga, o hup agya lagagimu, <sup>43</sup> it wene amburup mbalisagwi menda ako ap ambi inis Yusup awi Arimateya menda agayuk werék dombok atma, at "Ala avema banupwak o" yiluk, sokhigya werékma, alon dek akluk, at Pilatus adema lagya lagagirik, Yesus eyave warek woknirupwak yiluk, "Wokniru o," yugiri lagagi. <sup>44</sup> "Wokniru o," iri lagagimu, at Pilatus ako en, "Mondok hombagas," yugwi ako aruk hobagya lagagirik, "Ayai?" yiluk, it yegen werék enowa yonggo lakbagagi ako wagya lagagimu, "Yesus mondok hombagas a dek a?" yiluk, hemekagagi.

<sup>45</sup> Hemekagagi menda at ako en, "Mondok hombagas o," yugugu lagagimu, eyave warek ako wa lapwak yiluk, at Pilatus ako en Yusup ako yugogogi.

<sup>46</sup> Yugugu lagagimu, yum mudu obak ambi onngo hunggu lagagirik, wolok eyave warek ako visilogo wombaba wagya lagagirik, yum mudu obak ako vaga lobarogo helep wis mendagama mabaluk, helep sigilogo sup lakbagagwa. <sup>47</sup> Sup lakbagagwa ako, at hwa Maria awi Makdala menda ako inim, Maria Yoses isa inim, inil hagagwa.

**Yesus iluk akluk mendok yagagi wene**

(Matius 28:1-8; Lukas 24:1-12; Yaya 20:1-10)

**16** It Yakuri samban okbaluk, o hup agya lagagimu, hwa Maria awi Makdala menda ako inim, Maria Yakobus isa ako inim, hwa Salome inim, it ako en yo enggen amben sek menda Yesus ovaga eralogo bamunda onngo huni lagagwa. <sup>2</sup> Onngo huni lagu lagagwarik, nogo yiluk hari minggu vaga hutun hup mo daga wagya helan, helep wimu akoma lagagwa. <sup>3</sup> Lagu dugwit, "Sa en helep larik ako hurogo bininayogon embetep?" <sup>4</sup> yiluk, inil yokugu lagagwarik, helep ombok sup larik ako sigilogo lagagi inil hagagwa. <sup>5</sup> Hugu lagagwarik, wimu akoma nunggugu lagagwama, ilmu ininggis amot vokot apsawe ambi yum mudu yirik horaik werékma inil hugu lagagwarik, enanggela wunggu dugwit "Ap yi sava agarik?" umbutu lagagwama, <sup>6</sup> at ako en "Hit henanggela wulubuk. Hit Yesus awi Nasaret menda yo vaga lombalogo bagao ako hinil yokaguluk wagep ovara, eyave yoma agarik dek. At vage iluk akluk mendok yagas. At eyave warek agarikmu, avela adigat yi hinil yokanes. <sup>7</sup> 'An endak Galilea andoma lamindikmu neya lasogon', yiluk, wene yukheragagi ako † ndatak at ogagarikmu, At ane welagwi menda nin inim, Peterus inim, yugerelales," yugeragagi.

<sup>8</sup> Yugirigya lagagimu, "Wii," yiluk, enowak wuruk yagan wimu en lagu lagagwarik, hoda wunggu dugwit,

† Markus 14:28

enalon en ap akwa ambi yugeregetek mbauk enane dek lagagwa.

**Yesus sigam agagi wene ††**

(Matius 28:9-20; Lukas 24:13-49; Yaya 20:11-23; Lakbogogi Wene 1:6-8)

<sup>9</sup> Hari minggu o hutun hup en At Yesus ako iluk akluk mendok iri lagagirik, at hwa Maria awi Makdala menda madis 7 endawima welagagi wibagagi ako, Yesus eyave il neyapwak yiluk, sigam agya lagagimu, <sup>10</sup> At aswei inim, arupwi inim welagagwa ako yup yi-yi wo-wo yugu-sigik, at hwa ako yonggo yugera lagagi.

<sup>11</sup> Yesus iluk akluk, mendok yagas il higya lagagirik, yugera lagagi ako enaruk hunggugwa ovara, enendawi avyarat embetetek welagagwa.

<sup>12</sup> Andi okbagu lagagwarik, werékma, Yesus aswei menda mberen o umwa en wunggu lagagwarik, suvaga lagusim, At Yesus eyave adik hunogo heda okbaluk, sigam agya lagagimu, <sup>13</sup> eneyami vaga wagu lagagwarik, enaswei nin yugera wagagwa menda it ako ogo avyarat embetetek adigat welagagwa.

<sup>14</sup> Andi okbaluk, havis en At ane welagwi menda eneve 11 ako erom nunggwi werékma, neyapwak yiluk, enadema sigam ari wagagi. Sigam ari wagya lagagirik, enendawi lakot atma, At iluk akluk mendok yagagi inil halok yugera wagagwa ako, enendawi avyarat embetetek iniselok, enanggadi watigi.

<sup>15</sup> Enanggadi watya lagagirik, it ako yugirigya dugwit, "Hit yi awi ndi awi lagu dogomundik, it yi ap ndi ap andoma ovok erogo sek wene yugeregek nagu dogop o.

<sup>16</sup> Sek wene yugeregek lamwi ako andi, enendawima en avyarat umbutu dogomundik, ima wombabuguselok, enagap wendarisogon. Eke, wene andi enendawima avyarat embetetek iniselok andi, Ala en enowak dibaluk weyak okbisayogon o. <sup>17</sup> An nane enendawima avyarat umbutu-selok, it ogarubuk menda ogarusogon, it madis enendawima nonggagagi ako An ninis vaga nggigilogo wibugwis, it enane adik-adik enunggut menda yugurugwi, <sup>18</sup> mbas huli ininggis vagegatwis, heda nalis amburup nunggu-selok, hambegetek at inugwis, aup idup iniselok, enovaga ininggis vakbisiluk, sek okbugwis ogarit lagu dogosogon o," yiluk, yugeragagi.

**Yesus mbogot vaga wolok inggigi wene**

(Lukas 24:50-53; Lakbogogi Wene 1:9-11)

<sup>19</sup> Yugirigya lagagimu, nenowa Yesus inis ombok ako At Ala en wolok mbogot vaga ba inggya lagagimu, At inggis amot vaga hora yagagi. <sup>20</sup> Ba inggya lagagimu, it ako yi awi ndi awi sek wene yugeregek nagusim, ogarubuk menda ogarit nagwis vaga it ap akwa ovok

†† *Ala wene Bahasa Yunani mondok endak menda ayat 8 hudi vage wene Markus yi hekbagagwa. It ap Ala wene inilup menda en "Ayat 9 hudi en ayat 20 hudi ako andi ap Markus ako dirup watitek. Ap adik en havis dirup watigi," yiluk, yagalagwi.*

erogo, "Wene yi avyarat o," ombarupwak yiluk,  
nenowa inis ombok yonggat inivit nagu lagagi.

*Wene Markus ako, andi aro. Wa amin.*

# Lukas

**1** Nenasin Teyopilus wai. It ap wisane en yi wene ndi wene nit nenanggelekma oklagagi ako mbilinogo dirup mbaluguluk ogagagwa. <sup>2</sup> Dirup mbaluguluk ogagu dugwit, Yesus asinggigi hudi en oklagagi inil hugu lagagwarik sek wene yugeregek nagu lagagwa ako, mbilinogo yukneragagwa ako ndatak, it dirup mbanggugwa. <sup>3</sup> Dirup mbanggu lagagwarikmu, an ogo, endak asinggigi hudi en oklagagi ovok ilim erogo adem senbaluk, yi wene ndi wene hat mamulhogogwa ako, "Yi avyarat," ombarinok yiluk, mbilinogo dirup mbalhirup oknita halok, mbalhisiga o.

## Yohanes endaklarup yugeragagi wene

<sup>5</sup> Ap Herodes <sup>†</sup> o Yudea inis ombok vagago werekma, ap imam <sup>††</sup> ambi inis Sakaria inis unggul Avia menda welagagi. Eke, at ogwa andi, Harun <sup>‡</sup> ombawi wigalek menda inis Elisavet welagagi. <sup>6</sup> Iperen Nenasin Ala en, "Yerogo ogarup, nderogo ogarup," wene yugup adik ogagetek mondok atma nggedok ogarit nagu lagagwarikmu, Ala en it enendawi mondok mot inigu lagagi. <sup>7</sup> Enendawi mondok mot welagagwa ovara, hwa Elisavet ako, wimbu welagagirikmu, eneyak-enabut mondok dek hegek iperen enanggok agagwa.

<sup>8</sup> Ndugwis ambi vaga, ap Sakaria ako owa-aot imam-imam Avia menda inim Ala awi valekma ogarup vanggo iri lagagimu, at Sakaria ako Ala awi valekma andoma yavup imam menda ogagya lagagi. <sup>†††</sup> Ogagyama, it ap imam en, "Ala awi valekma ilim akoma amben eve sek menda ako, sa en hali ba nunggwigya hamwi," yiluk, helep enggen vaga avut mbanggu lagagwa enandogon ogagu lagagwa ako, ogagu-sigik, helep enggen vaga ap Sakaria inis mekbagagwa. <sup>10</sup> Mekbagu lagagwama, ap Sakaria ako Ala awi valekma ilim o

<sup>†</sup> Ap HERODES ininis ombok eneve empat welagagwa. Herodes endak andi, at Yesus endak lagagirikmu o Yudea vagago welagagi. Yesus endaklagagi aruk hunggu lagagirik, Yesus warigilik ogagagi ovara dek. Eke Herodes endak andi abut Herodes Antipas welagagi. Herodes Antipas ako, Yesus Ala wene yugerek nagu hegek o Yudea vagago welagagi. <sup>††</sup> It ap IMAM-IMAMandi, Harun ako ombawi wigalek menda. It agama Yakuri vagago welagagwa. It ap akwa Yakuri menda en wam ndomba a, kambing a, swa a, Ala ake baguluk wolok waguselok, it ap IMAM-IMAMako en, Ala ake yiluk, warogo hali napwak yiluk hali hunbagu lagagwa. <sup>‡</sup> At HARUN andi ap Lewi ombao wigalek menda. At imam mondok endak welagagi. Eke at Harun ombawi wigalek menda enadigat imam-imam welagagwa. <sup>†††</sup> It ap imam-imam menda ako, ndugerek-ndagarek Ala awi valekma andoma yavup ogari nonggegetek. Ata, tahun ambi vaga, samban ambi vaga ap ininis unggul ambi menda nunggegek ogagu lagagwa. O andi vaga, Sakaria owa asin ininis unggul Avia menda it ogarup hudi agya halok, nungguluk, ogagu lagagwa.

mogama akoma nunggwigya lagagirik, amben eve sek menda hali bagya hegek, ap akwa homago ako ovok erogo wasim dugwit, samban ogagagwa. <sup>11</sup> Samban ogagusigik, amben eve sek menda ako hali bagyama, Ala yonggo malaikat ambi amben eve sek menda hali belagwima inggis amot vikit adema mendek yi wagya hagagi. <sup>12</sup> Higya lagagirik, anggela wunggu dugwit, alon wisane agya lagagimu, <sup>13</sup> at malaikat ako en iri dugwit, "Sakaria wai. Halon habuk. Hat samban ogagya lagagin ako Ala ovok aruk hunggigirikmu, hogwa Elisavet ako habut ap at endarisogon. Endatya halok, inis Yohanes salinok yiluk, yukhisiga. <sup>14</sup> Hat hendawi mondok adenggen wisane hayogon. Eke, at endaklasogon andi vaga, Nenasin Ala en at ap ombok ombarisogon atma avakwa wisane enendawi adenggen umbutu dogosogom. Eke, anggur amburup inim, amburup anye nenek oginivisiga menda inim, at mondok ninggya dogobuk. At ao isa endawima en Averiniki endawima mondok werek endaklasogon. <sup>16</sup> Aren avakwa Iserael menda <sup>‡‡</sup> wisane eneyami vaga sugululuk Enasin Ala avema warupwak yiluk, okbugu dogosogon. <sup>17</sup> Averiniki ap Elia <sup>‡‡†</sup> ovaga agya lagagirik, anye vaga ogagya lagagi ako, Yohanes ovaga akluk, anderogo ogagya dogosogon. Nenasin warigilik ogagya hegek, at endak okbigik lagya dugwit, enasini enendawi enaburi inim dambubugu, it avakwa enendawi mbuk agarwik ako, it ap enendawi werek dugwit, Ala Wene dibaluk sek adigat ogasagwi ako it ndatak ogagu dogopwak yiluk, okbugu, eke, Nenasin warup ako avakwa enendawi dik-duk erek dogopwak yiluk, at ake vipuk erogo bugu, ogarit lagya dogosogon o," yiluk, yugogogi.

<sup>18</sup> Andi yugugu lagagimu, malaikat yagagi ako Sakaria endawi avyarat embetetek dugwit, "An ovok nanggok agirik o. Eke, nogwa ogo, anderogo agarik atma, yuknigin ako avyarat ogarup andi, wakhegek ngga ogarimi vaga nelup arimi?"

<sup>19</sup> Yugugu lagagimu, malaikat ako en, "An andi, Ngavirieli aro. An Ala inim agirik atma, sek wene yi, wolok, 'Yuguri elak o,' yuknugu lagama, yukhiri wagi o.

<sup>20</sup> Anen wene yukhigis ako eyave oklarup hudi vaga

<sup>‡‡</sup> Avakwa ISRAEL menda andi, ininis ambi Yakuri menda yagalagwi. It Yakup aburi 12 ako enombawi wigalek menda. Eke Ala en it avakwa Iserael menda ata Yakuri menda at angge mondok adik denek dogopwak yiluk, miginipigi. <sup>‡‡†</sup> Ap ELIA ako ap navi Ala en yugu hegek avakwa yugirigya lagagi menda welagagi. At ap navi ombok menda welagagi. At o muk Yesus wagatek hegek 850 tahun endak welagagi. Mbuku 2 Raja-Raja 2:11 yokhanes.

ndatak ogarisogon ovara, hat an yukhigis andi avyarat embetetekma, eyave oklarup atma des yi wagetek hegek, yogak andi, hane mondok dek agya dogo-mindik, hane yup meyan hayogon o," yiluk, yugogogi.

<sup>21</sup> Andi yugu-sigik, avakwa weram Sakaria sokhugwi ako en yugu dugwit, "Ala awi valekma en wulu wagetek adigat yi, nggarogonggan aga? Wi!" yiluk, yugusim, <sup>22</sup> Sakaria wulu wagya lagagimu, ane yugeraup meyan hugu lagagwarik, "Ala awi valekma dugwit, nogo heda abi heda higya lagarik, ane dek aga ai?" umbutu-sigik, at ako anedek we un inggi wene vaga adigat yugirigya lagagi.

<sup>23</sup> Andi en, at Sakaria ako Ala eyavup ogarup ako ovok dek agya lagagimu, amwa winggigi. <sup>24</sup> Amwa wunggu lagagirik, werekma, havis, ogwa Elisavet ako avula agya lagagirik, "Nasin Ala en nabwa nimbita dugwit, avakwa enangelekma nanggadi embetek lagya lagagis ako, dek arupwak yiluk, o yogak yi vaga okbanenggas ai," yiluk, mbauk amwa hegek, saut 5 welagagi.

#### Yesus endaklarup yuguri wagagi wene

<sup>26</sup> Elisavet ako avula agagi hegek, saut 6 agya lagagimu, Ala en malaikat Nggaviriel ako o Nggaliliya kota Nasaret andoma lakba lagagi. <sup>27</sup> Hwa sawe ambi ap hagap mbanggitek inis Maria adema lakba lagagi. At Maria ako ap ambi inis Yusup, Daut † ombao wigalek menda onngo bago mirik welagagi. <sup>28</sup> Malaikat ako en Maria adema lagya lagagirik, at yugugu dugwit, "Narup Maria wa! Nenasin Ala habwa imbita dugwit, adenggen wisane hovaga bagagas. At hinim at agarik o!"

<sup>29</sup> Yugogogi ako, Maria mondok endawi obak agya lagagirik, "Nggarogo yiluk anderogo yuknigas?" <sup>30</sup> imbita lagagimu, at malaikat ako en at yugugu dugwit, "Maria wai. Halon habuk. Ala habwa imbita dugwit, adenggen hovaga bagaup embetarikmu, <sup>31</sup> havula agya dogomindik, ap at endarisogon o. Endakbaluk, At inis Yesus salop. <sup>32</sup> At mondok ap ombok at dogosogon. Avakwa en, 'At Mondok Siyalek Dombok Agarik abut yi aro,' yugu dogosogom. At ombao Daut inis ombok dugwit, wene yugirigya lagagi ako, aveloma wene yugirigya dogopwak yiluk Nenasin Ala en mekbayogon. <sup>33</sup> At Yakup †† ombawi wigalek enowa inis ombok dugwit wene mondok-mondok yugirigya dogosogon. Eke, At avema bisaligama ako, dek asogonbuk mondok-mondok dogosogon."

<sup>34</sup> Yugugu lagagimu, at Maria en malaikat ako yugugu dugwit, "An ap ao nagap mbanggitekma, yuknigin ako andi, nggarogo navula arimi?"

† At DAUT andi ap inis ombok o Iserael akoma o muk 1000 tahun Yesus ao wagatek hegek vagago welagagi. †† Ap YAKUP ako, o muk erogo welagagi. At Yakup ombao andi Averaham, eke asin andi Isak. At ap mondok ombok welagagi. Eke at aburi 12 endaginipigi. At aburi 12 ako, it vaga 12 suku Iserael menda wigalagawa.

<sup>35</sup> Yugugu lagagimu, malaikat ako en, "Averiniki hovaga wambu wagya hegek, at Mondok Siyalek Dombok Agarik anye okbaga wagya dogomima, havula agya dogomindik, hat heyak endarisogon ako avakwa en, 'Wii, mondok sek adik denek agarik yi, Ala abut aro,' yugu dogosogom. <sup>36</sup> Eke, howa Elisavet ako ovok anggok agagi hegek, at ogo avula aga o. 'Hwa wimbu o,' yugu lagagwa ako ovara, avula agagi hegek, vage saut 6 agarikmu, yukhisiga o. <sup>37</sup> Ala en ambi ogarup ombasiga halok, ambi meyan asiga dek, atma at ogasiga o," yiluk, yugogogi.

<sup>38</sup> Yugugu lagagimu, at Maria en, "E o. Nasin Ala ayeloman an atma, yuknigin ako andi, mondok ndatak okbanupwak o," yiluk, yugugu lagagimu, malaikat ako en Maria hekbaluk, winggigi.

#### Hwa Maria ako en hwa Elisavet adema lagagi wene

<sup>39</sup> Malaikat ako vage wunggu lagagimu, hwa Maria ako amwa en lagya lagagirik, Sakaria amwa o kota ambi o Yudea andoma ndom vaga vupuk inggigi.

<sup>40</sup> Inggia lagagirik, ap Sakaria amwa nunggwigya dugwit, ogwa Elisavet ako wa yugogogi. <sup>41</sup> Maria wa yugogogi Elisavet en aruk hunggu hegek, isa endawima en avyak ako wadok iri hagagi. Wadok iri halok, Averiniki ako hwa Elisavet endawima hobo-hobo ari nungwigya lagagimu, <sup>42</sup> at ane ombok vaga iri dugwit, "It akwa nin inigik arova, Ala adenggen hat hadigat ombok erogo hovaga agarik o. Eke, heyak hendawima agarik ako ogo, Ala en adenggen ovaga bagya dogosogon o. <sup>43</sup> An sa nombakluk nadema wagen? Hat an Nasin Inis Ombok isa aro. <sup>44</sup> Wa yuknigin ako naruk hunggu neyagek, avyak nendawima en adenggen imbita dugwit, wadok iri highi o. <sup>45</sup> Nasin Ala yukhigas ako atma asogon avyarat embeten vaga, hadenggen wisane hayogon o," yiluk, yugogogi.

#### Maria en ndawi vaga Ala siyabagagi wene

<sup>46</sup> Yugugu lagagimu, at hwa Maria ako en iri dugwit, "An nendawi vaga Nasin Ala siyabaliga o.

<sup>47</sup> Nagap wendarisiga menda Ala ako en, An At ayeloman sovalek neyagek il neyagagirikmu, At vaga nendawi adenggen wisane haliga o. At Ala Mondok Anye Werek ako en iya erogo okban-inggigirikmu,

Avakwa ovok erogo yogak yi hudi en havis mondok-mondok 'Endawi adenggen wisane okbagagi o,' yiluk, yugu dogosogom o.

At inis Sek Adik Denek agarik o.

<sup>50</sup> It avakwa At enalon umbutu-selok, yogak endago inim, vivis endago inim, ovok erogo at Ala aigwak abet en okbugu dogosogon o.

<sup>51</sup> At Ala inggis anye vaga it avakwa enendawi siyabetaup wenggelit lagwi ako haryogo wibugu,

<sup>52</sup> It ap ininis ombok wene yugerelagwima akoma en sovalogo bugu,



Eke, it enendawi sovalek agarwik ako siyabugu,  
<sup>53</sup> It uvup agarwik ako eve sek menda wisane ena-  
 gaum erogo wogorigya,  
 It ap ininggi werek ako wogeregetek we un lakbugu,  
 Ogagya lagagi o.  
<sup>54</sup> Eke, wene o muk nenasini Averaham † ombawi  
 wigalek menda inim mondok-mondok naigwak abet  
 en okbugugu dogosogon yugeragagi ako,  
 wenggenggu dugwit, nit at ayelomani Iserael men-  
 da yonggat ninivi wagagi o,"  
 yiluk, yagagi.  
<sup>56</sup> Iri lagagirik, hwa Maria ako Elisavet inim dugwit,  
 saut henggam welagagirik, amwa eyami vaga winggi-  
 gi.

#### Ima Wombabisaup Yohanes endaklagagi wene

<sup>57</sup> Andi en, hwa Elisavet eyak endaklarup hudi agya  
 lagagirik, eyak ap at endaklagagi. <sup>58</sup> Endaklagya lagag-  
 imu, at inim agarwik, at owa-asin inim, Nenasin Ala  
 aigwak abet en okbagas hunggu lagagwarik, at inim  
 enendawi adenggen agu lagagwa.  
<sup>59</sup> Enendawi adenggen agu lagagwama, endaklagagi  
 hegek, ndugwis 7 dukluk, hutun avyak ako agap  
 mbaluguluk, adema lagagwa. †† Adema lagu lagag-  
 warik, agap mbabaluk, "Inis andi, asin Sakaria inis  
 ndatak salusogom," umbutugwa ovara, <sup>60</sup> at isa en,  
 "Dek o. At inis andi, Yohanes aro," yugeragagi.  
<sup>61</sup> Yugirigya lagagimu, iren, "Howa-hasin ininis an-  
 derogo ambi salek dekma, inis Yohanes andi, nano  
 yiluk salup yegen?" <sup>62</sup> Yugu lagagwarik, ininggi vaga  
 wakhegek asin yugugu dugwit, "Inis ngga salup em-  
 beten?"  
<sup>63</sup> Yugugu lagagwama, Sakaria en *papan tulis* ambi  
 nggino yugirigya lagagirik, wogugu lagagwama, "At  
 inis Yohanes aro," yiluk, dirup mbanggigi. Mbanggya  
 lagagimu, avakwa ovok en, "Wi!" yiluk, vok yagagwa.  
<sup>64</sup> "Inis Yohanes aro," yiluk, dirup ao mbanggya hegek,  
 asin ako ane hutlagya lagagimu, ane yigiluk ogagya  
 dugwit, siyabagagi. <sup>65</sup> Andi ogagagi vaga it inim agar-  
 wik ako enalon wisane agagwa. Eke, it avakwa o Yudea  
 ndom vaga agarwik ako en yi wene ndi wene oklagagi  
 ako mbilinogo yugeregek lagagwa. <sup>66</sup> Wene yagan  
 nagwis ako it ovok erogo enaruk hunggu lagagwarik,  
 dibaluk, Nenasin Ala avyak ako inim agarik hugu la-  
 gagwarik, "Avyak yi, sawe agya dogomindik, nggarogo  
 dogogwi?" yiluk, enendawi umbutugwa.

† Ap AVERAHAM ako, it Yakuri menda enombao mondok iya en-  
 dawi Ala inim hunik welagagi. Ala en iri dugwit, "Hat ombawi  
 wigalek menda andi suku ombok arisogon, eke, avakwa ininis ung-  
 gul adik-adik ovok erogo it vaga enadenggen wisane hagup," yiluk,  
 yugogogi. Endak Ogagagi Wene 12:1-3 yokhanes. †† It ap Yakuri  
 menda ako, avyak endago hegek, ndugwis 7 dukluk enagap mbang-  
 gu lagagwa. Enagap mbanggu lagagwa adem andi, avyak yi Avera-  
 ham ombawi wigalek menda halok, Ala ake denek agarik, yiluk,  
 mbanggu lagagwa. Kejadian 17:9-14; Imamat 12:1-3 yokhanes.

#### Ap Sakaria en Ala inis siyabagagi wene

<sup>67</sup> At Yohanes asin Sakaria ako Averiniki endawima  
 hobo-hobo ari nunggwigya lagagirik, yugugu hegek,  
 iri dugwit,  
<sup>68</sup> "Nit avakwa Iserael menda Nenasin Ala siyabagu  
 dogosogom o.  
 Aren wene mondok adik denek At inis vaga nenom-  
 bao Averaham yugogogi ako,  
 Eke nenombawi aigwak abet en okbisaup, yugeraga-  
 gi ako, ‡  
 atma des yupwak yiluk, endawi wenggenggu dug-  
 wit,  
 It ninim aik mbalek ininggimu en wender erogo  
 bininiluk,  
 Nit nenalon embetetek At eyavup ogarit lagwi,  
 Eke, At il hegek, nit weyak ogagetek At ake denek  
 nenendawi mot dugwit, hambugup hudi ogarit lagwi,  
 Ogagu dogopwak yiluk, okbininaup endawi  
 wenggelaga o.  
 O endak erogo it ap navi-navi †† at ake denek Ala en  
 yugirigya hegek avakwa yugurugu dugwit,  
 'It ninim ogorek ininggimu en ndialogo nenagap  
 wendatya,  
 it avakwa ovok erogo enanggon ninombarisagwi in-  
 inggimu en visilogo bininggu,  
 Ogasogon o,'  
 Yugu lagagwa ako ndatak ogagya dugwit,  
 Nenagap wendaknivupwak yiluk, at ayeloman  
 Daut ombao wigalek anye werek dombok ambi mek-  
 bagagi o.  
 Ogagagi andi, Nenasin Ala ako ninisa wagya lagarik,  
 wender erogo bininggarikmu, siyabagu dogosogom  
 o."  
<sup>76</sup> Iri lagagirik, Sakaria en at abut Yohanes yugugu  
 dugwit,  
 "Hat nabut yi, Nenasin ogarit lagya dogop sup yarit  
 lagya dogonyok yiluk,  
 hendak lagya dugwit,  
 Ala en avakwa enomaduk dek erogo bugu vaga, ena-  
 gap wendarisiga wene ako,  
 enelup arupwak yiluk,  
 yugeregek lami vaga hini, At Mondok Siyalek Dom-  
 bok Agarik Ane Yugeraliga yi aro,  
 yiluk, yukhugu dogosogom.  
<sup>78</sup> Nenasin Ala en hekbininaligadek des-erogo nenab-  
 wa en okbininaligama,  
 O het lagasiga andi hak, mbogot vaga eloma en At  
 awiya hak agarik ako, wambu wagya dugwit,

‡ At Ala en wene at inis vaga Averaham yugogogi ako, Kejadian  
 22:16 yokhanes. †† It ap NAVI-NAVI ako, Ala en it enendawima yu-  
 girigya hegek, irenen Ala wene ako avakwa yugurugu lagagwa. Eke  
 mbuku Perjanjian Lama (Endak Wene) wisane it navi-navi en dirup  
 watugwa. Anderogo atma, it Yakuri menda en Perjanjian Lama andi  
 'Buku Navi-navi' yagalagwi.

<sup>79</sup> It o hwiserekma dugwit, hambup enalon ombasagi ako awiya okbugu,

Eke, 'Sup enendawi ugun adenggen wadok dek dogop ako yi aro,' yiluk, yuknirigya,

Ogasogon, yukhisiga o,"

yiluk, yugogogi.

<sup>80</sup> Eke, avyak Yohanes ako sawe agya dugwit, endawi mondok hoda agagi. Aren awakwa Iserael menda enadema sigam agatek hegek, o mbedama awakwa dekma andoma welagagi.

### Yesus endaklagagi wene

(Mat 1:18-25)

**2** Yohanes ao nggedera helan, ap inis ombok Kaisar Agustus yi awi ndi awi O Oroma ovok erogo vagago welagagi. Vagago werekma it awakwa ovok erogo eneyave maren hudi agarwik, ilup arigiluk, ininis dirup mbalupwak yiluk, yugeragagi. <sup>2</sup> Ininis endak dirup mbanggugwa ako andi, ap Kirenius o Siriya gubernur hegek, mbanggugwa. <sup>†3</sup> Ininis dirup mbalupwak yiluk, it awakwa ovok erogo enawi adem vaga adik-adik lagagwa.

<sup>4</sup> At Yusup ako, Daut ombawi wigalek menda atma, o Nggaliliya kota Nasaret en o Yudea Daut endaklagagirikmu o kota Betlehem akoma lagagi. <sup>††5</sup> Hwa Maria Yusup migup avula agagi ako iperen ininis dirup mbalupwak yiluk, lagagwa. <sup>6</sup> Lagu lagagwarik, werekma, eyak endaklarup hudi agya lagagimu, <sup>7</sup> eyak manggum ap at endaklagagi. Endaklagya lagagirik, o awakwa nogo yilagwima hobo iri lagagimu, avyak ako yum dinggilogo kambin-ndomba enamwa iringga nelagwima akoma nggik okbagagwa.

### Ap ndomba unde watu lagagwa wene

<sup>8</sup> O Betlehem horok andoma o hup weram harumu ap ndomba unde werekma, <sup>9</sup> it Ala yonggo malaikat ambi verak erogo enadema mendok yi wagya hegek, Nenasin Ala awiya okbugu lagagimu, enalon wisane okbogogi. <sup>10</sup> Enalon wisane okbugu lagagimu, malaikat ako en yugirigya dugwit, "Henalon habuk. It awakwa ovok erogo enendawi adenggen ombok ombarup sek wene wolok yukhera wagi o. <sup>11</sup> Sek wene andi, henagap wendarisiga menda Daut endaklagagirikmu amunerama akoma henake o yogak endaklaga o. At andi, Nenasin inis ombok Keretus <sup>‡</sup> Ala en denogo bagagi ako aro. <sup>12</sup> Avyak ambi yum kain dinggilogo ndomba iringga nelagwima nggilik agarik hinil bikhelagu dogomundik, ako yi aro, ombarusogom o," yiluk, yugeragagi.

<sup>†</sup> O andi hudi vaga ap ombok Kaiser Agustus inim pemerintah Oroma inim yi awi ndi awi wisane vagago welagagwa. Negara ambi vagago welagagwa andi Siriya. Eke ambi vagago welagagwa andi Iserael. Iserael inim Siriya inim horok-horok welagagwa ovara negara adik-adik welagagwa. <sup>††</sup> O Nasaret en o Betlehem andi Kobakma en Ilu wane-wane 100 kilometer. <sup>‡</sup> Inis KERETUS adem andi, 'Ala en denogo bagagi'. Eke Iberani enane vaga, Mesias yagalagwi.

<sup>13</sup> Ao yugirigya, it mbogot-vaga menda eneyave wisane homago yukdekma homari wagu lagagwarik, at malaikat ako inim Ala inis siyabagu dugwit,

<sup>14</sup> "At mbogot winimen agarik Ala ako, inis siyabagu dogosogom o.

Eke, o wen vaga yoma it awakwa Ala endawi sek enombasiga ako, enendawi ugun wadokdek dogopwak o,"

yiluk, yagagwa.

<sup>15</sup> Yugu lagagwarik, it malaikat ako en ap ndomba unde ako bisiluk, eneyami vaga mbogot-vaga ungu-sigik, it ap ndomba unde ako at ambi en at ambi yugigik ogagu dugwit, "Nenasin Ala en oklaga yukneraga ako, o Betlehem bikha lasogom o."

<sup>16</sup> Yugu lagagwarik, Maria Yusup ako, avyak ndomba iringga nelagwima nggilik werekma, vupuk bigisa lagagwa. <sup>17</sup> Bigisa lagu lagagwarik, malaikat ako en avyak endago avok yugeragagi wene ako, awakwa nin andoma mbilinogo yugeragagwa.

<sup>18</sup> It ndomba unde en wene mbilinogo yugeragagwa ako, awakwa hunggu lagagwarik, it ovok erogo, "Wi!" yiluk, vok yagagwa.

<sup>19</sup> Vok yagagwa ovara, at Maria andi, wene yagagwa ako ovok erogo endawima wigya dugwit, wenggenggu lagagi. <sup>20</sup> Eke, it ap ndomba unde ako eneyami vaga lagu dugwit, malaikat en it yugeragagi ako ndatak enaruk hunggwis, inil hugwi, ogagagwarikmu, Ala agayuk wurogo inis siyabagek lagagwa.

### Yesus inis sanggugwa wene

<sup>21</sup> Ndugwis 8 vaga avyak ako agap mbalup agya lagagimu, mbangu lagagwama, at isa ao avula agatek hegek at malaikat ako en, "Inis Yesus salop o," yugogogi ako At inis Yesus sanggugwa.

### Yesus Ala woguruguluk, wolok lagagwa wene

<sup>22</sup> Inis sabagu lagagwarik, "Akwa eneyagi endaginipwis selok, ndugwis anderogo hudi avyak sovalek dogop o," yiluk, Ala wene yugup Musa <sup>††</sup> en dirup mbanggigi ako <sup>‡‡</sup> ndatak okbaluk, avyak ako Nenasin Ala woguruguluk, wolok o Yerusalem lagagwa. <sup>23</sup> Ala woguruguluk wolok lagagwa ako andi, Nenasin Ala en, "Ap manggum endaklagya halok andi, An henasin nake denogo banup o," yugirigya, <sup>†††24</sup> eke, ambi yugirigya dugwit, "Swa suwa mberen a, swa wurum mberen a, An henasin nake warogo baup o," yiluk, yugirigya, <sup>†††</sup> yagagi dirup warek ako ndatak ogaruguluk, avyak asin-isa ako en wolok lagagwa.

<sup>25</sup> O Yerusalem andoma ap ambi inis Simeon welagagi. At ap andi, endawi mondok sek Ala wene dibaluk ogagya lagagi. Ogagya dugwit, it awakwa Iserael men-

<sup>††</sup> Ap Musa ako ap Yakuri enasin ombok welagagi. Ala en Wene yerogo ogarup, nderogo ogarup Wene Yugup 12 hukum ako yugugu lagagimu Musa en awakwa Yakuri menda yugeragagi. Wunggugwa wene yokhanes. <sup>†††</sup> Imam 12:1-8 yokhanes. <sup>††††</sup> Wunggugwa Wene 13:2, 12 yokhanes. <sup>†††††</sup> Imam 12:8 yokhanes.

da at ap enagap wendari warup ako sokhigya lagagirikmu, Averiniki at ovaga welagagi.

<sup>26</sup> Averiniki at ovaga dugwit, Nenasin Ala en denogo mondok okbagagi Keretus ako, il hegetek hegek hambisogonbuk elup okbagagima, <sup>27</sup> Averiniki en Simeon endawima yugugu halok, Ala awi valekma mbumbu nonggagagi. Nunggigya lagagirik, werekma, Yesus isa-asin en Ala wene yugup dirup mbalek ogagu lagagwa ako, ndatak ogaruguluk, avyak Yesus ako wolok nonggagagwa. <sup>28</sup> Nunggugu lagagwama, at Simeon ako en avyak inggimu wigya lagagirik, Ala siyabagya dugwit,

<sup>29</sup> "Nasin wa! Hat hendawi ombasiga ako it Yakuri dek weram menda awiya okbugu,

Eke, haburi Iserael menda ininis siyabugu,

Ogarupwak yiluk,

Ap enagap wendarisiga menda yi awakwa ndi awakwa inil hapwak yiluk vipuk erogo bagagin ako, an ovok nil higririkmu,

Hat yuknigigin ako ndatak yogak at hayeloman an ako, nendawi horaik dugwit, hadema warigiluk, hekbanin o,"

yiluk, yugogogi.

<sup>33</sup> Avyak avok yagagi ako isa-asin en hunggu lagagwarik, "Wi!" yiluk, vok yagagwa. <sup>34</sup> Vok yugu-sigik, at Simeon ako en adenggen isa-asin enovaga bisapwak yiluk, Ala yugogogi. Yugugu lagagirik, At isa Maria ako yugugu dugwit, "Avyak yi, it awakwa Iserael menda wisane mekbugu-sovabugu, ogagya dogopwak yiluk, at Ala en denogo bagagi. Awakwa enelup arupwak yiluk, denogo bagagi hegek, awakwa wisane, 'Nenanggon o,' yiluk, yugwi ako vaga <sup>35</sup> enendawima ombasagi ako sigam agya dogosogon. Eke, hat ogo, segowa vaga hendawi sapok erogo hatwis sayogon o," yiluk, yugogogi.

<sup>36</sup> Hwa navi menda ambi inis Hana, ap Vanuel abut inis unggul Asiet menda welagagi. Hwa ako agun hidigya lagagirik, iperen inigik 7 tahun welagagirik,

<sup>37</sup> havis, sogwa hegek 84 tahun ogagagirikmu, ovok hwa anggok agagi. Ala awi valekma en winggitek mondok andoma at o hup dingga Ala ake yiluk, erom hunis dugwit, samban adigat ogagya lagagi. <sup>38</sup> O andi hudi vaga hwa ako wagya lagagirik, "Nasin Ala wa!" yiluk, yagagi. Eke, it awakwa "Ala en nit Yerusalem menda heda visilogo binina warup ai," yiluk, sokhugu lagagwa ako, Hana en avyak endaklagagi avok vagalogo yugeragagi.

### O Nggaliliya wunggugwa wene

<sup>39</sup> "Avyak endaklagya halok, yerogo ogagu dogop," yiluk, Nenasin Ala wene yugup dirup mbalek ako, isa-asin en ovok erogo dikduk-dakduk okbagu lagagwarik, eneyami vaga enamwa o Nggaliliya o kota Nasaret wunggugwa. <sup>40</sup> Eke, avyak ako ombok agya, anye

agya, ogagya dugwit, endawi werek hoda agagi. Eke, Ala endawi at inim hunik welagagi.

### Avyak Yesus Ala awi valekma nonggagagi wene

<sup>41</sup> Yesus isa-asin ako en tahun ambi wagya vaga it Yakuri Isogo Ombok Vasika † isagusim, o Yerusalem lagu lagagwa. <sup>42</sup> Lagu lagagwa ako, avyak Yesus endago hegek 12 tahun agya lagagimu, Isogo Ombok Vasika isagusim, lagagwa. <sup>43</sup> Isogo isago ako nelok, isa-asin enamwa enendawi ugun lagu-sigik, Yesus ako inim lagetek o Yerusalem mbup yagagi. Asin-isa ako ininggut dugwit, <sup>44</sup> awakwa ovok wagwi enanggelekma inim wandiga embetek lagu lagagwarik, nogo yuguluk ogagu dugwit, avyak ako eyave dek halok, owa-asin, asuwei inim werek hao en yiluk, belanggugwa. <sup>45</sup> Belanggugwa menda, eyave dek halok, eneyami vaga o Yerusalem belalit lagagwa. <sup>46</sup> Belanggu dugwit, ndugwis henggam okbaluk, Ala awi valekma, it ap ngguru agama enanggelekma horaik dugwit, enane hunggu, aren it enaigwakma wigya, ogagyama belanggugwa. <sup>47</sup> It ap ovok erogo ane hunggugwa ako en At yi wene ndi wene ovok elup dugwit, wene onggog yugirigya ako hunggu lagagwarik, "Avyak yi, ovok elup dugwit, yagaliga wi!" yiluk, vok yagagwa. <sup>48</sup> Asin-isa ako en At ako havitu lagagwarik, "Wi!" yiluk, isa en, "Neyak o. Hat nggarogo yiluk, anderogo okbininggin? Hasin niperen nenendawi anggin dugwit, belalhetek wagyo."

<sup>49</sup> Yugugu lagagimu, aren, "Hit nggarogo yiluk, an belalnetek wagep? An nasin awi valekma dogop aga andi, hit hininggutmu belalnetek wagep?" <sup>50</sup> Yugeragagi ovara, it dibagetek welagagwa.

<sup>51</sup> Andi en, at inim o Nasaret lagu lagagwarik, at isa-asin enavema dugwit, enane des erogo hunggu hegek, at isa ako en andi, it awakwa yugwi ako endawima wigya dugwit, wenggenggu lagagi. <sup>52</sup> Eke, at Yesus andi, endawi werek agya, eyave sawe agya, ogagya hegek, Ala inim, awakwa inim, at vaga enadenggen umbutu lagagwa.

### Ima Wombabisiliga menda Yohanes en yugirigya lagagi wene

(Mat 3:1-12; Mrk 1:1-8; Yoh 1:19-28)

**3** Ap Kaisar Siverius inis ombok dugwit, yi awi ndi awi Oroma menda ovok erogo at avema vagago welagagi. Vagago werekma, 15 tahun ogagya vaga at avema welagagwa menda andi, ap Pondiyus Pilatus o Yudea gubernur vagago welagagi. Eke, ambi, ap Herodes †† o Nggaliliya vagogo welagagi. At aot Pilipus

† Isogo VASIKA ako, saut Maret a, April a, isogo ombok isagu lagagwa. Isogo Vasika ogagu dugwit, wam ndomba eyak warogo nunggu lagagwa. It ogagagwa andi, it enombawi o muk Ala en o Mesir en visilogo wogenombolok wulu wagagi ako inilup dogoguluk adenggen ogagu lagagwa. Wunggugwa Wene 12:17-20 yokhanes.

†† Ap HERODES yi andi, inis Herodes Antipas, Herodes endak welagagi ako abut.

o Itureya Serakonitis vagogo welagagi. Eke, ambi, ap Litanias o Abilene vagogo welagagi.

<sup>2</sup> Andi vagago werekma, it ap Hanas Kayapas iperen imam-imam ininis ombok winimen inigik, Sakaria abut Yohanes ako o mbedama awakwa dekma andoma hegek, Ala en wene ambi at endawima yugogogi.

<sup>3</sup> Yugugu hegek, Yohanes en awakwa yugirigya dugwit, "Henomaduk dek erogo bigigaupwak en yiluk, weyak ogasagwi ako henasam hanes. Henasam hugu hiniselok, ima wombabigigaup o," yiluk, wene andi, is Yorodan liris ambut ovok erogo yugeregek lagya lagagi. <sup>4</sup> Ap navi Yesaya en o endak dirup mbanggigi ako Yohanes en ndatak ogagagi. Yesaya en Yohanes avok yagagi andi, yi:

"Ap ambi o mbedama awakwa dekma naik iri dugwit, 'Nenasin inis ombok warup sup ogovak higiroyagwi,

Eke, At lagya dogop sup mot erogo yagwi,  
Ogagu dogones o.

<sup>5</sup> Ndonggo halok, lekbagwi,  
Ndom inim, hulik inim, sovabagwi,  
Sup mbirik halok, mot okbagwi,  
Adok-adok werek halok, amot okbagwi,  
Ogagu dogones o.

<sup>6</sup> Ala en henagap wendarisiga menda lakbigiga wasogon ako, awakwa ovok erogo inil hagup o,' yiluk, yagan wasogon," †

yugeragagi dirup mbanggigi ako ndatak Yohanes en yugeregek lagya lagagi.

<sup>7</sup> Yugirigyama, [awakwa wisane at adema wagagwa.] It awakwa wisane en, "Nit ima wombabininapwak o," yiluk, at adema homari lagagwa ako yugirigya dugwit, "Mbas edup aburi wigalek menda hit yi aro. Ala aninis okbigigya wasogon ako, hoda wolovovok yiluk, sa en hurimbis yukheraga? <sup>8</sup> Hit weyak ogasagwi ako, henasam hegep halok, yo enggen eyave yiliga andi hak, ndatak ogagu dogones. Hit henendawima en umbutu dugwit, 'Averaham andi, nit nenombao atma, nit sek adigat agurik o,' ombasagwi andi, anderogo ombarubuk. At Ala en, 'Helep yi, at Averaham ombawi aru,' yiluk, yugirigya halok, arup sek inigik, hit adigat iya dekma, nggarogo yiluk yagalagwi? <sup>9</sup> Yaga yo adema murumenda ovok agarik atma, yigyo ndigyo enggen yugudek halok, murogo halima mabayogon o," yiluk, yugeragagi.

<sup>10</sup> Yugirigya lagagimu, awakwa ovok en, "Anderogo halok, nit nggarogo ogaruk?"

<sup>11</sup> Yugu lagagwama, Yohanes en, "Hit henasum yikhedelagwi mberen werek halok, ap ambi asum dek halok, ambi wogugwis, eke, henagarom werek halok andi, anderogo wogirugwi, ogagu dogones," yugeragagi.

<sup>12</sup> Yugirigya lagagirik, werekma, it pemerintah enake yoparip wonggalisagwi menda †† ako en ogo, "Ima

† Yesaya 40.3-5 yokhanes. †† It PEMERINTAH ENAKE YOPARIP WONGGALISAGWI MENDA ako, ap Yakuri menda ovara, it pemerintah

wombabininapwak o," yiluk, at adema wagu lagagwarik, "Ngguru wai. Nit nggarogo ogaruk o?"

<sup>13</sup> Yugugu lagagwama, Yohanes en yugirigya dugwit, "Henasini en, 'Yoparip anderogo hudi wongganggu dogones,' yukheralagwi ako, adigat wongganggu dogones," yugeragagi.

<sup>14</sup> Yugirigya lagagimu, it ap yegen werek menda ako en at yugugu dugwit, "Eke, nit ogo, nggarogo ogaruk?" yugugu lagagwama, Yohanes en, "Awakwa enangge wokneraupwak yiluk, henane anye vaga yugeraup andi moga. Eke huluk wene awakwa enovaga bisaup andi moga. Ata, yavup ogasagwi ongggo wokhirugwi-selok, 'Yi sek at wokneragao,' yiluk, wugu dogones," yugeragagi.

<sup>15</sup> Andi yugeragagi ako, it awakwa ovok enendawi adenggen umbutu dugwit, "Avyak! At Ala en nenowa inis ombok denogo mendok okbayogon Keretus yagagi ako, at Yohanes yi ai?" umbutusim, <sup>16</sup> Yohanes en it ovok yugirigya dugwit, "An we un is vaga adigat wombabigigaliga. Eke, At ambi wasogon ako andi, At mondok ombok aro. An horok atma, At arepatu nggolalup meyan o. At Averiniki inim, hali inim, henovaga bigiga warisogon. <sup>17</sup> Nggandum dinisagwima en ovok denbaluk, eyave halok, wonggalogo winimen ba inggya, eke, iluvulu halok, hali nagaup yagaligadekma lakbagya, ogarupwak yiluk, walup at inggimu vagogo agarik o," yiluk, yugeragagi.

<sup>18</sup> Sek Wene ‡ ako it awakwa yugirigya dugwit, Yohanes en anderogo wene wisane enaruk watigi.

<sup>19</sup> Enaruk watya lagagimu, ap inis ombok Herodes ako en at owa ogwa Herodias ndiyanggya, eke, yi weyak ndi weyak wisane ogarit lagya, ogagya lagagimu, Yohanes en "Hat ogo weyak," yiluk mberogogi.

<sup>20</sup> Mberugu lagagimu, Herodes en yi weyak ndi weyak ogarit lagya dugwit, Yohanes eyave vagogo heda marogo mabiselagwima mabagagi andi, weyak ambi labok wisane ogagagi.

#### Yesus ima wombagagi wene

(Mat 3:13-17; Mrk 1:9-11)

<sup>21</sup> Yohanes en awakwa ovok ima wombabugu lagagirik, Yesus inim ima wombabagya lagagimu, Yesus samban ogagyama, mbogot heyatu lagagimu,

<sup>22</sup> Averiniki eyave swa wurum ovagak wigak yagan Yesus ovaga wambu wagagi. Ovaga wambu wagya lagagimu, mbogot-vaga en ane iri dugwit, "Hat nabut nendawi hunik atma, nendawi adenggen ogagya heyagi o," yiluk, yugugu hagagi.

Oroma enake awakwa Yakuri menda en yoparip bapwak yiluk yugurugu lagagwa. It wisane awakwa enambokan ungggu lagagwama, awakwa Yakuri menda en mondok nenanggon umbutu lagagwa. ‡ SEK WENE andi, wene Ala en awakwa enomaduk dek erogo bisaup ako inim, eke wene awakwa at inim mondok-mondok iniluk dogop inim, enake sup hurutigi.

### Yesus ombawi endaklarit wagagwa wene

(Mat 1:1-17)

<sup>23</sup> Yesus ogarigiluk wagagi ako 30 tahun okbaluk asinggigi. It awakwa en Yesus andi, Yusup abut umbutu lagagwa. Eke, Yusup andi, Eli abut. <sup>24</sup> Eli andi, Matat abut. Matat andi, Lewi abut. Lewi andi, Maliki abut. Maliki andi, Yanai abut. Yanai andi, Yusup abut. <sup>25</sup> Yusup andi, Matika abut. Matika andi, Amos abut. Amos andi, Nahum abut. Nahum andi, Heseli abut. Heseli andi, Nagai abut. <sup>26</sup> Nagai andi, Mat abut. Mat andi, Matika abut. Matika andi, Simeai abut. Simeai andi, Yosek abut. Yosek andi, Yoda abut. <sup>27</sup> Yoda andi, Yohanan abut. Yohanan andi, Eresa abut. Eresa andi, Serubavel abut. Serubavel andi, Selatiel abut. Selatiel andi, Neri abut. <sup>28</sup> Neri andi, Maliki abut. Maliki andi, Adi abut. Adi andi, Kosam abut. Kosam andi, Emadam abut. Emadam andi, Er abut. <sup>29</sup> Er andi, Yosua abut. Yosua andi, Elieser abut. Elieser andi, Yorim abut. Yorim andi, Matat abut. Matat andi, Lewi abut. <sup>30</sup> Lewi andi, Simeon abut. Simeon andi, Yakura abut. Yakura andi, Yusup abut. Yusup andi, Yonam abut. Yonam andi, Eliakim abut. <sup>31</sup> Eliakim andi, Meleya abut. Meleya andi, Mina abut. Mina andi, Matata abut. Matata andi, Natan abut. Natan andi, Daut abut. Daut andi, Isai abut. <sup>32</sup> Isai andi, Ovet abut. Ovet andi, Mboas abut. Mboas andi, Salomon abut. Salomon andi, Nahason abut. <sup>33</sup> Nahason andi, Aminadap abut. Aminadap andi, Adimin abut. Adimin andi, Arini abut. Arini andi, Heseron abut. Heseron andi, Veres abut. Veres andi, Yakura abut. <sup>34</sup> Yakura andi, Yakup abut. Yakup andi, Isak abut. Isak andi, Averaham abut. Averaham andi, Sera abut. Sera andi, Nahor abut. <sup>35</sup> Nahor andi, Seruk abut. Seruk andi, Erehu abut. Erehu andi, Velek abut. Velek andi, Eber abut. Eber andi, Sela abut. <sup>36</sup> Sela andi, Kenan abut. Kenan andi, Arapakasat abut. Arapakasat andi, Sem abut. Sem andi, Nuh abut. Nuh andi, Lamek abut. <sup>37</sup> Lamek andi, Metusala abut. Metusala andi, Henok abut. Henok andi, Yaret abut. Yaret andi, Mahalalel abut. Mahalalel andi, Kenan abut. <sup>38</sup> Kenan andi, Enos abut. Enos andi, Set abut. Set andi, Adam abut. Eke, Adam andi, Ala abut at.

### Sile en Yesus avut mbanggigi wene

(Mat 4:1-11; Mrk 1:12-13)

**4** Averiniki ako Yesus endawima hobo-hobo ari nungwigya lagagimu, is Yorodan ima en wunggu lagagimu, Averiniki en wolok o mbedama awakwa dekma andoma lagagi. <sup>2</sup> Wolok lagya lagagirik, werekma, madis enasin Sile en At avut mbanggya hegek, ndugwis 40 hudi welagagi. Avut mbanggya hegek, Yesus erom nenggetek ndugwis 40 hari welagagirikmu, erom uvup agagi.

<sup>3</sup> Erom uvup agagirik werekma, Sile ako wagya lagagirik, At yugugu dugwit, "Hat avyarat Ala abut halok, helep yi, erom arupwak yiluk, yuguru!"

<sup>4</sup> Yugugu lagagimu, At Yesus en, "Ala en iri dugwit, 'Avakwa erom adigat nunggu-selok, iniluk dogosogom dek o,' yiluk, yugogogi dirup mbalek agarik." †

<sup>5</sup> Yugugu lagagimu, at Sile ako en Yesus wolok ndom vaga inggya lagagirik, andoma en wen vaga yoma yi awakwa ndi awakwa ininis werek enavema biselagwima ovok erogo o bigavok yagaliga hak ambivaga inukhagagi. <sup>6</sup> Inukhiga lagagirik, "It ap ininis werek enavema biselagwima andi ovok sek halok, awakwa en, 'Wi', yagalagwi yi ako, an vagogo dogopwak yiluk, woknogogirikmu, an nendawi ombakluk en wogeraliga. <sup>7</sup> Anderogo atma, hat navema seve yiluk, siyabaningga heyalok, hil hegen ako ovok erogo hat vagogo dogonyok yiluk, wokhisogon o."

<sup>8</sup> Yugugu lagagimu, at Yesus en, "Ala en iri dugwit, 'Henasin Ala avema seve yiluk, at adigat siyabagwi, at yagaliga halok adigat dibaluk ogarit lagwi, ogagu dogones,' yiluk, yugogogi dirup mbalek agarik." ††

<sup>9</sup> Yugugu lagagimu, Sile en Yesus wolok o Yerusalem Ala awi valekma o virimu ba inggya lagagirik, Ala wene mbalek vaga yugugu dugwit,

"Ala en it malaikat yonggo ako,

Haruwam dogopwak yiluk, yugeramima wagu dogomundik,

Helep vaga hisok hado yi wambigya hao en,

Ininggis ndalek vaga enewogogo ari wambisogon o,"

‡

yiluk, yugogogi dirup mbalek agarikma, hat Ala abut avyarat halok, yoma en soklok wambin."

<sup>12</sup> Yugugu lagagimu, at Yesus en, "Ala en iri dugwit, 'Henasin Ala An navut mbalubuk,' yagagi o," yiluk, yugogogi. ‡‡

<sup>13</sup> Yugugu lagagimu, at Sile en Yesus avut mbaligiluk ogagagi ako ovok at okbagya lagagirik, "Hivis yugurup ambi nanonggal werek agya hami a?" yiluk, hekbaluk, winggigi.

### Yesus o Nggaliliya eyami vaga lagagi wene

(Mat 4:12-17; Mrk 1:14-15)

<sup>14</sup> Wunggu lagagimu, at Yesus ako Averiniki anye endawima dugwit eyami vaga o Nggaliliya lagagi. Lagya lagagirik, werekma, At avok ako o andoma ovok erogo wigak yagagi. <sup>15</sup> O Nggaliliya andoma dugwit, it Yakuri samban ogasagwima wene mamuleregek lagya halok awakwa ovok erogo inis siyabagagwa.

### It Nasaret menda en Yesus mbo bagagwa wene

(Mat 13:53-58; Mrk 6:1-6)

<sup>16</sup> Andi en, At Yesus sawe agagirikmu o Nasaret akoma lagagi. Lagya lagagirik, it Yakuri samban ogasagwi vaga it samban ogasagwima akoma nonggegek iri lagagi ndatak, at nungwigya lagagirik, Ala wene dirup mbalek vaga bikhegek yugeragiluk, mendek yagagi.

† Ulangan 8:3 yokhanes †† Ulangan 6:13 yokhanes. ‡ Mazmur 91:11-12 yokhanes. ‡† Ulangan 6:16 yokhanes.

<sup>17</sup> Mendek iri lagagimu, mbuku virik-verek ap navi Yesaya en Ala wene dirup mbanggigi Yesus wogogogi. Wogugu lagagimu, mbuku ako mbigalogo baluk [Ala denogo mondok okbagagi Keretus ako avok] yugirigya dugwit,

<sup>18</sup> "It avakwa ininggidek ako Sek Wene yugirigya dogopwak yiluk, denogo baninggigima,

Nasin Ala Averiniki novaga agarik o.

It avakwa heda mago agarwik ako, visilogo bisayogon o, yiluk, yugirigya,

Inil mbuk ako, Hinil sek okbigigaup andi, ndak, yiluk, yugeregek lagya,

It avakwa sovabisiluk agarwik ako wender erogo bugu,

<sup>19</sup> Eke, Nenasin Ala nenabwa en okbininaup ako, yogak yi at aga o, yiluk, yagan lagya,

ogagya dogopwak yiluk, lakbani waga," † yiluk, yagagi dirup mbanggigi ako heyak bagya lagagirik, bikhegek yugeragagi.

<sup>20</sup> Wene ako ovok yugirigya lagagirik, mbuku ako yunggulogo yonggaragak wogugu lagagirik hora yagagi. Hora iri lagagimu, it avakwa Yakuri samban ogasagwima homagagwa ako, ovok erogo inil At adigat vurek welagagwa. <sup>21</sup> Inil vurek werekma, Yesus en it yugirigya dugwit, "Ala wene dirup mbalek bikhegek yukhirigi ako, o yogak yi henaruk hunggu hinigik, atma des yagas o," yiluk, yugeragagi.

<sup>22</sup> Yugirigya lagagimu, it avakwa ovok en, "Ap yi iya," yiluk, At wene eve sek iri halok, "Wi!" yiluk, vok yagagwa ovara, irenen at umbutu dugwit, "A! Yi adik, Yusup abut ako dek?" yiluk, yagagwa.

<sup>23</sup> Yugu lagagwama, Yesus en it yugirigya dugwit, "It avakwa en, 'Dokter wai. Hat heyave sek okhedomano,' mbilape yagalagwi ako, eke, 'O Kaperenaum ogagya lagen, hunggup ako, hat hawi adem vaga endaklagagindikmu yoma anderogo ogagya dogwen,' an yuknirup yiluk, yugu hinigis."

<sup>24</sup> Yugirigya lagagirik, "Henaruk vipak holek dogones! It ap navi-navi enawi adem vaga dugwit, Ala en yugirigya hegek yugurugu-selok, enowa-enasin en enane sek erogo hulisagwi dek o, yiluk, yukheraliga. <sup>25</sup> Ap Elia eyom vaga musu nenggetek hegek, tiga setengah tahun vaga yi awi ndi awi ovok erogo erom uvup werekma, Iserael enamwa andoma akwa sogwa eneyave wisane welagagwa ovara, <sup>26</sup> Ala en ap Elia ako akwa sogwa Iserael menda ambi enadema lapwak yiluk, lakbagetek. Ata, hwa sogwa ambi o Tiron kota Saravat Yakuri dek menda werekma, adema lakbagagi. <sup>27</sup> Eke, navi Elisa †† eyom vaga avakwa Iserael enamwa andoma amu hunik wisane welagagwa ovara, it ambi amu hunik sek okbigitek aro. Ap Naaman o Siriya Yakuri dek menda ako, adik at amu hunik sek okbagagi o, yiluk, avyarat yukheraliga."

† Yesaya 61:1-2 yokhanes. †† Navi ELISA ako, navi Elia aveloma vivis mondok yagagi.

<sup>28</sup> Yugeragagi ako it ap Yakuri samban ogasagwima welagagwa ako ovok enaruk hunggu lagagwarik, Yesus en ambi okbininayogon buk yedok hugu lagagwarik, enaninis wisane agagwa. <sup>29</sup> Enaninis wisane agu lagagwarik, mendek yiluk, At eyave enamwa en vago gogo wasim wibagu lagagwarik, enawi awek andugumu valekma, vedalogo wombaba laguluk, wolok lahusim, <sup>30</sup> it ovok andenam inigik enanggelekma en winggigi.

#### Ap ambi madis edup agoda werek endawima nonggagagi wene

(Mrk 1:21-28)

<sup>31</sup> Andi en, vivis, o Nggaliliya kota ambi Kaperenaum lagagi. Lagya lagagirik, it Yakuri samban ogasagwi vaga wene mamulirigya lagagi. <sup>32</sup> Wene mamulirigya dugwit, at ane anye vaga yugirigyama, avakwa en, "Wi!" yiluk, enalon agagwa.

<sup>33</sup> Ndugwis ambi vaga ap ambi madis edup agoda werek endawima nonggagagirikmu, it Yakuri samban ogasagwima welagagi. At ap ako ane naik hunik iri dugwit, <sup>34</sup> "Yesus wai. Hat ap Nasaret menda nit madis nngarogo okbininagiluk wagen? Nit dek okbininagiluk wagen a? Hat Ala abut mondok weyak ogasigadek sek adik denek agindik ako, hat an nelup aro".

<sup>35</sup> Yugugu lagagimu, Yesus en mberugu dugwit, "Hane dek wilin!" Yugugu lagagimu, madis ako en ap eyave avakwa enanggelekma wen vaga andoma ndun okbagya lagagirik, eyave edup yagan watitek hegek, madis nggigilogo winggigi.

<sup>36</sup> Nggigilogo wunggu lagagimu, avakwa ovok enalon en, "Wi!" yiluk, at ambi en at ambi yugigik yugu dugwit, "Avyak! Ap yi, ane yagaliga, ayai! At ane avuput anye vaga madis edup agoda werek menda, 'Wilin,' yugirigya halok, wibisaliga wi!" yiluk, yagagwa. <sup>37</sup> Eke, Yesus avok ako o andoma ovok erogo wigak yagagi.

#### Avakwa wisane sek okbogogi wene

(Mat 8:14-17; Mrk 1:29-34)

<sup>38</sup> At Yesus it Yakuri samban ogasagwima en wunggu lagagirik, Simon ‡ amwa lagagi. Lagya lagagirik, Simon ogwa isa aup sogwes-sogwes wisane werekma, Yesus en sek ogarupwak yiluk, yugogogwa. <sup>39</sup> Yugugu lagagwama, at eyave nogo yiligama lagya lagagirik, alilimu mendek dugwit, "Aup edup dek aru," ao yugugu hegek, dek agagi. Dek agya lagagimu, hwa ako mbikit mendek yiluk, it enake ogagya lagagi.

<sup>40</sup> Andi hudi vaga, o mo il huruk irisim, avakwa en enaswei aup edup adik-adik warek werekma, wogonombolok Yesus adema bisa wagagwa. Bisa wagu lagagwama, it ovok erogo inggis vakbugu dugwit, sek okbogogi. <sup>41</sup> Eke, it avakwa ovok madis enendawima nonggagagi ako ogo, sek okbugu dugwit, "Wilitales!" yiluk, madis ako yugirigya lagagimu, enane

‡ Ap SIMON ako, inis mberen, ambi Simon, ambi PETERUS.

na yugu dugwit, "Ala abut harat o!" yiluk, nggigilogo wunggugwa. Ala en ap inis ombok denogo mondok okbagagi Keretus ako enelupma, enane yugu-sigik ovara, at Yesus en mberirigya dugwit, "Henane ambi yup mondok dek!" yiluk, yugeragagi.

#### Yesus avakwa dekma lagagi wene

(Mrk 1:35-39)

<sup>42</sup> O hutun, mo il nggao iri lagagimu, Yesus o andoma en wunggu lagagirik, avakwa dekma lagagi. Lagagi ovara, it avakwa wisane en At belangugwa. Belangu lagagwarik, inim dogoguluk, sovabasogon yiluk ogagagwa ovara, <sup>43</sup> Yesus en it yugirigya dugwit, "Ala denogo mendok okbagagi ako avakwa at avema dogopwak yiluk sup hutbayogon Sek Wene ako, o kota nin inim yugeregek lagya dogoguluk, lakbani wagaririkmu, mondok yugeregek landiga o," yiluk, yugera-gagi.

<sup>44</sup> Yugirigya lagagirik, o Yudea it Yakuri samban ogasagwima dombok akoma yugeregek nagu lagagi.

#### Yesus ane waupwak yiluk, endak yanggup yugeragagi wene

(Mat 4:18-22; Mrk 1:16-20)

**5** Andi en, havis ndugwis ambi vaga At Yesus ako in-amut Nggenesaret yanggadek omban vaga mendek werekma, it avakwa wisane Ala wene enaruk huluguluk, hobo-hobo homari wagu lagagwa. <sup>2</sup> Hobo-hobo homari wagu lagagwama, Yesus en it ap ikan wasagwi menda enamburis mberen is omban vaga bago hagagi. It ap ikan wasagwi menda ako en enam-buris hekbaluk, yum yarin ikan wasagwi menda ako hutusim, mburis hagagi. <sup>3</sup> Higya lagagirik, mburis ambi Simon amburis ako vaga nungwigya lagagirik, Simon yugugu dugwit, "Is ombanma horok ambukum vanggo yi nunggusogom," yiluk, nunggu-gu lagagwarik, Simon iperen mburi-vaga horaik dugwit, it avakwa wisane homago ako wene mamuleragagi.

<sup>4</sup> Wene mamulirigya lagagirik, Simon aswei inim yugirigya dugwit, "Is agurukmu andenam ari nunggu-gu dogomundik, ikan warovovok yiluk, heneyarin ako wombaba lales."

<sup>5</sup> Wombaba lales yugirigya lagagimu, Simon en, "Ai, Nasin. O hup en wombangusat ninigik o yanggo yagas ambiat ogo mondok watitek at, ovara, yuknirigindikmu, wombaba lasogom o." <sup>6</sup> Yiluk, wombaba lagagwarikmu, ikan mondok wisane erogo watu lagagwama, yarin ako mondok libis iri menda ogagagi.

<sup>7</sup> Yarin ako mondok libis iri menda agya lagagimu, enaswei nin mburis ambi vaga akoma werekma yongwarinivi warupwak yiluk, ininggi wene vaga yugurugu lagagwama, wagu lagagwarik, ikan warogo mburis mberen mbin erogo bagagwama, anggin en mburis mberen is endawima sovalivilip.

<sup>8</sup> Simon Peterus en mburis ako sovanggya menda higy lagagirik, Yesus avema seve yiluk, "Nasin o. An ap

yi mondok weyak ogasiga mendama, baniluk wilin o," yiluk, yugogogi.

<sup>9</sup> Yugogogi andi, ikan wisane watugwa ako vaga at aswei inim mondok vok yagagwa yiluk, yugogogi. <sup>10</sup> Simon aswei Yakubus Yohanes, Sevedius aburi iperen ako inim vok yagagwa. Eke, Yesus en Simon yugugu dugwit, "Halon habuk. Hat ikan belalogo wasiga hak, o yogak en avakwa belalinipu dogosogon," yiluk, yugogogi.

<sup>11</sup> Yugugu lagagimu, mburis ako is omban vaga bagu lagagwarik, yi menda ndi menda ovok erogo hekbaluk, Yesus inim lagagwa.

#### Ap amu hunik sek okbagagi wene

(Mat 8:1-4; Mrk 1:40-45)

<sup>12</sup> Andi en, havis ndugwis ambi vaga Yesus o kota ambima werekma, ap ambi amu hunik welagagi. Ap ako Yesus il higya lagagirik, elese wen vaga samup yiluk nggino yugugu dugwit, "Ai, Nasin. Haren sek okbanup imbita heyalo, ndak sek okbanup o," yiluk, yugogogi.

<sup>13</sup> Yugugu lagagimu, Yesus inggis welalogo vagatya dugwit, "Sek okbagaup imbitirikmu, sek aru!" wene ao yugugu hegek, at amu hunik ako dek agagi.

<sup>14</sup> Dek agya lagagimu, Yesus en, "Avakwa mondok yugerabuk. At imam en il heyaupwak yiluk, adema elak. An sek okbagagirikmu, Musa en, 'Ala ake andero-go baup,' yagagi ako, it avakwa en bagya heyaupwak yiluk, belak," yiluk, aruk warogo lakbalagagi. †

<sup>15</sup> Aruk warogo lakbalagagi ovara, Yesus ogarit landiga wene ako evenuk wigak iri lagagimu, yi avakwa ndi avakwa wisane At ane hunggwis, edup-mbedup halok eneyave sek okbugu, ogarupwak yiluk, At adema homari wagek yugu lagagwa. <sup>16</sup> Anderogo ogagu lagagwa ovara, Yesus o avakwa dekma akoma wunggu lagagirik, samban ogari lagek ogagya lagagi.

#### Ap inggis-isok yidugup sek ogagagi wene

(Mat 9:1-8; Mrk 2:1-12)

<sup>17</sup> Ndugwis ambi vaga Yesus umwa en wene mamulirigyama, it ap Parisi menda †† inim, it ap Musa wene mbalek mamulerelagwi menda inim, yi awi ndi awi o Nggaliliya en, Yudea en, Yerusalem en, wagu lagagwarik, we ugun horaik dugwit, Yesus ane hunggu lagagwa. Avakwa aup warek sek oginivupwak yiluk, Nenasin Ala anye ako Yesus okbagya hegek, ogagya lagagi. <sup>18</sup> Akoma werekma, ap ambi inggis-isok yidugup werekma, ap en yo duriluk, Yesus adema ba

† It avakwa Iserael menda ako, AP AMU HUNIK werek halok, avakwa inim dogop moga ovara, sek agya halok, ap imam en bikhugu dugwit, ovok sek halok, at ap ako Ala ake yiluk swa suwa mberen wolok warupwak yiluk yugurugu lagagwa. Wolok wagya halok, it imam en, "Ap ako Ala ivaga ovok horek agarik," yugu lagagwa. Yuguselo, at vivis avakwa inim dogop sek at, agagi. Imamat 14 yokhanes. †† It ap PARISI menda ako, it avakwa Yakuri menda nin Ala Wene Yugup mondok ndatak erogo ogaruguluk okhagagwa ovara it nin wisane enendawima enaninis avakwa enabwa embetetek welagagwa.

nungguluk, ogagagwa menda <sup>19</sup> it avakwa ovok hobohobo erek werékma, ba nunggup meyan agya lagagimu, wolok o winimen o viril vaga unggugwa. Unggu lagagwarik, viril heyarogo yo durik enewogo avakwa ovok enanggelekma Yesus adema wombabagagwa.

<sup>20</sup> Wombabagu lagagwama, Yesus en it enendawi at ovaga vanggaluk, avyarat umbutwi yedok inugu lagagirik, ap ako yugugu dugwit, "Avyak! Hat homaduk dek erogo bagagi."

<sup>21</sup> Yugugu lagagimu, it ap Musa wene mbalek maulerelagwi menda ako inim, it ap Parisi menda inim, iren enendawi umbutu dugwit, "A! Nit nenomaduk dek erogo biniliga ako At Ala adigat agarik. Ambi inim dek. Ap Ala wiyiknom-weyaknom erogo baliga yi sa embetep?" yiluk, umbutugwa.

<sup>22</sup> Enendawi umbutwi ako Yesus yedok inugu lagagirik, yugirigya dugwit, "Hit nggarogo yiluk henendawi anderogo winggilisagwi?" <sup>23</sup> 'Homaduk dek erogo bagagi,' yugurup andi, iya a, ata 'Mendek yiluk lagya dogwen,' yugurup andi, iya a? Hit eres!" <sup>24</sup> Yugirigya lagagirik, "An Ap At Endaklagagi † wen vaga yoma dugwit, avakwa enomaduk dek erogo bisapwak en yiluk, Ala en An yuknogogi ako hinilup arovovok yiluk sek okbayogon," yiluk, yugeragagi. Yugirigya lagagirik, ap inggis-isok yidugup ako yugugu dugwit, "Mendek iri dogomindik, hat hagone ndalek nogo yiliga menda ako, hedelok hamwa wilinok yiluk, yukhisiga." <sup>25</sup> Ao yugugu hegek, ap ako it ovok erogo inivaga mendek iri lagagirik, at agone ndalek nogo yiliga menda ako hedelok amwa wunggu dugwit, Ala inis siyabagek lagagi. <sup>26</sup> Ako lagya hegek, it ogagya hagagwa ako vaga Ala inis siyabagu dugwit, "Yogak ninil helagudek menda higyoma, nenalon wi!" yiluk, vok yagagwa.

#### At Yesus en ap Lewi yanggup yugogogi wene

(Mat 9:9-13; Mrk 2:13-17)

<sup>27</sup> Andi en, Yesus wunggu lagagirik, ap pemerintah enake yoparip wonggalisiga menda ambi inis Lewi yoparip wonggalisagwima horaik il hagagi. Higya lagagirik, Yesus en at yugugu dugwit, "Ninim lasogom, oma," <sup>28</sup> yugugu lagagimu, at Lewi ako yi menda ndi menda ovok erogo hekbaluk, mendek iri lagagirik, Yesus inim lagagi.

<sup>29</sup> Andi en, ap Lewi ako at amwa Yesus adenggen isogo ombok isagagi. Isagagirikmu, it avakwa homago wisane ap pemerintah enake yoparip wonggalisagwi menda inim, avakwa nin inim, Yesus Lewi inim erom nunggusim, <sup>30</sup> it ap Parisi menda inim, ap Parisi menda Musa wene mamulerelagwi menda inim, iren Yesus ane welagwi menda ako enanggin-enanggon yiluk, yugurugu dugwit, "A! It pemerintah enake yoparip wonggalisagwi menda inim, it weyak ogasagwi menda

nin inim, hit nggarogo yiluk hinim dambulik dugwit erom is nelagwi?"

<sup>31</sup> Yugurugu lagagwama, At Yesus en, it yugirigya dugwit, "It ap aup edup dek halok andi, ap ndokter adema laup ombasagudek. Ata, aup edup halok sek oginivupwak yiluk, ndokter adema laup ombasagwi.

<sup>32</sup> Andi ndatak, Anen it ap 'An sek' ombasagwi menda eneyanggup yugeragiluk wagatek. Ata, it weyak ogasagwi menda enasam helok, enomaduk mbo baupwak yiluk, eneyanggup yugera wagagis o," yiluk, yugeragagi.

#### Ala ake yiluk, erom hunis dogop wene

(Mat 9:14-17; Mrk 2:18-22)

<sup>33</sup> Yugirigya lagagimu, it ap Parisi menda ako en Yesus yugugu dugwit, "It ap Yohanes ane welagwi menda andi, Ala ake yiluk, erom hunis dugwit, samban ogasagwi. Eke, nit ap Parisi nenane welagwi menda andi, anderogo ogasagwi ovara, hat hane welagwi menda andi, we ugun erom nungwi, is ugun nungwi, ogagu-selagwi."

<sup>34</sup> Yugu lagagwama, Yesus en, "Ap ogwa hidigyama, owa-asin inim isogo isagu dugwit, 'Hit erom nenggetek dogones,' yiluk, owa-asin yugeraup sek embetep? Dek! <sup>35</sup> Owa-asin inigik, agun wolok laup vanggo yi wagya ako vaga andi, erom hunis dogosogom," yiluk, yugeragagi.

<sup>36</sup> Yugirigya lagagirik, wene wakhegek yugirigya dugwit, "Yum hain swi menda ambi libilogo yum mbadis endak menda ambi vaga llobalogo monggadisagwidek. Llobalogo monggatu halok, yum hain swi libilisagwi ako weyak asiga. Eke, yum swi menda ako, yum endak menda vaga llobalogo monggadek halok, elese iperen ndatak asigadek adik asiga. Anderogoma, yum hain swi menda ambi libilogo yum mbadis endak menda ako vaga llobalogo monggadesagudek o."

<sup>37</sup> Yugirigya lagagirik, wene wakhegek ambi iri dugwit, "Anggur amburup swi menda iwak kambin agamut endak ogovak hibirik vaga, nudisagudek. Anggur amburup swi menda iwak kambin agamut endak ogovak hibirik vaga nudup halok, anggur amburup swi menda en iwak endak menda ako viklagya dugwit, yanggalandiga. Yanggalagya dugwit, anggur amburup dek agya, eke, iwak ako weyak agya, oklandigama, anggur amburup swi menda iwak kambin agamut endak ogovak hibirik vaga, nudisagudek. <sup>38</sup> Anggur amburup swi menda andi, iwak kambin agamut swi ogovak hibirik vaga adigat nudisagwi. <sup>39</sup> Eke, anggur amburup endak menda andi, 'Ai weyak,' yiluk, yagalagwima, anggur amburup endak menda nelok, swi menda, 'Wokniru,' yiluk, yagalagwidek o," yugeragagi.

† 'AN AP AT ENDAKLAGAGIS' Yesus yagagi ako andi, inis Yesus en at salhedagagi. Eke, navi Daniel ako en, Ala en ap ambi avakwa enagap wendarupwak yiluk lakba wasogon andi, inis 'Ap At Endaklagagi' yagagi (Daniel 7:13-14 yokhanes).



### It Yakuri samban ogasagwi vaga nggarogo ogagu dogop wene

(Mat 12:1-8; Mrk 2:23-28)

**6** Ndugwis ambi it ap Yakuri samban ogasagwi vaga Yesus ane welagwi menda inim gandum yagoma sup vaga lagu dugwit, At ane welagwi menda en gandum ininggis vaga mbalogombo agamut bonggalogo wikbagek nenggek lagagwa. <sup>2</sup> Nenggek lagu-selok, it Parisi menda nin en, "Samban ogasagwi vaga yavup anderogo ogarup moga yugup hegek, hit nggarogo yiluk ogasagwi?" yiluk, yugeragagi.

<sup>3</sup> Yugurugu lagagwama, Yesus en, "Wene at Daut arwi inim, erom uvup dugwit, ogagagwa wene ako, Ala wene mbalek vaga hit bikhegetek dugwit yagalagwi yei? <sup>4</sup> At Daut ako Ala awi valekma nunggigya lagagirik, roti Ala ake bago ako it ugun naup moga, it imam-imam halok adigat nunggu dogop yugup hegek ovara, wogogo ninggya lagagirik, nin at inim lagagwa ako wogoragagi, wene dirup mbalek ako hit bikhegetek agipik yei? [Naup moga hegek nungugwa ovara, Ala en mbet yugeragagibuk,]" yiluk, yugeragagi.

<sup>5</sup> Yugirigya lagagirik, "Samban ogasagwi vaga yerogo ogarup nderogo ogarup yugu dogop andok ako andi, An Ap At Endaklagagis aro," yiluk, yugeragagi.

### Ap inggis weyak sek ogagagi wene

(Mat 12:9-14; Mrk 3:1-6)

<sup>6</sup> Andi en, ndugwis ambi Yakuri samban ogasagwi vaga Yesus ako it samban ogasagwima nunggwigya lagagirik, wene mamuliragagi. Wene mamulirigyama, ap inggis amot weyak nggorak ovagak andenam werekma, <sup>7</sup> Yesus wene mamulirigya hegek, it ap Musa wene mbalek mamuliragwi menda inim, it ap Parisi menda inim, iren, enane wonggalogo At ovaga baguluk, "Yesus samban ogasagwi vaga yavup ogarup moga yugup hegek ap sek ogagya hamwi a?" yiluk, inil bik-bak ogagagwa. <sup>8</sup> Inil bik-bak ogagu-sigik, it umbutwi ako Yesus yedok inugu lagagirik, ap inggis weyak ako yugugu dugwit, "Mendek yiluk, ilim yenam oma," yugugu lagagimu, ap ako mendek yiluk, ilim mendek yi lagagi.

<sup>9</sup> Mendek yi lagya lagagimu, Yesus en it yugurigya dugwit, "Samban ogasagwi vaga sek oginivup andi, sek a, ata weyak oginivup andi, sek a? Avakwa eneyave inidi yup andi, sek a, ata enarup andi, sek a? Hit eres!" yiluk, <sup>10</sup> it ovok erogo il dombalinipu lagagirik, ap ako yugugu dugwit, "Hinggis ngges okhanen," yugugu lagagimu, ngges okhigya lagagirik, inggis mondok sek agagi.

<sup>11</sup> Inggis mondok sek agagi ovara, it andi, enendawi enaninis wisane agya dugwit, "Yesus nggarogo okbauk?" yiluk, wene mbanggugwa.

### It ap lakbigik menda miginipigi wene

(Mat 10:1-4; Mrk 3:13-19)

<sup>12</sup> Andi hudi vaga Yesus samban ogarigiluk, hulikmu inggigi. Inggya lagagirik, o hup Ala yugugu hegek, o yanggo yagagi. <sup>13</sup> O yanggo iri lagagimu, At ane welagwi menda ako warupwak yiluk, yanggup yugeragagi, wagu lagagwama, ap eneyave 12 miginipu lagagirik, ininis "Lakbigik menda", sabigigi. <sup>14</sup> It miginipigi ako andi yi: Simon inis ambi Peterus sanggigi ako inim, at Simon aot Andreas inim, Yakubus inim, Yohanes inim, Pilipus inim, Mbarotolomeus inim, <sup>15</sup> Matius inim, Tomas inim, Alepius abut Yakubus inim, Simon ap Selot menda <sup>††</sup> inim, <sup>16</sup> Yakubus adik menda ambi abut Yudas inim, eke, Yudas Ikariot Yesus hivis warupwak yiluk onngo hunggigi ako inim, miginipigi.

### Wene mamulirigya, sek okbugu, ogagagi wene

(Mat 4:23-25)

<sup>17</sup> At Yesus ap miginipigi ako inim hulikmu en wambu wagu lagagwarik, o huris vaga andoma mbup yagagwa. Mbup yugu lagagwama, At ane welagwi menda wisane inim, avakwa nin evena o Yudea en, o kota Yerusalem en, o Tirus Sidon <sup>‡</sup> is yanggadek laut amban vaga akoma en, <sup>18</sup> Yesus ane hunggwis, aup edup iniselok sek okbugu, ogarupwak yiluk, At adema homari wagagwa. Eke, it avakwa madis edup agoda werek menda enendawima nonggegek ogagu lagagwa ako sek okbogogi. <sup>19</sup> Yesus anye endawima agarik ako wulu wagya dugwit, avakwa sek ogonivit lagyama, it avakwa ovok erogo sek arusogon yiluk, Yesus ininggis vakhaguluk, ogagagwa.

### Enendawi adenggen dogop inim, anggin dogop inim, yugeragagi wene

(Mat 5:1-12)

<sup>20</sup> Anderogo ogasagwima, Yesus en At ane welagwi menda ako il biginigu lagagirik, yugirigya dugwit, "Hit ap henangge dek yi, Ala en hit at avema bigigaliga atma,

Henendawi adenggen umbutu dogosogom o.

<sup>21</sup> Hit yogak uvup agipik yi, henagaum asogonma, Henendawi adenggen umbutu dogosogom. Hit yogak yup yasagwi yi, enda yarup okhivinisogonma,

Henendawi adenggen umbutu dogosogom.

<sup>22</sup> It avakwa yi, enombawi en navi-navi weyak okbugu lagagwa ako ovagak,

An Ap At Endaklagagis ako nane wegep vaga enanggon adigat hinumbutu dugwit,

† LAKBIGIK MENDA andi, irenen Yesus inis vaga ogagu dogopwak yiluk Yesus en adik denek miginipigi. †† Ap SELOT andi it Yakuri menda ako Oroma menda enavema werekma, enanggon en enadik dogop ogagu lagagwa menda. ‡ TIRUS SIDON andi, kota mberen o negara Libanon. Avakwa weram Yakuri dek menda andoma welagagwa.

'Hit nit menda dek,' yiluk, hekbugugwis, wiyiknom-weyaknom erogo bugugwis, 'Ap yi weyak o,' yiluk, hininis sovabugugwis, ogagu-selok, henendawi adenggen umbutu dogosogom.

Henake ago mbogot vaga wisane agarik atma, anggin anderogo okbugugu-selok, henendawi adenggen en agasogot wugu dugwit ndawi luvuk yugu dogop.

<sup>24</sup> Eke, hit hininggis werek yi andi, henendawi ugun wadokdek sek welagupikmu,

anggin henovaga arugup!

<sup>25</sup> Hit yogak henagaum agipik yi, hivis uvup arugup!

Hit yogak enda yasagwi yi, hivis henendawi burup agya dugwit, yup yagu dogop!

<sup>26</sup> It avakwa yi, enombawi en ap Ala inis vaga huluk wene yugurugu-sigik ovara, siyabugu lagagwa ako ndatak,

it ap ovok en hininis siyabugugu-selok anggin henovaga arugup!" yiluk, yugeragagi.

#### Hinim ogorek halok henendawi hunik oginivup wene

(Mat 5:38-48; 7:12a)

<sup>27</sup> Yugirigya lagagirik Yesus en ambi yugirigya dugwit, "Hit an nane henaruk holek agipik yi, wene ambi yukherayogon. It hinim ogorek agipik andi, henendawi hunik okbugwis, enanggon henombasagwi ako sek okbugwis, <sup>28</sup> it homan okbugugwis ako, Ala en adenggen okbisapwak yiluk, yugugwis, it weyak okbigelagwi ako, enake samban ogagwi, ogagu dogones. <sup>29</sup> Eke, henelagandin venak vaga henatwis-selok, venak enakbatugwi, henasum sogwes yum wugu-selok, henasum bayu yirik idi yubuk. Ata, inim wogorugwi, <sup>30</sup> nggino yukirugu-selok, wogorugwi, ogagu dogones. Henangge wugu-selok, Wokneres, yugeraup andi moga. <sup>31</sup> Hiren, 'Anderogo okbininup sek ai,' ombasagwi ako ndatak avakwa sek adigat okbigik lagu dogones.

<sup>32</sup> It henabwa ombasagwi ako, enadigat hit henendawi hunik okbugu halok, onngo ngga hedaup embetep? Dek o. It weyak ogasagwi menda ogo, enabwa ombasagwi menda ako enendawi hunik okbiselagwi. [Anderogo atma, it henabwa ombasagwi dek menda inim henendawi hunik oginipu dogones.] <sup>33</sup> It hinim yonggat-yonggat yagalagwi ako, hiren it enadigat sek okbugu hiniselok, onngo ngga hedaup embetep? Dek o. It weyak ogasagwi menda ogo, it yonggat-yonggat yagalagwi menda sek okbiselagwi. [Anderogo atma, it yonggathinivisagwidek menda inim, sek okbugu dogones.]

<sup>34</sup> Hiren, 'Hivis ndatak woknerasogom,' umbutu dugwit, henaswei wogorugu hiniselok, andi vaga nggaroggo okhedaup embetep? Mondok dek. It ap weyak

ogasagwi ako en, 'Hivis ndatak woknerasogom o,' yiluk, enaswei wogerelagwi. [Anderogo atma, 'Hivis ndatak woknerasogom,' embetetek dugwit, ugun at wogurugu dogones.] <sup>35</sup> At Mondok Siyalek Dombok Agarik ako en it ap weyak menda enendawi lakot dambe-vambe erek agarwik ako enabwa ombasiga. Enabwa ombasiga atma, hit ogo, it hinim ogorek agipik ako enabwa umbutu dugwit, sek okbugwis, eke 'Hivis woknerasogom,' embetetek dugwit, ugun wogorugwi, ogagu dogones. Ogagu hiniselok, 'Hit An naburi aro,' yiluk, onngo mondok iya erogo wokhirigya hagup o.

<sup>36</sup> Henasin en avakwa aigwak abet en sek okbisaliga hak, hit ndatak avakwa henaigwak abet en sek okbigik lagu dogones," yiluk, yugeragagi.

#### Henane anye vaga enowak dilubuk wene

(Mat 7:1-5)

<sup>37</sup> Yugirigya lagagirik, ambi yugirigya dugwit, "Hit henane anye vaga avakwa enowak dilubuk. Henane anye vaga enowak dinggitek hiniselok, hit ogo, Ala en ane anye vaga henowak dilisogonbuk. Eke, hiren avakwa 'Hit weyak o,' yiluk, anggin enovaga bisabuk. 'Hit weyak o,' yiluk, anggin enovaga bigitek hiniselok, Ala en 'Hit weyak o,' yiluk, anggin henovaga bigigayogon buk. Eke, hiren it avakwa weyak okbigelagwi ako enomaduk dek erogo bugu dogones. Enomaduk dek erogo bugu hiniselok, Ala en hit henomaduk dek erogo bigigayogon. <sup>38</sup> Ugun wogorugwi hiniselok, ugun at wokhirigya hagup o. Sogolowak elola mbin erogo yekbaluk, nggwe-nggwes ogagya, sovalogo wombabagya, okbaluk, nggilup-nggilup wambigya hegek, henadema ndilogo wokherelagwi hak, ndatak wokhirigya hagup o. Wakhegek ako vaga wakhelok avakwa wogerelagwi ako andi, ndatak wakhelok wokhirigya hagup o," yugeragagi.

<sup>39</sup> Yugirigya lagagirik, wene wakhegek ambi yugirigya dugwit, "It ap inil mbuk ir-it ininggi vapak laup sek embetep? Eke iperen nggilin eloma nggedek wambup dek embetep? <sup>40</sup> It wene mamulrelagwi ako sovalek inigik, wene mamulhedelagwi ako siyalek agarwikbuk. It mamulhedelagwi ako mondok mamulhidugu dogomundik andi, it mamulrelagwi ndatak dogosogom.

<sup>41</sup> Yo agako mbalek hinimu winik agarik ako dibagetek dugwit, hit henaswe yo iluvulu imu nonggas ako nggarogonggan dibelagwi? <sup>42</sup> Eke, yo agako mbalek hit hinimu wikhegetek dugwit, 'Naswe. Yo iluvulu himu nonggas ako wikheyayogon,' andi nggarogonggan yugurup embetep? Ee! Henagavoval yagalagwi! Yo agako mbalek hit hinimu winik agarik ako endak wikhelok, henaswe imu wikhaup andi, sek hagup o," yiluk, yugeragagi.

### Yo enggen yiliga wene

(Mat 7:16-20; 12:33-35)

<sup>43</sup> Wene wakhegek ambi yugirigya dugwit, "Yo sek menda en yo enggen weyak menda yiligadek. Eke, yo weyak menda en yo enggen sek menda yiligadek. <sup>44</sup> Yi yo ndi yo eyave enggen yiliga vaga enelup asagwi. Hit yo widis enggen ako yo bondo adok-adok vaga yugumu heralisagudek. Eke, anggur enggen ako heda sogonaik vaga yugumu welagudek. <sup>45</sup> Ap sek menda endawima enggen yugup sek menda ako vaga sek adigat ogasiga. Eke, ap weyak menda endawima enggen yugup weyak menda ako vaga weyak adigat ogasiga. Endawima en nggeker-erek wunggu dugwit, abis vaga en yagaliga o," yiluk, yugeragagi.

### Ap mberen en o mberen vangugwa wene

(Mat 7:24-27)

<sup>46</sup> Yugirigya lagagirik, ambi yugirigya dugwit, "Hit An yukheraliga ako ogagetek dugwit, nggarogo yiluk, 'Ai, Nasin! Ai, Nasin!' adigat yuknisagwi? <sup>47</sup> It awakwa An nadema wagu lagarwik, An nane hobaluk, ogasagwi hak yukherayogon. <sup>48</sup> Ap o valisagwi ako ovagak, it aro. Ap ambi wen ilim erogo bavunggu lagagirik, helep owak ndalek vaga owak wombabagagi. Wombabagagirikmu, hivis is nggut ogakluk wagya dugwit, o valek masaligiluk ogagagi menda owak modo erogo wombalekma, wadokdek welagagi. <sup>49</sup> Andi wadokdek welagagi ovara, it ap An nane hobaluk, ogasagudek ako andi, ap ambi o owak wen ilim erogo wombabagatekma un ovaga wombabaluk o vanggigirikmu, is nggut ogakluk wagya dugwit, yigitik-wagatik danggo erogo wolok wunggu dugwit, mondok masalogo bagagi ako ovagak it aro," yiluk, yugeragagi.

### Ap yegen werek ayeloman sek ogagagi wene

(Mat 8:5-13)

**7** Yesus awakwa inivaga wene ovok yugirigya lagagirik, o Kaperenaum lagagi. <sup>2</sup> Lagya lagagirik, werekma, it ap yegen werek menda enasin ambi ayeloman mondok endawi hunikmu, aup edup mondok hambigiluk ogagagi. <sup>3</sup> Ap yegen werek menda enasin ako [ap Yakuri dek weram menda]. Aren Yesus ogarit lagya aruk hunggu lagagirik, ayeloman sek okba warupwak yiluk, Yakuri enasini nin yuguri laupwak yiluk yonggo lakbogogi. <sup>4</sup> Yonggo Yesus adema lakbogogi, lagu lagagwarik, it Yakuri enasini ako en enane enabwa edik enabwa edok seve erogo Yesus yugugu dugwit, "Ai, at ap yegen werek menda enasin andi, nit awakwa Yakuri menda ninim endawi mondok hunik okninivisigama, eke, arenen nit Yakuri samban ogasagwima o vabininggirikmu, anderogo atma, ayeloman sek ogari laup andi sek o." <sup>6</sup> Yugugu lagagwama, Yesus inim lagagwa.

It ako ao enamwa ari wagetekma, ap yegen werek enasin ako en asweimuni it nin yonggo lakbogogi. Lakbogogi, Yesus adema lagu lagagwarik, "Ai, Nenasin! Ap nenaswe yegen werek en iri dugwit, 'At un anggodo warugwi en. An ap madukma, Yesus an namwa nunggu warup meyan. <sup>7</sup> Eke, an ap horok atma, At adema laup ogo, embetetek. Ata, sup vaga lagya dugwit "Sek aru," ane iri halok nayeloman sek asogon. <sup>8</sup> An ogo, nasini enavema dugwit, enane hunggu, eke, an narwi yegen werek ako navema dugwit, an nane hunggwis, ogasagwima, narwi ambi, "Elak," yugugu neyalok andi, lagya, ambi, "Oma," yugugu neyalok andi, wagya, eke, nayeloman, "Yi ogaru," yugugu neyalok andi, ogagya, ogasagwima, [Yesus ogo "Sek aru," iri halok, atma asogon, yiluk,] yuguri elales,' yiluk, lakbinina wagarikmu yukhisagwi," yiluk, yugogogwa.

<sup>9</sup> Yugogogwa Yesus aruk hunggu lagagirik, ["An avyarat nembetas, wi!" yiluk,] vok yagagi. Vok iri lagagirik, awakwa At ambetaga lagwi ako ena endenogo biginigu dugwit, "It awakwa Iserael menda ogo, nin horok at avyarat numbutu-sigik, at weram Yakuri dek menda andi adigat novaga vanggabuluk avyarat ombok erogo nembetas, yiluk, yukheraliga." <sup>10</sup> Yugirigya lagagimu, yonggo lagagwa ako eneyami vaga enamwa wagu lagagwarik, ayeloman aup werek ako vage sek agagirik werekma, ha wagagwa.

### Hwa sogwa eyak iluk ogagagi wene

<sup>11</sup> Andi en, hivis Yesus o kota ambi inis Nain lagyama, At ane welagwi menda inim, awakwa wisane inim, lagagwa. <sup>12</sup> O kota sup mbanggut leget wogoma ari lagusim, hwa sogwa ambi eyak ap adik ambenggama hambigya lagagimu, yo duriluk wulu wagusim, it awakwa wisane o kota andoma agarwik inim, isa inim, lagu sogogi. <sup>13</sup> Nenasin Yesus en hwa ako higya lagagirik, abwa wisane imbitya dugwit, "Yup yagya buk," yugogogi.

<sup>14</sup> Yugugu lagagirik, apsawe nggorak yo durik wolok wagusim vanggo yi lagya lagagirik, inggis vagatigi. Inggis vagatya lagagimu, apsawe yo durik wolok wagi ako mbup yugu lagagwama, Yesus en, "Nabut! Hiluk aru! An Yesus en yukhisiga."

<sup>15</sup> Yugugu lagagimu, apsawe hombagagi ako iluk akluk yo durik ako vaga hora iri lagagirik, ane yagagi. Ane iri lagagimu, Yesus en apsawe ako isa wogogogi.

<sup>16</sup> Wogugu lagagimu, it awakwa wisane enalon akluk, Ala siyabagu dugwit, "Ap navi Ala en yugugu hegek yueraliga menda ombok ambi nenanggelekma en mendek yagas o," yugu lagagwarik, "At Ala en at aburi bikninisa waga higyo o," yiluk, yagagwa.

<sup>17</sup> Eke, Yesus ogagagi wene ako o Yudea avilis ambot ovok wigalagagi.

**Yesus hemethaguluk, ima Wombabisaliga menda Yohanes en arwi lakbogogi wene**

(Mat 11:2-19)

<sup>18</sup> Yesus ogagagi wene yagan nagwis ako Yohanes ane welagwi menda en Yohanes [heda mago werema] yugiri lagagwa. Yugiri lagu lagagwama, Yohanes en at ane welagwi menda mberen yanggup yugirigya lagagirik, <sup>19</sup> wagu lagagwama, it yugirigya dugwit, "At warup ako arat waga a, ata adik ambi wasogon yiluk sokhugu dogomwi a? Yesus ako hemetha elales," yiluk, At Nenasin adema lakbogogi.

<sup>20</sup> Lakbogogi ako Yesus adema lagu lagagwarik, At yugugu dugwit, "Ap Ima Wombabisaliga menda Yohanes en yuknirigya dugwit, 'Ala en lakba warup yagagi ako harat wagen a, ata adik ambi wasogon yiluk, sokhugu dogomwi a?' yiluk, hemetha elales, yuknirigya lagama, yukhiri wagyo," yiluk, yugogogwa.

<sup>21</sup> O andi hudi Yesus en avakwa wisane aup warek inim, aup edup yagan warit lagwi inim, madis edup agoda werak enendawima nonggagagi inim, sek okbugu, inil mbuk wisane sek okbugu, ogagyama, lagagwa.

<sup>22</sup> Lagagwa ako en Yesus yugugu lagagwama, Yesus en, "Ogagya hinil neyagep inim, yagan lagya henaruk hunggip inim, andi, heneyami vaga Yohanes yuguri elales. Inil mbuk menda inil hugwi, inisok weyak menda sup sek erogo lagwi, amu hunik menda sek agwi, enaruk nggulup menda enaruk hunggwis, nggorak menda iniluk erogo bugu, eke, ap ininggi dek ako Sek Wene yugirigya, ogasiga ako yuguri elales. <sup>23</sup> Eke, hit An henanggon nombakluk hekbanenggetek halok andi, Ala en adenggen okbugugu dogosogon o," yiluk, yugeragagi.

<sup>24</sup> Yugirigya lagagimu, it Yohanes en yonggo lakbogogi ako enamwa lagu-sigik, Yesus en Yohanes avok avakwa yugirigya dugwit, "Hit nano menda haguluk, o mbedama avakwa dekma lagep? Don angga havut en wolok lagek-wagek yagaliga hak, ap endawi ndaik anderogo haguluk, lagep? <sup>25</sup> Dek! Ap endawi modo haguluk lagep. Nano menda haguluk lagep? Ap ambi asum sek yirik haguluk, lagep? Avyak! It enasum sek adigat yikhidugwi, segedok amburup werak menda adigat nunggwu, ogasagwi ako andi, ap ininis ombok enamwa akoma adigat agarwik. <sup>26</sup> Nano haguluk, lagep? Ap navi Ala en yugirigya hegek yugeraliga menda ambi haguluk, lagep? Avyak! Hit hegep ako andi, at navi ovara, it navi nin andi, un sovalek inigik, at ako andi, mondok iya dombok hegep, yiluk, yukheraliga. <sup>27</sup> At Ala en iri dugwit,

'Hat laup sup yarogo bagaupwak yiluk,

Anen yonggo endak lakbagya hil neyayogon,' † yiluk, yagagi dirup mbalek ako andi, at Yohanes yiluk, yagagi. <sup>28</sup> Yi avakwa ndi avakwa enanggelekma en, at Yohanes iya dombok ako hak ambi endaklagatek. An-

derogo ovara, Ala avema dugwit ininis sovalek agarwik andi, Yohanes horok at sovalek hegek, it mondok ombok dombok dogosogom o," yiluk, Yesus en avakwa yugeragagi.

(<sup>29</sup> At Yesus yugeragagi ako andi, it avakwa ovok erogo ap pemerintah enake yoparip wonggalisagwi menda inim hunggu lagagwarik, Yohanes en it endak ima wombabogogirikmu, "Ala andi, endawi mot adigat agarik," yiluk, yagagwa. <sup>30</sup> Anderogo ovara, it ap Parisi menda inim, Musa wene mamulerelagwi menda inim, it ako andi, Yohanes en it ima wombabininaup nenanggon umbutugwarikmu, Ala en it ogagu dogop inimitigi ako ogo mbo bagagwa.)

<sup>31</sup> Yesus en wene ambi yugirigya dugwit, "It avakwa o yogak agarwik yi, nano ndatak wakhaik? It ngga hak ogasagwi? <sup>32</sup> Dek. Avyak mariduk avakwa pasar ogasagwima hora yiluk, wene onngo-onngo yugu dugwit,

'Nit ndawi viyanggup ovara, hit eyave yegetek.

Eke, de wene viyanggup ovara, hit yup yagatek,' yiluk, yagalagwi andi hak hit anderogo ogagu hinigis.

<sup>33</sup> Hit avakwa yogak agipik ako andi avyak ndatak agipik. Andi, at Yohanes Ima Wombabisaliga ako is nenggetek erom nenggetek welagagi ovara, hiren, 'Madis endawima nonggagas,' yagalagwi. <sup>34</sup> Eke, An Ap At Endaklagagis yi erom inim, amburup inim, ugun nenggek wagya lagagima, hiren yugu dugwit, 'Erom inim, is anggur amburup inim, ovadek en nenggek lagya dugwit, it ap pemerintah enake yoparip wonggalisagwi inim, ap weyak ogasagwi menda inim, it inim hunik oginivit lagya yi, hinil hanes o,' yiluk, yagalagwima, Anen, 'Hit avyak ndatak agipik,' yiluk, yukheraliga. <sup>35</sup> Hit avyak ndatak agipik ovara, Ala endawi werak en ombasiga ako andi, it ogasagwi ovok erogo ogagwi vaga, sek at hugu dogosogom," yiluk, yagagi.

**Yesus en hwa weyak ogagya lagagi omaduk dek okbagagi wene**

<sup>36</sup> Ap Parisi menda ambi inis Simon en Yesus inim erom naguluk, "Oma," yugugu lagagimu, at amwa nunggigya lagagirik, inim erom naguluk, hora yagagi.

<sup>37</sup> Hora iri lagagimu, o kota andoma hwa weyak ogagya lagagi menda ambi en Yesus ap Parisi menda amwa erom naliga aruk hunggigi. Aruk hunggu lagagirik, amburup amben segedok menda iwak helep vaga mendagoma, nudik wolok nonggagagi. <sup>38</sup> Wolok nungwigya lagagirik, Yesus ambukmu andenam mendek yiluk, yup yagya dugwit, yup o angga vaga Yesus isok min okbagagi. Okbagya lagagirik, iris vaga hutu, isok vaga virik-verek iris, ogagya lagagirik, amburup segedok ako isok vaga ndibagagi.

<sup>39</sup> Ap Parisi menda, "Yesus ninim erom naup," yugogogi ako en hwa ako ogagya higya lagagirik, endawi imbita dugwit, "Hwa yi, weyak ogasiga menda atma, ap Yesus yi ako navi avyarat duklip en, 'Hwa weyak

† Maleakhi 3:1 yokhanes.

ogasiga menda en vaknita higi,' yiluk, andi vage yedok helap," imbitigi.

<sup>40</sup> Imbita hegek, Yesus en, "Simon wai. An wene ambi yukhirup imbitirikmu, yukhisogon." Yugugu lagagimu, at ako en, "Yukniru, Nasin."

<sup>41</sup> Yugugu lagagimu, Yesus en, "Ap mberen en ap ambi enanomar mbalek welagagwa. Ambi yoparip 500 *denari* † mbalek, eke, ambi yoparip 50 *denari* mbalek welagagwa. <sup>42</sup> Iperen enanomar mbalek onngo wogorup meyan halok, enabwa en, 'Asugen. Un onngo dek hedomanes,' yiluk, yugeragagi. At asugen yugeragagi ako andi, ap eneyave mberen ako, anomat ombok mbalek welagagi akova mondok endawi hunik imbitigi a, ata anomat maduk mbalek welagagi akova mondok endawi hunik imbitigi a?"

<sup>43</sup> Yugugu lagagimu, Simon en, "Dek. Ap anomat ombok mbalek welagagi ako en mondok endawi hunik imbitigi ai?" yugugu lagagimu, Yesus en, "Yegen andi aro."

<sup>44</sup> Yugugu lagagirik, Yesus en hwa ako bikhigya lagagirik, Simon yugugu dugwit, "Simon wai. Hwa yi hil hegen a? An hamwa nunggu wagya lagima, nisok hurigiluk, haren is woknigitek ovara, at hwa yi ako andi, yup o angga vaga nisok min okbagya, iris vaga hotnita, ogaga. <sup>45</sup> Haren An dinggik-hambup oknetetek ovara, at andi, An nunggu wagi hudi en yogak yi hudi mbup yegetek nisok vaga virik-verek adigat yagaliga. <sup>46</sup> Haren amburup nunggul vaga erabanenggetek ovara, at ako andi, amburup amben sek onngo ombok menda nisok vaga ndibaluk hogabenanggas. <sup>47</sup> Andi vaga en hwa yi, weyak wisane ogagya laga ovara, omaduk dek erogo bagirikmu, mondok endawi hunik iya erogo oknetas. Nit weyak horogat ogagu lagagup ako dek erogo bininggigi, umbutu iniselok andi, un horogat enendawi hunik ombasagwi."

<sup>48</sup> Yugugu lagagirik, hwa ako yugugu dugwit, "Homaduk dek erogo bagagi," yugogogi.

<sup>49</sup> Yugogogi ako, it erom naguluk inim horaik welagagwa ako ir-it yugu dugwit, "Avakwa enomaduk dek erogo bisaliga ako andi Ala adigatma, ap yi sa embetep?"

<sup>50</sup> Yugu-sigik, Yesus en hwa ako yugugu dugwit, "Hendawi novaga vanggabuluk avyarat nembeten vaga Ala en hagap wendakhetas, hendawi ugun hamwa elak," yiluk, yugogogi.

### Akwa en Yesus ake ogagu lagagwa wene

**8** Andi en, at Yesus en Ala avema bisaup Sek Wene ako o kota ombokma inim, madukma inim, yugeregek nagu lagagi. Nagu dugwit, At ane welagwi menda 12 ako inim nagusim, <sup>2</sup> it akwa nin madis enendawima nonggagagi ogo, nin aup edup welagagwa ogo, Yesus en sek okbogogi ako andi, inim nagu la-

† *O Iserael andoma it enayoparip inis andi, DENARI welagagi. Denari ambiat andi, yavup satu hari onngo ndatak wogurugu lagagwa.*

gagwa. It akwa sek okbogogi ako andi, hwa Maria inis ambi Makdalena yugu lagagwa endawima en madis eneyave 7 hudi wibogogi ako inim, <sup>3</sup> hwa ambi Yohana, agun inis Kusa ap ombok Herodes awi aruwam welagagi ako inim, hwa Sutana inim, eke, akwa nin wisane inim nagu lagagwa. It akwa ako enangge-enangge vaga Yesus at aswei inim enake ogagu lagagwa.

### Ap awi lisilit lagagi wakhegek yugeragagi wene

(Mat 13:1-9; Mrk 4:1-9)

<sup>4</sup> It awakwa wisane yi awi ndi awi en Yesus adema homari wagu-sigik, At wene wakhegek ambi yugirigya dugwit, <sup>5</sup> "Ap awi lisilisiga menda en awi lisililuluk, winggigi. Wunggu lagagirik, lisilit lagya hegek, nin sup vaga wombagagi. Sup vaga wombagagi ako awakwa inisok vaga sovalogo baik lagagwarikmu, swa en nungugwa.

<sup>6</sup> Nin helep iri vaga wombagagi. Helep iri vaga wombagagi ako andi, avuduk inggigi ovara, wen mbuk atma, mbuk agagi.

<sup>7</sup> Nin iringga aigyangge werek anggelekma wombagagi. Iringga aigyangge werekma wombagagi ako andi iringga inim inggirikmu, iringga en mbalogo wombanggigi.

<sup>8</sup> Eke, nin wen mudis vaga wombagagi. Wen mudis vaga wombagagi ako andi, avuduk inggya lagagirik mudi-mudis inggya dugwit, adem ambi en enggen 100 yugu, ambi en 100 yugu, ogagagi o," yiluk, yugeragagi.

Wene andi yugirigya lagagirik, ane ombok vaga iri dugwit "Avyak! Henaruk werek halok andi, des erogo at hunggu dogones o," yiluk, yugeragagi.

### Nano yiluk Yesus wene wakhegek vaga yugeragagi wene

(Mat 13:10-17; Mrk 4:10-12)

<sup>9</sup> Yugirigya lagagimu, At ane welagwi menda ako en Yesus hemethugu dugwit, "Hat wene wakhegek yukneregen ako adem nggarogo yiluk yukneregen?"

<sup>10</sup> Yugugu lagagwama, At Yesus en, "Ala avema bigigaup wene At endawima hwilago welagagi ako henelup arovovok yiluk An vagalogo yukheraup ombasiga ovara, it ap nin ako en andi,

'Inil helagwi ovara yedok hegetek,  
Eke, enaruk hulisagwi ovara enendawima dibagatek,  
Dogopwak yiluk,' ††  
wene atok hwilagago heda adigat yugeraliga o," yugeragagi.

### Ap awi lisilit lagagi eyave wene

(Mat 13:18-23; Mrk 4:13-20)

<sup>11</sup> Yugirigya lagagirik, "Wene wakhegek yukhirigi ako eyave sigam erogo yukherayogon. Awi lisilit lagagi ako

†† *Yesaya 6:9 yokhanes.*

andi Ala wene aro. <sup>12</sup> Sup vaga wombagagi ako andi, avakwa en Ala wene hunggu lagaoma, Sile en wagya lagarik, wene hunggugwa ako avyarat ombasagwi vaga enagap wendatya hao en yiluk, ndiyaliluk wolok wilisiga. <sup>13</sup> Eke, helep iri vaga wombagagi ako andi, it avakwa Ala wene hobaluk enadenggen dugwit, wugu lagarwik, sidok avyarat ombasagwi ovara, enendawima omanggen vipak erogo yagetekma hivis enendawi avut mbanggya vaga hekbelagwi aro.

<sup>14</sup> Tringga aigyangge werekma wombagagi ako andi, it avakwa wene enaruk hulisagwi ovara, eneyave dogop vaga enendawi virik werekma, ininggi werek okhedaup adigat enendawi wenggelit lagwi, wen vaga sek dogop adigat enendawi wenggelit lagwi, ogarit lagu dugwit, wene yugup ako mbalogo wombalisagwi aro. Enggen eve sek menda mondok yiligadek.

<sup>15</sup> Eke, wen mudis vaga wombagagi ako andi, it avakwa wene hobaluk enendawi eve sek vaga vipak erogo wugu lagarwik, hunik adigat ogagu dugwit, enggen yiliga ako aro," yiluk, yugeragagi.

**Lambu yevedogo sogolowak avema belagudek wene**  
(Mrk 4:21-25)

<sup>16</sup> Yugirigya lagagirik, ambi yugirigya dugwit, "Lambu yevedogo baluk sogolowak vaga vi wogogo belagudek, eke mbanggu avema belagudek. Ata, yevedogo baluk, it avakwa sup nunggu wandagwi ako awia haupwak yiluk, winimen sigama belagwi. <sup>17</sup> Yi menda ndi menda hwilago agarik halok, sigam agya, eke, wene hose agarik halok, ombok vaga vagalagya, ogarisogon.

<sup>18</sup> Henendawi dibavovok yiluk, An nane henaruk des erogo holek dogwes. It ap avyarat wene dibelagwi halok andi, vivis ambi inim erogo dibapwak yiluk, okbugu dogosogon. Eke, it avyarat wene dibelagwi dek halok andi, horagat inilup dugwit, 'An dibagi,' ombasagwi andi, vivis mondok enunggut okbisayogon o," yiluk, yugeragagi.

**Yesus isa-arwi wagagwa wene**  
(Mat 12:46-50; Mrk 3:31-35)

<sup>19</sup> Yugirigyama, Yesus isa-arwi inim At adema wagu lagagwarik, avakwa wisane homagoma, Yesus werekma umwa nunggup meyan agya lagagimu, <sup>20</sup> avakwa en, "Hisa-harwi bikheyaguluk wagao ovara wasim agarwik," yugogogwa.

<sup>21</sup> Yugugu lagagwama, Yesus en, "Nisai-narwi andi, it Ala wene hobaluk, ogasagwi yi aro," yiluk, yugeragagi.

**Havut endengga "Havolok dek aru," yugogogi wene**  
(Mat 8:23-27; Mrk 4:35-41)

<sup>22</sup> Hivis ndugwis ambi vaga Yesus ane welagwi menda inim mburi-vaga nunggugu lagagwarik, yugirigya dugwit, "Inamut yanggadek ambo ela vikit lasogom o," yiluk, lagagwa. <sup>23</sup> Lagu dugwit, Yesus ako nogo yogogi.

Nogo yugu hegek, inamut yanggadekma o havut endengga ombok wagya dugwit, mburis elola is yanggadi nunggigya hegek, mburis seve yagan wambup ogagagi.

<sup>24</sup> Seve yagan wambigya lagagimu, Yesus adema lagu lagagwarik, iluk okbaluk, "Nenasin wai! Nenasin wai! Is mondok ndokal ninivisiga!"

Yugugu lagagwama, At iluk akluk, o havut endengga inim, inamut mogoliluk ogagya inim, mberugu lagagimu, havut mbup iri lagagirik, is ako avolok dek agagi.

<sup>25</sup> Dek agya lagagimu, Yesus en At ane welagwi menda yugirigya dugwit, "Henendawi novaga vanggabaluk avyarat nombasagwi ako nggayok lagiplik yagalagwi?"

Yugirigya lagagimu, enalon en at ambi en at ambi yugigik yugu dugwit, "Avyak! Is o havut endengga yugugu hegek, At ane hulisiga yi sa embetep? Wi!" yiluk, vok yagagwa.

**Madis ap endawima en wibagagi wene**  
(Mat 8:28-34; Mrk 5:1-20)

<sup>26</sup> Andoma en, is Nggaliliya mbalogo ambo ela vikit en o Nggerasa menda werekma wombagagwa.

<sup>27</sup> Wambugu lagagwarik, At Yesus mburi-vaga en wenvaga wunggu lagagimu, ap ambi kota andoma menda madis endawima nonggagagi Yesus adema lagagi. O muk en umwa welagetek ayum yirikdek, avakwa hambugu-selok wimu bisa landagwima andoma welagagi.

<sup>28</sup> Aren Yesus higya lagagirik, avema seve iri lagagirik, ane ombok vaga, "Yesus wai! At Mondok Siyalek Dombok Agarik Ala abut Hat Yesus yi, an nggarogo okbanigiluk wagen? An edup-mbedup okbaninggya hao en yiluk, yukhisiga," yugogogi. <sup>29</sup> Yugogogi ako andi, Yesus en madis edup agoda werek menda ap endawima en wulupwak yiluk, yuguguma, ap ako en Yesus yugogogi. O muk erogo madis en ap ako vagari wagek adigat ogagya halok, inggis-isok mbusi heda vaga makbaluk, aruwam inigik ovara heda libilogo hekbaluk madis en ap ako viyaliluk o avakwa dekma andoma ba lagek ogagya lagagi.

<sup>30</sup> Madis ako en Yesus yugugu lagagimu, Yesus en, "Hat hini iru!"

Yugugu lagagimu, madis eneyave wisane ap ako endawima nonggagagwarik werekma, "An ninis Wisane o," <sup>31</sup> yiluk, "Ap yi, endawima en wunggu niniselok, wen nggilin eloma wombabininabuk," enane ngges erogo yugogogwa.

<sup>32</sup> Hulik averop andoma wam wisane ambekma buris yigik nagusim werekma, it madis ako en "Ai, wam enendawima andoma nungguguluk lakbininin," yiluk, enane avuput vaga Yesus yugugu lagagwama, Yesus en "E o. Andoma nungwi lales." <sup>33</sup> Yugirigya lagagimu, madis ako ap endawima en wunggu lagagwarik, wam enendawima nunggugu lagagwama, wam ovok erogo lapik-lapikmu andoma en yulup yagan inamut yanggadekma nunggugu lagagwama, is ako en ndokal inipigi.

<sup>34</sup> It wam endak hedugu lagagwa menda en wam is ndokal inipu ako hugu lagagwarik hoda sak yagan wunggu dugwit, wam is ndokal inipigi wene ako o ombokma im, o madukma im, yugeregek nagu lagagwa.

<sup>35</sup> Yugeregek nagu lagagwama, ogagagi ako awakwa bikhaguluk enamwa en wunggu lagagwarik, Yesus adema lagagwa. Lagu lagagwarik, ap madis endawima en wungugwa ako endawi sek eve ap akluk yum yirik Yesus avema horaik werekma hagagwa. Hugu lagagwarik, enalon umbutugwa.

<sup>36</sup> Enalon umbutu lagagwama, it endak oklagagi inil hagagwa ako en madis wisane ap endawima nonggagwa Yesus en wibogogi wene mbilinogo yugeragagwa.

<sup>37</sup> Yugurugu lagagwama, it awakwa o Nggerasa menda yi awi ndi awi andoma ovok erogo mondok enalon wisane agu lagagwarik, Yesus amwa wulupwak yiluk, yugogogwa. Yugugu lagagwama, Yesus mburi-vaga nunggigya lagagirik eyami vaga winggigi.

<sup>38</sup> Wungguma, at ap madis endawima wungugwa ako en, "Ninim lasogom," yiluk ane avuput vaga Yesus yugogogi ovara, Yesus en at amwa lakbagya dugwit, <sup>39</sup> "Hamwa heyami vaga lagya dogomindik, Ala en okbagagas ako mbilinogo yugerelak." Yugugu lagagimu, lagya lagagirik, at amwa o kota andoma ovok erogo, "Yesus en yerogo okbenanggas," yiluk, mbilinogo yugeregek nagu lagagi.

**Yairus abut inim, hwa Yesus asum vagatigi inim, sek oginipigi wene**

(Mat 9:18-26; Mrk 5:21-43)

<sup>40</sup> It awakwa wisane Yesus warupwak yiluk, sokhugusim, eyami vaga inggya lagagimu, heyaga warogo wogogwa. <sup>41</sup> Wugu lagagwama, ap ambi it Yakuri samban ogasagwima enasin inis Yairus Yesus adema wagya lagagirik, avema seve yiluk, "An namwa niperen lasogom en, oma o," yiluk, ane avuput vaga Yesus yugogogi. <sup>42</sup> At abut ambilom adik ambenggama hwayyak endago sawe hegek 12 tahun ogagagirikmu, mondok hambigiluk ogagyama yugogogi.

Yugugu lagagimu, Yesus ako lagya hegek, it awakwa wisane inim linggiluluk lagagwa. <sup>43</sup> Lagusim, hwa ambi amuya ogagya hegek, 12 tahun ogagagirikmu, sek arigiluk angge ovok erogo ndokter wogoragagi ovara, sek agetek welagagi. <sup>44</sup> Hwa ako Yesus ambetaga lagya lagagirik, asum atok inggi vagatya lagagimu, amuya ogagya lagagi ako dek agagi. <sup>45</sup> Dek agya lagagimu, Yesus en, "Sa en vaknetas?"

Yugirigya lagagimu, it wisane erogo dik-dek yugusigik, Peterus en at yugugu dugwit, "Nasin o. It awakwa wisane yi linggilherelok wagu dugwit, sagambit erogo bagagu-sigis!"

<sup>46</sup> Yugugu lagagimu, Yesus en, "Dek. An nanye ambi dek agya higerikmu, sa en vaknetas?"

<sup>47</sup> Yugugu lagagimu, hwa ako en, "Vage yedok neyagas higi o," yiluk, alon en owak de-de iri dugwit, Yesus

avema seve iri lagagirik, awakwa ovok inivaga adem ngga vaga Yesus ayum vagatigi inim, eke ao vagatya hegek eyave sek agagi ako inim, vagalogo yugogogi. <sup>48</sup> Yugugu lagagimu, Yesus en, "Nabut o. Hendawi An novaga vanggaluk avyarat nembeten vaga sek agenma, hendawi ugun hamwa elak," yugogogi.

<sup>49</sup> Ao yugugu hegek, ap ambi it Yakuri samban ogasagwi enasin amwa akoma en wagya lagagirik, ap Yairus ako yugugu dugwit, "Habut vage hombagarikmu Nenasin Ngguru yi sup enam warogo wolok lagun en."

<sup>50</sup> Yugugu ako At Yesus aruk hobaluk, Yairus yugugu dugwit, "Halon ombarubuk. Hendawi novaga vanggaluk avyarat nombasiga halok, habut sek asogon," yugukluk, <sup>51</sup> ap ako amwa lagagwa.

Lagu lagagwarik, it awakwa ovok erogo wasim dogopwak yiluk, yugirigya lagagirik, Peterus o, Yohanes o, Yakubus o, hwayyak isa-asin o, ako adigat woginiviluk amwa nonggagagi. <sup>52</sup> Nunggwigya lagagirik, awakwa ovok yup yagu dugwit eneyave wakhidugwi inugu lagagirik, "Yup yarubuk. Hwayyak yi hombagabuk un nogo yiligama, yup yarubuk."

<sup>53</sup> Yugirigya lagagimu, it awakwa en hwayyak ako hombagas ovok enelupma, At agenda yagagwa.

<sup>54</sup> Agenda yagagwa ovara, Yesus en hwayyak ako inggis vagatya dugwit, "Nabut mendek iru!" <sup>55</sup> Yugugu lagagimu, hwayyak ako [mondok hombagagi ovara] endawi yaklari wagya dugwit, mendek yagagi. Mendek iri lagagimu Yesus en, "Hwayyak yi erom naupwak yiluk wogeres." <sup>56</sup> Yugirigya lagagimu, hwayyak isa-asin ako en, "Wi!" yiluk, vok yugu lagagwama, Yesus en, "Ogagya neyagep ako awakwa mondok yugerabuk," yiluk, inaruk watigi.

**At Yesus ane welagwi 12 menda ako lakbogogi wene**

(Mat 10:5-15; Mrk 6:7-13)

**9** Ndugwis ambi vaga, at Yesus en it ap 12 menda ako homari warupwak yiluk, yanggup yugirigya lagagirik, wagu lagagwama, At anye vaga it enanye okbisiluk, yi madis ndi madis ovok erogo awakwa enendawima en nggilogo wibugwis, yi aup ndi aup edup halok, sek okbugwis, At inis vaga ogonivit nagu dogopwak yiluk, awene yugeragagi. <sup>2</sup> Awene yugirigya lagagirik, Ala avema bisaup wene yugeregek lagwi, awakwa sek ogonivit lagwi, ogarit nagu dogopwak yiluk, lakbugu dugwit, <sup>3</sup> "Hit lagu dugwit, yi menda ndi menda henowanggun inim, yerek-terek wokhiruguselok yekhedamenda yum inim, henagarom henayoparip inim, henasum vakean mberen inim, wolok labuk heneyave adigat elales. <sup>4</sup> Hit o hunogoma lamundikmu, ap ambi en wokhinipu-selok, hinim adigat o kota andoma dogomundik, o kota adikmu andoma laup halok andi, laup. <sup>5</sup> Yi awi ndi awi lamundikmu, heyaga warogo wokhinipitek halok andi, enamwa o kota en wunggu dugwit, inil vaga inilamundinek hin-

isok vaga mupak hak horogo baluk, andoma en wilitalo o.”

<sup>6</sup> Yugirigya lagagimu, lakbogogi ako lagu lagagwarik, yi awi ndi awi lagu dugwit, Sek Wene yugurugwi, avakwa sek okbugwis, ogarit nagu lagagwa.

**Ap Herodes endawi obak agagi wene**

(Mat 14:1-12, Mrk 6:14-29)

<sup>7</sup> Ogarit lagwi ako it avakwa en inigu lagagwarik, Yesus andi sa yiluk, it nin en “At andi, at Yohanes Herodes en mondok watigirikmu hambuluk bisa lendagwima en iluk akluk, mendek yagas ai,” yugwi, eke, it nin en, “Dek. Ap navi endak welagagi Elia ako sigam aga ai,” yugwi, eke, it nin en, “Dek. Ap muk Ala en yugirigya hegek yugurugu lagagwa navi-navi akoma menda ambi iluk akluk, mendek yagas o,” yugwi, yagan lagwi ako ap inis ombok Herodes ako aruk hunggu lagagirik, endawi obak agagi. <sup>9</sup> Endawi obak dugwit, “Anen Yohanes unggul mbalupwak yiluk yugirigya lagagimu, mondok watugwa ovara, ogarit landiga naruk hunggis yi, sa en ogarit landiga?” yiluk, Yesus bikhagiluk, ogagagi.

**Ap 5000 erom ugurogo wogoragagi wene**

(Mat 14:13-21; Mrk 6:30-44; Yoh 6:1-14)

<sup>10</sup> It ap lakbogogi ako eneyami vaga wagu lagagwarik, ogarit nagu lagagwa ako Yesus mbilinogo yugogogwa. Yugugu lagagwama, At Yesus en woginiviluk o kota ambi inis Mbesaida enadikmu ari lagagwa. <sup>11</sup> Enadikmu ari lagagwa menda, avakwa wisane “Yesus andoma laga,” enaruk hunggu lagagwarik, amusek lagagwa. Amusek lagu lagagwama, Yesus en heyaga wakbugu lagagirik, Ap Ala en denogo mendok okbagagi ako avakwa at avema dogopwak yiluk sup hutbayogon wene yugirigya, eke, eneyave aup edup halok, sek okbugu, ogagagi.

<sup>12</sup> Ogagya hegek, mo il vage huruk yigiluk ogagya hegek, it ap 12 ako At adema wagu lagagwarik, yugugu dugwit, “Nenasin. O yoma avakwa enawi dekma wagyo atma, it avakwa wisane homari wagao yi, o ombokma inim, o madukma inim, andoma enagarom onngo hunogombo nunggi nogo yupwak en, lakbisin.”

<sup>13</sup> Yugugu lagagwama, At Yesus en iri dugwit, “Enagarom naupwak yiluk, hiren wogeranes.”

Yugirigya lagagimu, iren, “Nit roti 5, eke, ikan mberen at agarikma, avakwa wisane yi, enagarom huni laup sek yiluk yagaliga a?” yiluk, yugogogwa. <sup>14</sup> (Yugogogwa andi, ap eneyave adigat lima ribu hudi werek yiluk, yugogogwa.)

Yugugu lagagwama, Yesus en At ane welagwi menda ako yugirigya dugwit, “It avakwa enarwi 50 dombok ogorogo hora yupwak yiluk, yugeranes.” <sup>15</sup> Yugirigya lagagimu, anderogo at hora okbogogwa.

<sup>16</sup> Hora okbugu lagagwama, At Yesus en roti 5, ikan mberen inim, inggimu wigya lagagirik, elese mbotog

vaga ilik lagya dugwit, “Nasin Ala wa!” yiluk, ugutigi. Ugurogo At ane welagwi menda en avakwa homago ako sumbureraupwak yiluk, wogoragagi. <sup>17</sup> Wogoragagi sumburirugu lagagwama, it ovok erogo nunggu lagagwarik, enagaum agagi. Enagaum agya lagagimu, nin higitlagagi ako yum mburin yedogo 12 hudi bagagwa.

**Peterus en, “Hat Keretus aro,” yugogogi wene**

(Mat 16:13-29; Mrk 8:27-29)

<sup>18</sup> Andi en, havis ndugwis ambi vaga Yesus adikmu samban ogagyama, At ane welagwi menda ako adema wagu lagagwama, Yesus en enaigwakma wigya dugwit, “It avakwa en An sa numbutu dugwit, yagalagwi?”

<sup>19</sup> Yugirigya lagagimu, iren yugugu dugwit, “Avakwa nin en, ‘At Ima Wombabisaliga menda Yohanes ako aro,’ yugwi, eke nin en, ‘Elia aro,’ yugwi, eke, nin en, ‘Ap muk Ala en yugirigya hegek yugurugu lagagwa navi-navi ako menda ambi iluk akluk, mendek yagas,’ yugwi, yagalagwi o.”

<sup>20</sup> Yugugu lagagwama, Aren it yugirigya dugwit, “Eke, hit andi, An sa numbutu dugwit, yagalagwi?”

Yugirigya lagagimu, at Peterus en, “Ala en denogo bagagi Keretus andi Hat at higyo o.”

<sup>21</sup> Yugugu lagagimu, At Yesus en, “An navok yegep andi, avakwa mondok yugera labuk,” yiluk, enaruk watigi.

**“Anggin-mbanggin erogo narusogom,” yugeragagi wene**

(Mat 16:21-28; Mrk 8:31-9:1)

<sup>22</sup> Enaruk wakbaluk, yugirigya dugwit, “An Ap At Endaklagagis ako mondok novaga anggin-mbanggin erogo banusogom. It ap ombok-ombok inim, it imam-imam enasini inim, Musa wene mbalek mamulereagwi menda inim, enanggon en hekbanunggu dugwit, narusogom. Natu dogomima, hambigya dogomindik ndugwis mberen dukluk ndugwis ambi vaga Ala en niluk erogo mondok okbanisogon o.”

<sup>23</sup> Yugirigya lagagirik, it avakwa ovok erogo wene yugirigya dugwit, “Hit An nane wokbaluk ninim nagu dogop umbutu dugwit halok, yi menda ndi menda ogarup ombasagwi ako hetbisiluk, ndugerek-ndagarek yo winik ako hedelok, An ninim at nagu dogosogom.

<sup>24</sup> Hit heneyave hinidi okhidugu dugwit, an nane mbo bamwi halok, heneyave yelemele yusogom. Eke, An nini ombok arupwak yiluk, heneyave idi dek okbetamwi halok, hinidi erek dogosogom. <sup>25</sup> Hit yi awi ndi awi ovok erogo andok okhidugu dogomundik, heneyave yelemele yusogom halok, andi vaga nano okhedaguluk, yagan nagu dogop embetep? <sup>26</sup> Ap ambi sa en An ninis inim, An avakwa inivaga alon en yegetek dogoso-

† *NDUGEREK-NDAGAREK YO WINIK HEDELOK YESUS INIM NAGU DOGOP adem andi, Yesus yo winik vaga yagan watigi ako hak, nit Yesus ake hambup sek yiluk nenendawi sek vaga o ndugerek-ndagarek Yesus eyavup ogarit lagu dogop.*



gon halok, hivi An ninim, an Nasin inim, it Ala ake ogagu dogop denek agarwik malaikat inim, mondok abinak werek dugwit niniris nenovagangge yikedelok wagu dugwit, An Ap At Endaklagagis yi en ap ako inis yisogonbuk. <sup>27</sup> Dibas! Hit avakwa yoma agipik andi, nin ao hambegetek hinigik, avakwa Ala avema bisa wagya ako hinil hasogom o," yiluk, yugeragagi.

**Yesus ndom vaga en elese adik agagi wene**

(Mat 17:1-8; Mrk 9:2-8)

<sup>28</sup> Wene andi yugirigya lagagirik, samban ambi ok-baluk, Yesus en Peterus o, Yohanes o, Yakubus o, woginiviluk samban ogaruguluk, ndom vaga unggugwa. <sup>29</sup> Unggu lagagwarik, Yesus samban ogagyama, At elese adik agya lagagirik, asum mudu amumulip digavok ovagak agya hegek, <sup>30</sup> abinak yevedek vaga ap mberen Musa Eliya eneyave sigam ari wakluk, Yesus o Yerusalem hambup atma des yup agagi wene ako, Yesus inim wene mbanggugwa.

<sup>32</sup> Wene mbangu-sinigik, ap Peterus aswei inim mondok nogo yup okbogogi ovara, iniluk agu lagagwarik, Yesus mondok abinak ovaga werekma, ap mberen inim enogogwa. <sup>33</sup> Inigu lagagwarik, it ap mberen ako Yesus hekbaluk, dagaguluk ogagusim, Peterus en Yesus yugugu dugwit, "Nasin guru wai. Nit yoma agurik yi sek atma, eravo henggam ambi Hat, ambi Musa, ambi Eliya at valogo bigigasogom," yugogogi. (Andi yugogogi ako we ugun inggutmu, yugogogi.)

<sup>34</sup> Ako ao yugugu hegek, hena wagya dugwit, lovarogo bogogi. Hena enovaga lovakbisa wagya lagagimu, enalon wisane agu-sigik, <sup>35</sup> hena anggelekma en ane iri dugwit, "An nabut denogo bagagis ako yi atma, At ane des erogo hunggu dogones." <sup>36</sup> Iri lagagimu, bikhugu lagagwarik, Yesus adigat hagagwa. Hugu lagagwarik, ogagya hagagwa ako, andi hudi vaga avakwa mondok yugeregetek mbup yagagwa.

**Madis avyak endawima en wibagagi wene**

(Mat 17:14-18; Mrk 9:14-27)

<sup>37</sup> Hutun At Yesus ane welagwi menda inim ndom vanga akoma en wambu wagu lagagwama, avakwa wisane At adema lagagwa. <sup>38</sup> Adema lagu lagagwarik, avakwa wisane homari lagagwa ako ambi en ane ombok vaga Yesus yugugu dugwit, "Ngguru wai. Nabut ambulom endagoma bikhankok yiluk, yukhisiga, nasin! <sup>39</sup> Madis en avyak ako vagari wagek adigat ogagya halok, na iri hegek, legogo wen vaga ane ndun okbagya lagarik, inggis-isok ndogom-ndogom yupwak yiluk okbagya, owari-lagap ogarupwak yiluk, okbagya, ogagya lagarik, wasiga. Hekbaluk, wulup andi, ombasigadek aro. <sup>40</sup> Anen hat hane welagwi menda ako madis nggigilogo wibaupwak yiluk, yugirigi ovara, iren nggigilogo wibaup meyan."

<sup>41</sup> Yugugu lagagimu, At Yesus en, "Hit avakwa yogak agipik yi, henendawi novaga vanggabuluk, avyarat

embetetek weyak adigat ogarup ombarit nagwis yi, An ndugwis maren nendawi seve yiluk hit hinim dogop?" yiluk, yugirigya lagagirik, ap abut edup werek ako yugugu dugwit, "Habut wolok oma."

<sup>42</sup> Yugugu lagagimu, ao wolok wagya hegek, madis ako en avyak eyave legogo wen vaga ndun okbagya lagagirik, inggis-isok ndogom-ndogom yupwak yiluk okbagagi. Okbagya hegek, At Yesus en madis edup agoda werek menda ako mberugu lagagirik, avyak ako sek okbagya dugwit asin wogogogi. <sup>43</sup> Wogugu lagagimu, it avakwa en Ala anye wisane hugu lagagwarik, "Wi!" yiluk, vok yagagwa.

**"Narusogom o," yiluk, ambi inim yugeragagi wene**

(Mat 17:22-23; Mrk 9:30-32)

Yesus yi ogagek ndi ogagek ovok ogarit lagya vaga, it avakwa ovok en, "Wi!" yiluk, vok yugu-sigik, Yesus en At ane welagwi menda ako yugirigya dugwit, <sup>44</sup> "An wene yukheraliga yi, des erogo henaruk holes. An Ap At Endaklagagis yi, narupwak yiluk neyave vagogo ap wogirigya hagup." <sup>45</sup> Yugeragagi ovara, it dibagatek welagagwa. Eke, wene andi, hwilago ovagak yugeragagima, yedok hegetek ovara, "Yukneregen ako andi, nggarogo yukneregen?" yiluk, enalon en aigwakma wegetek mbup yagagwa.

**"An iya, hat iya," yiluk, wene alelo watugwa wene**

(Mat 18:1-5, Mrk 9:33-37)

<sup>46</sup> Andi en, hivi Yesus ane welagwi menda en, "An iya hat iya," yugu dugwit, wene alelo watugwa. <sup>47</sup> It enendawi umbutu dugwit, wene alelo watwis ako At Yesus yedok inugu lagagirik, avyak maduk ambi wogogo alilimu mendek okbaluk, <sup>48</sup> it ako yugirigya dugwit, "At ambi henanggelekma mondok sovalek agarik halok andi, at ap ombok adigat agarik. Anderogo atma, ap ambi an nane wokbaluk, at avyak yi, waliga halok andi, An at wokneraliga, eke, An wokneraliga halok andi, At lakbani wagagi ako waliga o," yiluk, yugeragagi.

**"Hinim ogorek dek halok hit menda at," yugeragagi wene**

(Mrk 9:38-40)

<sup>49</sup> Yugirigya lagagimu, Yohanes en, "Nasin wai. Ap ambi nit ninim nelagwi dek ovara, aren Hat hinis vaga madis nggigilogo wibagya ninil hugu lagurik, 'Moga' yugugup," yugogogi. <sup>50</sup> Yugugu lagagimu, At Yesus en, "'Moga,' yugurubuk. It hinim ogorek dek halok andi, hit menda aro," yugeragagi.

**Samaria menda en, "Yesus ninim dogobuk," umbutugwa wene**

<sup>51</sup> Andi en, hivi At Yesus mbogot vaga wolok dagaup vage vanggo yi wagya lagagimu, Yesus o Yerusalem laup yiluk, endawi mondok mbuk agya lagagirik dugwit, <sup>52</sup> yonggo endak lakbisa lagagi lagu lagagwarik, at

wagyama ake vipuk erogo baupwak yiluk, avakwa Samaria menda enamwa o desa andoma ambi nong-gagagwa. <sup>53</sup> Nunggugu lagagwama, avakwa o Samaria menda en, Yesus o Yerusalem mondok laup imbitya yedok hugu lagagwarik, [enendawi weyak umbutu dugwit] "Yerusalem laup embetarikmu, ninim dogop nenanggon, laupwak," umbutugwa. <sup>†54</sup> It anderogo umbutwi At ane welagwi menda Yakubus Yohanes iperen inigu lagagwarik, "Nenasin wai! Hali mbogot vaga en yevedogo iniri wambu warupwak yiluk, yuguruk ai?"

<sup>55</sup> Yugugu lagagwama, ena endenogo biginugu dugwit, mbereragagi. <sup>56</sup> Mberirigya lagagirik, o adik ambima lagagwa.

### Yesus inim nagu dogop wene

(Mat 8:19-22)

<sup>57</sup> Sup vaga lagusim, ap ambi en Yesus yugugu dugwit, "Hat yi awi ndi awi nagu dogop imbita heyalok, an hat hinim at nagu dogosogon."

<sup>58</sup> Yugugu lagagimu, At Yesus en, "Yangge do andi, enawi yo masalekma homoma agarwik, eke, swa mbogot vaga nelagwi ako, enawi yo vaga valek agarwik, ovara, An Ap At Endaklagagis yi andi, nogo yiligama mondok dek," yiluk, yugogogi.

<sup>59</sup> Yugugu lagagirik, Yesus en ap adik ambi yugugu dugwit, "An hat hinim nagu dogosogom o," yugogogi ovara, ap ako en, "Ai, nasin! Endak nasin wen sabaluk, hinim lasogom en, 'Sek,' yukniru."

<sup>60</sup> Yugugu lagagimu, At Yesus en, "It avakwa Ala wene enendawima dek halok andi, nggorak ndatak at agarwik ako menda en enowa-enasin hambugu-selok, wen sabugu dogopwak yiluk, hekbisin. Hat andi, Ala en avakwa At avema dogop sup hutbagagi wene ako, yi awi ndi awi yugeregek nagu dogwen," yugogogi.

<sup>61</sup> Yugugu lagagimu, ap adik ambi en Yesus yugugu dugwit, "Nasin. Hat hinim nagu dogosogon imbiti ovara, lagiluk, endak nowa-nasin yugera lapim, 'Sek,' yukniru."

<sup>62</sup> Yugugu lagagimu, At Yesus en, "It avakwa en an ninim nagu dogop yugu dugwit, enambokan biginugu-selok, Ala avema dugwit Ala eyavup ogarit lagya dogop meyan," yiluk, yugeragagi. <sup>††</sup>

### Yesus en ap eneyave 70 denogo lakbogogi wene

**10** Andi en, havis Nenasin Yesus en ap adik 70 denogo lakbugu dugwit, yi awi ndi awi o kota dombok laup imbitigirikmu akoma it enendak mberen

<sup>†</sup> It SAMARIA menda andi it enombawi Yakuri menda ovara, it Yakuri menda nin en, "Hit nit menda dek," yiluk, yugu lagagwama, it Yakuri menda inim ogorek welagagwa. It Yakuri menda o Yerusalem samban ogari lagu lagagwa ovara, it Samaria menda en o Ndom Gerasim vaga samban ogagu lagagwa. Andi halok, ap Yakuri menda sup Samaria vaga Yerusalem lagu-selok, 'Nenanggon,' umbutu lagagwa. <sup>††</sup> Wene andi, Ala eyavup sek ogarit lagusim ovara, wene adik ambi ari wagya halok musek lagya dugwit, Ala avema dogop andi meyan halok, yagagi.

hondok lakbogogi. <sup>2</sup> Lakbugu dugwit, "Enggen yugup wisane aga ovara, mbalisagwi menda eneyave horok ambukumat atma, at enggen yugup andok werek Ala ako en, enggen mbalisagwi menda lakbisaupwak yiluk, yugugu dogones.

<sup>3</sup> Eke, hit andi, elales. Hit ndomba ovagak yi, avakwa yangge do ovagak werekma, enanggelekma lakbigigaliga. <sup>4</sup> Lakbigigaligama, henayoparip wonggalek inim, yerek-terek wokhirugu-selok yekhedamenda yum inim, henaropato ambi adik inim, andi wolok labuk heneyave adigat elales. Eke, suvaga lagu dugwit, it avakwa iniselok, heyaga wakbigik labuk.

<sup>5</sup> Avakwa enamwa ambima nunggugu dogomundik, endak heyaga wakbugu dugwit, 'Wa! Ala en adenggen ombok erogo henovaga okbugugu dogopwak o,' yiluk, yugerano. <sup>6</sup> Ap enawi werek ako enendawi sek vaga, 'Yi nit nenaswei aro,' yiluk, wokhinipu-selok, adenggen enovaga bisamwi ako enovaga asogon. Eke ap ako enendawi weyak en wokhinivup enanggon umbutu-selok andi, adenggen enovaga bisamwi ako, enovaga asogonbuk sugulogo hit henovaga at okhedelok, wilitalo. <sup>7</sup> It avakwa en hit wokhinivup umbutu-selok, enamwa hinim andoma at dogop. It ap yavup ogasagwi yavup onngo waup sek atma, hinim dugwit, henagarom yi menda ndi menda menakhirugu-selok, andi nunggu dogop. Ya nogo yigik nda nogo yigik yagan nagu dogobuk.

<sup>8</sup> Hit o kota ambima nungumundikmu, heyaga warogo wokhinipu-selok, enagarom menakheramwi andi at nunggu dogop. <sup>9</sup> Eke, avakwa andoma aup warek iniselok, sek okbugu dugwit, 'Ala avema bigigaup vage henadema vanggo yi waga o,' yiluk, yugurugu dogop. <sup>10</sup> Eke, o kota ambima nungumundikmu, it avakwa en wokhinipitek iniselok andi, weram sup ombok vaga wunggu dogomundik, yugurugu dugwit, <sup>11</sup> 'Henovaga asogon ako andi, henovadombok, henelup arovovok yiluk, nit henamwa dugwit, ninisok vaga mupwak hondo yagas ako horogo bigelagwi. Ala avema bigigaup vage henadema vanggo yi waga, avyarat umbutu dogones,' yiluk, yugerano. <sup>12</sup> O havis avakwa enowak dilup hudi vaga it avakwa o Sodom endak welagagwa andi <sup>‡</sup> horogat enasogon ovara, it ap o kota andoma menda ako andi, mondok iya erogo enasogon, yiluk, yukheraliga," yugeragagi.

### Yi awi ndi awi avyarat embetetek halok, yugeragagi wene

(Mat 11:20-24)

<sup>13</sup> Wene ambi iri dugwit, "Hit avakwa Korasim menda andi, anggin henovaga arugup! Eke hit avakwa Mbe-saida menda andi, anggin henovaga arugup! Nnggarogo ogarubuk menda henamwa ogagya neyagagup ako, an o Tirus Sidon andoma ogagatek. An ogagatek ovara, o Tirus Sidon andoma ogagya dukli en, it avak-

<sup>‡</sup> It ap Sodom menda andi, mondok weyak ogaguselok, Ala anin en hali abya vaga enatigi. Kejadian 19 yokhanes.

wa andoma menda en it weyak ogasagwi ako enasam helap. Enasam hugu dugwit, hora yiluk enayum weyak yikhidugwi, isaben enagap vaga wakhidugwi, ogaklip. <sup>14</sup> Anderogo atma, havis enowak dilup agya vaga avakwa Tirus Sidon menda andi, we un horogat enasogon ovara, hit Korasim Mbesaida menda ako andi, mondok iya erogo henasogon. <sup>15</sup> Eke, hit avakwa Kaperenaum menda andi, 'Nit mbogot vaga siyabininayogon,' yiluk, yagalagwi yi? Mondok dek. It hambuluk landagwima yagamu andoma mbo womba bigigayogon, umbutu dogwes," yiluk, yagagi

<sup>16</sup> Iri lagagirik, At ane welagwi menda ambi yugirigya dugwit, "It avakwa hit henane hunggu-selok andi, An nane hulisagwi, hit hekbugugu iniselok andi, An hekbanungwi, eke, iren An hekbanunggu-selok andi, At lakbani wagagi ako hekbelagwi aro," yiluk, yugirigya lagagirik, lakbogogi.

#### It ap 70 ako eneyami vaga wagagwa wene

<sup>17</sup> Andi en, havis it ap 70 lakbogogi ako enadenggen embetek eneyami vaga wagu dugwit, "Nenasin! Madis ogo Hat hinis vaga yugurugu niniselok, hunggu-sug-up."

<sup>18</sup> Yugugu lagagwama, At Yesus en, "Hit madis avakwa enendawima en nggigilogo wibugu hinigik, An en at Sile o bigavok ogasiga ako ovagak mbogot vaga en anye dek agya dugwit wambu wigya hagagis. <sup>19</sup> Mbas avakwa enasiga inim, hagudi inim, hinisok vaga sovalogo bagwi, at hinim ndup ogorek ako anye dek erogo bagwi, ogagu dogovovok yiluk, An nawene yukhirigi. Nawene yukhirigima, weyak edup menda ambi heno-vaga asogon mondok dek aro. <sup>20</sup> Anderogo ovara, it madis henane hulisagwi ako vaga henendawi adenggen ombarubuk. Ata, hininis mbogot vaga eloma dirup mbalek agarik ako vaga henendawi adenggen umbutu dogones," yiluk, yugeragagi.

#### Endawi adenggen en Ala heyaga watigi wene

(Mat 11:25-27; 13:16-17)

<sup>21</sup> Ndugwis andi vaga Yesus endawima Averiniki en adenggen wisane okbagya lagagimu, Ala heyaga watya dugwit, "Wen-mbogot andok Hat Nasin wa yukhisiga. Hat ogarup yi ako, it ap enendawi werek inim, enendawi anggat inim, enelup agusao en, hwilak baluk, mariduk swi endago ovagak vagalogo yugeragaginma wa. Anderogo ogarup hendawi sek ombakluk ogagaginma, Nasin wa, yukhisiga o."

<sup>22</sup> Yugugu lagagirik, "An Nasin en yi menda ndi menda ovok erogo An nandok dogopwak yiluk, woknigas. Ala abut andi sa? It avakwa ininggut Nasin adigat elup agarik. Eke, Nasin andi sa? Andi, At abut An nelup agirik. Eke, abut An en it avakwa Nasin enelup arupwak yiluk, vagalogo yugeraup imbitya neyalok, it ogo, enelup asagwi," yiluk, yugeragagi.

<sup>23</sup> Yugirigya lagagirik, At ane welagwi menda il biginigu lagagirik, enadikmu yugirigya dugwit, "An ogarit lagya hit hinil neyalagwi ako, it avakwa hugu-selok, hit hinim henendawi adenggen erogo hugu dogosogom.

<sup>24</sup> Andi, hit hinil helagwi ako, it o muk welagagwa Ala en yugirigya hegek yugaliga menda navi-navi inim, it ap ombok-ombok ininis werek inim, it wisane en, 'Helao dek ai,' umbutu lagagwa ovara, ao halok, hegetek welagagwa. Eke, hit hulisagwi ako, iren, nenaruk 'Hulup dek ai,' umbutu lagagwa ovara, hunggitek welagagwa, yiluk, yukheraliga o," yugeragagi.

#### Ap Samaria menda aigwak abet en ap sek okbagagi wene

<sup>25</sup> Andi en, havis ndugwis ambi vaga ap Musa wene mamuleraliga menda ambi en Yesus avut mbaligiluk, wagya lagagirik, yugugu dugwit, "Ngguru wai. An mondok-mondok niluk dogogiluk, nggarogo ogarik?"

<sup>26</sup> Yugugu lagagimu, At Yesus en, "Musa wene mbalek andi, nggarogo mbalek agarik? Hat hil nggarogo haliga?"

<sup>27</sup> Yugugu lagagimu, ap ako en, "Heneyave henanye inim, henendawi henanggela inim, ovok at henasin Ala adigat henendawi hunik ogagu dogwes.' Eke, ambi, 'Hit heneyave henendawi hunik okhedelagwi ako hak, it hinim agipik ako anderogo at henendawi hunik oginipu dogwes, Ala wene anderogo mbalek agarik,'" yiluk, yugogogi.

<sup>28</sup> Yugugu lagagimu, At Yesus en, "Sek yegen. Yegen ako ndatak ogagya heyalok, hiluk mondok-mondok dogogun."

<sup>29</sup> Yugugu lagagimu, ap ako, "An sek-sek," nombarupwak yiluk, Yesus yugugu dugwit, "Eke, nendawi hunik oginivik en it ninim agirik andi sa?"

<sup>30</sup> Yugugu lagagimu, At Yesus en wene wakhegek vaga at onngo yugugu dugwit, "Ap ambi Yakuri menda o Yerusalem en o Yeriko wombagagi. Wambigyama, ap enonggop welagwi menda en vagarogo ndun okbaluk, asum angge-angge ovok erogo ndiyanggu dugwit, eyave watu lagagwarik, andenam hambupwak yiluk, hekbaluk wunggugwa.

<sup>31</sup> Wunggu-sigik, havis ap imam ambi we ugun sup andi vaga lagya dugwit, ap warek ako higya lagagirik, hegek lagagi. <sup>32</sup> Lagya hegek, havis ap Lewi † menda ambi anderogo sup andi vaga ugun lagyama, ap watugwarikmu ari lagya dugwit, eyave warek andenam hegek, alilirup mbikit lagagi.

<sup>33</sup> Lagya hegek, havis ap Samaria menda ambi sup andi vaga wagagi. [It Samaria menda andi, it avakwa Iserael menda inim ogorek welagagwa.] Wagya dugwit, ap warek ako il hagagi. Il higya lagagirik, abwa ombakluk, <sup>34</sup> adema lagya lagagirik, agavelo libiklobak erek ako hotbaluk, anggur amburup inim, am-

† Ap LEWI menda andi, Ala eyavup o Ala awi valekma ogagu lagagwa. It Ala ake vagago welagagwa. 1 Tawarikh 23:28-32 yokhanes.

burup adik menda inim, eralogo heda makbagya lagagirik, eyave wogogo at anggong keledai vaga hora okbaluk avakwa nogo yilagwima hunogoma ba nonggagagi. Ba nunggwigya lagagirik, andoma aruwam wela-gagi.

<sup>35</sup> Eke, hutun at ayoparip mbusi verak mberen wogogo ap nogo yilagwima awi werek ako wogugu dugwit, 'Ap yi aruwam dogwen. Aruwam dugwit, wokhigis yi ako dek agya halok, hat hangge ambi lobalogo hunggu dogomi halok, an wagya dogomindik, avoloma wokhisogon,' yugogogi," yiluk, Yesus en ap Musa wene mbalek mamuleraliga menda ako yugogogi.

<sup>36</sup> Yugugu lagagirik, "Ap henggam ako it avakwa inim dugwit, enendawi hunik ombasagwi ovagak ap ong-gop welagwi menda en watugwa ako, ap ambi sa en endawi hunik okbagagi embeten?"

<sup>37</sup> Yugugu lagagimu, at ap Musa wene mbalek mamuleraliga menda ako en, "At ap aigwak abet en abwa ombakluk sek okbagagi ako aro." Yugugu lagagimu, At Yesus en, "Hat andi, ndatak ogarit nagu dogwen," yiluk, yugogogi.

### Maria Mareta bigisa lagagi wene

<sup>38</sup> Yesus At ane welagwi menda inim lagu dugwit, o ambima nunggu lagagwama, hwa ambi inis Mareta en Yesus at amwa nunggu warupwak yiluk, yugogogi.

<sup>39</sup> Yugugu lagagimu, nonggagagirik werekma, hwa Mareta aot inis Maria ako, Yesus avema horaik dugwit, ane hunggigi ovara, <sup>40</sup> Mareta andi, Yesus ake yi walagek, ndi walagek aburuk ogagya lagagi. Ogarit lagya dugwit, Yesus adema lagya lagagirik, yugugu dugwit, "Nasin wai. Hat hake an nadigat ogagya dogopwak yiluk, naot hekbenanggarikmu Hat neyagetek agindik? Yonggatnyaupwak yiluk, yuguru!"

<sup>41</sup> Yugugu lagagimu, Yesus en, "Mareta, Mareta. Hat yi ogarup ndi ogarup adigat hendawi anggim dugwit, aburuk-mbaburuk ogarit lagya heyagi. <sup>42</sup> Ambiat mikbaluk, ogarup andi sek. Eke, hat haot Maria en sek ogarup mitarikmu, An, 'Moga,' yugisogon buk," yiluk, yugogogi.

### Samban ogarup mamuleragagi wene

(Mat 6:9-13; 7:7-11)

**11** Hivis ndugwis ambi vaga At Yesus ambima samban ogagagi. Ogagya lagagimu, At ane welagwi menda ambi en Yesus yugugu dugwit, "Nasin. Ap Yohanes en At ane welagwi menda samban ogarupwak yiluk, mamuleragagi ako hak nit samban ogaruguluk, Hat mamulneran."

<sup>2</sup> Yugugu lagagimu, At Yesus en, "Hit samban ogagu dugwit, Ala yerogo yugugu dogones:

'Nenasin!

Hat hiniis mondok adik denek agindikma, siyabagalagwi o.

Nit Hat havema dogoguluk, okbininanok.

<sup>3</sup> Nenagarom nunggu dogop o ninggi-nanggi woknirigya dogwen o.

<sup>4</sup> It ap nit weyak erogo bininelagwi ako niren enomaduk dek erogo biselagwima, haren nit nenomaduk dek erogo binunggu dogwen o.

Eke, weyak ogarupwak en yiluk, nenavut mbanggya hao en, nenaruwam dogwen o,' yiluk, anderogo yugugu dogones," yugeragagi.

<sup>5</sup> Yugirigya lagagirik, At ane welagwi menda ako ambi inim yugirigya dugwit, "Ap hit menda ambi en nogo endawi mberen agya vaga at aswe ambi adema lagya dogomindik, yugugu dugwit, 'Naswe wai. An naswe ambi o ambima lagya dugwit, bikneyagek waga ovara, erom wogorup mondok dekma, hat roti henggam wokniru o,' yugugu halok, <sup>7</sup> at aswe amwa agarik ako en iri dugwit, 'Nogo mondok agako agirikmu, an hane ngginggis yuknirubuk. Sup ovok lakhidigi. Eke, naburi ninim nogo yugusim, mendek yiluk wokhirup andi meyan,' yiluk, anderogo yugisogon. <sup>8</sup> Andi, nogo mondok agako agagirikmu, wogorup anggong ombarison ovara, alon embetetek ane hunik adigat yugugu vaga at mendek yiluk, 'Wokniru o,' yugugu ako wogisogon buk embetep? Wogosogon aro, yiluk, yukheraliga.

<sup>9</sup> Anderogo hak, an wene ambi yukherayogon. It avakwa en nggino yugugu-selok, wogirigya, belanggu-selok, havethedugwi, sogop vupuk ogagu-selok, sup hutbugu, ogasagwi. Ogasagwima, hiren Ala nggino yugugu dogop. Nggino yugugu hiniselok, aren wokherayogon. Sek menda at ovaga belanggu dogones. Belanggu hiniselok, at elola en havethedasogom. Sup vupuk ogagu dogones. Sup vupuk ogagu hiniselok, aren sup hurogo bigigayogon o.

<sup>11</sup> Hit henabut ambi en, 'Erom wokniru o,' yukhirigya halok, helep wogorup embetep? 'Ikan ambi wokniru o,' yukhirigya halok, mbas edup menda wogorup embetep? <sup>12</sup> 'Swa enggen ambi wokniru o,' yukhirigya halok, hagudi wogorup embetep? <sup>13</sup> Dekma, hit ap weyak menda ovara, henaburi en nggino yukhiruguselok, sek menda wogerelagwi ako ndatak, hit henasin mbogot vaga menda en, 'Averiniki wokniru o,' yugugu hiniselok, wokherayogon buk embetep? Avyarat wokherayogon aro," yiluk, yugeragagi.

### Yesus Mbelesebul inis vaga ogasiga yugogogwa wene

(Mat 12:22-30; Mrk 3:20-27)

<sup>14</sup> Hivis ndugwis ambi vaga Yesus en madis ambi ane dek okbisaliga menda ap endawima en nggigilogo wibagya lagagimu, wunggu hegek, ap ane dek ako ane werek agagi. Ane werek agya lagagimu, it avakwa en, "Wi!" yiluk, vok yagagwa. <sup>15</sup> Vok yagagwa ovara, it nin en yugu dugwit, "At Yesus andi, madis enasin Mbelesebul anye vaga en nggigilogo wibisaliga," yagagwa. <sup>16</sup> Eke, it nin en At endawi avut mbalusogom, umbutu dugwit, "Mbogot vaga ninelup arup nenalon werek menda ambi ogaru o," yiluk, at yugogogwa.

<sup>17</sup> It enendawi umbutwi At Yesus yedok inugu laga-girik, it yugirigya dugwit, "Ap enowa ambi at avema agarwik inim ir-it ogokhedelok sak yugu-selok, at avema bisaligama anye dek asogon. Eke, o yapwi ambiat agarwik atma, ir-it ogokhedelok wunggu-selok, enawi andi um dogosogon.

<sup>18</sup> Hiren yugu dugwit, 'At madis Mbelesebul anye vaga nggigilogo wibisaliga o,' yagalagwima, anen 'At Sile en at avema menda inim ogokhedugu dugwit hoda wunggu-selok, at avema bisaligama andi, nggarogonggan anye dogop,' yiluk, yukheraliga.

<sup>19</sup> Eke, hiren An madis Mbelesebul yuknugu vaga madis nggigilogo wibisaliga yagalagwi ako, avyarat halok enda, hit henarwi en ogo madis nggigilogo wibisalagwi ako madis Mbelesebul en yugeraliga vaga wibiselap. Ovara dek. Hit henarwi en madis Mbelesebul yugirigya vaga nggigilogo wibiselagwi dek. Anderogo atma, hit henarwi en, henanggadi wakbigigasogom. <sup>20</sup> Anen Ala inggis anye vaga madis nggigilogo wibugu neyalok andi, Ala avema bigigaup vage henadema waga umbutu dogones.

<sup>21</sup> Ap ambi anye werek en yegen mbagerek dugwit awi aruwam halok, at angge ugun andoma sek dogosogon. Angge sek dogosogon ovara, <sup>22</sup> ap adik ambi anye wisane en ap ako awi vaga miklari nunggigya dugwit, at eyave sovalogo bagya halok andi, ayegenndugudis ako vaga endawi vanggalaluk, dogomi ako ndiyalogo angge-angge ako amororo okbaluk, sumbu-raliga.

<sup>23</sup> It An ninim dambulik wagetek iniselok andi, ninim ogorek agarwik. Eke, An ninim homakbiselagwidek ako en haryogo wibisalagwi aro," yiluk, yugeragagi.

### Madis edup agoda werek menda eyami vaga nunggu wandiga wene

(Mat 12:43-45)

<sup>24</sup> Yugirigya lagagirik, Yesus en ambi yugirigya dugwit, "Madis edup agoda werek menda ap endawima en wunggu lagarik, 'Nggoma sat yanggal hedaik,' yiluk, is adem dekma belalit naliga. Belalit naliga ovara sat yanggal hedaup dek halok, 'Namwa wulu wagirikmu akoma neyami vaga nunggisogon,' yiluk, <sup>25</sup> nung-gigya dogomindik, o um ovara at wulu wagarikmu akoma mupwak horek nggarik-nggarek erek halok, <sup>26</sup> andi en, wunggu lagarik, at madis ako weyak ovara, madis mondok weyak dombok eneyave 7 homak-bisiluk, woginiviluk eyami vaga nunggu wandiga. Nunggu wigya lagarik, akoma inim werekma, ap ako endak madis ambiat endawima werekma horogat sek welagagi ovara, havis wisane erogo hobo-hobo ari nunggugu-selok, ap ako mondok evelela weyak at dogosogon," yiluk, yugeragagi.

### Enendawi adenggen umbutu dogop wene

<sup>27</sup> Wene andi yugirigya lagagimu, avakwa wisane homago enanggelekma en hwa ambi en ane ombok erogo Yesus yugugu dugwit, "Hwa eyak endakhitya lagagirik, agadyak wokhugu lagagi ako, endawi adenggen himbita dogosogon."

<sup>28</sup> Yugugu lagagimu, At Yesus en, "At ako endawi adenggen imbita dogosogon ovara, it Ala wene des erogo hobaluk, ogarit lagu-selok andi, enendawi mondok adenggen wisane umbutu dogosogom," yiluk, yugeragagi.

### "Ninelup arup menda ambi ogagya heyasogom," yugogogwa wene

(Mat 12:38-42)

<sup>29</sup> Andi yugirigya lagagirik, it avakwa wisane homari wagek yugu-sigik, Yesus en it yugirigya dugwit, "Hit avakwa o yogak agipik yi, hit weyak dombok ogarit lagu hinigis. 'Hat avyarat mbogot vaga en Ala en lak-baga wagagi, nit ninelup arup menda ambi ogagya heyasogom,' yiluk, yuknisagwi ovara, Anen adik ambi ogagya neyasogom buk. Ata, ap Yunus † ako en enelup arup menda ogagagi ako andi adigat ogagya neyagup.

<sup>30</sup> At Yunus ako avakwa o Niniwe enelup agek welagagi ako hak, An Ap At Endaklagagis ako hit avakwa o yogak agipik yi, henelup agek agirik. <sup>31</sup> O endak, hwa ombok ambi at amwa o adumu selatan vikit en at ap Salomo endawi werek dugwit, wene hulisiga menda ako aruk huligiluk wagagi. †† Wagagi ovara, at Salomo ‡ andi, ap horogat welagagi, eke, At ambi yoma agarik yi andi, mondok ombok erogo agarik. At hwa ombok ako en ap horogat ane huligiluk wagagi ovara, hit andi, At ombok agarik ako ane hunggitek agipik. Anderogo atma, havis avakwa enowak dilup hudi vaga at hwa ombok ako en mendek yiluk, hit yogak agipik yi yukhirigya dugwit, 'An ap horogat Salomo ako ane hunggwigis ovara, hit en ap ombok yi ane hunggitek atma, henanggadi ares,' yiluk, yukhirigya hagup.

<sup>32</sup> At Yunus andi, ap maduk ovagak dugwit, avakwa o Niniwe menda Ala wene yugirigya lagagimu, it ovok erogo enasam helok, enomaduk mbo bagagwa. Mbo bagagwa ovara, at ambi yoma agarik yi andi, ap mondok ombok atma, wene yukheraliga ako hobaluk, henomaduk mbo baup sek hegek, henendawi mbuk agipik. Anderogo atma, havis it avakwa enowak dilup hudi it o Niniwe menda ako en mendek yiluk, hit yogak agipik yi yukhurugu dugwit, 'Nit ap maduk Yunus

† Ap YUNUS at navi o endak erogo welagagi. At Yunus ako ikan aveta elola tiga hari welagagi. Welagagirikmu ikan en at iluk mbo-mbo ugo wera mbikit ba winggigi. At ikan elola 3 hari welagagi hak, Yesus hambuluk lendagwima en 3 hari welagagirik iluk agagi. †† HWA OMBOK O SELATAN VIKIT EN WAGAGI AKO, ap inis ombok Salomo endawi mondok werek ako en mbilape mamulnirupwak yiluk at amwa en o adumu 1,500 kilometer wagagi. ‡ At SALOMO ako andi, o muk ap inis ombok dugwit o Iserael vagago welagagi. At asin andi, Daut. Eke Salomo ako, endawi mondok werek wiligya lagagi.

ako yuknirigya lagagimu, nenomaduk mbo bagagup ovara, hit ap ombok ane hunggitek atma, henanggadi ares,' yiluk, yukhurugu inisasogom," yiluk, yugeragagi.

### Heneyave o awia okbugugu dogop wene

(Mat 5:15; 6:22-23)

<sup>33</sup> Yugirigya lagagirik, ambi yugirigya dugwit, "Avakwa en unda yevedogo baluk, mbedak avema a, sogolowak avema a, hwilak belagudek. Ata, yevedogo baluk, it awakwa sup nunggu wendagwi ako awia haupwak yiluk, winimen sigama belagwi.

<sup>34</sup> Hit heneyave unda yevedek ovagak awia ako andi, hinil at. Hit hinil sek agipik halok, heneyave ovok erogo awia dogogup. Eke, hit hinil weyak werak halok andi, heneyave ovok erogo o hwiserek ovagak dogogup.

<sup>35</sup> Andi halok, henendawima awia agarik ako dek agya dugwit, o hwiserek ovagak agya hao en, dibagu dogwes. <sup>36</sup> Hit heneyave venak vikit ambi o hwiserek ovagak dek ovok awia adigat agarik halok, unda awia yovalevet higya dugwit, heneyave awia erogo bigaliga hak, heneyave ovok awia erogo dogogup," yiluk, yugeragagi.

### Musa wene mamulerelegwi menda inim, Parisi menda inim, ogagagwa wene

(Mat 23:1-36; Mrk 12: 38-40)

<sup>37</sup> Wene andi yugirigya lagagimu, ap Parisi menda ambi en, "Ninim erom naguluk, oma," yiluk, Yesus yugogogi. Yugugu lagagimu, At Yesus ap ako amwa nunggwigya lagagirik, erom nagiluk, hora yagagi.

<sup>38</sup> Erom nagiluk, At inggis adat vaga horekdek dugwit, we un hora yagagi ap Parisi ako il higya lagagirik, "Ap yi nggarogo ogasiga wi!" imbitigi. †

<sup>39</sup> Ap Parisi ako imbitya lagagimu, At Nenasin Yesus ako en, "Hit ap Parisi menda en [Ala sek nenombarupwak yiluk,] henagas owak sogolowak inim, henowalup inim, agavelo weram adigat hurisagwi ovara hegek, henendawi ilim andi awakwa enangge ndialogo hedaup inim, yi weyak ndi weyak ogarup inim, henendawima wisane hobo-hobo erek agipik. <sup>40</sup> Hit ap wes ovagak yi! At Ala agavolo weram ogovak higitigi ako en enendawima inim ogovak higitigi dek yiluk yagalagwi? <sup>41</sup> Dek! Henendawima ilim en it ap ininggis dek wogorugu hiniselok andi, Ala en sek henombarisogon.

<sup>42</sup> Hit Parisi menda yi, we un divu angga, hibi angga, erom angga, mbinde angga ako wogogo Ala ake sek belagwi ovara, hegek, awakwa enowak sek erogo dilisagwidek, eke, Ala hinim henendawi hunik ogasagwidek. Anderogo atma, anggin henovaga arugup! Wene adem ombok andi, ogagu dugwit, maridik-

† It Yakuri menda ako adat it enombawi ogagu lagagwa mamulik ogagu lagagwarikmu, ininggis adat vaga horekdek halok andi erom nenggetek wulugu lagagwa. Eke, sogolowak erom is nelagwi menda inim adat vaga hutu lagagwa. Kotor dek arupwak yiluk hutitek ovara, 'Adat yi vaga ogagu niniselok, Ala en sek nenombarisogon,' yiluk, hutu lagagwa.

mariduk andi inim lobalogo ogarup sek atma, ogagu dogop.

<sup>43</sup> Hit Parisi menda yi, it Yakuri samban ogasagwima akoma ap ombok-ombok hora yagalagwima hora yugwi, o vasat ogasagwima nit adigat vok yuknerapwak yiluk, nagwis, ogagu dogop henendawi hogop adigat ombasagwima, anggin henovaga arugup!

<sup>44</sup> Avakwa enunggut inigik, hiren weyak ogarupwak yiluk, enendawi nomalisagwi atma, anggin henovaga arugup."

<sup>45</sup> Yugugu lagagimu, ap Musa wene mamuleraliga menda ambi en wene onngo Yesus yugugu dugwit, "Ngguru wai. It wiyiknom-weyaknom okbisaliga vaga nit ninim nenanggadi asiga."

<sup>46</sup> Yugugu lagagimu, Yesus en, "Hit ap Musa wene mamulerelegwi menda ogo, Yakuri wene yugup yerogo ogarup nderogo ogarup wene anggin wisane menda awakwa yugeralagwi ako, awakwa enomado vaga ndan okbaluk, wene ako anggin adigat vialiluk nagusigik, yonggaranisaup embetetek, hinil biginigik hoda wilisagwi atma, anggin henovaga arugup!

<sup>47</sup> It navi-navi hit henombawi en enarogo bogogwa ako, hiren it enowak o wimu bagagwa akoma sek erogo wet ogasagwi. Enowak o wimu sek erogo wet ogasagwi ovara, it wene yagagwa ako ogasagwi dek atma, hit henombawi en navi-navi enatugwa ako andi, 'Sek at ogagagwa' yiluk, yugu hinigis. Anderogo atma, anggin henovaga arugup.

<sup>49</sup> Anderogo yiluk, At yi menda ndi menda ovok ilup agarik Ala ako en iri dugwit, 'Navi-navi inim, lakbigik menda inim, lakbisa wagya neyalok, hit Iserael menda en nin initwis, nin anggin enovaga bisaguluk enamusek lagwi, ogagu hinisayogon o,' yiluk, yagagi. <sup>50</sup> Anderogo atma, o wen yi wakagagi hudi en lenak-lenak it ap navi-navi enamuya wombagagi ako hit awakwa o yogak agipik yi henovadombok, yiluk, henarisogon. <sup>51</sup> O muk Habel amuya wombagagi hudi en vivis ap Sakariya o Ala awi valekma Ala ake warogo hali hunisagwima ilim andoma amuya wombagagi hudi andi, ovok erogo andi hit yogak agipik yi henovadombok, yiluk, henarisogon, yukheraliga.

<sup>52</sup> Hit Musa wene mamulerelegwi menda yi, yi wene ndi wene awakwa enelup agu sao en, sup kunci hit at hwilagogo vakbaluk werakma, anggin henovaga arugup! Nirat wene ninelup arup, embetetek dugwit, it nin enelup arup ombasagwi ako enelup agu sao en, sup ando mbabiselagwi," yiluk, yugeragagi.

<sup>53</sup> Yugirigya lagagirik, o andoma en wunggu lagagimu, it Musa wene mamulerelegwi menda inim, ap Parisi menda inim, o andi hudi en At ane yupumndupum yimi vaga yidilogo baluk, vagaruguluk, enaninis en aigwakma dirit-darit wugu lagagwa.

**Enagavoval ogarit nagu-selok, yugeragagi wene**  
(Mat 10:26-27)

**12** It Musa wene mamulerelagwi menda inim, ap Parisi menda inim, Yesus vagaruguluk, enaninis en aigwakma dirit-darit wugu-sigik, it avakwa eneyave wisane ininggis dinggilup meyan homakbaluk, hobo-hobo en enovaga sep yagan lagagwa. Sep yagan lagu-sigik, At Yesus en At ane welagwi menda enendak yugirigya dugwit, "It ap Parisi ako en enendawi enagavoval amulisagwi yukherelagwi. Enagavoval amulisagwi yukheralagwi ako andi ragi roti virisiga menda hak. Ragi ako, horok maduk atma yedok helagwi dek ovara, andi vaga roti ombok vikbaluk sigam helagwi. Anderogo hak, it enagavoval amulisagwi yukheralagwi ako andi, wene andi menda wugu hisao, suwam watu dogones.

<sup>2</sup> Yi wene ndi wene enendawima sovalek agarik halok andi sigam agya, eke yi ogagwi ndi ogagwi hwilago agarik halok andi vagalagya, ogarisogon o. <sup>3</sup> Anderogoma, hit o hwiserekma dugwit, yugu lagagup ako o awia vaga yugu hunggwis, eke, umwa ilim andoma dugwit, wene madi ngguruk yugu lagagup ako, o selekma winimen andoma en hum-naik vaga vagalagya, ogagya hagup," yiluk, yugeragagi.

**Ala halok, nenalon umbutu dogop wene**  
(Mat 10:28-31)

<sup>4</sup> Yugirigya lagagirik, ambi yugirigya dugwit, "Ai naswei. An wene ambi yukherayogon. Avakwa en henagavelo adigat henasagwi ako andi, henalon ombarubuk. Henakbaluk, nggarogo okbigigaup embetep? Dek aro.

<sup>5</sup> Hit henalon ombasagwi ako andi, An hurimbis yukherayogon. At henagavelo mondok henakbaluk, hali abya wuluk-herek yagaligama lakbigigaup andok ako andi, henalon umbutu dogones. At mondok henalon umbutu dogones o, yiluk, yukheraliga.

<sup>6</sup> Yoparip mariduk mberen vaga swa wudue 5 eneyave dambup erogo hunisagwi ako dek a? Onggo maduk at hunisagwi ovara, At Ala en swa ambiat ambi mondok inggut asigadek. <sup>7</sup> Hiniris ogo ovok erogo At Ala inggis dinggilik agarik. Anderogoma, swa mariduk eneyave wisane dambulogo at endawi hunik horogat agarik ovara, hit ako andi, At endawi hunik ombok erogo henombasigama, henalon umbutu dogobuk," yugeragagi.

**"Yesus andi Nenasin aro," yiluk, vaganggu dogop wene**  
(Mat 10:32-33; 12:32; 10:10-20)

<sup>8</sup> Wene yugirigya lagagirik, ambi yugirigya dugwit, "Hiren avakwa inivaga, 'Yesus andi Nenasin aro,' yiluk, vaganggu hiniselok, An Ap At Endaklagagis ako en it Ala yonggo lakbisa wandiga menda malaikat ako inivaga, 'It avakwa yi, an narwi aro,' yiluk, yisogon. <sup>9</sup> Eke, hit

avakwa inivaga, 'Yesus andi, nininggut,' yugu hiniselok andi, an ogo, it Ala yonggo lakbisa wandiga menda malaikat ako inivaga, 'It avakwa andi, An ninggut o,' yiluk, iri neyagup, yiluk, yukheraliga.

<sup>10</sup> An Ap At Endaklagagis ako enane wiyiknom-weyaknom erogo banunggu-selok, enomaduk andi, Ala en dek erogo bisayogon ovara, Averiniki wiyiknom-weyaknom erogo bagu-selok andi, enomaduk andi, Ala en dek erogo bisayogon mondok dek aro.

<sup>11</sup> It avakwa Yakuri samban ogasagwima homago inim, it ap ininis werek inim, it ap ombok-ombok inim, enadema wokhiniviluk bigiga lagu-selok, henendawi anggin dugwit, 'Nenagap wendakhedaup yiluk, wene ngga yugerami?' yiluk, henendawi wenggelubuk. <sup>12</sup> Andi hudi wene yugeraup yiluk, Averiniki en, 'Anderogo yugeran o,' yiluk, yukhirigya hagup," yugeragagi.

**Ap inggi werek ovara endawi wes ovagak yugeragagi wene**

<sup>13</sup> Yugirigya lagagimu, it avakwa wisane homago ako ambi en Yesus yugugu dugwit, "Ngguru wai. An nowa en nasin eyase nin higiogo woknirupwak yiluk, yuguru."

<sup>14</sup> Yugugu lagagimu, At Yesus en, "Avyak! Henowak dilogo heneyase sumbukheraupwak yiluk, an at denogo baninggigi embeten?" <sup>15</sup> Yugugu lagagirik, Yesus en avakwa yugirigya dugwit, "Angge wisane agarik ako vaga hinilik dogosogom dekma, ap enangge hogop-hogop umbutu hinisao en, henedawi suwam watu dugwit, dibagu dogwes," yugeragagi.

<sup>16</sup> Yugirigya lagagirik, wene wakhegek yugirigya dugwit, "Ap inggi werek ambi en awi-angge wen mudis vaga yagagirikmu, enggen yugup wisane agagi.

<sup>17</sup> Enggen yugup wisane agya lagagimu, endawi imbita dugwit, 'Yagagis enggen yugup mbalek baup o dekma, nggarogo ogarik?'

<sup>18</sup> Imbitya lagagirik, 'Yerogo ogasogon. An o maduk yi, masalogo bagya dogomindik, o ombok erogo vabaluk, nangge inim, yagagis enggen yugup ako inim, andoma ba nunggigya dogosogon. <sup>19</sup> Ba nunggigya dogomindik, nangge wisane wonggalek agarik ako ninggya neyagek yi tahun ndi tahun ogarupwak yiluk, yogak sat yanggal hedigya dugwit, erom ninggya, amburup ninggya, enda adigat yagan lagya, ogagya dogosogon, yiluk, nendawi dibaluk ogasogon o,' yagagi.

<sup>20</sup> Yagagi ovara, At Ala en, at ap ako yugugu dugwit, 'Hat ap wes yi, wai! Yogak o hup yi vaga hat henedawi An wa warisogonma, hat vipuk erogo bagen ako havis sa en andok arisogon embeten?' yiluk, yugisogon.

<sup>21</sup> Anderogo atma, it avakwa enangge wen vaga menda adigat wisane okhidugu dugwit ovara, enangge eyave mbogot vaga menda okhedetek iniselok, at ap andi ndatak aro," yiluk, yugeragagi.

**“Henendawi anggin dogobuk,” yugeragagi wene**

(Mat 6:25-34)

<sup>22</sup> Yugirigya lagagirik, Yesus en At ane welagwi menda ako yugirigya dugwit, “Niniluk dogop yiluk, nenagarom nano namwi? Eke, neneyave vaga nenayum nano yikhedamwi? yiluk, henendawi umbutu dugwit, henendawi anggin dogobuk, yiluk, yukheraliga.

<sup>23</sup> Nelagwi menda andi, horogat ovara, hiniluk dogop andi, iya. Eke, yikhedelagwi menda andi, horogat ovara, heneyave ako andi, iya aro. <sup>24</sup> Swa ngguragas ogasagwi ako dibas. Awi yakhidugwi, enggen mbanggis, andi ogasagudek. Eke, o ndanggi enggen mbalogo beta nunggisagwima ogo, dek adigat ovara, at Ala en enagarom wogeraliga. Swa andi, at endawi hunik horogat hegek, Ala en enagarom wogeraliga ovara, hit andi, at endawi mondok hunik atma, wokherayogon dek ombasagwi? Wokherayogon aro.

<sup>25</sup> Hit ambi hambup vanggo yi wagya hegek, ‘Niluk ambukumat inim dukluk, hambup sek ai,’ yiluk, henendawi anggin wenggelit lagwi vaga ndatak okbugugu hagup embetep? Dek. <sup>26</sup> Henendawi anggin wenggelit lagwi vaga ambukumat dukluk hambup okbigigaup meyan atma, henagarom naup inim, henasum yikhedaup inim, henendawi anggin wenggelek dogobuk.

<sup>27</sup> Yo hundumbuk mot inggya lagarik, agare enggen yiliga ako dibas. Salomo ap mondok ombok yum pakian sek adigat yirik halok, awakwa en, ‘Wi,’ yiluk, vok yugu lagagwa ako ovara, at horogat o. Yo hundumbuk agare enggen halok andi, yavup ogagya, digi danggya, ogasigadek ovara, Ala en unde watya hegek, agare enggen mondok segedok yiligama yiluk, yukheraliga. <sup>28</sup> Yo-angga heda-angga weram yogak mudi-mudis inggya, heveret sakni bagu-selok, hali ninggya, ogasiga ovara, At Ala en elese sek erogo baligama, aren yo-angga ako maduk okbagya, eke, hit awakwa Ala horogat avyarat ombasagwi menda yi, hit mondok iya dombok heneyaga dogosogon buk embetep?

<sup>29</sup> Anderogoma, ‘Nenagarom-nenagas nano namwi?’ yiluk, henendawi wenggelit lendagwi andi, moga. Henendawi anggin dogobuk. <sup>30</sup> It awakwa weram menda ako en, andi menda ovok erogo belalit nelagwi ovara, hit andi, ‘Nit andi menda dek,’ yiluk, hogop ombasagwi ako At henasin elup agarik. <sup>31</sup> Hiren ‘An Ala avema dogop, ai,’ ombakluk, endak musek lagu hiniselok, vivis andi menda ovok erogo ovaga dulogo wokhirigya hagup,” yiluk, yugeragagi.

**Enangge wonggalogo mbogot vaga batugu dogop wene**

(Mat 6:19-21)

<sup>32</sup> Yugirigya lagagirik, At Yesus en, “Naburi wai! Ala en hit at avema dogop imbitigi ako, sek menda dikduk erogo okbigigaup endawi sek imbitigirikmu, henalon

habuk. <sup>33</sup> Henangge vaga onngo hunggu dogomundik, ap ininggis dek halok, yoparip wogoranes. It ap enonggop en wa nunggugwi, hudu-hudup libilit nung-gwigya, ogasigadekma mbogot vaga andoma henangge eyave sek, dek arup dek ako menda yidik dogopwak yiluk, yum awi libik yagaliga dek ako menda yikhiduga dogones.

<sup>34</sup> Henangge wonggalek werekma, henendawi ogo, andoma at dogosogon o,” yiluk, yugeragagi.

**Ala ayeloman halok dikduk erek dogop wene**

<sup>35</sup> Wene ambi yugirigya dugwit, “Henayum, henamboranis nggitik-nggetok yirik dugwit, hininggimu unda mondok yevedek dikduk erek dogones. <sup>36</sup> Ap hwa hidi-gyama isogo isagusim akoma en ap ombok amwa sup vupuk ogari wagya hao en, ayelomani en mbikit sup huthaguluk, sokhelagwi hak dogones. <sup>37</sup> Enasin en ayelomani ako iniluk dugwit, suwam watusim isa wagya halok, adenggen enombarisogon. Suwam watusim isa wagya halok, asin en asum nggolabaluk, at ayelomani isogo naupwak yiluk, ambekma horabisiluk, enake ogagya dogosogon, yiluk, avyarat yukheraliga. <sup>38</sup> O hup agako vaga warimi a, o yanggo irisim warimi a, wagya dogomindik, ayeloman anderogo iniselok, adenggen enombarisogon o.

<sup>39</sup> Hit dibas! At ap awi werek en, ap onggop waliga menda ako mo il andi vaga wasogon, elup aklip en, ‘Sup lakbaluk, nangge onggop wa nunggu wagu sao en,’ yiluk, nogo yigitek mondok-mondok suwam watya duklip. <sup>40</sup> Anderogo hak, An Ap At Endaklagagis ako mo il andi vaga warup nembetetekma hinigik, wasogonma, hit ogo mondok dikduk okbaluk, dogones o,” yiluk, yugeragagi.

**Ap ambi ugun-ugun ogasiga, ap ambi dikduk ogasiga wene**

(Mat 24:45-51)

<sup>41</sup> Yugirigya lagagimu, Peterus en Yesus yugugu dugwit, “Nasin wai. Wene wakhegek yukneregen yi andi, nit adigat yukneregen a, ata it awakwa ovok erogo yugeregen a?”

<sup>42</sup> Yugugu lagagimu, At Nenasin Yesus en, “Andi halok, Ap ombok ayeloman ambi endawi werek yavup dikduk ogagya halok andi, at asin ap ombok ako en at ayelomani nin andi yugirigya dogopwak yiluk, mondok okbagagi. Mondok okbaluk, winggigi. Wunggu hegek, ayeloman ako en, it nin ako enagarom wogeraup agya halok, enagarom des erogo wogeraagagi. <sup>43</sup> Vivis it enasin ako wagya dugwit, at ayeloman ambi ako anderogo dikduk ogagya halok, asin ako endawi adenggen ombarisogon. <sup>44</sup> Asin en ayeloman ako anderogo ogagyama adema wagya halok, angge-angge ovok erogo aruwam dogopwak yiluk, mendok okbayogon, yiluk, avyarat yukheraliga. <sup>45</sup> Eke, ayeloman ako en endawima imbitiya dugwit, ‘An nasin arabu dukluk



wasogon ai,' yiluk, at asin ayelomani nin ap inim akwa inim yo yawi enatya, yi menda ndi menda ugun nenggek adigat lagya, amburup nenek oginivisiga menda ninggya dugwit, nenek ogarit lagya, ogarit lagya halok andi, nggarogo oklarup ombasagwi?

<sup>46</sup> Ayeloman ako en, 'Nasin ndugwis andi vaga wasogon,' eke, 'Mo il andi vaga wasogon,' embetetek ugun inggutmu at asin ako wagya dogomindik, ayeloman ako eyave libik-lobak erogo it ap avyarat ombasag-widek menda bisaligama akoma at lakbayogon.

<sup>47</sup> Ap ayeloman ambi asin ogarup ombasiga ako elup ovara, dikduk okbaluk, ogagetek halok, yo yawi vaga hegek-kegek watya hagup. <sup>48</sup> Eke, ayeloman ambi asin ogarup ombasiga ako inggut dugwit, weyak ogarimi vaga onngo yo yawi warup ovara, horogat watya hagup. Ala en ombok erogo wokhirigya dogomindik, hivi, 'Ombok erogo wokheragagis ako vaga, ombok erogo ogagagup a dek a?' yiluk, yukhirigya, eke, vaga-gogovovok yiluk, ombok erogo hininggimu bigigya dogomindik, hivi evenuk, 'Ombok erogo hininggimu begegis ako vaga, iya erogo ogagagup a dek a?' yiluk, yukhirigya, ogagya hagup o," yiluk, yugeragagi.

#### Ogorogo bisagiluk wagagi wene

(Mat 10:34-36)

<sup>49</sup> Yugirigya lagagirik, ambi yugirigya dugwit, "Anen o wen vaga yoma ovok erogo hali bagiluk wagagisma, mbikit hali abya bagibuk, ai, ombasiga. <sup>50</sup> Avakwa ima wombabiselagwi hak an anggin-mbanggin okbanup yiluk agirik ovara, wotok erogo okbanup hudi aoma, nendawi mondok anggin dombok okneraliga. <sup>51</sup> It avakwa o wen vaga yoma enendawi ugun adenggen erogo dambubisagiluk, wambu wagagis embetep? Dek. Ogorogo bisagiluk, wambu wagagis o, yiluk, yukheraliga.

<sup>52</sup> Yogak en ap ambi aburi 5 halok, henggam en mberen inim ogorek, eke, mberen en henggam inim ogorek, inisagup. <sup>53</sup> Inim ogorek dugwit, asin en abut inim ogorek, abut en asin inim ogorek, isa en eyak inim ogorek, eyak en isa inim ogorek, ombak en, abut inim ogorek, abut en, ombak inim ogorek, inisagup," yugeragagi.

#### O elese agya vaga dibaup wene

(Mat 16:2-3)

<sup>54</sup> Yugirigya lagagirik, Yesus en it avakwa wisane yugirigya dugwit, "O Iserael yoma hena mo il huruk yi landigama barat vikit en daga wagya halok, 'Wi! Andi musu nagiluk, ogasiga ai,' yigipikmu, musu naliga.

<sup>55</sup> Eke, havut o selatan vikit en warit wagya halok, 'Wi! Heveret o hivi asogon higgi,' yigipikmu, heveret hivi at asiga. <sup>56</sup> Wen-mbogot elese dibaluk, 'Andi anderogo asogon higgi o,' yiluk, hinilup ovara, yogak yi hudi vaga arup ako hit nggarogo yiluk dibagatek, 'Wi! Ala anderogo ogasiga higgi,' yiluk, yegetek at agipik? Hit

henagavoval at ovagak yagalagwi yi!" yiluk, yugeragagi.

#### Inim ogorek halok, hodo erogo dambunggu dogop wene

(Mat 5:25-26)

<sup>57</sup> Yugirigya lagagirik, ambi yugirigya dugwit, "Sek ogarup yi at higgi,' yiluk, henadik-henadik dibaup sek hegek ovara, nano yiluk sek ogarup dibagatek agipik?

<sup>58</sup> Ap hinim ogorek ako hinim at ap enowak dilisiga menda adema lamwi halok, sup vaga ao hinim lagu dugwit, hodo erogo vagalogo hinim henendawi dambulhedaup. Dek halok, at hinim ogorek en likhiniviluk ap owak dilisiga menda adema bigigya lagya, andi en, ap enowak dilisiga menda en ap ayegen werek adema bigigya lagya, andi en, ap ayegen werek ako en ap heda marogo mabiselagwima mabugugu, ogagu sao en, sup vaga ao hinim lagu dugwit, hodo erogo vagalogo hinim henendawi dambulhedaup. <sup>59</sup> Heda marogo mabiselagwima mabugugu-selok, at hinim ogorek agarik ako en, 'Onggo anderogo baup,' yiluk, yukheragagi ako mondok ovok erogo bagetek hegek, andoma en wibigigasogom mondok dek aro, yiluk, yukheraliga," yugeragagi.

#### Enomaduk mbo bagetek halok dek okbisaup wene

**13** O andi hudi avakwa nin en, "Avakwa Nggaliliya menda en Ala ake warogo hali bagusim, ap Gubernur Pilatus en enetas," yiluk, Yesus yuguri lagagwa. <sup>2</sup> Yuguri lagu lagagwama, At Yesus en, "It ap Nggaliliya menda nin enomaduk horogat halok, hekbugu, eke, it enetas andi, enomaduk wisane ogagu lagaorikmu, anderogo enatya, ogaga embetep?

<sup>3</sup> Mondok dek o. It enomaduk andi it nin ndatak welagao. Anderogo ovara, hit weyak ogasagwi ako henasam helok, mbo bagetek hiniselok, hit ogo, anderogo dek okbugugu hagup, yiluk, yukheraliga. <sup>4</sup> O Siloam o adup valek ndun iri dugwit, it ap 18 hudi sopalinipigi ako andi, it avakwa ugun Yerusalem agarwikmu andi, weyak ogagatek enomaduk horogat inigik, eke, it sopalinipigi andi, enomaduk wisane erogo ogagagwarikmu, sopalinipigi embetep? <sup>5</sup> Mondok dek. It enomaduk ndatak aro. Anderogo ovara, hit weyak ogasagwi ako henasam helok, mbo bagetek hiniselok, hit ogo, anderogo at dek okbugugu hagup, yiluk, yukheraliga," yugeragagi.

#### Yo widis enggen yigitek halok, wakhegek yugeragagi wene

<sup>6</sup> Yugirigya lagagirik, wene wakhegek yi, yugirigya dugwit, "Ap ambi eyavupmu, yo widis ambi yago wela-gagi. Welagagirikmu, enggen yugup mbaligiluk, bikhelagagi ovara, enggen yugup dek adigat higya lagagi.

<sup>7</sup> Enggen yugup dek adigat higya lagagirik, at ayeloman eyavup ogasiga ako yugugu dugwit, 'Yo widis yi

ako enggen yugup mbaligiluk, bikha wagek ogagya neyagek, 3 tahun ogagagi ovara, enggen yugup dek adigatma, wen enam warogo dogogwi en, murogo bain.'

<sup>8</sup> Yugugu lagagimu, at ayeloman ako en, 'Nasin! Tahun yi vaga anen va yugu, adem mogot mbanggya, ogarup imbitirikmu, hekbaup. <sup>9</sup> Eke, tahun yi okbaluk, ambi agya vaga enggen yugu halok andi sek. Eke, enggen yugu dek halok andi, murogo banok o,' yiluk, yugogogi o,' yugeragagi.

#### **Yakuri samban ogasagwi vaga hwa ambi sek ogagagi wene**

<sup>10</sup> Andi en, hivis At Yesus it Yakuri samban ogasagwi vaga it samban ogasagwima ambi wene mamulirigya-ma, <sup>11</sup> hwa ambi madis endawima nungwigya lagagirik, aup edup hegek, tahun 18 ogagagima, ambor hedalek atmamendek yup meyan at welagagi.

<sup>12</sup> Meyan at werekma, At Yesus en hwa ako il higya lagagirik, yanggup yugogogi wagya lagagimu, yugugu dugwit, "Hwa yi wai! Edup ako mondok dek okbagagi o," yiluk, <sup>13</sup> inggis ao vakbagya hegek, hwa ako ambor edup akodek agya lagagimu mendek yiluk, Ala inis siyabagagi.

<sup>14</sup> Andi ogagya lagagimu, ap Yakuri samban ogasagwima enasin ako it samban ogagwi vaga Yesus en hwa ako sek ogagya higya lagagirik, aninis en avakwa yugirigya dugwit, "Yavup ogarup yiluk ndugwis 6 hudi denek werekma, ndugwis 6 hudi denek andi vaga ugun edup sek okbigigaup yiluk, wagu dogop andi sek. Eke, nit samban ogasagwi yi vaga wagek yup andi dek."

<sup>15</sup> Yugirigya lagagimu, Nenasin Yesus ako en at yugugu dugwit, "Hit avakwa henendawi henagavoval ovagak yugerelagwi yi wai! Hit ovok samban ogasagwi vaga henanggom sapi a, henanggom keledai a, davoma larikmu, is naupwak yiluk, sogop hurugo baluk woginiviluk landagwi ako dek? <sup>16</sup> Eke, andi halok, Averaham ombao hwa yi, Sile en heda marogo vagogo welagagi hegek, 18 tahun ogagagirikmu, hit samban ogasagwi vaga heda visilogo hekbaup andi, moga atma yiluk, yagalagwi? Heda visilogo hekbaup andi, sek at."

<sup>17</sup> Andi yugeragagi vaga at inim ogorek welagagwa ako enanggadi erogo bogogi ovara, it avakwa nin en At Yesus eve iya nggarogo ogarubuk menda ogarit lagya lagagi ako vaga enadenggen umbutu lagagwa.

#### **Vudok enggen vaga wakhegek yugeragagi wene**

(Mat 13:31-32; Mrk 4:30-32)

<sup>18</sup> Andi, At Yesus en, "Ala avema bisaup ako andi, nano ndatak? Eke, nano vaga wakhaik? <sup>19</sup> Dek. Ala avema bigigaup ako andi, ap ambi vudok enggen yatya lagagimu, oklagagi hak. Vudok enggen yatya lagagimu, avuduk ingga dugwit, yo ako ombok agagi. Ombok

agya lagagarik, abwak vaga yi swa ndi swa mbogot vaga nelagwi menda enawi valheda nunggugu lagagwa o," yugeragagi.

#### **Ragi roti virisiga menda wakhegek yugeragagi wene**

(Mat 13:33)

<sup>20</sup> Andi yugirigya lagagirik, ambi yugirigya dugwit, "Ala en avakwa at avema bugu lagagimu eneyave wisane wigalarup ako nano vaga wakhaik? <sup>21</sup> Avakwa Ala avema ako andi, ragi roti virisiga menda ovagak. Andi, hwa ambi en *ragi roti* virisiga menda ako horok maduk at *tepung* wisane inim hudilogo wombabaluk, ragi roti virisiga menda ako menda inim muduk-medak ogagya halok, ovok erogo virisiga o," yiluk, yugeragagi.

#### **Sup maduk vaga nunggup wene**

(Mat 7:13-14, 21-23)

<sup>22</sup> Andi en, At Yesus ako o Yerusalem lagya dugwit, o kota ombokma inim, o madukma inim, ambima nonggegek ogarit lagya dugwit, wene mamuleregek lagya lagagi. <sup>23</sup> Lagyama, ap ambi en, "Nasin wai! Avakwa ovok erogo enagap wendarimi a, ata ambitap adigat enagap wendarimi a?"

Yugugu lagagimu, At Yesus en it yugirigya dugwit, <sup>24</sup> "Sup maduk vaga nunggup yiluk, dil watu dogones. It avakwa wisane nunggup yiluk, ogarugup ovara, meyan at hagup o, yiluk, yukheraliga. <sup>25</sup> At awi werek ako en mendek yiluk, sup latya dogomima, hit weram sup vupuk ogagu dugwit, 'Nasin! Sup hut neran,' yugurugup ovara, Aren, 'Hit ap nggoma en wagep? Hit An ninggut,' yukheragwi. Yukhirigya halok, <sup>26</sup> hiren At yugugu dugwit, 'Dek. Isogo ninim nunggu lagyo ako. Dek. Ninawi mbumbumu wene mamulnirigya lagen ako o,' At yugurugup ovara, <sup>27</sup> Aren, 'Hit nggoma en wagep? Hit An ninggut. Hit weyak ogasagwi yi, hodo wilitales o,' yiluk <sup>28</sup> weram wikbigigagwi. Weram wibigigamindikmu, andoma dugwit, ap Averaham o, Isak o, Yakup o, eke, it ap Ala en yugirigya hegek yugerlagwi menda navi-navi ovok erogo Ala avema agarwik inugu dogogupik, henaninis en yup yagwi, henaik nggidit-nggidit yugwi, ogagu dogogup o.

<sup>29</sup> It avakwa o weram en o mo daga wandiga venak-venak vikit en, o mo huruk yagaligama vikit en, Ala avema bisaligama isogo naguluk, homari warugup.

<sup>30</sup> Homari wagu dogogupik, it ap hivis agarwik ako andi, nin enendak agwi, eke, enendak agarwik ako andi, nin hivis agwi, ogagu inisagup," yugeragagi.

#### **Avakwa o Yerusalem menda enabwa imbitigi wene**

(Mat 23:37-39)

<sup>31</sup> O andi hudi vaga, it ap Parisi menda nin en Yesus adema lagu lagagwarik, At yugugu dugwit, "Ap Herodes harup imbitama, yoma en hodo erogo wilin."

<sup>32</sup> Yugugu lagagwama, Yesus en, "At ap yangge do ovagak andi, wene yi yuguri elales: An yogak inim, heveret inim, madis ap enendawima agarwik halok, nggigilogo wibugu, aup edup halok, sek okbugu, ogagya dogomindik, ndugwis mberen dukluk ndugwis ambi vaga An ogarigiluk wagagis ako andi, mondok wotok erogo ogasogon. <sup>33</sup> Anderogo ovara, ap navi ambi o hunogoma en hambup meyan, o Yerusalem adigat hambup sek atma, yogak inim, heveret inim, dogovit inim, An andoma lagya dogosogon aro.

<sup>34</sup> Ai! Yerusalem, Yerusalem! It ap navi-navi ako initwis, ap Ala en yonggo henadema lakbisa wagagi andi, helep vaga initwis, ogasagwi menda atma ai! Swa ayam isa en eyagi alup amik avema sovalbisiluk agarik hak, anen hit heneyagi anderogo at wonggalogo bisaup ndugerek-ndagarek imbita lagagis ovara, hiren, 'Nenanggon,' umbutu lagagupmu, ai! <sup>35</sup> Hit Yerusalem menda hit henawi yoma Ala en hekbigigamima, hit hinil nggale yusogom. Hiren, 'Nenasin Ala en lakba waga yi, inis siyabasogom o,' yiluk, yegetek hegek, hinil mondok neyagetek dogogup o, yiluk, yukheraliga," yugeragagi.

#### Ap inggis-isok virik sek okbagagi wene

**14** Hivis it Yakuri samban ogasagwi ambi vaga At Yesus en erom naguluk ap Parisi enasin ambi amwa nonggagagirikmu, awakwa en at inil vurek wela-gagwa. <sup>2</sup> Inil vurek inigik, ap ambi edup inggis-isok virik Yesus adema werekma, <sup>3</sup> At Yesus en Musa wene mamulereagwi menda inim, it Parisi menda inim, yugirigya dugwit, "Yakuri samban ogasagwi vaga awakwa sek oginivup andi, sek a, weyak a? Ala wene yugup Musa dirup mbanggigi ako vaga bikhugu dugwit ng-garek helagwi?"

<sup>4</sup> Yugirigya lagagimu, it ovok erogo enane mondok dek mbup yagagwa. Mbup yugu lagagwama, At Yesus en ap ako inggis vagogo sek okbagya lagagirik, lakbalagagi.

<sup>5</sup> Lakbalagagi lagya hegek, At Yesus en it yugirigya dugwit, "Hit samban ogasagwi vaga hit ambi henabut a, henanggom sapi a, wen bavulikmu is yanggadekma nggedek wambigya halok, hit mbikit vagogo badaga warup sek a, weyak a?" <sup>6</sup> Yugirigya lagagimu, enane onngo yugurup meyan agya lagagimu, mbup yagag-wa.

#### Enendawi sovalek dugwit, enaganiya isagu dogop wene

<sup>7</sup> At Yesus ap Parisi amwa erom nunggu dugwit, it awakwa erom naup enayonggo bagagi ako, At Yesus en it ap ombok hora yagalagwima adigat hora yi wag-wi inugu lagagirik, wene wakhegek yugirigya dugwit, <sup>8</sup> "Ap hwa hidigya dugwit, isogo naguluk, henayonggo bagya halok, ako lagu dogomundik, ap ombok hora yagalagwima andoma hora yubuk. Hit ap horogatma,

eke, ap ambi mondok ombok ayonggo bamindikmu wagya halok, <sup>9</sup> at hinim henayonggo bamindikmu ako en hit yukhera wagya dugwit, 'Avyak! Ap yi, hit henaveloma hora yipim hit witlares,' yukhirigya halok, henanggadi embetek ap ugun hora yagalagwima hora yi laup agya hao en, ap ombok hora yagalagwima hora yubuk.

<sup>10</sup> Henayonggo bagya halok, ako lagu dogomundik, ap ugun hora yagalagwima andoma hora yup. Horaik werekma, at henayonggo bami ako en hit yukhera wagya dugwit, 'Nowa-nasin. Hit ap ombok hora ya-galagwima yoma hora yi omanes,' yukhirigya halok, it awakwa ovok erogo erom naup hinim agarwik ako ini-vaga hit siyalek at hinisaupwak, ap ugun hora yagalag-wima andoma hora yugu dogop. <sup>11</sup> Hit henendawi siyabatugu hiniselok, sovabugugu, eke, henendawi sovabatugu hiniselok, siyabugugu, ogagya hagup," yiluk, yugeragagi.

<sup>12</sup> Yugirigya lagagirik, Yesus en ap at ayonggo bagagi ako yugugu dugwit, "Hat isogo isagya dugwit halok, hinim hendawi hunik agindik inim, haswei inim, howa-haot inim, ininggis werek hat hinim agindik inim, it enadigat enayonggo bagya dogobuk. It enadigat enayonggo bagya heyalok, hivis it anderogo isogo is-agu dugwit, onngo-onngo hat hayonggo bagu sao en, it enadigat enayonggo bagya dogobuk. <sup>13</sup> Ata, isogo is-agya dugwit, ininggis dek halok, inisok venak weyak-venak weyak halok, enerambo weyak halok, inil mbuk halok, enayonggo bagya dogop. <sup>14</sup> Enayonggo bagya heyalok andi, hendawi adenggen wisane hayogon. Eke, iren onngo wokhirup meyanma, vivis, it awakwa sek menda hombagagwa ako iniluk okbisaup hudi ako vaga onngo wokhugu hagup," yiluk, yugogogi.

#### Isogo ombok isasagwi wakhegek yugeragagi wene (Mat 22:1-10)

<sup>15</sup> Ap erom naup inim horaik welagagwa ako ambi en Yesus yugogogi ako aruk hunggu lagagirik, Yesus yugugu dugwit, "It Ala avema bisaligama dugwit, iso-go namwi ako enadenggen umbutu dogosogom."

<sup>16</sup> Yugugu lagagimu, Yesus en wakhegek yugirigya dugwit, "Ap ambi isogo ombok isarup imbita lagagirik, awakwa wisane enayonggo bagagi. <sup>17</sup> Enayonggo bagya lagagirik, isakbaluk, ayeloman ambi yugugu dugwit, 'Isogo isago yi, mondok vedarup agyama, naup ap enayonggo bagi ako warupwak yiluk, yugeregek elak,' yiluk, lakbalagagi.

<sup>18</sup> Lakbalagagi ako en yugeregek lagagi ovara, it enadik-enadik at enanggin-enanggon yugugu dugwit, at ambi en, 'An yavup ogarek ambi onngo bagirikmu bikha laupma, isogo isago nalaup andi, meyan o, nasin,' yugugu, <sup>19</sup> eke, ambi en, 'An sapi ninggis anggangga venak-venak hudi onngo hunggis wen ndililit wal okha lagek yipim, isogo isago nalaup andi, meyan o, nasin,' yugugu, <sup>20</sup> eke, ambi en, 'An nogwa

swi at hidigirikmu, isogo nalaup meyan o,' yugugu, ogagagwa.

<sup>21</sup> Ogagagwa ako ayeloman en asin mbilinogo yuguri wanya lagagimu, asin aninis en ayeloman yugugu dugwit, 'O kota yoma sup andogon-andogon ovok erogo lagya dogomindik, ap ininggidek halok, inggis-inisok weyak halok, inil mbuk halok, enerambo weyak halok, hodo erogo woginiviluk omano.'

<sup>22</sup> Yugugu lagagimu, woginiviluk wanya lagagirik, asin yugugu dugwit, 'Nasin. Yuknigin ako woginiviluk wagi ovara, hora yup nggolo wisane agarik.'

<sup>23</sup> Yugugu lagagimu, asin ako en ayeloman yugugu dugwit, 'Andi halok, awakwa o weram sup andogon-andogon ugun agarwik ako an namwa hobo-hobo ogari nunggu warupwak yiluk, hane anye vaga eneyanggup erogo bisa wanya dogwen. <sup>24</sup> Isogo naguluk, endak enayonggo bagi ako ovok erogo an nagasogo isago na nunggu warup mondok dek aro,' yugogogi," yiluk, yugeragagi.

#### Yi menda ndi menda nggelabisiluk, an ninim laup wene

(Mat 10:37-38)

<sup>25</sup> Awakwa wisane Yesus inim nagusim, Yesus en elese ambukmu laklagya lagagirik, it yugirigya dugwit, <sup>26</sup> "Hit hinisai-henasini inim, henabur-henogwa inim, henowai-henarwi inim, eke, hit heneyave dombok inim, henendawi inim hunik ombok erogo dugwit, an ninim henendawi hunik horagat dugwit, an nadema wagu hiniselok, an nane welagwi menda arusogom mondok dek o. <sup>27</sup> Henagyo winik hedelok an ninim warup embetetek hiniselok, an nane welagwi menda arusogom mondok dek o. †

<sup>28</sup> Hit an nane waup umbutu hiniselok, endak ogarup andi wakhegek ambi yisogon. Hit o adup valit dagaup ombasagwi halok, 'Valup ongo baup ovok werek a, dek a?' yiluk, hininggis dinggingitek hegek, valisagwi embetep? <sup>29</sup> Yoparip hininggis dinggingitek hegek vunggu hiniselok, wen bavulogo owak wombabaluk, wake ao sambunggitek hegek yoparip dek agya halok, ap nin en inil hugu dogomundik, 'Ap yi, o valup yiluk ogaga ovara, atok dek agya halok, hekbagas yi, hanes o,' yiluk, henaganda hambusogom ako dek?

<sup>31</sup> Eke, ap ndugandok ambi en ndup ogari laup yiluk, ndup ako avok wililisiga halok, arwi endak dibisiluk, 'An narwi eneyave sepuluh ribu en it ninim ndup ogorek eneyave dua puluh ribu werekma, ndak enari laup a, meyan a?' yiluk, wal okhegetek hegek, yamburi landiga embetep? <sup>32</sup> Wal okhelok meyan agya halok, it inim ndup ogorek ako ao wagu-sigik, 'Ndup vage moga erogo yo nggunggup o,' yiluk, yonggo lakbisa landiga ako dek a? <sup>33</sup> Andi ogasagwi ovagak, hit ambi

† *Ndugerek-ndagarek yo winik hedelok Yesus inim nagu dogop adem andi, Yesus yo winik vaga yagan watigi ako hak, nit Yesus ake hambup sek yiluk nenendawi sek vaga o ndugerek-ndagarek Yesus eyavup ogarit lagu dogop.*

henangge-henangge ovok erogo hek baup henendawi wal okhegetek hegek an nane welagwi menda arusogom mondok dek," yugeragagi.

#### Garam edup dek halok, mbo belagwi wene

(Mat 5:13; Mrk 9:50)

<sup>34</sup> Wene ambi yugirigya dugwit, "Garam sek ovara, aitek agya halok andi, nggarogonggan en edup werek ogarup? <sup>35</sup> Garam aitek ako andi, wen mudis arupwak yiluk, yavup yagoma a, wen weyakma a, balip ovara, ambi ogarup dekma, mondok mbo belagwi. Henaruk werek halok andi, des erogo at henaruk hunggu dogwes," yiluk, yugeragagi.

#### Ap ambi andomba bolagagi wakhegek wene

**15** It ap pemerintah enake yoparip wonggalisagwi menda inim, weyak ogasagwi menda inim, ovok erogo Yesus ane hulusogom yiluk, at adema lagu lagagwa. <sup>2</sup> Adema lagu lagagwama, it Parisi menda inim, it Musa wene mamulerelegwi menda inim, iren Yesus it ap weyak ogasagwi menda andi inim inigu lagagwarik, enanggin-enanggon yugu dugwit, "Ap yi, awakwa weyak ogasagwi menda woginipu lagarik, inim erom naliga hinil yokhanes!" yagagwa.

<sup>3</sup> Yugu lagagwama, At Yesus wene wakhegek it yugirigya dugwit, <sup>4</sup> "Hit ambi henandomba eneyave 100 werekma, ambiat bolagya halok, 99 adigat iringga nenggek nelagwima nenggek nagu-sigik, ambiat bolagagi ako hekbagetek ilik lagek-wombalagek belalit nagu lagipik, havethedelagwi ako dek? <sup>5</sup> Eke, havethedugu lagipik, henomado vaga sambiniluk henendawi adenggen vaga, hai warit <sup>6</sup> henamwa wolok lagu lagipik, henaswi, henowa-henaot inim, homakbisiluk, 'Nandomba bolagagi ako belalhidigya lagirik havethidigirikmu, hit ninim adenggen ogarusogom,' yiluk, yugerelagwi ako dek? <sup>7</sup> Andi wane-wane ap 99 umbutu dugwit nenendawi mondok sek adigat halok nenomaduk mbo baup dek ombasagwi halok, it mbo-got vaga agarwik enendawi adenggen horogot ombarusogom ovara, it ap weyak ogasagwi ambi en weyak ogagya lagagi ako, asam helok, mbo bagya halok andi, it mbogot vaga agarwik ako enendawi adenggen ombok erogo umbutu dogosogom o, yiluk, yukheraliga," yugeragagi.

#### Yoparip bolagagi wene

<sup>8</sup> Andi yugirigya lagagirik, ambi yugirigya dugwit, "Hwa ambi yoparip 10 vagogo werekma, ambiat bolagya halok, unda yebetbaluk, mupwak horogo lakbagek ogagya dugwit, mbup yegetek belalit-belalit ogagya lagarik, havethedaliga ako dek? <sup>9</sup> Eke, havethedelok, aswei inim, at inim agarwik inim, homakbisiluk, 'Nayoparip bolagagi ako havethidigirikmu, ninim adenggen ogarusogom,' yugereliga ako dek? <sup>10</sup> Ako andi ndatak ap weyak ogasiga ambiat en

weyak ogagya lagagi ako asam helok, mbo bagya halok, it Ala yonggo lakbisa wandiga menda malaikat ako en enendawi adenggen umbutu dogosogom, yiluk, yukheraliga o," yugeragagi.

### Ap abut ambi bolagagi wene

<sup>11</sup> Yugirigya lagagirik, wene ambi iri dugwit, "Ap ambi aburi mberen welagagi. <sup>12</sup> Ambetaga menda ako en asin yugugu dugwit, 'Nasin. Heyase an woknirup embeten ako hodo erogo wokniru,' yugugu lagagimu, asin en angge eyase ako mogologo iperen wogoragagi."

<sup>13</sup> "Wogirigya lagagimu, ndugwis ambukum dukluk, abut elavo ako en asin angge wogogogi ako ovok erogo wonggalogo ongo hundutu lagagirik, ayoparip hedelok o adumu andoma winggigi. Wunggu lagagirik andoma dugwit, endawi dibagetek ugun ogarit lagya dugwit, ayoparip ako dek okhedagagi. <sup>14</sup> Ayoparip ako dek okhidigya lagagirik, werekma, avakwa andoma ovok erom uvup wisane agagirikmu, at ogo erom uvup wisane ogagagi. <sup>15</sup> Erom uvup ogagya lagagimu, ap awerek ambi awi andoma menda eyavup ogagya dogogiluk, adema lagagi. Adema lagya lagagimu, at ap andi en anggomi o weram andoma eyaga dogopwak yiluk, lakbagagi. <sup>16</sup> Lakbagagi lagya lagagirik, eyaga dugwit, 'Nagaum arupwak yiluk, erom agamut wamnau yi, an ninggya dogosogon,' imbitigi ovara, dek, it nin en ambiat ogo mondok wogigitek at welagagwa.

<sup>17</sup> Andi en, ndugwis ambi vaga endawi wenggelagya lagagirik, 'A! An nasin ayelomani en yavup ogasagwi ongo hedelagwi ako, eneyave wisane dugwit, erom higiogo bagek nelagwi ovara, an andi, erom uvup en hambup atma, <sup>18</sup> an yoma en nasin adema lagya dogomindik, "Nasin. At mbogot vaga menda inim, hat inim, weyak okbugugu lagi o. <sup>19</sup> Weyak okbugugu lagima, Yi an nabur, yuknirup andi dek. Ata, hayeloman en yavup ogasagwi ongo hedelagwi ako ovagak okbanin," yuguri laik,' imbitigi. <sup>20</sup> Imbitiya lagagirik, o andoma hekbaluk, asin adema wagagi.

Adema wagya lagagirik, ao ari wagyama, asin ako il yokhigya lagagirik, abwa en venggen lagya dugwit, dimit-domat okbaluk, ayup yagagi.

<sup>21</sup> Ayup yagya hegek, abut en asin yugugu dugwit, 'Nasin. At mbogot vaga menda inim, hat inim, weyak okbugugu lagi. Weyak okbugugu lagima, "Yi an nabur," yuknirup andi dek,' yugogogi.

<sup>22</sup> Yugogogi ovara, asin en ayelomani yugirigya dugwit, 'Yum mondok segedok adigat wogogo yikbagwi, sanggan at inggis vaga yikbagwi, arepatu yikbagwi, hodo erogo ogares. <sup>23</sup> Okbaluk, sapi eyak amok werek ambi wa lagu dogomundik, warogo isogo isagu dugwit, adenggen ogarusogom. <sup>24</sup> An nabur yi, hombagagi ovagak ovara, iluk aga. Eke, bolagagi ovara, havethidigi o,' yiluk, adenggen ogagagwa.

<sup>25</sup> Adenggen ogagu-sigik, owa ako yavumu welagagirik, amwa ari nunggu wagya dugwit, ndawi nggidis watwis aruk hunggigi. <sup>26</sup> Hunggu lagagirik, ayeloman ambi yanggup yugogogi wagya lagagimu, yugugu dugwit, 'Yi nano ogasagwi?' yiluk, <sup>27</sup> hemethigya lagagimu, ayeloman ako en, 'Dek. Haot ako vage nunggu waga. Eke, eyave sek nunggu wagarikmu, hasin ako en sapi eyak amok werek ambi warogo isagu dugwit, adenggen ogasagwi.'

<sup>28</sup> Yugugu lagagimu, owa ako aninis agya lagagirik, amwa nunggup anggon akluk, werekma, asin wunggu lagagirik, ane sagain erogo, 'Nungguma,' yugogogi ovara, <sup>29</sup> owa ako en asin yugugu dugwit, 'Haruk dogwen. An yi tahun ndi tahun heyavup ogasiga. Eke, ogagya dugwit, "Yerogo ogarup, nderogo ogarup," yuknugu ako nanggong mondok yagaligadek ogarit adigat landiga ovara, kambin eyak ambiat an naswei ninim nenendawi adenggen dugwit, isarogo naguluk, mondok woknigitek agindik ovara, <sup>30</sup> habut yi andi, akwa ugun wurinivit nagu dugwit, hayoparip wogogogin ako dek ogarit nagu laga ako wagyama, sapi eyak amok werek menda warogo isagigin.'

<sup>31</sup> Yugugu lagagimu, asin en, 'Nabut o. Hat mondok-mondok ninim agindikma, nangge-nangge ovok erogo andi, hat hangge aro. <sup>32</sup> Eke, hat haot yi andi, hombagagi ovagak ovara, iluk aga o. Eke, bolagagi ovara, havethidigima, nenendawi adenggen dugwit, isogo yi sek isagyo,' yugogogi," yiluk, Yesus en it avakwa yugeragagi.

### Ayeloman ambi en asin ambakan inggigi wene

**16** Andi en, havis At Yesus en At ane welagwi menda ako yugirigya dugwit, "Ap inggi werek ambi ayeloman en at awi aruwam welagagi. Aruwam werekma, avakwa en, 'Dek. Hayeloman ako en hangge mondok dek erogo baik landiga,' <sup>2</sup> yiluk, asin ako yugugu lagagwama, ayeloman ako yanggup yugogogi wagya lagagimu, yugugu dugwit, 'Hat ogarit landiga hunggis andi, nggarogo ogarit landigama, yuknigao? Hat yogak namwa o aruwam ambi inim dogop dekma, hat yoma dugwit, ogarit lagya lagen ako mbilinogo yukniru.'

<sup>3</sup> Yugugu lagagimu, ayeloman ako endawi wenggenggu dugwit, 'Nasin en o aruwam dogop dek, yuknigarikmu, an nggarogo ogarik? Nanye dekma, wen bavunggu dogop andi, meyan. Eke, nambenggino yugeregek lagya dogop andi ogo, nanggadi werek.

<sup>4</sup> Ata, weram wibaninggya dogomima, avakwa en an woknerapwak yiluk, yerogo ogarup sek ai?' yiluk, endawi wenggenggigi. <sup>5</sup> Wenggenggu lagagirik, at ap ayeloman ako en it avakwa at asin anomarangge dirup mbalek welagagwa ako enadik-endadik mbauk erogo at adema warupwak yiluk, yanggup yugeragagi. Yanggup yugirigya lagagimu, ambi endak wagagi ako

yugugu dugwit, 'An nasin anomarangge dirup mbalek wogurup maren agarik?'

<sup>6</sup> Yugugu lagagimu, ap ako en, 'Hasin anomarangge an wogurup andi, saitun amburup 15 nderem nudik mbalek agarik.' Yugugu lagagimu, ayeloman ako en, [vavis woknerapwak yiluk,] 'Nasin anomarangge dirup mbalek hat wogurup andi, wogogo aveloma 7 nderem nudik adigat hodo erogo mbauk erogo dirup waru.'

<sup>7</sup> Yugugu lagagirik, at ayeloman ako en at ambi yugugu dugwit, 'Eke, hat ogo, nasin anomarangge dirup mbalek wogurup andi maren agarik?' Yugugu lagagimu, ap ako en, 'Gandum 100 harun yidik dirup mbalek agarik.' Yugugu lagagimu, ayeloman en, 'Nasin anomarangge dirup mbalek agarik yi, wogogo aveloma 80 harun adigat mbauk erogo dirup waru,' yogogogi. Yugugu lagagirik, [vavis woknerapwak yiluk at ayeloman ako en it nin asin anomarangge dirup mbalek welagagwa ako ovok erogo anderogo adigat yugeragaji].

<sup>8</sup> Ayeloman ogagagi asin ako hunggu lagagirik, ayeloman at ambukmu inggigi hegek ovara, endawi anggat vaga iya erogo wenggenggu lagagi halok, ayeloman adema 'Wil' yugogogi."

Wene wakhegek ako yugirigya lagagirik, Yesus en at ane welagwi menda yugirigya dugwit, "It avakwa enendawi ugun wen vaga menda yogak agarwik ako it menda inim ogagu dugwit, enendawi anggat vaga iya erogo wenggelisagwi ovara, it Ala aburi enendawi awia okbogogi ako andi, it wen vaga menda inim ogagu dugwit, enendawi dek dugwit, horogat wenggenggu-sigis," yiluk, yugeragagi.

<sup>9</sup> "Henangge-henayoparip wen vaga menda avakwa enendawi hunik okhinivupwak yiluk, yonggarinigik nagu dogop. Anderogo ogagu hiniselok, dek agya halok, vavis o sekma andoma mondok-mondok dogovovok yiluk heyaga warogo wokhinivisogon, yiluk, yukheraliga.

<sup>10</sup> Ap ambi en horogat ogarup menda adik ogagatek des erogo ogagya halok, ombok ogarup menda ogo ndatak des erogo ogagya dogosogon. Eke, ap ambi en horogat ogarup menda des erogo ogagatek halok, ombok ogarup menda ogo ndatak des erogo ogasogon dek aro. <sup>11</sup> Anderogoma, henangge-henayoparip wen vaga menda ako des erogo vagago agipik dek halok, eve sek menda vagago dogovovok yiluk, Ala en bigigayogonbuk. <sup>12</sup> Eke, hiren ap ambi angge des erogo vagogo welagetek halok, hit henadik henangge vagago dogovovok yiluk, Ala en wokherayogon embetep? Dek aro.

<sup>13</sup> Ap ambi en asini mberen enayeloman akluk, enake ogagya dogop meyan. Iperen enake ogarit lagya halok, ambi anggon imbitya dugwit, ambi endawi hunik imbitya, ata, ambi en ogarup yugugu ako seve erogo ogagya dugwit, ambi en ogarup yugugu ako anggon adigat imbitya, ogasogon. Hiren At Ala inim, henangge-henayoparip wen vaga menda ako inim,

iperen henendawi dambulik vaga musek laup andi, meyan," yiluk, yugeragagi.

<sup>14</sup> Yugirigya lagagimu, it ap Parisi en Yesus wene yugeragagi ako hunggu lagagwarik, yoparip enendawi hunikma, Yesus agenda yagagwa. <sup>15</sup> Agenda yagu lagagwama, At Yesus en it yugirigya dugwit, "Hiren avakwa sek henombarupwak yiluk, henanggangga hedelagwi ovara, Ala en andi, henendawi ombasagwi ako elup agarik. Yi menda ndi menda iya ombasagwi andi, At Ala anggon ombasiga," yiluk, yugeragagi.

#### Yesus en Musa wene ako dek arisogombuk yiluk, yugeragagi wene

(Mat 11:12-13; 5:31-32; Mrk 10:11-12)

<sup>16</sup> Yugirigya lagagirik, ambi yugirigya dugwit, "Ap Yohanes wagetek hegek, Musa wene yugup dirup mbalek ako inim, it ap Ala en yugirigya hegek yugurugu lagagwa navi-navi enane ako inim, ogarit nagu lagagwa. Eke, ap Yohanes wagagi hudi andi, avakwa Ala avema dogopwak yiluk sup hutbagagi Sek Wene ako yugeregek nagusim, it avakwa ovok erogo dil watu dugwit, Ala avema bisaligama nunggu wendagwi. <sup>17</sup> Anderogo ogasagwi ovara, wen inim, mbogot inim, dek arup andi, ndak ovara, Musa wene yugup dirup mbalek ako andi, nin maduk mbalek ambi dek asogon andi mondok dek aro.

<sup>18</sup> Ap ambi ogwa hekbaluk, hwa adik ambi wigya halok andi, at en hwa endak ako alyak waliga. Eke, ap ambi hwa bonggalek ako wigya halok, at ogo, alyak waliga," yiluk, yugeragagi.

#### Ap inggi werek ambi, Lasarus inim ogagagwa wene

<sup>19</sup> Yugirigya lagagirik, Yesus en wene ambi yugirigya dugwit, "Ap ambi inggi werek menda, ayum segedok onngo ombok adigat yikhidigya lagagi. At ninggi-ninggi segedok amburup werek menda adigat ningga dugwit, adenggen wisane welagagi. <sup>20</sup> Eke, ap adik ambi ambenggino iri lagagi menda inis Lasarus eyave vaga amu hunik atma, ap inggi werek awi sup mbanggutmu andenam horaik adigat welagagi. <sup>21</sup> At ako en, 'Ap inggi werek ako ambi ninggya hegek, ilivulu wambigya ako, naik dek ai,' imbitya lagagi. Eke, yangge wagu lagagwarik, at amu ako enabya melan nunggu lagagwa.

<sup>22</sup> Andi en, ndugwis ambi vaga ap ambenggino yagaliga menda ako hambagagi. Hambigya lagagimu, it malaikat ako en eyave wolok Averaham adema ba lagagwa. Ba lagagwa hegek, havis ap inggi werek ako ogo hambagagi. Hambigya lagagimu, eyave wen saba lagagwa. <sup>23</sup> Saba lagu lagagwama, hali hunikmu ari lakluk, andoma yagan watya dugwit, elese ilik lagya lagagirik, o adumu andoma ap Lasarus Averaham iperen werek enogogi. <sup>24</sup> Inugu lagagirik, At ane ombok vaga yugugu dugwit, 'Nasin Averaham wai! An hali abya edup adik wisane yagan wasigama, nabwa nim-

bitya dugwit, ap Lasarus en inggis atok vaga is erabaluk, nabya eraba warupwak yiluk, lakbaoma!

<sup>25</sup> Yugogogi ovara, Averaham en at yugugu dugwit, 'Nabut. Hat hiluk dugwit, segedok adigat welagagin. Eke, Lasarus yi andi, anggin-mbanggin welagagi ako hendawi wenggelu. Yogak Lasarus yoma dugwit, endawi seyo yagas ovara, hat andi, yagan wasiga. <sup>26</sup> Eke, ambi, it ap yoma en hat heya wagwi, andoma en nit ninisa wagwi, ogarup ombasagwi ako meyan haupwak yiluk, ilim andoma nggedek ombok bagagi.'

<sup>27</sup> Yugugu lagagimu, ap inggi werek ako en, 'Eke, andi halok nasin. An nowa-naot eneyave 5 nasin amwa agarwikma, yagan wasagwima yoma wagu sao en, an nasini enamwa hurimbis yugera laupwak yiluk, ap Lasarus andi, lakbanok yiluk, yukhisiga.'

<sup>29</sup> Yugugu lagagimu, Averaham en at yugugu dugwit, 'Musa yagagi wene inim, it navi-navi enane inim, yugerelagwi ako hunggu dogopwak.'

<sup>30</sup> Yugugu lagagimu, ap ako en, 'Meyan, nasin Averaham. Ap ambi hambuluk lendagwima en yugere lagya halok andi, it weyak ogasagwi ako enasam helok, mbo bagu dogosogom!'

<sup>31</sup> Yugugu lagagimu, Averaham en, 'It howa-hasin ako en Musa yagagi wene inim, it navi-navi enane inim, hulisagudek halok, ap ambi hambuluk lendagwima en iluk akluk, yugera lagya halok ogo, it weyak ogasagwi ako enasam helok, mbo bagu dogosogombuk,' yugogogi,' yiluk, Yesus en yugeragagi.

#### Weyak ogasagwi wene

(Mat 18:6-7, 21-22; Mrk 9:42)

**17** Yugirigya lagagirik, Yesus en At ane welagwi menda ako yugirigya dugwit, "Hit weyak ogarovovok yiluk, henendawima mabigiga warisogon ovara, at henendawima mabigiga wandiga ako andi, anggin ovaga arugwi! <sup>2</sup> Ap ambi en avyak mariduk yi, weyak ogarupwak yiluk, enendawima mali wagao vaga avyak ako weyak ogagu-sao en, ap andi helep ombok gandum yanggalisagwi menda ako vaga avupmu, heda yidilogo is namut agurukmu wombabiselapmu en sek aro. <sup>3</sup> Anderogoma, henendawi suwam watu dogwes.

Hit henaswe ambi en weyak ogagya halok, anggadi warup. Anggadi wakbaluk, weyak ogaga ako asam helok, mbo bagya dogomima, at omaduk andi, dek erogo bagu dogop o.

<sup>4</sup> Eke, ap ambi en ndugwis ambi vaga weyak 7 hudi okbugugu dogomindik, asam helok, 'Ai, an weyak okbigigis o,' yiluk, ogaga ndatak 7 hudi yukhera wagya halok, hirenen 7 hudi at omaduk dek erogo bagu dogop," yiluk, yugeragagi.

#### Enendawi avyarat ombasagwi wene

<sup>5</sup> Yugirigya lagagimu, it lakbigik menda ako en, "Nenasin o. Nenendawi hova vanggabuluk, avyarat ombasagwi ako ambi hoda arupwak yiluk, okbininin."

<sup>6</sup> Yugugu lagagwama, At Nenasin Yesus en it yugirigya dugwit, "Hit henendawi novaga vanggabuluk, avyarat nombasagwi ako maduk yo vudok enggen ovagak henendawima duklip en, yo wane ombok yi, 'Hadem hen hedelok is endawima yaklarit lagya heyayogon o,' yugugu hiniselok, yaklarit lagya helap," yiluk, yugeragagi.

#### Asin en yugugu halok, ayeloman ogagya dogop wene

<sup>7</sup> Yugirigya lagagirik, ambi yugirigya dugwit, "Hit henayeloman ambi en yavup ogagya a, ata henandomba unde waginipu a, ogarit lagya dogomindik, wasim en henamwa nungwigya halok, hiren, 'Hagarom hodo na oma,' yiluk, yugurup andi dek. <sup>8</sup> Ata, hit en henayeloman ako yugugu dugwit, 'Nit nengarom isagogo biniluk, hayum yikhidigya dogomindik, nit nunggu ninigik, hat nit nenake yi welagek ndi welagek ogagya dogop. Eke, nit ovok nunggu niniselok andi, hat erom na omano,' yiluk, anderogo yugisagwi. <sup>9</sup> Asin en ayeloman 'Yerogo ogarup, nderogo ogarup,' wene yugigas ako adigat ogagya halok, at eyavup atma, asin en, 'Wa!' yugisigadek. <sup>10</sup> Andi halok, hit ndatak, wene, 'Yerogo ogarup, nderogo ogarup,' yukheraliga ako ovok okbagu dogomindik, 'Dek. Nit un hayeloman adigat agurik. Havema dugwit, hat yuknirigya halok adigat ogagyoma, wa yuknerabuk,' yugugu dogop sek," yiluk, yugeragagi.

#### Ap eneyave 10 enamu hunik sek okbogogi wene

<sup>11</sup> Hivis ndugwis ambi vaga At Yesus o Yerusalem lagya dugwit, o Samaria wombabagek, o Nggaliliya ilik bagek, sup ilim vaga lagagi. <sup>12</sup> Lagya dugwit, o asoragoma nungwigya hegek, ap eneyave 10 amu hunik ako menda en Yesus nunggu wagya inil hugu lagagwarik, [ap eneyave sek menda enovaga arugwi en yiluk, horok-horok ari warup moga, yiluk,] <sup>†</sup> adumu lenak en <sup>13</sup> enane ombok vaga At yugugu dugwit, "Nenasin Yesus wai! Nenabwa ombaru o."

<sup>14</sup> Yugugu lagagwama, at Yesus il biginugu lagagirik, "[Musa wene yugup dirup mbalek ako ndatak], it ap imam-imam en inil hinisaupwak yiluk, heneyave inugera lales." <sup>††</sup> Yugirigya lagagimu, it ako, lagu-sigik, enamu hunik ako dek agagi.

<sup>15</sup> Enamu hunik dek agya lagagimu, at ambi en imbita dugwit, "An sek agi," yiluk, imbita lagagirik, sugululuk, eyami vaga wagya dugwit, ane ombok vaga Ala inis siyabagek wagagi. <sup>16</sup> Ala inis siyabagek Yesus ave-ma seve yi wagya lagagirik, endawi adenggen en,

<sup>†</sup> *Imamat 13:45-46 yokhanes.* <sup>††</sup> *Imamat 14:1-32 yokhanes.*

Yesus "Wa!" yugogogi. Eke, ap andi, awi o Samaria menda aro.

<sup>17</sup> Ap ako Yesus, "Wa!" yugugu lagagimu, At Yesus en, "Ap eneyave 10 sek aga ako dek? Eke nin eneyave 9 ako nggoma lagao?" <sup>18</sup> It nin Yakuri menda ako dek inigik ap weram Samaria menda yi adigat Ala inis siyabagiluk, eyami vaga suguliluk waga yi?" <sup>19</sup> Yiluk, Yesus en ap ako yugugu dugwit, "Hendawi novaga vanggaluk, avyarat nembeten vaga sek agindikmu, mendek yiluk elak o," yiluk, lakbagagi.

### Ala avema bisa warup wene

(Mat 24:23-28, 37-41)

<sup>20</sup> Andi en, hivis it Parisi menda en Yesus yugugu dugwit, "At Ala en nit mera avema binina warimi?" yiluk, Yesus aigwakma wugu lagagwama, Yesus en it yugirigya dugwit, "At Ala en avakwa at avema bigiga warup ako andi, avakwa yedok haupwak yiluk, ogagetekma warugwi. <sup>21</sup> It avakwa en ogo, 'Yoma wandiga yi hanes.' 'Andoma wandiga andi hanes,' yukheregetekma warugwi. Ala avema bisaup andi, vage hit henanggelekma agarik umbutu dogones," yugeragagi.

<sup>22</sup> Andi yugirigya lagagirik, At ane welagwi menda ako yugirigya dugwit, "An Ap At Endaklagagis yi, 'Ndugwis ambiat eyave haupwak ai,' nombarumwi ovara, hinil neyaup dek andi, hudi vanggo yi wasogon.

<sup>23</sup> It avakwa en, 'Eyave yoma wandigama, bikha manes.' 'Andoma wandigama, bikha lales,' yukhuruguselok, enamusek labuk. <sup>24</sup> Andi, o bigavok mbogot vaga en yovalevet higya halok, o atok-atokma ovok erogo awia agya dugwit ovok sigam asiga hak, An Ap At Endaklagagis warup ako hudi anderogo ogarugwis.

<sup>25</sup> Anderogo ogarugwis ovara, endak, avakwa en mondok novaga edup-mbedup erogo banunggi, avakwa yogak agarwik ako en An enanggon yiluk, mbo banunggi, ogarusogom aro.

<sup>26</sup> Ap Nu werek hegek, avakwa ungun ogarit lagu lagagwa ako ndatak, An Ap At Endaklagagis warup hudi it avakwa anderogo ungun at ogarit lagu dogosogom.

<sup>27</sup> It avakwa en ungun at erom nunggi, is nunggi, ap en hwa hidugwi, hwa en ap hidugwi, ogarit lagu-sigik, ap Nu mburis aveta elola nunggiwagya lagagimu, is yanggadit inggya dugwit, it eneyave ovok erogo is ndokalinipigi.

<sup>28</sup> At Lot werek hegek, ogagagi ako ndatak avakwa en erom nunggi, is nunggi, enangge-enangge hunggun okhidugwi, yavup ogagwi, o vanggis, ungun ogarit lagu-sigik, <sup>29</sup> ap Lot o Sodom en wunggu lagagimu, Ala mbogot vaga en helep enggen hali inim womba ba waga dugwit, it eneyave ovok dek erogo bogogi.

<sup>30</sup> It ungun ogarit lagusim, dek erogo bogogi ako ndatak, An Ap At Endaklagagis ako avakwa anderogo ungun ogarit lagusim, andi hudi sigam ari warugwis.

<sup>31</sup> Henangge handimen werekma, heneyave mbedakma werekma, An waga neyalok, henangge handimen agarik ako heda dagabuk, eke, hit nin yavumu agipik ako heneyami vaga suguliluk, henamwa labuk.

<sup>32</sup> At Lot ogwa ogagagi ako henendawi wenggeles!

<sup>33</sup> Hit heneyave hinidi okhedugu dugwit, an nane mbo bamwi halok, heneyave yelemele yusogom. Eke, an nini ombok arupwak yiluk, heneyave idi dek okbetamwi halok, hinidi erek dogosogom. <sup>34</sup> Ndugwis andi vaga hup ap mberen handimen nogo yugusim ambi wigya, ambi hekbaga, <sup>35</sup> akwa mberen erom weragusim ambi wigya, ambi hekbaga, <sup>36</sup> (eke, ap mberen yavumu werekma, ambi wigya, ambi hekbaga,) ogagya hagup, yiluk, yukheraliga," yugeragagi.

<sup>37</sup> Yugirigya lagagimu, At ane welagwi menda en, "Nenasin. Andi o nggoma en ogarup yiluk yegen?"

Yugugu lagagwama, At Yesus en, "Wam vidis agarikmu werekma akoma swa ikakuk linggisagwi," yiluk, yugeragagi. ††

### Ap owak dilisiga menda, hwa sogwa inim ogagawa wene

**18** Andi yugirigya lagagirik, avakwa anggon-mbanggon okbigitek samban adigat ogagu dogopwak yiluk, Yesus wene yi, wakhegek At ane welagwi menda ako yugirigya dugwit, <sup>2</sup> "O kota ambima ap wene owak dilisiga menda ambi welagagi. Ap andi en Ala alon imbita, eke, avakwa enane alon imbita, ogagetek at welagagi.

<sup>3</sup> Eke, hwa sogwa ambi o kota andoma welagagi. Hwa andi en hunik-kunik ap wene owak dilisiga ako yuguri lagek adigat ogagya dugwit, 'At ninim ogorek ako en ando mbalogo baninggyama, an ungun ogarit laga dogogiluk, an nawene mbaniru,' yugugu lagagi.

<sup>4</sup> Yugugu lagagi ako ap owak dilisiga en endak anggon imbitigi ovara, yuguri lagek adigat ogagya lagagimu, hivis endawi wenggenggu dugwit, 'An Ala nalon ombasigadek, eke, avakwa enane nalon ombasigadek ovara, <sup>5</sup> hwa sogwa yi, hunik adigat yukniri wagyama, aburuk okbaninggya hao en, nggatuk erogo awene mbalisogon,' imbitigi," yiluk, yugeragagi.

<sup>6</sup> Yugirigya lagagirik, At Nenasin Yesus ako en "At ap wene owak sek erogo dilisiga dek menda yagagi ako holes. <sup>7</sup> Anderogo ndatak Ala en at aburi miginipigi ako enane hup-dingga at yugugu-selok, enowak dilogo enawene nggatuk erogo mbalisogon dek embetep? Dukluk heveretmbo, ndogovitmbo, adigat wolok laga dugwit, enawene mbalup embetep? <sup>8</sup> Dek. Mbikit enowak dilogo enawene nggatuk erogo mbalisogon, yiluk, yukheraliga. Anderogo oginivup ovara, An Ap At

† At LOT OGWA OGAGAGIako, mbuku Kejadian 19:26 yokhanes. At Lot ogwa ako, o Kota Sodom en wunggu dugwit, ambukmu bikha laga lagagimu, helep garam ovagak agagi. †† SWA IKAKUK LINGGISAGWI halok, ap en, wam vidis agarik yedok helagwi. Andi wane-wane, Yesus en yerogo oklarisogon yagagi ako oklagya halok, Yesus vage warisogon yedok hasogom.



Endaklagagis wagya neyalok, it avakwa wen vaga yoma enendawi novaga vanggaluk, avyarat numbutu-sami a, dek a?" yiluk, yugeragagi.

**Ap Parisi inim, ap pemerintah enake yoparip wonggalisiga menda inim, enavok yugeragagi wene**

<sup>9</sup> Yugirigya lagagirik, it avakwa nin enendawi en, "Avakwa nin andi, mondok meyan, eke, nit andi, Ala wene dibaluk, sek adigat ogasagwi o," umbutu lagagwarikmu, Yesus en wene yi wakhegek yugirigya dugwit, <sup>10</sup> "Ap mberen samban ogaruguluk, Ala awi valekma nonggagagwa. Ambi andi, Parisi menda, eke, ambi andi, ap weyak pemerintah enake yoparip wonggalisiga menda. <sup>11</sup> Iperen Ala awi valekma nunggugu lagagwarik, ap Parisi ako en mendek yiluk, samban okhidigya dugwit, 'Ai, Nasin Ala! It avakwa enonggop welagwi menda inim, weyak ogasagwi menda inim, wanggi welagwi menda inim, eke, ap pemerintah enake yoparip wonggalisiga menda yi ako inim, an anderogo hak dekma, wa yukhisiga. <sup>12</sup> An samban ambi vaga ndugwis mberen Ala ake yiluk, erom hunis agirik o. Eke, nangge agarik halok, nin higiogo Hat Ala hake baliga o,' yiluk, yugogogi. <sup>13</sup> Yugogogi ovara, ap pemerintah enake yoparip wonggalisiga ako en andi, adumu erogo mendek iri lagagirik, alon en il mbogot vaga bikhegetek eyave wakhidigya dugwit, 'Ai, Nasin Ala! An weyak ogasiga mendama, nabwa ombaru o,' yiluk, yugogogi.

<sup>14</sup> Iperen samban anderogo ogagagwa ovara, at samban endak ogagagi ako dek. Ata, havis ogagagi ako adigat Ala en, 'Ap andi, endawi sek highi o,' imbita hegek, amwa lagagi. Andi, ap ambi endawi siyabatigya halok, sovabagya, eke, endawi sovabatigya halok andi, siyabagya, ogasogon o, yiluk, yukheraliga," yugeragagi.

**Avyak enadenggen enovaga bogogi wene**

(Mat 19:13-15; Mrk 10:13-16)

<sup>15</sup> Andi en, havis avakwa en avyak mariduk Yesus inggis vakbisiluk enadenggen enovaga bisapwak yiluk, At adema woginiviluk wagagwa. Woginiviluk wagwi ako, At ane welagwi menda en inigu lagagwarik, mbereragagwa. <sup>16</sup> Mberirugu lagagwama, At Yesus en avyak ako warupwak yiluk, yanggup yugirigya lagagirik, wagu-sigik, At ane welagwi menda ako yugirigya dugwit, "Hekbisines! Ala avema dogop andi, it avyak mariduk yi hakma, An nadema wagusim, moga yugerabuk. <sup>17</sup> Dibas! It avyak mariduk Ala avema dogopwak yiluk nunggisagwi anderogo hak, hit anderogo nunggegetek hiniselok andi, nunggusogon dek o," yiluk, yugeragagi.

**Ap inggi werek ambi ogagagi wene**

(Mat 19:16-26; Mrk 10:17-31)

<sup>18</sup> It ap Yakuri enasin ambi en Yesus yugugu dugwit, "Ngguru wai! Hat sek adigat agindik yi, an mondok-mondok niluk dogogiluk, nggarogo ogarik?"

<sup>19</sup> Yugugu lagagimu, At Yesus ako en, "Nano yiluk An sek adigat agirik yiluk, yuknigin? Ap ambi sek adigat agarik andi dek, Ala adigat sek agarik," <sup>20</sup> yugugu lagagirik, "Wene yerogo ogarup, nderogo ogarup, Ala wene yugup ako andi, hat ovok hilup. 'Ap ogwa werek hegek, hwa agun werek hegek, ogarup moga. Ap warup moga. Ap enangge-enangge enonggop waup moga. Henane huluk ap enovaga bisaup andi moga. Hinisa-henasin enagayuk wutu dugwit, enane des erogo hunggu dogones,' yiluk, wene yagagi yugup ako hat ovok hilup aro."

<sup>21</sup> Yugugu lagagimu, ap ako en, "Wene andi an madukma en des erogo ogagya lagagis," yiluk, yugogogi.

<sup>22</sup> Yugugu ako At Yesus hunggu lagagirik, "Wene andi ovok erogo ogasiga ovara, ambi at andi, ogagetek highi ako yukhisogon. Hat hangge ovok erogo onngo hunogo it ap enangge dek menda ako sumburerelak. Sumburera lagya heyalok, hat havis hangge eyave sek menda o mbogot vaga en ombok at onngo hedayogon. Andi ogagya dogomindik, ninim nagu dogoguluk, omano," yiluk, yugogogi.

<sup>23</sup> Yesus en ap ako yugogogi aruk hunggu lagagirik, at angge-angge wisane ako vaga endawi hunik atma, wogeraup anggon imbitya dugwit, endawi mondok wakhedagagi. <sup>24</sup> Endawi wakhidigya hegek, At Yesus en bikhigya lagagirik, at yugugu dugwit, "It ap ininggi werek menda ako, At Ala avema dogop andi nggarogo nunggup erek highi o," yugogogi. <sup>25</sup> "Wam ombok unta dirup yarum elo maduk andi ndak nunggup ovara, ap ininggis werek halok ako andi, Ala avema dogop, nggarogo nunggup erek highi o," yugeragagi.

<sup>26</sup> Yugeragagi it hunggugwa ako en Yesus yugugu dugwit, "Andi halok, ap sa maren enagap wendarup embeten?" yiluk, yugogogwa.

<sup>27</sup> Yugugu lagagwama, At Yesus en, "It avakwa en ogarup meyan helagwi ako, Ala en ogarup sek at haliga," yiluk, yugeragagi.

<sup>28</sup> Yugirigya lagagimu, at Peterus en At yugugu dugwit, "Nit nenangge-nenangge ovok erogo hekbisiluk, hinim nagu dogoguluk, wagyo akora?"

<sup>29</sup> Yugugu lagagimu, At Yesus en, "Ap ambi sa en Ala avema dugwit Ala eyavup ogarit lagya dogogiluk, awi valek inim, ogwa inim, owa-aot inim, asin-isa inim, aburi inim, ovok erogo hekbagya halok andi, <sup>30</sup> o yogak at, aveloma wisane wogosogon. Eke, havis atok vaga at mondok-mondok iluk dogosogon o, yiluk, avyarat yukhirigi o," yugeragagi.

**"An narusogom o," ambi inim yugeragagi wene**

(Mat 20:17-19; Mrk 10:32-34)

<sup>31</sup> Yugirigya lagagirik, andi en, ap 12 ako woginiviluk enadikmu ari lagu lagagwarik, it yugirigya dugwit, "Avyak yoma wai! Nit o Yerusalem dagasagwi. Dagasagwima, it ap Ala yugirigya hegek yugurugu lagagwa navi-navi en An Ap At Endaklagagis okbanup dirup mbanggugwa ako ovok erogo andoma en atma des iri hasogom. <sup>32</sup> An Ap At Endaklagagis ako narupwak yiluk, avakwa weram Yakuri dek menda wogerasogom. Wogurugu dogomwima, An nanggadi watbanungwi, wiyiknom-weyaknom erogo banungwi, enowaris novaga suvurogo banungwi, okbaniluk, <sup>33</sup> nabirok natu dogomundik, neyave mondok narusogom. Natu dogomwima, ndugwis mberen dukluk ndugwis ambi vaga niluk akluk mendek yisogon o," yiluk, yugeragagi.

<sup>34</sup> Wene adem hwilago ovagak yugeragagima, wene ako ovok erogo it yedok hegetek enendawi obak wela-gagwa.

**Ap il mbuk sek ogagagi wene**

(Mat 20:29-34; Mrk 10:46-52)

<sup>35</sup> At Yesus o Yeriko horok ari wagya hegek, ap ambi il mbukma, sup ombok vaga horaik ambenggino iri lagagi. <sup>36</sup> At ap ako it avakwa wisane enane yagan wagwi aruk hunggu lagagirik, "Yi nano yagan wandagwi?"

<sup>37</sup> Yugirigya lagagimu, it avakwa en, "Dek! Yesus awi Nasaret menda ako, sup ari vaga wagya halok, yagan wendagwi."

<sup>38</sup> Yugugu lagagwama, ap ako ane ombok vaga iri dugwit, "Yesus Daut ombao wai. An nabwa nombaru!"

<sup>39</sup> Yugugu lagagimu, it enendak wagwi ako en ap ako ane mbup yumwak yiluk, mberogogwa ovara, hegek, aren iri dugwit, "Daut ombao wai. Nabwa nombaru o," yiluk, ane ombok vaga ambi inim yugigik adigat ogagagi.

<sup>40</sup> Yugigik adigat iri lagagimu, At Yesus mbup iri lagagirik, ap ako At adema wolok warupwak yiluk, yugirigya lagagimu, wolok At adema ba wagu lagagwama, Yesus en ap ako yugugu dugwit, <sup>41</sup> "An hat nggarogo okbanupwak yiluk, embeten?"

Yugugu lagagimu, ap ako en, "Nasin. Nil sek okbanup yiluk, yukhisiga."

<sup>42</sup> Yugugu lagagimu, Yesus en, "Hat hendawi novaga vanggabuluk avyarat nembeten ako vaga, hil sek akluk, elak."

<sup>43</sup> Ako ao yugugu hegek, at il sek agagi. Il sek agya lagagimu, Yesus inim lagu dugwit, Ala inis siyabagek lagagi. Eke, Yesus ogagagi ako it avakwa ovok erogo hugu lagagwarik, Ala siyabagagwa.

**Yesus Sakius inim ogagagwa wene**

**19** At Yesus o Yeriko nunggwigya lagagirik, mbikit wagyama, <sup>2</sup> ap ambi inis Sakius pemerintah enake yoparip wonggalisagwi menda enasin mondok inggis werek dombok welagagi.

<sup>3</sup> At ako en, "Yesus andi, nggarogo ovagak?" yiluk, bikhagiluk, ogagagi menda eyave dul, eke, avakwa wisane homagoma, bikhaup meyan agagi.

<sup>4</sup> Meyan agya lagagimu, "Yesus sup yi vaga wasogon higi," yiluk, il hagiluk, at endak vupuk lagya lagagirik, yo vaga inggigi.

<sup>5</sup> Yo vaga inggigirik werekma, At Yesus ndan iri lagagirik, il ilik lagya dugwit, "Sakius wai. Yogak an hat hamwa laupma, hodo wambuma." <sup>6</sup> Yugugu lagagimu, Sakius ako mbikit yo vaga en wambu wagya lagagirik, heyaga wakbaluk, endawi adenggen embetek amwa lagagwa.

<sup>7</sup> It avakwa en Yesus iperen lagwi inugu lagagwarik, enanggin-enanggon yugu dugwit, "Ap weyak ogasiga menda inim at amwa lendagwi yi inisenes!"

<sup>8</sup> Yugu lagagwama, at Sakius en it wisane inivaga Nenasin Yesus yugugu dugwit, "Ai Nasin. An nanggenangge higi-rogo ap ininggidek halok, wogera-yogon. Eke, ap we-wes okbugu lagi ako, enangge ambi dek okbugu lagi halok, aveloma 4 hudi wogirigya, ap ambi adik angge dek okbugu lagi halok, aveloma 4 hudi wogirigya, ogarisogon o."

<sup>9</sup> Yugugu lagagimu, At Yesus en, "Hat ogo hat hombao Averaham Ala ovaga vanggabuluk avyarat imbitigi ako hak, hat yogak an novaga vanggabuluk avyarat nembeten andi vaga, hat haburi hinim yogak yi vaga Ala en henagap wendakhinipas. <sup>10</sup> An Ap At Endaklagagis yi, it avakwa yelemele yagagwa ako havedogo enagap wendarigiluk, wambu wagagis o," yiluk, yugogogi.

**Yoparip mbusi emas vaga wakhegek yugeragagi wene**

(Mat 25:14-30)

<sup>11</sup> It avakwa ako enaruk hunggu-sigik, Yesus en wene wakhegek ambi yugeragagi. Andi, at Yesus o Yerusalem vage horok ari wagya lagagimu, it avakwa en "Ala avema bisaligama mbikit sigam arisogon ai," umbutwi yedok inigu lagagirik, wene wakhegek yi yugeragagi. Yugirigya dugwit, <sup>12</sup> "Ap inis werek ambi en, 'O adumu andoma lagya neyalok, ap ombok o yoma vagago dogogiluk mondok okbaninggya dogomwima, neyami vaga wasogon,' yiluk, <sup>13</sup> lagiluk, ogagya dugwit, at ayelomani eneyave 10 yanggup yugirigya lagagirik, wagu lagagwama, ayoparip mbusi emas menda 10 higi-rogo, ap ambi yoparip mbusi emas ambi wogorigya, ap ambi yoparip mbusi emas ambi wogirigya, wogirigya dugwit, 'An wagatek neyagek, nayoparip yi vaga yi menda ndi menda hunit nagu dugwit, ambi lobalhidugu dogones.' †

<sup>14</sup> Yugirigya lagagirik, lagagi. Lagya hegek, it nin at avema menda en at enanggon dombok umbutu dugwit, 'At ap yi, nenasin inis ombok akluk, o yoma vagago dogop nenanggon,' yiluk, yugera laupwak yiluk, enarwi lakbogogwa.

<sup>15</sup> Lakbogogwa yugera lagagwa ovara, hegek, ap ako inis ombok it enamwa andoma vagago dogopwak yiluk mondok okbagu lagagwama, amwa eyami vaga wagya lagagirik, 'Nayoparip ako vaga it maren lobalhedagao hami?' yiluk, ayelomani ayoparip wogoragagi ako yanggup yugeragagi.

<sup>16</sup> Yanggup yugurigya lagagimu, ayeloman endak wagagi ako en, 'Ai nasin. Hayoparip woknigigin ako vaga ambi inim 10 lobanggis.'

<sup>17</sup> Yugugu lagagimu, asin en, 'Ai nabut wa! Nayeloman hat sek, mondok sek dombok ogagen. Maduk ogarup ovara, hegek, des erogo ogarit lagya lagenma, yogak o kota 10 hudi vagago dogonyok yiluk, mondok okbagaliga.'

<sup>18</sup> Yugugu lagagimu, ayeloman ambi ambetaga wagya lagagirik, 'Ai nasin. Hayoparip woknogogin ako vaga ambi inim 5 lobanggis.' <sup>19</sup> Yugugu lagagimu, asin en, 'Andi halok, hat o kota 5 hudi vagago dogop.'

<sup>20</sup> Yugugu lagagimu, ambi ambetaga wagya lagagirik, 'Ai nasin. Hat hendawi hanggidik an nilup atma, eke, hendawi hanggidik dugwit, hat en bagetek ovara, wigya, eke, awi lisinggitek ovara, enggen yugup mbalhidigya, ogasigama, nalon en hayoparip nasula yidik vagago welagi ako yi o,' yiluk, yugogogi.

<sup>22</sup> Yugugu lagagimu, asin en ayeloman ako yugugu dugwit, 'An ogarup yukhogogis ovara, an nane sagalisiga hat nayeloman yi, hane yegen ako vaga hanggadi watbagasogon. Nendawi nanggidik dugwit, bagetek ovara, wigya, eke, awi lisinggitek ovara, enggen yugup mbalhidigya, ogasiga hat helup agindik ovara, <sup>23</sup> an wagya neyalok, nayoparip inim, vagago dogop onngo inim, an wa wasogon ai, yiluk, it avakwa enayoparip ombok arupwak yiluk, ogasagwi ako, wogoregetek nggarogo yiluk welagagin?'

<sup>24</sup> Yugugu lagagirik, avakwa at inim agarwik ako yugirigya dugwit, 'Nayoparip vagago agarik ako ndiyalogo ap yoparip 10 lobalhedagagi ako wogores.'

<sup>25</sup> Yugirigya lagagimu, iren, 'Ai nasin. At andi, ayoparip ovok 10 agarik!'

<sup>26</sup> Yugugu lagagwama, aren, 'Hit menda ambi agarik halok andi, ambi inim ovaga ndulogo wokhirigya hasogom. Eke, hit menda ambi dek halok andi, ambukumat agarik ako ndiyalogo hedigya hasogom o. <sup>27</sup> Eke, it ninim ogorek dugwit, "At nenasin inis ombok akluk, o yoma vagago dogop, nenanggon," yagao ako andi, woginiviluk wagu dogomundik, nil neyagek, enares,' yugeragagi," yiluk, Yesus en avakwa ako yugeragagi.

**"Nenasin inis ombok yi aro," yagan wagagwa wene**  
(Mat 21:1-11; Mrk 11:1-11; Yoh 12:12-19)

<sup>28</sup> Yesus en wene andi yugirigya lagagirik, at endak o Yerusalem lagyama, ane welagwi menda inim lagu dugwit, <sup>29</sup> o Betepage inim, Betania inim, ndom inis Saitun avema andoma horok ari lagagwarik, At ane welagwi menda mberen lakbugu dugwit, <sup>30</sup> "O valekma akilisim ari lamwira, wam keledai eyak, ap ao ova-ga hora yegetek menda ambi hugu dogomundik, yunggwi yidugup akom veralogo yoma wolok omano. <sup>31</sup> Eke it avakwa andoma en, 'Hit nggarogo yiluk keledai andi veralisagwi?' yukhurugu-selok, hiren yugurugu dugwit, 'Nit Nenasin keledai dekma, "Walales," yuknirigya lagama, wa wagyo,' yugerano," yiluk, lakbogogi.

<sup>32</sup> It lakbogogi ako, lagu lagagwarik, yugeragagi ako ndatak hagagwa. <sup>33</sup> Hugu lagagwarik, keledai eyak ako veranggusim, it ap enanggom keledai werek ako en, "Keledai andi, nggarogo yiluk, veralisagwi?"

<sup>34</sup> Yugurugu lagagwama, iren, "Nit Nenasin keledai dekma, 'Walales,' yuknirigya lagama, wa wagyo," yugurugu lagagwarik, <sup>35</sup> wolok Yesus adema ba lagagwa. Ba lagu lagagwarik, enayum weram menda nggolalogo wam keledai ambot vaga ndabagu lagagwarik, Yesus ako wam keledai ambot vaga hora okbagagwa. <sup>36</sup> Hora okbagu lagagwama, Yesus lagya hegek, it avakwa enayum sogwes yum mbigalogo sup ombok vaga ndabalin lagagwa.

<sup>37</sup> Ndabalin lagu lagagwama, o Yerusalem vanggo yi lagu-sigik, sup ndom Saitun wambu wandagwima akoma avakwa At ane welagwi menda ovok en nggarogo ogarubuk menda wisane ogarit lagya ako inil hugu lagagwarikmu, enadenggen en amikmit yagan lagu dugwit, Ala inis siyabaik lagagwa. <sup>38</sup> Ala inis siyabaik lagu dugwit,

"Nenasin Ala en Nenowa inis ombok lakba waga yi, inis siyabaliga o.

At mbogot vaga winimen agarik ako en, nenendawi dambubininggas atma,

At Ala inis mondok siyabelagwi o," † yiluk, yagan lagagwa.

<sup>39</sup> Yagan lagwi ako, it Parisi menda nin en avakwa wisane wonggalari wagagwa ako enanggelekma en Yesus yugugu dugwit, "Ngguru wai. Hane welagwi menda yi, mbereran."

<sup>40</sup> Yugugu lagagwama, Yesus en, "Avyak! It avakwa yi, enane yegetek duklipmu en, helep yi, Ala inis siyabagu duklip, yiluk, yukheraliga," yugeragagi.

**O Yerusalem higya lagagirik, yup yagagi wene**

<sup>41</sup> Yugirigya lagagirik, o kota Yerusalem vanggo yi lagya lagagirik, il higya dugwit, yup yagagi. <sup>42</sup> Yup yagya dugwit, "Hit Yerusalem yi, yogak yi vaga henen-

† At YOPARIP MBUSI EMAS wogeragagi andi, yavup saut henggam ogagarikmu onngo wogeralagwi ndatak wogeragagi.

† Mbuku Ndawi 118:26 yokhanes.

dawi ugun wadok dek adenggen dogop yiluk, nggaro-  
go okbigigaup hinilup duklipmu en, ai, okbigigelap  
ovara, yogak hinil hinisao en, hwilago agarik.

<sup>43</sup> Hirenen Ala yi hudi at ninisa waga o, yiluk, yedok  
hegetekma, henamwa Yerusalem en wunggu hinisao  
en, it hinim ndup ogorek en eve helep leget walinogo  
bugugwis, eloma-yoma en, yumu-yagamu en, ndup  
okhinivuguluk, horok ari wagwi, ogagu dugwit, henawi  
helep vaga valek yi, helep ambi ovaga duduk erek do-  
gosogon buk. Masalogo bagu dugwit, Ala yi hudi at  
ninisa waga o, yiluk, yedok hegetekma, habut-hogwa  
hinim ovok erogo mondok dek erogo bigigaup vage  
vanggo yi wasogon o," yiluk, yugeragagi.

**Yesus Ala awi valekma dugwit haryogo wikbigik wene**

(Mat 21:12-17; Mrk 11:15-19; Yoh 2:13-22)

<sup>45</sup> Andi yugerelok, Ala awi valek mbumbumu nung-  
wigya lagagirik, it avakwa yi menda ndi menda ongo  
hunggik yagalagwi menda akoma haryogo wibugu  
dugwit, <sup>46</sup> "Ala en 'An nawi valek yi, "Samban ogasag-  
wima yi at dogosogon" ', yiluk, yagagi dirup mbanggig  
ovara, hit andi, o yi ap enonggop wokbaluk, hwilaklari  
lendagwima ovagak ogagep," yiluk, yugeragagi.

<sup>47</sup> Yesus hup-dingga Ala awi valekma wene mamuliri-  
gya lagagi. Mamulirigya lagagi ovara, it imam-imam  
enasini inim, it Musa wene mamulerelagwi menda in-  
im, it avakwa enasini inim, At Yesus warup yiluk, oga-  
gagwa ovara, <sup>48</sup> avakwa en at wene yugirigya ako  
enendawi hunik dombok ogagu dugwit, inil at adigat  
vurek atma, nggarogo warubuk erek halok, mbup ya-  
gagwa.

**"Sa inis vaga ogasiga?" wene**

(Mat 21:23-27; Mrk 11:27-33)

**20** Hivis ndugwis ambi vaga At Yesus Ala awi valek-  
ma mbumbumu dugwit, wene mamulirigya, Sek  
Wene yugirigya, ogagyama, ap imam-imam enasini in-  
im, it Musa wene mbalek mamulerelagwi menda inim,  
ap ombok-ombok inim, At adema wagagwa. <sup>2</sup> Adema  
wagu lagagwarik, At yugugu dugwit, "Hat yi ogagek  
ndi ogagek ogasiga ako, sa inis vaga ogasiga? Sa en  
hat yukhogogi vaga ogasiga? Yukneran."

<sup>3</sup> Yugugu lagagwama, At Yesus en iri dugwit, "An  
ogo, wene ambi hemekhinisayogon. <sup>4</sup> At Yohanes ima  
wombabugu lagagi ako andi, mbogot vaga en yu-  
gogogi vaga wombabugu lagagi a, ata avakwa en yu-  
gogogwa vaga wombabugu lagagi a? Yukneres!"

<sup>5</sup> Yugirigya lagagimu, ir-it wene mbanggu dugwit,  
"Niren, 'Mbogot vaga en yugogogi vaga ima wom-  
babugu lagagi,' yugugu niniselok, aren iri dugwit, 'Eke,  
andi halok, hit hinilup helan, nggarogo yiluk at avyarat  
embetetek welagagup?' yuknerayogon. <sup>6</sup> Eke, it avak-  
wa ovok erogo, 'At Yohanes andi, navi Ala en yugugu  
hegek yugeraliga menda' ombasagwima, niren 'Un  
avakwa en yugogogwa vaga ima wombabugu lagagi,  
yugugu niniselok, Iya! Helep vaga nenarusogom o,"

yiluk, ir-it wene mbanggu. <sup>7</sup> Wene mbanggu la-  
gagwarik, at yugugu dugwit, "At Yohanes ako, sa en  
yugogogi vaga ima wombabugu lagagi ako nit nin-  
inggut," yugogogwa.

<sup>8</sup> Yugugu lagagwama, At Yesus en, "Eke, andi halok,  
An ogo, sa en yuknogogi vaga ogasiga yi, wene ongo  
yukherayogon buk," yiluk, yugeragagi.

**It Yakuri menda en Yesus nenanggon umbutugwarik-  
mu wakhegek ap awi yago aruwam welagagwa yuger-  
agagi wene**

(Mat 21:33-46; Mrk 12:1-12)

<sup>9</sup> Andi yugirigya lagagirik, wene wakhegek it avakwa  
wisane yugeragagi ambi yi aro. "Ap ambi en anggur  
awi yatu lagagirik, enggen mbalogo nin it hidugwi, nin  
at wogogwis, ogagu dogopwak yiluk, at eyavup yago-  
ma aruwam bisiluk, o adumu andoma dukluk, waso-  
gon yiluk, lagagi. <sup>10</sup> Lagagirik andoma dugwit, anggur  
enggen yugup ako hoda agya lagagimu, it at eyavup  
yago aruwam bisiluk lagagi ako en enggen yugup  
mbalogo wogorupwak yiluk, ayeloman ambi enadema  
lakba wagagi. Lakba wagagi wagya lagagimu, it at  
eyavup yagoma aruwam agarwik ako en ayeloman  
wagagi ako yo yawi vaga wakbagu lagagwarik,  
enggen mbalogo bagagwa ako wogogitek un ovadik  
eyami vaga lakbagagwa.

<sup>11</sup> Un ovadik eyami vaga lakbagagwa amwa lagya la-  
gagimu, ayeloman adik ambi lakba wagagi. Lakba wa-  
gagi wagya lagagimu, at ogo, eyave yo wakbagu la-  
gagwarik, anggadi warogo enggen mbalogo wogog-  
itek un ovadik lakbagagwa. <sup>12</sup> Lakbagagwa amwa  
lagya lagagimu, ayeloman adik ambi hunogo lakba  
wagagi. Lakba wagagi wagya lagagimu, at ako ogo, yo  
warogo wibagagwa.

<sup>13</sup> Ap lakbisa wagagi ako anderogo adigat okbugu la-  
gagwama, ap eyavup yago werek ako en iri dugwit, 'An  
nggarogo ogarik? An nabut nendawi hunik yi, lakbayo-  
gon. Lakbagya neyalok, at agayuk wutu dugwit wugwi-  
sami a, dek a?' yiluk, lakba wagagi.

<sup>14</sup> Lakba wagagi wagya lagagimu, it ap at eyavup ya-  
go aruwam welagagwa ako en abut wagya inil hugu  
lagagwarik, ir-it wene mbanggu dugwit, 'Abut mavu-  
rangge hedaup yi atma, yavup yago yi mavorangge nit  
hedapim, abut yi mondok warusogom o,' yiluk,  
<sup>15</sup> avyak ako wagya lagagimu, eyave yavup yagoma en  
haryogo weram wibaluk, mondok watugwa," yiluk,  
wene andi Yesus en wakhegek yugeragagi.

Wakhegek yugirigya lagagirik, ambi yugirigya dug-  
wit, "Andi ogagagwa ako at eyavup yago werek en it  
ap andi, nggarogo okbisami embetep? <sup>16</sup> Dek. At  
wagya dogomindik, it eyavup aruwam agarwik ako  
enarogo bisiluk, enaveloma it ap adik aruwam dogop-  
wak yiluk, mondok okbisayogon o," yiluk, yugeragagi.

Yugirigya ako it avakwa hunggu lagagwarik,  
[wakhegek andi it Iserael menda enavok iri halok, an-

derogo okbininaup ai, yiluk] "Anderogo ogarup moga o, Nenasin," yugogogwa.

<sup>17</sup> Yugugu lagagwama, At Yesus en it biginigu lagagirik, wene yugirigya dugwit,

"It helep o valisagwi menda ako en,

O vunggu dugwit, helep ambi mbo bagagwa ako, mondok-mondok owanggi ndalaga o,"<sup>†</sup>

yiluk, yagagi Ala wene dirup mbalek ako andi, nggarogo yiluk mbanggigi embetep?

<sup>18</sup> It awakwa helep andi vaga yakhedugwis halok, eneyave hadik-hadok erogo wambusogom o. Eke, helep andi en avut dagauk erogo awakwa enovaga ndun yi wagya halok andi, eneyave mondok ilumut-mut erak-dak-dak erogo bisayogon," yiluk, yugeragagi.

<sup>19</sup> It Musa wene mbalek mamulerelegwi menda inim, it ap imam-imam enasini inim, en, "Wene wakhegek yagas andi, nit niniselok yagas ai," yiluk, yedok hugu lagagwarik, o andi hudi vaga Yesus vagaruguluk, oga-gagwa ovara, awakwa enalon en mbup yagagwa.

#### Ap Kaisar ake baup yugogogwa wene

(Mat 22:15-22; Mrk 12:13-17)

<sup>20</sup> It Musa wene mbalek mamulerelegwi menda inim, it ap imam-imam enasini inim, ako en Yesus inil wolok-wolok nagu dogopwak yiluk, enarwi lakbogogwa. Enarwi lakbogogwa ako en, "Nit ap avyarat nenom-barupwak," ombakluk, enane enagavoval yagan nagu lagagwa. Enane enagavoval yagan nagu dugwit, "Yesus ane yupum-ndupum yimi vaga yidibaluk, eyave vagarogo awakwa enaruwam menda gubernur ako en awene mbalup at ovaadombok atma, awene mbalup-wak yiluk, ba lasogom," umbutugwa. <sup>21</sup> Yagan Yesus adema lagu lagagwarik, hemetu dugwit, "Ngguru wai! Hat wene yagaliga inim, mamuleraliga inim, andi avyarat adigat iri dugwit, ap ambi iya, eke, ambi meyan, andi embetetek Ala wene avyarat des erogo mamulnirigya heyagy. <sup>22</sup> Anderogo heyagyoma, ap inis ombok Pemerintah Oroma enasin Kaisar ake yoparip baup andi, sek a, weyak a?" yiluk, yugogogwa.

<sup>23</sup> Yugugu lagagwama, At Yesus en it at ambokan unggwi yedok inigu lagagirik, yugirigya dugwit, <sup>24</sup> "Yoparip mbusi ambi enukneres," yugirigya lagagimu, wogugu lagagwama, it yugirigya dugwit, "Sa elese ovagak ogarek inis dirup mbalek helagwi?"

<sup>25</sup> Yugirigya lagagimu, iren, "Dek. Andi Kaisar aro."

Yugugu lagagwama, At Yesus en, "Andi halok, Kaisar angge halok andi, Kaisar at wogogwis, eke, Ala angge halok andi, Ala at wogogwis, ogagu dogones," yiluk, yugeragagi.

<sup>26</sup> At wene yugeragagi ako vaga awakwa inivaga wene ambi yidilogo ovaga baup meyan halok, un, "Wi!" yiluk, mbup yagagwa.

<sup>†</sup> Mbuku Ndawi 118:22 yokhanes.

"Hambugu niniselok, havis niniluk arusogom a, dek a?"

wene

(Mat 22:23-33; Mrk 12:18-27)

<sup>27</sup> Andi en, it ap Saduki menda nin Yesus adema wagagwa. It Saduki menda ako, awakwa hambuluk, iniluk akluk mendek yusogom buk yugu lagagwa. It ako, Yesus adema wagu lagagwarik, at hemetu dugwit, <sup>28</sup> "Ngguru wai. At Musa en, 'Ap ambi hwa wolok, abut dek hegek hambigya halok, owa aveloma abut endarupwak yiluk, aot en owa sogwa hedaupwak o,' yiluk, dirup mbaniragagima, <sup>†29</sup> ap ambi aburi eneyave 7 endaginipigi. At manggum ako en hwa wigya lagagirik, abut dek hegek hombagagi. <sup>30</sup> Hambigya lagagimu, aot manggum ambetaga menda inim, <sup>31</sup> andi en, at aot ambukmu menda inim, andi en, it eneyave 7 endago ovok erogo anderogo adigat hwa ako wugwi, enaburi dek hegek enadigat hambugwi, ogagagwa.

<sup>32</sup> Eke, havis, hwa ako ogo hombagagi. <sup>33</sup> It ap eneyave 7 ako en hwa ako wugwi-hambugwi ogagu lagagwama, havis awakwa hambuluk iniluk erogo mondok ok-bisaup hudi vaga hwa andi, ap sa ogwa arisogon embeten?" yiluk, yugogogwa.

<sup>34</sup> Yugugu lagagwama, At Yesus en, "It awakwa yogak wema agarwik yi, ap en hwa hedugwi, akwa en ap hedugwi, ogasagwi. <sup>35</sup> Anderogo ogasagwi ovara, At Ala en, 'It awakwa sek menda enombasiga andi, ninim dogoguluk, hambuluk landagwima en iniluk erogo mondok okbisayogon,' ombasiga ako andi, Ala en mondok okbisagwi. Mondok okbugu dogogwimu inim dugwit, ap en hwa hedugwi, akwa en ap hedugwi, ogagu dogogup mondok dek aro. <sup>36</sup> Ala en it awakwa ako iniluk erogo mondok okbisagwi hudi vaga, Ala aburi dombok dugwit, malaikat ako ndatak arugup atma, havis hambugup mondok dek. <sup>37</sup> It awakwa hombagagwa iniluk erogo mondok okbisagwi ako andi, ambi yisogon. At Musa yo aik werek adema en hali abya wuluk kerek iri hegek iris hagagi wene ako mbilinogo dirup mbanggya dugwit, 'Nasin Ala andi, ap Averaham inim, Isak inim, Yakup inim, enasin Ala aro,' yiluk, dirup mbanggigi andi vaga it hombagagwa ako Ala en avyarat iniluk erogo mondok okbisaliga helagwi o. <sup>38</sup> Dirup mbanggigi ako, At Ala en it awakwa hombagagwa ovara, mondok iniluk agarwik inisaligama, at andi, it awakwa hambuluk dek agagwa menda enasin Ala dek. Ata, iniluk menda enasin Ala aro," yiluk, yugeragagi.

<sup>39</sup> Anderogo yugirigya lagagimu, it Musa wene mbalek mamulerelegwi menda nin en, "E o Ngguru. Hat sek yegen," yiluk, yugugu lagagwama, <sup>40</sup> it ovok en ambi inim At hemethaup enalon en mbup yagagwa.

<sup>††</sup> Bilangan 25:5-10 yokhanes.

**"Keretus andi, sa ombao?" yugeragagi wene**

(Mat 22:41-46; Mrk 12:35-37)

<sup>41</sup> At ambi inim hemethaup enalon umbutu lagagwama, At Yesus en it yugirigya dugwit, "At Ala en denogo mondok okbagagi Keretus ako andi, Daut avema menda ombao,' yagalagwi andi, nggarogo yiluk yagalagwi embetep? <sup>42</sup> At Daut adik en mbuku Ndawi wene vaga dirup mbanggya dugwit,

'At Nenasin inis ombok Ala en an Nasin inis ombok yugugu dugwit,

"It hinim ndup ogorek menda ako, An sovalogo havema bigitek neyagek,

Ninggis amotkan hora yima," yugogogi,' yiluk, dirup mbanggigi ako andi, <sup>44</sup> at Daut en, At Keretus ako, 'An Nasin inis ombok,' yagagi. Anderogo atma, avakwa en 'Keretus andi, un At Daut avema menda ombao adigat' yup andi dek," yiluk, yugeragagi.

**Musa wene mbalek mamulerelagwi menda en henambukmu unggu sao en, suwam watu dogop wene**

(Mat 23:1-36; Mrk 12:38-40)

<sup>45</sup> Yugirigya lagagirik, avakwa ovok erogo enaruk hunggu-sigik, Yesus en at ane welagwi menda ako yugirigya dugwit, <sup>46</sup> "It Musa wene mbalek mamulerelagwi menda ako en henambukmu unggu sao en, henendawi suwam wathidugu dogones. Enasum adup segedok yikbetaluk, ap akwa vasat ogasagwima andoma en nit adigat wogobinapwak yiluk nagwis, it Yakuri samban ogasagwima akoma ap ombok-ombok hora yagalagwima hora yugwi, isogo isugu dugwit, ap ombok-ombok hora yagalagwima hora yugwi, ogarup adigat enendawi sek ombasagwi.

<sup>47</sup> It ap andi, akwa sogwa enangge dek okbugwis, avakwa iya nenombarupwak yiluk, samban adup erogo ogagwi, ogasagwi andi vaga, it avakwa nin enomaduk onngo horogat enovaga bugu dugwit, it ap andi ako, enomaduk onngo ombok erogo enovaga bisayogon," yiluk, yugeragagi.

**Hwa sogwa inggidek en Ala ake bagagi wene**

(Mrk 12:41-44)

**21** Andi yugirigya lagagirik, Yesus ena laklagya dugwit, avakwa ininggi werek menda en enangge Ala awi valekma yoparip belagwima enayoparip Ala ake ba wagu sogogi.

<sup>2</sup> Bagusim, hwa sogwa inggidek ambi wagya lagagirik, yoparip mbusi enggen mariduk mberen Ala ake belagwima ba wagya hagagi. <sup>3</sup> Ba wagya higya lagagirik, it avakwa yugirigya dugwit, "Dibas! It avakwa enangge wisane hegek ba wagao ovara, hwa sogwa inggidek menda yi, at agarom hunogo naup dek hegek ovok erogo betagarikmu, it ap akwa ininggis werek menda un horok maduk at bagao ovara, at hwa

sogwa angge dek hegek ba waga yi andi eve ombok at bagas o," yiluk, yugeragagi.

**"Ala awi valek masalogo lakbasogom," yugeragagi wene**

(Mat 24:1-2; Mark 13:1-2)

<sup>5</sup> Yugirigya lagagimu, at ane welagwi menda nin en yugu dugwit, "Ala awi valek andi, helep mondok sek inim, yi menda ndi menda mondok segedok menda Ala ake bago inim, ako vaga, mondok mondok sek valek," yiluk, yagan lagusim, <sup>6</sup> Yesus en it yugirigya dugwit, "Hit hinil helagwi yi ako andi, helep ovaga dambuk ogarek iligik andi ambiat ogo dogosogonbuk. Ovok erogo masalogo lakbaup hudi vanggo yi wasogon," yiluk, yugeragagi.

**Anggin-mbanggin erogo bisaup wene**

(Mat 24:3-14; Mrk 13:3-13)

<sup>7</sup> Yugirigya lagagimu, iren at hemethugu dugwit, "Ngguru wai. Hat yukneregen ako o mera oklarimi? Eke, 'Anderogo ogarup' yukneregen ako atma des yup hudi horok vanggo yi wagya halok, adem ngga oklagya vaga nenelup arup?"

<sup>8</sup> Yugugu lagagwama, At Yesus en yugirigya dugwit, "Avakwa nomalhinipu-sao en, henendawi suwam wathidugu dogones. It ap wisane [huluk at] An ninis vaga wagu dugwit, at ambi en, 'At Keretus ako andi, an aro,' iris, eke, at ambi en, 'Hivis oklarup ako vage vanggo yi waga o,' iris, yagan warusogoma, enane hobaluk, enamusek labuk. <sup>9</sup> 'Dek. Ndup sumburisagwi o. Dek. Haryogo wibisaupwak yiluk, ndup ogasagwi,' yugwi henaruk hunggu dugwit halok, henalon habuk. Ogarup ako andi, endak oklarisogon ovara, o hivis oklarup ako mbikit oklarisogon buk o," yiluk, yugeragagi.

<sup>10</sup> Yugirigya lagagirik, ambi yugirigya dugwit, "Ap ininis unggul adik-adik ndup sumbutwis, ap inis ombok ambi arwi en ap inis ombok ambi arwi inim ndup ombok ogagwi, ogarusogon. <sup>11</sup> Ogagu-sigik, o wadok mondok ombok wisane ogagya, yi awi ndi awi erom uvup ogagya, o yi awi ndi awi adwanggak wisane oklagya, eke, mbogot vaga mondok enalon werek menda ogagya, henelup arup elose adik menda ogagya, ogagya hasogom. <sup>12</sup> Anderogo ovara, ogagetek hegek, ap en hit vakbigigiluk, edup-mbedup okbugugwis, it ap Yakuri samban ogasagwima bigiga lagwi, heda marogo mabiselagwima mabugugwis, eke, an nane wagagup vaga it ap ininis werek inim, it ap ombok-ombok inim, enadema wokhiniviluk lagwi, ogarusogom.

<sup>13</sup> Anderogo okbugugu-selok, 'Yugeraup nanonggal aga o,' yiluk, ogagya neyagu lagagup ako, yugurugu dogogup. <sup>14</sup> Henagap wendakhedaup yiluk, wene onngo ngga yugeraup andi henendawi anggin dogobuk. <sup>15</sup> Anen henendawi werek okbugugu dugwit wene ngga yugeraup yukheramima, yugurugu hiniselok, it hinim ogorek ako onngo yukhurugwi, henane sagangg-

wis, okbigigasogom mondok dek. <sup>16</sup> Hinisai-henasini inim, henowa-henaot inim, henowa-henasin inim, henaswei inim, it ako en wokhiniviluk ap enowak dilis-agwima bigiga lagwi, hit nin henatwis, ogarusogom. <sup>17</sup> Eke, An ninis wagagup vaga awakwa ovok en enanggon henombarusogom ovara, <sup>18</sup> hinirisenggen ambiat ogo bolarugwi mondok dek atma, <sup>19</sup> henendawi mbuk dogomwi vaga Ala en henagap wendarisogon," yiluk, yugeragagi.

### O Yerusalem dek erogo baup wene

(Mat 24:15-21; Mrk 13:14-19)

<sup>20</sup> "It ap enayegen werek wisane homago o Yerusalem walinggwis inigu dogogupik, 'O Yerusalem dek erogo baup vage vanggo yi waga higi,' ombarugup. <sup>21</sup> Andi hudi vanggo yi wagya halok, yi ogarup ndi ogarup Ala wene dirup mbalek ovok erogo atma des yupwak yiluk, awakwa Yerusalem menda weyak ogasagwi ongo wogeraup andi hudima, it o Yudea agarwik ako, ndom vaga andoma hoda hwilak lari wunggwis, o kota agarwik ako, o andoma hekbaluk, wunggwis, ogarupwak. Eke, o kota weram agarwik ako o kota nunggubuk. <sup>23</sup> Andi hudi vaga Ala en o wen vage yoma anggin-mbanggin mondok adik dombok okbugu dugwit, it awakwa yi, aninis okbisagwirikmu, akwa enavula agarwik inim, eneyak enagadyak wogere-lagwi inim, [hoda wulup meyan atma,] enabwa. <sup>24</sup> Nin mbusinggarep vaga inutu-selok hambugwi, nin heda marogo awakwa ininis unggul adik-adik enamwa andoma bisa lagwi, ogarugup. Eke, it awakwa weram Yakuri dek menda en o Yerusalem inisok sovalogo bigik lagu dogogup. At Ala en, 'It awakwa weram Yakuri dek menda andok dugwit, tahun anderogo o Yerusalem vagego dogosogom,' imbitigi ako atma des yegetek hegek, sovalogo bigik lagu dogogup," yiluk, yugeragagi.

### "An Ap At Endaklagagis wasogon," yugeragagi wene

(Mat 24:29-31; Mrk 13:24-27)

<sup>25</sup> Yugirigya lagagirik, ambi yugirigya dugwit, "Henelup arovovok yiluk, mo il inim, saut inim, dadiwap inim, andi mondok elokwe adik ogagya hagup. Eke, o wen vage yoma is laut yanggadek ane ombok iri dugwit, mondok mogoliluk ogagya halok, it awakwa ininis unggul dombok ovok erogo, 'Yi nggarogo ogarit wandiga wi!' yiluk, enendawi mondok obak arugup. <sup>26</sup> It mbogot vage enanye werek menda ako enowak dede wisane ogagya halok, it ap ovok en yi menda ndi menda o wen vage oklarit warup ako, 'Yi at oklarit wagya higyo,' yiluk, enalon en enendawi mondok obak arugup. <sup>27</sup> Andi ogagya halok, An Ap At Endaklagagis ako mondok nabinak werek niris-novagangge nagayuk werek dugwit, hena anggelekma en wagya neyagup. <sup>28</sup> Yi menda ndi menda oklarup ako asinggu halok andi, 'Wender erogo bininaliga vage sigam ari wagya higyo o,' yiluk, henut leklakluk, hinil iligik dogop," yugeragagi.

### Yo ara vage wakhegek yugeragagi wene

(Mat 24:32-35; Mrk 13:24-31)

<sup>29</sup> Yugirigya lagagirik, wene yi, wakhegek yugirigya dugwit, "Yi yo ndi yo inim, yo ara inim, o Iserael yoma ogasiga ako dibas. <sup>30</sup> Yo anggup savuligiluk, ogagya hinil hugu lagipik, 'O vage hivi bagiluk ogasiga higi o,' yiluk, yagalagwi. <sup>31</sup> Ako yagalagwi ndatak, mo il inim, saut inim, dadiwap inim, mondok elokwe adik oklarup endak yukhirigi ako, oklagya hinil hugu dogogupik, 'Ala avema bininaup ako vage vanggo yagas higi,' yiluk, ombarugup.

<sup>32</sup> Hit awakwa yogak agipik yi, ao dek agetek hinigik, hivis ogarup avok yukhirigi ako ovok erogo atma des iri hagup yiluk, avyarat yukheraliga. <sup>33</sup> Wen inim, mbotgot inim andi, dek arugwi ovara, An nane andi, mondok-mondok dek arisogon dek o," yiluk, yugeragagi.

### Suwam watu dogop wene

<sup>34</sup> Yesus en wene ambi yugirigya dugwit, "Bagas sakno bagoma mbikit sopal landiga hak, 'Ndugwis andi vage anderogo okhinivisogon,' yiluk, wene yukhirigi ako, hit awakwa o wen vage yoma ovok erogo ndugwis ambi vage mbikit supuk erogo okbigigya wasogonma, henendawi suwam wathidugu dogones. Yi menda ndi menda henagaum dek heda nenggek nagwis, amburup nenek ogivisiga menda nenggek nagwis, 'Nangge nggarogo okhedaik o,' yiluk, henendawi anggin wisane wenggelit nagwis, ogagu dugwit, henendawi ugun obak hinisao en, henendawi suwam wathidugu dogones. <sup>36</sup> Samban adigat ogagu dugwit, henendawi suwam wathidugu dogones. Andi ogagu hiniselok, anggin-mbanggin okhinivup ako henendawi mbuk dugwit, henanye erogo wugu dogomundik, An Ap At Endaklagagis nivaga henanggadi dek dugwit mendek yusogom," yiluk, yugeragagi.

<sup>37</sup> At Yesus en o dinggya Ala awi valekma wene mamulirigya, eke, o hup agya halok, wunggu lagagwarik, ndom inis Saitun akoma nogo yi lagya, ogagya lagagma, <sup>38</sup> o hutun hetlagatya vage awakwa ovok At ane huluguluk, adema Ala awi valekma wonggalari wagu lagagwa.

### Yesus warup umbutugwa wene

(Mat 26:1-5; Mrk 14:1-2; Yoh 11:45-53)

**22** Isogo Erom Roti Virisigadek Menda inis Vasika † ako, adenggen isarup vage vanggo yi wagagirikmu, <sup>2</sup> it imam-imam enasini inim, it ap Musa wene mbalek mamulere-lagwi menda inim, iren awakwa wisane enalon en, "Yesus nggarogonggan waruk?" yiluk, mbauk erogo wene mbalit nagu lagagwa.

† ISOGO VASIKA ako, saut Maret a, April a, isogo ombok isagu lagagwa. Isogo Vasika ogagu dugwit, wam ndomba eyak warogo nunggu lagagwa. It ogagagwa andi, it enombawi o muk Ala en o Mesir en visilogo wogenombolok wulu wagagi ako inilup dogoguluk adenggen ogagu lagagwa. Wungugwa Wene 12:17-20 yokhanes.

**Yudas en Yesus warupwak yiluk, yonggo lagagi wene**

(Mat 26:14-16; Mrk 14:10-11)

<sup>3</sup> Mbauk erogo mbalit nagusim, at Sile en it ap 12 menda ambi inis Yudas Ikariot endawima nonggagagi. <sup>4</sup> Nunggwigya lagagimu, it ap imam-imam enasini inim, it Ala awi valek suwam watu lagagwa enasini inim, at Yudas en yugirigya dugwit, "Yesus warovovok yiluk, nggarogo wokheraik o," yiluk, inim wene mbali lagagi. <sup>5</sup> Inim wene mbali lagya lagagimu, it enendawi enadenggen umbutu dugwit, "Onggo yoparip wokhurusogom," yugugu lagagwama, <sup>6</sup> at Yudas ako en, "E o," iri lagagirik, "Avakwa inil vaga dekma oklarup o ngga hudi eyave vagago wogeraup nanonggal agya hammi?" yiluk, sokhigya lagagi.

**Isogo Vasika isarup wene**

(Mat 26:17-25; Mrk 14:12-21; Yoh 13:21-30)

<sup>7</sup> Adenggen Erom Roti Virisigadek Menda ogagusim, isogo Vasika isaruguluk ndomba warup hudi agya lagagimu, <sup>8</sup> At Yesus en Peterus Yohanes iperen lakbugu dugwit, "Isogo Vasika nit naup vipuk-vapuk erogo ba lales."

<sup>9</sup> Yugirigya lagagimu, iren, "O nggoma nit vipuk erogo balauk?"

<sup>10</sup> Yugugu lagagwama, At Yesus en, "Hit o kota andoma nunggu dogomundik, ap ambi is sogolowak vaga nudik wolok lagyama, hinim avuk akluk, ap enama nunggwigya halok, hinim nunggwi lalo. <sup>11</sup> Hinim nunggu dogomundik, ap awi werek ako yugugu dugwit, 'Nenasin Ngguru en, "An nane welagwi menda ako ninim isogo Vasika naguluk, o hamat nggoma vokot werek? yugurup," yukneragarikmu, yukhisagwi.' <sup>12</sup> Yugugu hiniselok, at ap awi werek ako en o handimen hamat ombok ogorek ambi ovok werek yukhirigya halok, andoma at isagogo bagu dogop," yiluk, lakbogogi.

<sup>13</sup> Lakbogogi lagu lagagwarik, Yesus en it yugeragagi ako ndatak at hugu lagagwarik, andoma isogo Vasika ako isagogo bagagwa.

**Amburup naup mamuleragagi wene**

(Mat 26:20-30; Mrk 14:22-26; 1 Kor 11:23-25)

<sup>14</sup> Isogo bagagwa ako ovok naup vanggo iri lagagimu, Yesus en lakbigik denogo bogogi ako inim hora yagagwa. <sup>15</sup> Hora yugu lagagwarik, Yesus en it yugirigya dugwit, "An nova edup-mbedup okbanenggetek hegek, isogo Vasika isago yi, ninim naup ai, yiluk, hinim nasogom. <sup>16</sup> Nunggu dogomundik, hivi Ala en avakwa at avema mondok-mondok okbugu dugwit, 'Isogo Vasika eve menda adem yi aro,' yiluk, yedok hagup atma des yi lagatek hegek, An isogo Vasika yi nenggetek wiligya dogosogon atma, yogak ninim nasogom ai, ombasiga o, yiluk, avyarat yukheraliga."

<sup>17</sup> Andi yugirigya lagagirik, is owak inggimu wigya lagagirik, "Ai Nasin Ala wa!" yiluk, "An yogak ninim okbaluk hivi Ala en avakwa at avema mondok-mondok bisaup ari wagetek hegek An anggur enggen amburup yi, nenggetek dogosogonma, wogogo sumbukhedomanes, yiluk, yukheraliga."

<sup>19</sup> Yugirigya lagagirik, roti inggimu wigya lagagirik, "Ai Nasin Ala wa!" yiluk, ugurogo sumburigya dugwit, "Yi An neyave hit henake denek ako yi atma, novaga wenggenitu dugwit, nunggu dogones."

<sup>20</sup> Yugirigya lagagirik, nunggu lagagwama, amburup nudik anderogo at sumburigya dugwit, "Hit visilogo bigigagiluk henonggo bagya dugwit namuya wilisogon ako andi, amburup yi aro. Wene swi menda Ala hinim dambubigigaup yiluk, nggatuk erogo yukheragagi ako, an namuya vaga mondok atma nggedo yisogon," yiluk, sumbureragagi.

<sup>21</sup> Sumburigya lagagirik, "Avyak! An narupwak yiluk, ap yugerayogon ako ninim erom naliga yoma agarik.

<sup>22</sup> An Ap At Endaklagagis okbanup ako holek ndatak at okbanisogon ovara, at narupwak yiluk avakwa yugerayogon ako andi mondok anggin iya erogo ovaga arugwi o." <sup>23</sup> Yugirigya lagagimu, "Sa en ogarup halok yagas?" yiluk, ir-it at ambi yugigik, at ambi yugigik yagagwa.

**An iya, hat iya, yagagwa wene**

<sup>24</sup> At ambi yugigik, at ambi yugigik yugu lagagwarik, andi en, "An iya, hat iya," yugu dugwit, wene watu lagagwa. <sup>25</sup> Wene watusim, at Yesus en it yugirigya dugwit, "It ap weram menda enasini ininis ombok en enane anye vaga enaburi yerogo ogarup nderogo ogarup wene yugirugwi, eke, it ap ombok-ombok en avakwa 'Nenasini sek menda wa,' yukneraup umbutwi, ogasagwi ovara, <sup>26</sup> hit andi, anderogo yugu dogobuk. Ap ombok ambi henanggelekma agarik halok, at avyak maduk ovagak arupwak. Eke, at wene yugeralliga menda ako ogo, henayeloman at arupwak. <sup>27</sup> Sa en iya agarik embetep? At erom naliga andi, iya a, ata at naliga ako ake yi welagek ndi welagek ogasiga andi iya a? Dek. At naliga menda ako iya agarik. Anderogo ovara, An henanggelekma dugwit, henayeloman ovagak akluk, henake yi welagek ndi welagek ogasiga.

<sup>28</sup> Anggin-mbanggin okbanunggu-sigik, hit An hekbanilagudek mondok ninim agipikma, <sup>29</sup> Nasin en avakwa navema bisapwak yiluk, andok okbaninggigi ako ndatak, hit An navema bisaligama erom nunggwi, is nunggwi, eke, avakwa wene yugerallagwima dugwit, avakwa Iserael menda ininis unggul 12 ako enowak dinggis, ogagu dogovovok yiluk, andok okbigaliga," yiluk, yugeragagi.



**Yesus en Simon Peterus "Yesus an ninggut," yisogon, yugogogi wene**

(Mat 26:31-35; Mrk 14:27-31; Yoh 13:36-38)

<sup>31</sup> Yugirigya lagagirik, Yesus en, "Simon, Simon wai! Haruk dogwen. Gandum eyave delarupwak yiluk, avudit halok wibelagwi hak, at Sile en hit anderogo henavut mbalogo okbigigagiluk, Ala yugugu lagama, 'E o,' yagas ovara, <sup>32</sup> hat hendawi novaga vanggabuluk, avyarat nembeten ako, dek agya hao, An hake samban ogagi. Heyami vaga sugululuk nadema wagya dogomindik andi, harwi yi, enendawi aik wakbugu dogogun," yiluk, yugogogi.

<sup>33</sup> Yugugu lagagimu, at Simon en iri dugwit, "Ai Nasin. Heda marogo mabiselagwima mabagagwi, mondok hatwis, ogagu-selok, an niperen okbininaup sek imbiti."

<sup>34</sup> Yugugu lagagimu, At Yesus en, "Peterus wai. O yagak yi vaga ayam ane ao yegetek hegek, hat hane henggam vaga, 'Yesus andi, an ninggut,' iri heyayogon, yiluk, yukhisiga," yugogogi.

**Enayoparip, enasum, mbusinggarep erasul inim, wolok laup wene**

<sup>35</sup> Yugugu lagagirik, it ovok yugirigya dugwit, "Endak lakbigigis ako, henayoparip wonggalek inim, yerek-terek wokhirugu-selok yekhedaumenda yum inim, henaropato ambi adik inim, An en 'Wolok labuk,' yukhirigya lagagimu, 'Ai,' umbutu lagagup a, dek a?"

Yugirigya lagagimu, iren, "Dek. Nit nenangge ambi dek welagetek, Nenasin."

<sup>36</sup> Yugugu lagagwama, At Yesus en, "Anderogo ovara, yogak en henayoparip wonggalek agarik halok wugwi, yerek-terek wokhirugu-selok yekhedaumenda yum werek halok wugwi, eke, mbusinggarep erasul dek halok, henayum sogwes yum weram menda vaga ambi hunhidugwi, ogagu dogones," yugeragagi.

<sup>37</sup> "Andi, Ala en iri dugwit, 'At ap weyak menda inim ininggis dingginggugwa,' yiluk, yagagi dirup mbalek ako, An ogarimi vaga atma des yisogon, yiluk, yukheraliga. An okbanup yiluk, dirup mbandugul ako o yagak yi atma des yi wandiga halok, yukheraliga."

<sup>38</sup> Yugirigya lagagimu, iren, "Mbusinggarep erasul mberen yi agarik, Nenasin." Yugugu lagagwama, At Yesus en, "Ovok at," yiluk, yugeragagi.

**Ndom Saitun vaga dugwit, samban ogagagi wene**

(Mat 26:36-46; Mrk 14:32-42)

<sup>39</sup> Yugerelok akoma en wunggu lagagimu, ndom Saitun vaga enggek yagaligama, andi hudi ogo arat inggigi. Inggya lagagimu, at ane welagwi menda ako inim unggugwa.

<sup>40</sup> Dagaup imbitigirikmu akoma lagu lagagwarik, it yugirigya dugwit, "Weyak ogarup henendawi nggagali wagya hao, samban adigat ogagu dogones."

<sup>41</sup> Yugerelok, helep lagani beyak helendagwi ako hak, At horok adumu erogo lagya lagagirik, erambo yunggubuluk, samban ogagagi. <sup>42</sup> Samban ogagya dugwit, "Ai, Nasin! Yogak edup-mbedup okneraup ako, dek okbaup imbitya heyalok, dek okbain. Eke, dek halok, An ogarup ombasiga ako hekbaluk, Hat ogarup ombasiga ako adigat ogasogon." <sup>43</sup> Yugugu lagagimu, malaikat ambi mbogot vaga en At adema sigam ari wagya lagagirik, endawi modo okbagagi. <sup>44</sup> Endawi modo okbagya lagagimu, endawi mondok wakhidigya dugwit, abwa edok erogo samban ambi inim ogagagi. Ogagya hegek, digak winggigi ako amuya enggen ovagak ndetek wen vaga wombagagi.

<sup>45</sup> Samban okbaluk, mendek iri lagagirik, At ane welagwi menda enadema eyami vaga lagya lagagirik, it enendawi mondok burup iri halok, nogo yugwis enegegi. <sup>46</sup> Nogo yugwis inigu lagagirik, it yugirigya dugwit, "Hit nano nogo yilagwi? Weyak ogarup henendawi nggagali wagya hao en, mendek yiluk, samban ogagu dogones," yiluk, yugeragagi.

**Yesus vagatugwa wene**

(Mat 26:47-56; Mrk 14:43-50; Yoh 18:3-11)

<sup>47</sup> Wene andi ao yugirigyama, it ap 12 menda ambi inis Yudas ako endak wagya hegek, ap eneyave ambi homago ambetaga wagagwa. It ambetega wagu-sigik, at Yudas endak Yesus wa yugurigiluk, adema horok ari wagya lagagimu, <sup>48</sup> At Yesus en, "Yudas wai! Hat wa yuknirimi ako vaga An Ap At Endaklagagis yi, avakwa en narupwak yiluk, wogeraup embeten, yei?"

<sup>49</sup> Yugugu lagagimu, it Yesus inim welagagwa ako en it Yudas melen ogaruguluk, wagagwa ako yedok inigu lagagwarik, "Nenasin wai. Mbusinggarep vaga enaruk?"

<sup>50</sup> Yugu-sigik, it ambi en ap imam-imam enasin ombok ayeloman aruk amot vikit sobalogo lakbagagi.

<sup>51</sup> Sobalogo lakbagya lagagimu, At Yesus en, "Anderogo ogarubuk," yiluk, ap ako aruk inggis vakbagya lagagirik, sek okbagagi.

<sup>52</sup> Sek okbagya lagagirik, At Yesus en it At vagaruguluk wagagwa imam-imam enasini inim, it Ala awi valek aruwam watu lagagwa enasini inim, it ap ombok-ombok inim, ako yugirigya dugwit, "Ap enonggop welagwi menda vaginivi landagwi hak, An anderogo vakneraguluk, mbusinggarep inim, yo mbandugul inim, wolok wagep yi? <sup>53</sup> Hup-dinggya Ala awi valekma ninim neyagek, vaknetetek welagep ovara, at o hwiserek andok ako hinim okbanup yogak yi atma, ogares," yiluk, yugeragagi.

**Peterus en, "Yesus andi An ninggut," yagagi wene**

(Mat 26:57-58, 69-75; Mrk 14:53-54, 66-72; Yoh 18:12-18, 25-27)

<sup>54</sup> Yugirigya lagagimu, Yesus vagatu lagagwarik, wolok ap imam-imam enasin ombok amwa akoma ba lagagwa. Ba lagu-sigik, Peterus ako enambetaga ya horopo lagagi. <sup>55</sup> Imam-imam enasin ombok ako

amwa ba lagu lagagwarik, at awi mbumbumu andoma hali hubaluk, horaik werekma, Peterus ako enanggelekma hora yagagi. <sup>56</sup> Hora yagagirik werekma, hwavyak ambi hali hunik awia vaga Peterus eyave horaik werekma higya lagagirik, at il vurek dugwit, "Ap yi ogo inim wiligya laga."

<sup>57</sup> Iri lagagimu, Peterus en an dik-dek iri dugwit, "Hwavyak yi! Ap andi, an ninggut," yugogogi.

<sup>58</sup> Yugugu lagagimu, havis ap ambi adik en Peterus higya lagagirik, yugugu dugwit, "Hat ogo, At menda heyagi!"

Yugugu lagagimu, at Peterus en, "Avyak! An mondok dek!"

<sup>59</sup> Yugugu lagagimu, andi en havis, mo il ambi okbaluk, ap ambi adik en ane vanggo erogo yugu dugwit, "Ap yi, Nggaliliya mendama, at ogo inim avyarat wulugu lagao."

<sup>60</sup> Yagagi ovara, Peterus en, "Avyak! Hat yegen andi, an mondok ninggut aro."

Ao yuguguma, ayam ane yagagi. <sup>61</sup> Ane iri lagagimu, Nenasin Yesus elokwe endenogo Peterus bikhigya lagagimu, Peterus ako en, "O yogak yi vaga ayam ane ao yegetek hegek, hat hane henggam vaga, Yesus an ninggut, yisogon o, yuknigas ako, yi at yagas," yiluk, wenggenggu lagagirik, <sup>62</sup> weram wunggu lagagirik, endawi wakhidigya dugwit yup wisane yagagi.

#### Yesus wiyiknom-weyaknom erogo yo yawi watugwa wene

(Mat 26:67-68; Mrk 14:65)

<sup>63</sup> It ap Yesus vagago welagagwa ako en Yesus aganda yagu dugwit, yo yawi watugwa. <sup>64</sup> At il hain vaga vwi okbaluk, ambi inim watu dugwit, "Sa en hatya hegen? Iru!" <sup>65</sup> Yiluk, at wiyiknom-weyaknom erogo bagu dugwit, wene andi menda adigat wisane erogo yugogogwa.

#### Yesus owak dinggugwa wene

(Mat 26:59-66; Mrk 14:55-64; Yoh 18:19-24)

<sup>66</sup> Eke, o yanggo iri lagagimu, it Yakuri enawene amburup mbalisagwima ap ombok-ombok inim, ap imam-imam enasini inim, ap Musa wene mbalek mamulerelagwi menda inim, homakbaluk, werekma, Yesus awene amburup mbalupwak yiluk, At eyave wolok it enadema ba lagu lagagwama, At yugugu dugwit, <sup>67</sup> "Ala en denogo mondok okbagagi Mesias ako, Hat halok, yukneran."

Yugugu lagagwama, At Yesus en, "An yukhirigya neyalok, hit avyarat nombarusogombuk, <sup>68</sup> eke, Anen hit hemethinitu neyalok, hiren onngo yuknirisogombukma, An nggarogo yukheraik? <sup>69</sup> Yogak yi hudi en andi, An Ap At Endaklagagis yi, At anye iya erogo agarik Ala ako inggis amot vikit horaik dogosogon."

<sup>70</sup> Yugirigya lagagimu, it ovok erogo At yugugu dugwit, "Eke, andi halok, Hat yi Ala abut a, dek a?"

Yugugu lagagwama, Aren, "Hit yegep andi aro."

<sup>71</sup> Yugirigya lagagimu, iren, "At dombok adik en yagas nit vage hunggupma, wene ambi ngga yukneraupwak yiluk, yagalagwi? Dek aro!" yiluk, yagagwa.

#### Yesus wolok Pilatus adema lagagwa wene

(Mat 27:1-2, 11-14; Mrk 15:1-5; Yoh 18:28-38)

**23** It Yakuri enawene amburup mbalisagwi menda anderogo yugu lagagwarik, awakwa homago ako ovok erogo mendek yiluk, Yesus vakbaluk Gubernur Pilatus † adema wolok lagagwa. <sup>2</sup> Wolok lagu lagagwarik, enane huluk ova-ova yugu dugwit, "Ap yi, nit awakwa ovok nenavut dagalit laga dugwit, 'Ap inis ombok Kaisar o vagago agarik onngo yoparip wogorup moga o. Henasin inis ombok Keretus An aro,' yagan lagyama, heyakbagyo."

<sup>3</sup> Yugugu lagagwama, at Pilatus en Yesus yugugu dugwit, "Ap Yakuri enasin inis ombok hat at ai?"

Yugugu lagagimu, At Yesus en, "Yegen andi aro."

<sup>4</sup> Yugugu lagagimu, at Pilatus en it ap imam-imam enasini inim, awakwa wisane homago ako inim, yugirigya dugwit, "Ap yi, at avyarat weyak ogaga halok andi, At warup sek ovara, At ogaga ambi an mondok nil hegetek."

<sup>5</sup> Yugeragagi ovara, it enane vanggo erogo hunik adigat yugu dugwit, "Dek. Ap yi, wene mamuleregek laga dugwit, awakwa o Yudea menda ovok erogo o Nggaliliya en o yi hudi at enavut dagalit landiga," yiluk, yugogogwa.

#### Yesus Herodes adema lakbagagi wene

<sup>6</sup> Yugugwis ako at Pilatus aruk hunggu lagagirik, "At ap yi, Nggaliliya menda ai?" yiluk, awakwa yugirigya lagagimu, <sup>7</sup> "Yu," yugogogwa. Yugugu lagagwama, Pilatus en ap inis ombok Herodes o Nggaliliya vagago agarik yiluk, O Yerusalem sidok wagagirik werekma, aren Yesus owak dilupwak yiluk, adema lakbagagi.

<sup>8</sup> Lakbagagi laga lagagimu, ap Herodes ako en Yesus ogarit laga aruk hunggu lagagirik, "Enelup arup enalon werek menda ambi ogagya haik en ai," o muk en hogop imbita lagagima, Yesus higya lagagirik, endawi adenggen imbitigi. <sup>9</sup> Endawi adenggen imbita lagagirik, yi wene ndi wene wisane Yesus hemethagagi ovara, Yesus wene onngo yegetek mbup erek welagagi. <sup>10</sup> Mbup erek werekma, it imam-imam enasini inim, it ap Musa wene mbalek mamulerelagwi menda inim, huluk ova-ova yugu dugwit At ovaga bagu lagagwa.

<sup>11</sup> Eke, at Herodes arwi yegen werek menda inim Yesus wiyiknom-weyaknom erogo bagu dugwit, agenda yagagwa. Andi ovok okbagu lagagwarik, yum mondok segedok menda yikbaluk, eyami vaga Pilatus adema lakba lagagi. <sup>12</sup> At Herodes Pilatus endak iperen ogorek welagagwa ovara, andi hudi iperen dambulagagwa.

† At PILATUS ako o propinsi Yudea Gubernur vagago welagagi.

**"Yesus mondok warusogom," yagagwa wene**

(Mat 27:15-26; Mrk 15:6-15; Yoh 18:39-19:16)

<sup>13</sup> Yesus eyami vaga lakba wagagirikmu, at Pilatus en it ap imam-imam enasini inim, Yakuri ap ombok-ombok inim, avakwa ugun inim, homakbugu lagagirik, <sup>14</sup> yugirigya dugwit, "Ap yi, avakwa enavut dagalit landiga yiluk, nadema wolok wagep ovara, henane At ovaga bagep ako, hinivaga owak dinggirikmu, at weyak ogaga halok andi at warup sek ovara, At weyak ogaga ambi an mondok hegetek. <sup>15</sup> Eke, Herodes ogo, At weyak ambi ogagatek higya lagarik, eyami vaga lakba wagama, weyak ogagu-selok, enasagwi ovara, At weyak ambi mondok ogagetek o, yiluk, yukheraliga. <sup>16</sup> Anderogoma, asam hapwak yiluk, yo adigat warogo hekbayogon," yiluk, yugeragagi.

<sup>17</sup> [Yugeragagi ako, Isogo Vasika isagu-selok, ap heda mago ambi visilogo hekbagek ogagya lagagima, yiluk, yugeragagi.]

<sup>18</sup> Wene ako yugirigya lagagimu, it ovok ambivaga yugu dugwit, "A! Ap yi warogo bas. Ap Mbarabas visilogo hekbininin," yugogogwa. <sup>19</sup> Ap Mbarabas ako avakwa nin inim en, "Nenadik dogosogom," yiluk, o kota andoma ndup ogagu dugwit, ap ambi watya lagagimu, heda magogo mabiselagwima mabagagwa werekma, yugogogwa.

<sup>20</sup> Yugugu lagagwama, at Pilatus en Yesus hekbaup imbita dugwit, ane mberen vaga it yugeragagi ovara, <sup>21</sup> enane yanjak-hanjak yugu dugwit, "At yo winik vaga lobalogo watbas. Yo winik lobalogo watbas."

<sup>22</sup> Yugu lagagwama, at Pilatus en ane henggama vaga ambi inim yugirigya dugwit, "Nggarogo yiluk? At weyak ogaga ngga vaga yegep? Weyak ogagu-selok enasagwi ovara, weyak ogaga eve ngga halok, 'Warup, yagalagwi? At weyak ogaga ambi, an hegetekma, un asam hapwak yiluk yo warogo hekbayogon."

<sup>23</sup> Yugeragagi ovara, yo winik vaga lobalogo baupwak yiluk, enane hunik adigat yanjak-hanjak yugu dugwit, Pilatus ane ako sagalogo bagu lagagwama, <sup>24</sup> at okbaup yugogogwa ako Pilatus en anggon imbita dugwit ovara, "Sek aro," yiluk, yugeragagi. <sup>25</sup> Yugirigya lagagimu, at ap, "Nenadik dogosogom," yiluk, ndup ogagya dugwit, ap watya lagagimu, heda magogo mabiselagwima mabagagwa ako, "Visilogo hekbininin," yugogogwa ako visilogo wibagagi ovara, Yesus andi, it umbutugwa ako ndatak okbamwak yiluk, wogeragagi.

**Yesus yo winik vaga lobabagagwa wene**

(Mat 27:32-44; Mrk 15:21-32; Yoh 19:17-27)

<sup>26</sup> Wogorigya lagagimu, vagakluk lagu dugwit, ap ambi inis Simon awi Kirene mendama, weram en endawi ugun o kota akoma nunggu wagyama, vagarogo yo winik ako Yesus ambetaga wolok laupwak yiluk, omado vaga bagagwa.

<sup>27</sup> It avakwa wisane at amusek lagu dugwit, akwa nin en ayup yagwi, eneyave wakhidugwi, ogarit inim lagagwa. <sup>28</sup> Ogarit lagusim, At Yesus elokwe endenogo biginigu lagagirik, it yugirigya dugwit, "Hit akwa O Yerusalem menda yi, An nayup yarubuk. Ata, hit heneyagi hinim henayup yakhidugu dogones.

<sup>29</sup> [Anggin henovaga arisogonma,] it avakwa en yugu dugwit, 'Akwa wimbu inim, eneyak betelagudek inim, enagadyak wogorugwi ininggut inim, enadenggen ombasagwi o,' yiluk, yugu dogop hudi wasogon, yukheraliga.

<sup>30</sup> Andi hudi it avakwa en ndom ombok yugugu dugwit, 'Endenogo sopalogo bininin o,' yiluk, yugugwis, eke, ndom maduk yugugu dugwit, 'Neneyave sovalogo bininin o,' yiluk, yugugwis, † ogarusogom. <sup>31</sup> Andi, avakwa en yo iluk hegek anderogo okbagu-selok, yo mbuk agya halok, nggarogo okbaup embetep?" yiluk yugeragagi. ††

<sup>32</sup> Yesus vagakluk lagu dugwit, it ap weyak ogasagwi menda eneyave mberen Yesus inim enaruguluk, vaginiviluk lagagwa. <sup>33</sup> Vaginiviluk o inis Unggul Owakma akoma lagu lagagwarik, At Yesus it ap weyak ogasagwi ako inim yo winik vaga lobalogo bugu dugwit, ambi inggis amot vikit bagwi, ambi inggis hware vikit bagwi, ogarogo bogogwa. <sup>34</sup> Lobalogo bugu lagagwama, At Yesus en, "Ai Nasin o. It ininggut dugwit, obanilagwima, it weyak ogasagwi yi, enomaduk dek erogo bisin o," yugogogi. Eke, it ap ako en helep enggen vaga wakhegek ogagu dugwit, asum sumbukhedagagwa.

<sup>35</sup> It avakwa ako andenam inil vurek werekma, it ap Yakuri enasini ako en At wiyiknom-weyaknom erogo bagu dugwit, "At avakwa enagap wendatya lagama, At Ala en denogo mondok okbagagi Keretus ako avyarat halok andi, agap wendakhedapwak," yiluk, yagagwa.

<sup>36</sup> Eke, it ap yegen werek menda ako ogo, At agenda yagu dugwit, anggur amburup eda menda At situn okhagagwa. <sup>37</sup> Situn okhugu dugwit, "Hat ap Yakuri enasin hini ombok halok andi, hagap wendakhedoman!" yiluk, yugogogwa.

<sup>38</sup> Eke, wene ambi, "Yakuri enasin inis ombok yi aro," yiluk, dirup warogo unggumu yo winik vaga lobabagagwa.

<sup>39</sup> Lobabaluk werekma, ap mberen inim lobalogo bogogwa ako ap ambi en At Yesus wiyiknom-weyaknom erogo bagya dugwit, "Ala en denogo mondok okbagagi Keretus harat ako dek? Harat halok andi, hat hagap wendakhidigya, eke, nit nenagap wendatya, ogaru."

<sup>40</sup> Yugogogi ovara, aswe ako en at mberugu dugwit, "At ovaga lobalogo baup embetao ndatak hat ogo wane-wane hovaga lobalogo bagagaoma, hat Ala

† Hosea 10:8 yokhanes. †† Adem ayat yi, yo ILUK andi Yesus, at weyak ogagatek. Eke yo MBUK andi, avakwa weyak ogasagwi menda. Yesus weyak ogagatek ovara edup-mbedup okbagagwa halok, it weyak ogasagwi menda nggarogo okbaup ombasagwi? It evenuk weyak okbugugu dogosogom.

halon embetetek yi? <sup>41</sup> Nit okbininalagwi ako andi, ogagyonggo ndatak okbininalagwima, sek at ovara, at yi andi, weyak mondok ogagetek o.”

<sup>42</sup> Yugugu lagagirik, Yesus yugugu dugwit, “Ai, Nasin Yesus. Hinis ombok akluk wagya halok, An vaga hendawi wenggenerano.”

<sup>43</sup> Yugugu lagagimu, At Yesus en at yugugu dugwit, “Yogak hambuluk, landagwima o mondok segedokma akoma hat niperen dogosogom o, yiluk, avyarat yukhisiga o,” yugogogi.

#### Yesus hombangagi wene

(Mat 27:45-46; Mrk 15:33-41; Yoh 19:28-30)

<sup>44</sup> Eke, o dingga yam 12 vaga yi awi ndi awi andoma, mo il awia mondok dek agya lagagimu, o hup hak agagi hegek, mbikit yam 3 howam vaga o awiya agagi. Eke, Ala awi valekma yum obak ilim sivilik welagagi ako, ilim wane erogo nggago yagagi. <sup>46</sup> Nggago iri lagagimu, At Yesus ane ombok vaga iri dugwit, “Ai Nasin o. Nendawi Hat hinggimu dogonyok yiluk, wokhisiga o,” yiluk, endawi werahidigya lagagirik, hombangagi.

<sup>47</sup> At yegen werek enasin ako en ogagya higya lagagirik, at Ala inis siyabagya dugwit, “Ap yi, at avyarat weyak ogagatek higi o,” yiluk, yagagi.

<sup>48</sup> Eke, it awakwa wisane inil dogoguluk, wonggalari lagagwa ako ogagwi hugu lagagwarik, eneyave wakhedegek eneyami vaga sugululuk enamwa wungugwa. <sup>49</sup> Eke, At Yesus inim hunik ako, it akwa o Nggaliliya en at inim wagagwa ako inim, o adumu en andenam mendek dugwit, ogagwi ako ovok erogo inil lakhagagwa.

#### Yesus eyave wimu mabagagwa wene

(Mat 27:57-61; Mrk 15:42-47; Yoh 19:38-42)

<sup>50</sup> O Yudea kota ambi inis Arimatea andoma ap ambi inis Yusup welagagi. At ap andi it Yakuri enawene amburup mbalisiga ako menda welagagi ovara, aswei wene amburup mbalisagwi menda ako en, “Yesus watbaup,” hobaluk ogagagwa ako at endawi sek atma nggedok ogasiga mendama, at ane inim mondok lobanggitek. Eke, aren “Ala avema bininapwak o,” yiluk, sokhigya lagagi.

<sup>52</sup> At ap ako en Pilatus adema lagya lagagirik, “Yesus eve warek wokniru o,” yiluk, nggino yugogogi, “E o,” yugugu lagagimu, <sup>53</sup> eyave warek ako visilogo wombaba wagya lagagirik, yum mudu obak vaga dinggilogo helep wis swi mendagoma awakwa ao mabigitek akoma maba lagagi. <sup>54</sup> Hutun it Yakuri samban ogarup yiluk, vipuk erogo bagwi ako vaga ogagagi.

<sup>55</sup> Eke, it akwa Yesus inim o Nggaliliya en wagagwa ako Yusup amusek lagu lagagwarik, wimu mendago inim, Yesus eyave welalogo bagagwa inim, inil hagagwa. <sup>56</sup> Inil helok, eneyami vaga enamwa wunggu lagagwarik, yo enggen amburup sek menda inim, amburup amben segedok menda inim, vipuk erogo bagagwa.

Vipuk erogo bagu lagagwarik, Ala en, “Yerogo ogarup, nderogo ogarup,” yagagi dirup mbalek ako ndatak it Yakuri samban ogasagwi vaga [wolok lagatek] sat yanggal hedagagwa.

#### Yesus iluk akluk mendek yagagi wene

(Mat 28:1-10; Mrk 16:1-8; Yoh 20:1-10)

**24** Eke, it Yakuri samban okbaluk, nogo yiluk hari minggu vaga hutun en it akwa en amburup vipuk erogo bagagwa ako, wolok wimu akoma lagagwa. <sup>2</sup> Lagu lagagwarik, helep sup larik ako higilogo hurik hugu lagagwarik, <sup>3</sup> nonggagagwa ovara, Nenasin Yesus eyave warek bagagwa ako inil hegetek. <sup>4</sup> Eyave dek halok, “Yi nggarogonggan oklaga?” yiluk, werekma, yukdekma ap mberen enasum mudu amumulip digavok ovagak yirik enadema mendek yi wagu enogogwa. <sup>5</sup> Inigu lagagwarik, enalon wisane oginipu dugwit, enesele wen vaga samup yiluk, inigik, it ap ako en akwa ako yugurugu dugwit, “At iluk agarik ako it hombangagwa enanggelekma agarik hao en yiluk, belalubuk. <sup>6</sup> Eyave yoma dek. At vage iluk akluk, mendek yagas. At o Nggaliliya dugwit, ‘An Ap At Endaklagagis ako narupwak yiluk, neyave vagarogo it ap weyak menda wogirigya dogomima, yo winik vaga llobalogo banunggu-selok, ndugwis mberen dukluk ndugwis ambi vaga Ala en niluk erogo mondok okbanisogon o,’ yiluk, wene yukheragagi ako henendawi wenggeles.” <sup>8</sup> Yugurugu lagagwama, At yagagi ako enape wenggelagagwa.

<sup>9</sup> Wenggenngu lagagwarik, wimu en eneyami vaga wunggu lagagwarik, inil hagagwa ako ovok erogo it ap 11 inim, enaswei inim nagu lagagwa ako ovok erogo inim, mbilinogo yugeragagwa. <sup>10</sup> It akwa en ap lakbigik menda mbilinogo yugeragagwa ako andi, hwa Maria awi Madalena menda inim, hwa Yohana inim, Yakubus isa Maria inim, it akwa adik inim, iren mbilinogo yugeragagwa.

<sup>11</sup> Yugeragagwa ako, it lakbigik menda en, “It akwa yi wes ovagak yagalagwi,” yiluk, it avyarat embetetek welagagwa ovara, <sup>12</sup> At Peterus, mendek yiluk, vupuk wimu akoma lagya lagagirik, ena seve yiluk, il malhigya lagagirik, yum nggolalek ako adigat andenam hagagi. Higya lagagirik, “Yi nggarogonggan aga wii!” yiluk, endawima wenggelit amwa winggigi.

#### Sup o Emaus vaga lagu dugwit, ogagagwa wene

<sup>13</sup> Ndugwis andi vaga Yesus ane welagwi menda mberen o Yerusalem en o ambi inis Emaus lagagwa. O kota Yerusalem en o Emaus laup andi, o adumu 11 kilometer atma, lagu dugwit, <sup>14</sup> oklagya hagagwa ako ovok erogo mbilinit lagagwa. <sup>15</sup> Mbilinggu dugwit, wene nidi-hidi mbalit lagusim, Yesus adik enadema lagya lagagirik, inim lagagi ovara, <sup>16</sup> At yedok hagup en yiluk, enendawi apik erogo bogogi.

<sup>17</sup> Inil hwilagogo bogogi inigik, At Yesus en it yugirigya dugwit, "Hit suvaga lagu dugwit, wene ngga mbalit landagwi?"

Yugirigya lagagimu, enelese enabwa edok erek mbup yugu lagagwarik, <sup>18</sup> iperen ako ambi inis Ke-liopas en At Yesus yugugu dugwit, "It ap huru yi awi ndi awi en o Yerusalem nunggu wagao agarwik ako yogak ogaga yi, ovok erogo enelup ovara, hat hadik hinggutma wagya lagindik, yegen yi?"

<sup>19</sup> Yugugu lagagimu, At Yesus en, "Nggarogo agarikmu yegep?"

Yugirigya lagagimu, iren, "Ap Yesus awi Nasaret menda. At andi, Ala en yugugu hegek yugeraliga menda navi dugwit, wene yugirigya laga inim, ogagya laga inim, andi Ala ogo, nit awakwa ovok ogo, ninivaga mondok anye iya erogo ogarit lagya hugu lagyo. <sup>20</sup> Andi ovara, it ap imam-imam nenasini inim, nit Yakuri nenasini inim, iren warup wene mbabaluk, yo winik vaga lobalogo baupwak yiluk, wogirugu lagaoma, yo winik vaga lobalogo bagao ako. <sup>21</sup> Nit awakwa Iserael menda wender erogo binani warup ako Arat imbitoma, ai. Anderogo ovara, okbagao hegek, yogak ndugwis mberen welagyo. <sup>22</sup> Eke, ambi, it akwa nit ninisai ako en nanggela wibininggao. It akwa ako o hutun en wimu akoma lagu lagaorik, <sup>23</sup> At eyave warek dek hagao. Eyave dek halok, wagu lagaorik, nit yuknirugu dugwit, 'It malaikat menda en, "Dek. At iluk agarik," yiluk, nogo heda nenabi heda higyo,' yuknirugu inigup.

<sup>24</sup> Yuknirugu lagaoma, it nin ninim welagyo en wimu bikha lagu lagaorik, akwa yukneragao ako ndatak hagao ovara, At eyave andi, dek hagao," yiluk, Yesus mbilinogo yugogogwa.

<sup>25</sup> Yugugu lagagwama, At Yesus en it yugirigya dugwit, "Hit henendawi wes yundup erek higi. It ap navi- navi Ala en yugirigya hegek henombawi yugurugu lagagwa ako ovok erogo henendawi obak avyarat embetetek nggarogo yiluk agipik? <sup>26</sup> At Ala en denogo mondok okbagagi Keretus ako anggin-mbanggin ovaga bagao yegep ako, ovaga bagetek hegek, at siyabaup embetep? Dek. Ovaga baup agarikmu, bagao," yiluk, yugirigya lagagirik, <sup>27</sup> At Ala en denogo mondok okbagagi ako wagya halok, "Anderogo ogasogon," yiluk, Musa wene dirup mbanggigi ako hudi en it ap navi- navi Ala en yugirigya hegek yugurugu lagagwa dirup mbanggugwa ako ovok erogo amburup mbalogo yugeragagi.

<sup>28</sup> Amburup mbalogo yugirigya hegek, o it laup umbutugwarikmu akoma ndan yi lagu lagagwarik, At mbikit layogon yiluk, ogagagi menda, <sup>29</sup> sovabaluk, yugugu dugwit, "O mo il huruk iri dugwit o hup asogon atma, ninim dogosogom o," yugugu lagagwama, inim dogogiluk, enamwa nonggagagi.

<sup>30</sup> Nunggwigya lagagimu, inim erom naguluk, hora yiluk, erom inggimu wigya lagagirik, "Nasin Ala wa," yiluk, ugoro sumbureragiluk ogagya lagagimu, <sup>31</sup> "At ako yi at higyo o," yiluk, yedok hagagwa. Yedok hugu

lagagwama, inil inigik, enanggelekma andenam en dek agagi.

<sup>32</sup> Enanggelekma en dek agya lagagimu, iperen wene mbanggu dugwit, "Avyak! Sup vaga wagu dugwit, wene yuknirigya, Ala wene dirup mbalek amburup mbalogo yuknirigya, ogagya hegek, nit nenendawi mondok adenggen wisane okninivit nunggwigya higyo ako ai?" yiluk, yagagwa.

<sup>33</sup> Yugu lagagwarik, andi hudi vaga mbikit mendek yiluk, eneyami vaga o Yerusalem wagagwa. Wagu lagagwarik, it ap 11 inim, awakwa nin inim, homakbaluk dugwit, "Nenasin Yesus avyarat iluk akluk, mendek iri lagarik, eyave ap Simon adema sigam ari waga o," yiluk, mbilinggu sogogwa.

<sup>35</sup> Inigu lagagwarik, it ap mberen ako suvaga lagu dugwit, ogagagwa inim, erom ugoro sumburirigya hegek At yedok hagagwa ako inim, ovok erogo mbilinogo yugeragagwa.

#### At ane welagwi menda ovok erogo enadema sigam agagi wene

(Mat 28:16-20; Mrk 16:14-18; Yoh 10:19-23; Lak 1:6-8)

<sup>36</sup> Mbilinirigusim, supuk erogo, Yesus adik enanggelekma mendek yi nunggwigya lagagirik, "Henendawi hora eres," yugeragagi.

<sup>37</sup> Yugirigya lagagimu, inil hugu lagagwarik, enanggela wunggu dugwit, "Yi madis ai?" yiluk, enalon wisane agagwa. <sup>38</sup> Enalon wisane agu lagagwama, Yesus en it yugirigya dugwit, "Hit nggarogo yiluk henendawi anggin dugwit, henendawi yunggup yegek yagalagwi? <sup>39</sup> Hit An at neyaguluk, ninggis-nisok yi, bikneyanes. An ninyo-nowak werek neyagep ndatak it madis andi ininyo enowak werek dekma, An vaknitu dugwit, An neyave at nombares," yugeragagi.

<sup>40</sup> Yugirigya lagagirik, inggis-isok sigam inuk eragagi.

<sup>41</sup> Inuk irigya lagagimu, enendawi adenggen en, "Wii, nenalon! Yi nggarogongan oklaga!" yiluk, umbutu dugwit, "Yi At eyave at," ao embetetek inigik, it yugirigya dugwit, "Erom ambi werek a, dek a?" <sup>42</sup> Yugirigya lagagimu, ikan isogo ambi wogugu lagagwama, <sup>43</sup> hedigya lagagirik, it inil inigik ninggigi.

<sup>44</sup> Ninggya lagagirik, yugirigya dugwit, "Ninim dugwit, An ogarup wene ako Ala wene yugup Musa en dirup mbanggigi ako inim, it ap Ala en yugirigya hegek yugurugu lagagwa navi- navi dirup mbanggugwa inim, mbuku Ndawi wene dirup mbalek inim, ovok erogo atma des yisogon o, yiluk, yukhirigya lagi ako yi okbenanggao o," yiluk, yugeragagi.

<sup>45</sup> Yugirigya lagagirik, Ala wene mbalek sigam haupwak yiluk, enendawi awia okbogogi. <sup>46</sup> Enendawi awia erogo okbugu lagagirik, yugirigya dugwit, "Ala wene mbalek vaga iri dugwit, 'At Ala en denogo mondok okbagagi Keretus ako edup-mbedup ovaga bagu-selok, ndugwis mberen dukluk, ndugwis ambi vaga hambuluk bisa lendagwima en iluk agya dogomindik, mendek yisogon. <sup>47</sup> Hit weyak ogasagwi ako henasam

helok, henomaduk mbo bagu dogomima, Ala en henomaduk dek erogo bigigayogon o,' yiluk, wene ako At inis vaga, eve endak o Yerusalem en yi awi ndi awi ovok erogo yugeregek wunggu dogosogom o, yiluk, Ala wene dirup mbanggugwa ako yi at okbenanggao.<sup>48</sup> Ogagya neyagep yi ako, ovok erogo vagalogo yugeregek nagu dogop andi hit atma,<sup>49</sup> Nasin en wokheraup avok yukheragagi ako, Anen henovaga wombabigiga wasogon. Wombabigiga wasogonma, Ala anye eloma en henovaga mondok dikduk okba wagetek hegek, o kota yoma dogop," yiluk, yugeragagi.

### Yesus mbogot vaga wolok inggigi wene

<sup>50</sup> Yugirigya lagagirik, o kota en wulukluk, woginiviluk o Betania horok andoma ari lagu lagagwarik, inggis ilik bagya dugwit, adenggen enovaga bogogi.

<sup>51</sup> Adenggen enovaga ao bugu hegek, At eyave wolok mbogot vaga inggya hagagwa. <sup>52</sup> Inggya hugu lagagwarik, Ala avema seve yiluk inis siyabagu lagagwarik, enadenggen wisane embetek eneyami vaga o Yerusalem lagagwa. <sup>53</sup> Wunggu lagagwarik, Ala awi valekma akoma adigat dugwit, enendawi adenggen en Ala inis siyabagu lagagwa.

# Lakbogogi

**1** Teyopilus wai. At Yesus en yi ogagek ndi ogagek ogagya, wene mamulirigya, ogarigiluk wagagi ako asinggigi hudi en Averiniki endawima dugwit, At aori denogo lakbogogi ako wene denggalinupu lagagirik, mbogot-vaga wolok inggigi hudi ogagya lagagi ako ovok at mbuku endak ako vaga dirup watigis. <sup>3</sup> At watu lagagwama, hombagagi ako iluk agya lagagirik, "It naori en An avyarat niluk agi, enelup arumwak o," yiluk, sigam agagi, eke, Nenowa Inis Ombok Ala en denogo bagagi ako avema bininaup wene ako yugirigya, ogarit lagya hegek, ndugwis 40 hudi welagagi.

<sup>4</sup> Ndugwis ambi vaga at aori inim erom nunggu dugwit, it yugirigya, "At Yohanes en ap akwa weyak ogasagwi ako mbo baguselok, ima wombabugu lagagi ovara, horok yi at Nenasin en Averiniki henovaga wombabigigya warisogon atma, hit o Yerusalem hekbaluk labuk. Nenasin en, 'Avyarat wokherayogon o', yiluk, yagagi An yukhirigya lagi ako, wokherapwak yiluk, sokhugu dogones," yiluk, yugeragagi.

## Yesus mbogot-vaga wolok inggigi wene

<sup>6</sup> It ako Yesus inim homakbaluk dugwit, At yugugu dugwit, "Nenasin wai. Endak nit Iserali menda en nenasin inis ombok Daut avema ninigik, nenendawi ugun seyalek welagagup hak, nit yogak anderogo ap Oroma menda sovabiniluk agarwik ako wibisiluk nit sek okbininaup a?" yiluk, yugogogwa.

<sup>7</sup> Yugugu lagagwama, Yesus en wene onngo it yugirigya dugwit, "O ninggi-nanggi ogagu dogop Nasin Ala adigat andok dugwit, hit Iserali menda sek okbigigaup hologo bagagi andi, hit henelup arup dek. <sup>8</sup> Hit ako Averiniki henovaga wambu wagya dugwit, At anye okbugugu halok, o Yerusalem inim, o Yudeya ovok inim, o Samariya inim, yi awi ndi awi atok-atokma andoma ovok erogo inim, An ogarit nagu hinil neyagu lagagup wene ako yugeregek nagu dogop," yiluk, yugeragagi.

<sup>9</sup> Wene andi yugirigya lagagirik, inil iligik inigik, wolok inggya lagagimu, hena anggelekma hwilatigi.

<sup>10</sup> At mbogot-vaga inggya hegek, it inil ao iligik werekma, ap mberen yum mudu yanggwi iris hak yirik supuk erogo enadema mendek yi wakluk, <sup>11</sup> yugurugu dugwit, "Hit ap Nggalileya menda yi wai. Nggarogo yiluk mbogot-vaga hinil iligik adigat agipik? At Yesus eyave hit hinigik mbogot-vaga wolok inggya hinil hegep andi, wane-wane havis At eyave anderogo at wambu wagya hinil hagup," yiluk, yugeragagwa.

## Yudas avoloma mondok okbagagwa wene

<sup>12</sup> Yugurugu lagagwama, it lakbogogi ako o ndom Saitun vaga en o Yerusalem horok satu kilometer at eneyami vaga wambu wagagwa. <sup>13</sup> O kota Yerusalem nunggu wagu lagagwarik, it agarwikmu handimen akoma unggugwa. It unggugwa ako eneyave andi, Peterus, Yohanes, Yakubus, Andereyas, Pilipus, Tomas, Mbarotolomeyus, Matiyus inim. Alepiyus abut Yakubus ako inim, at Simon ap Selot menda inim, † Yakubus ambi abut Yudas inim, ako at. <sup>14</sup> It akwa nin inim, At Yesus isa Maria inim, Yesus aori ambetaga menda inim, andoma inim dambulik dugwit, enendawi ambiat akluk samban adigat ogagu lagagwa.

<sup>15</sup> It andoma inigik, ndugwis ambi vaga it ap akwa Yesus Ala abut denek menda avyarat umbutugwa menda ako eneyave seratus dua puluh hudi homagagwa enanggelekma en, at Peterus ako mendek iri lagagirik, <sup>16</sup> yugirigya dugwit, "Nowa-nasin. At Yudas ako ninim Yesus ane wokbaluk, at eyavup ogagu dogosogon yiluk denogo mondok okbininggigi ovara, at Yudas ogarup wene ako o endak erogo Averiniki en Daut yugugu hegek yagagi Ala wene dirup warek ako, atma des yumwak yiluk, at Yudas en yugirigya lagagimu, Yesus eyave vagatugwa o," yiluk, yugeragagi.

<sup>18</sup> (At Yudas weyak ogagagi onngo yoparip bago ako vaga wen onngo bagagirikmu andenam at ape samup yi wambigya lagagirik, agaum supulagya dugwit, alor ovok erogo hudilogo wulu wagagi. <sup>19</sup> Hudilogo wulu wagagi yagagwa ako, it Yerusalem menda ovok enaruk hunggugwarikmu wen onngo bagagi ako inis it enane vaga andi, "Akendama at," yugu lagagwa. Eke nit nenane vaga andi, Amuya Wombagagirikmu, yagalagwi.)

<sup>20</sup> At Peterus ako en wene andi yugirigya lagagirik, Ndawi Wene mbalek Ala wene ambi yugirigya dugwit, "At welagagirikmu ap akwa winggik-nonggegek yegetek werekma,

o andi um dogopwak," ††

yiluk, yagagi. Eke, ambi iri dugwit,

"At avoloma ogagya dogopwak yiluk, ap adik ambi mondok okbapwak o," ‡

† Ap Selot andi it ap Yakuri menda enadik dogop ogagu lagagwa menda. †† Mbuku Ndawi Wene 69:25. (Indonesia enane vaga Buku Mazmur yagalagwi andi adem Ndawi vaga Ala siyabelagwi menda, andi halok nit nenane andi Mbuku Ndawi Wene yugu dogosogon.) ‡ Mbuku Ndawi Wene 109:8

yiluk, mbuku Ndawi Wene ako vaga dirup warek agarik. <sup>21</sup> Agarik atma, ap ambi Yesus iluk akluk mendok yagagi il hagagi halok, ninim Yesus Ala abut hambigya lagagirik iluk akluk mendok yagagi wene ako vaginalogo yugeregek nagu dogoguluk, denogo baup agarikmu, okbasogon o. Ap andi at Yohanes en ap akwa ima wombabugu lagagi hudi en Yesus nenanggelekma en mbogot-vaga wolok inggigi hudi ndugurek-ndagarek Nenasin Yesus ninim nagu lagagup ako menda ambi mondok okbasogon," yiluk, yugeragagi.

<sup>23</sup> Yugirigya lagagimu, ap ambi denogo basogon yiluk ap mberen endak miginipugwa. Ap ambi mitugwa andi inis Yusup. Yusup andi inis henggam, inis ambi Mbaresabas, inis ambi havis salek andi Yutus. At ako mirogo bagwi, eke, ap ambi inis Matiyas mirogo bagwi, <sup>24</sup> okbugu lagagwarik, samban ogagu dugwit, "Nenasin o. At Yudas ninim hat heyavup ogarit nagu dogosogon yiluk denogo bininggigin ovara, hetbininiluk at laup mikedagirikmu akoma at lagagirikmu, yi ap akwa ndi ap akwa enendawi ombasagwi ovok helup atma, it ap mberen miginipup yi, at avoloma denogo baup hologo bagen ako, yuknerano," yiluk, samban ogagagwa. <sup>26</sup> Samban okbagu lagagwarik, helep enggen vaga enavut mbanggu dugwit, 'Avut endenogo lagya halok, Yusup mondok okbaup. Eke, avut endenogo lagatek halok, Matiyas mondok okbaup,' yiluk, ogagu lagagwama, avut endenogo lagatek halok, it ap 11 lakbogogi ako inim dogopwak yiluk Matiyas at denogo mondok okbagagwa.

#### Averiniki wagagi wene

**2** O Pendakota ogarup hudi agya lagagimu, it avyarat umbutugwa menda ako ovok erogo ambekma homakbaluk, <sup>2</sup> o ambekma akoma horaik werekma, havut adengga ane yagan landiga hak, mbikit supuk erogo mbogot-vaga en ane yagan umwa akoma hobo-hobo ari nonggagagi. <sup>3</sup> Nunggwigya lagagirik, hali abya ovagak mogologo it enadik-enadik enovaga ari wagya hagagwa. <sup>4</sup> Enovaga ari wagya hugusigik, ovok erogo Averiniki enendawima hobo-hobo ari nunggigya lagagirik, yugirigya hegek, it ap akwa enane unggut adik-adik menda mbikit inilup agya halok yugurugu lagagwa.

<sup>5</sup> O andi hudi vaga, it ap Yakuri Ala enalon ombasagwi menda, o yi awi ndi awi ovok en o Yerusalem wagu lagagwarik werekma, <sup>6</sup> ane iris ako enaruk hobaluk, homari wagu lagagwarik, it andi enane dombok vaga yugwi ako enaruk hunggu dugwit, "Wi! Yi andi nggarogonggan aga u!" yiluk, enendawi obak agagi. <sup>7</sup> It ovok erogo enalon en, "Wi!" yiluk, vok yugu dugwit, "It ap Nggalileya menda en adigat enane adik-adik yagalagwi yi, dek a? It Nggalileya menda at ovara, <sup>8</sup> nit nenane vaga dombok yagalagwi hulisagwi yi, nggarogonggan wokbaluk yagalagwi embetep? <sup>9</sup> Nit Paratiya menda

inim, Mediya menda inim, Elam menda inim, Mesopotamiya agarwik menda inim, o Yudeya en, Kapadokiya en, Pondus en, Asia en, <sup>10</sup> Virigiya en, Pambiliya en, Mesir en, o Libiya kota Kirene avilis ambot andoma en, it Oroma menda wagao inim, <sup>11</sup> nit Yakuri menda inim, it Yakuri menda dek ovara, Yakuri enawene wokbaluk it ogasagwi menda inim ogarit lagagwa inim, Kereta menda inim, Arap menda inim, nit ovok erogo Ala nggarogo ogarubuk menda ombok dombok ogaga ako nenane adik-adik vaga mbilinogo yuknirugwi ovok hulisagwi o," yiluk, yagagwa. <sup>12</sup> It enalon en, "Yi nggarogo ogarup yiluk yagalagwi?" yiluk, at ambi yugigik ogagu lagagwama, <sup>13</sup> it nin en, "Dek o. Is anggur amburup nunggu lagarwik, nenek-nenek hak yagan nagwis yi hinil bigisenes," yiluk enaganda yagagwa.

#### Peterus en Ala wene yugeragagi wene

<sup>14</sup> Enaganda yagu lagagwama, at Peterus aswi 11 inim mondok iri lagagirik, ane ombok vaga yugirigya dugwit, "Hit nowa-nasin Yakuri menda inim, hit o Yerusalem agipik menda ovok erogo inim, wene ambi yukherayogon yiluk, henaruk hunggu dugwit, dibagu dogwes." <sup>15</sup> Yugirigya lagagirik, "Hutun mo ao daga wagya hegek, jam 9 vaga at yiluk, it yi, anggur amburup nelok nenek-nenek hak yagan nagwis embetep andi dek o. <sup>16</sup> Nit nenane adik-adik yagalagwi yi, at Navi Yoel Ala en yugugu hegek yagagi ako atma asiga yi aro:

<sup>17</sup> 'Ala en iri dugwit,

O havis ogarup hudi yi ap akwa ndi ap akwa ovok erogo Averiniki enovaga wombabisa warisogon.

Henaburi ap inim akwa inim enendawima yugirigya neyagek, an iris ako yugeregek nagwis,

Henaburi apsawe en yugirigya neyagek nogo heda enabi heda hugwi,

Henasini enanggok en yugirigya neyagek enabi vaga hugwi,

Ogarusogon o.

<sup>18</sup> Havis andi hudi vaga, it an nayeloman muni akwa inim, ap inim,

it ogo ovok erogo Averiniki enovaga wombabisa warisogonma,

an nane yugeregek nagu dogosogon.

<sup>19</sup> Mbogot-vaga eloma en elose adik-adik menda ogagya,

yagamu wen vaga en nggarogo ogarubuk menda ogagya,

Ogagya dugwit,

Enamuya inim, yivuk aveta inim, hali abya inim, ogarisogon o.

<sup>20</sup> An Henasin Ninis Ombok warup ako vanggo yi wagya neyagek,

mo il hup agya, saut andi muya ovagak agya, ogarimindikmu,



An niris novangge dikduk ogakluk wagya neyalok, Wi yiluk, siyabanusogon o.

<sup>21</sup> Andi ogagya dogomima, ap ambi sa en, Nenasin Inis Ombok o, yiluk, an neyanggup iri dogomima, agap wendarisogon, † yiluk, at Navi Yoel en yugeragagi ako ari wagya yi arat o.

<sup>22</sup> Hit ap Iserali menda yi, wai. An yukheraliga yi, des erogo hunggu dogones. Ala en At Yesus Nasaret menda denogo lakba wagagi hit dibavovok yiluk, Ala en anye okbagya hegek, at hinim dugwit nggarogo ogarubuk menda ogagya, enalon werek menda ogagya, elose adik menda ogagya, ogagya lagagi ako henelup.

<sup>23</sup> At Ala en havis ogarup hologo bagagi musek Yesus ako vagogo hit Iserali menda wokhurugu lagagwama, hambupwak yiluk, it ap weyak ogasagwi menda hinim eyave yo vaga llobalogo bagagup ovara, <sup>24</sup> at hambisagwima andoma mondok sovalek dogop meyan atma, hambuluk lendagwima andoma yagan watya lagagi ako agap wendarogo Ala en iluk erogo mondok okbagagi," yiluk, Peterus en yugeragagi. <sup>25</sup> Yugirigya lagagirik, it Yesus hambisagwima en iluk erogo mondok yagagi avyarat ombarupwak yiluk, Ndawi Wene ambi yugirigya dugwit, "O endak erogo at inis ombok Daut en Yesus vivis ogarup wene iri dugwit,

'An Nasin Ala mondok-mondok nelosema agarik highi o.

Nenasin ninim atma, an mondok wadok dek at agirik o.

<sup>26</sup> Anderogo atma, an nendawi vaga adenggen im-bitya,

Nane vaga siyabagagya,

Ogasiga o.

An hambisagwima lagiluk hetbaninggya, Habut Endawi Sek Adigat Denek ako ogo, hambuluk, vidis agya neyagek, hetbaninggya,

Ogarisogon dekma,

An neyave hambisogon halok, nendawi dulik dugwit, nendawi seyalek at dogosogon o.

<sup>28</sup> Niluk dogogiluk, sup yi o, yuknogogin,

Hat ninim werekma nadenggen ombok dombok okbanugun o,' ††

yiluk, yagagi wene ako andi, eyave Yesus en ogarup yiluk avok vagalogo yagagi.

<sup>29</sup> Nowa-nasin. Nit nenombao Daut ogagagi wene an vagalogo yukheraliga. At Daut ako hambigya lagagimu, wimu mabagagwarikmu akoma ninil helagwi o.

<sup>30</sup> At Daut ako andi, Ala en yugugu hegek yugeraliga menda navi atma, Ala en wene hanum mbalogo Daut yugugu dugwit, 'Daut wai. Hat hombawi ambi wene yugeraligama havoloma dogopwak yiluk anen mondok okbayogon o', yiluk, yugogogi. Yugogogi wene ako elup dugwit, <sup>31</sup> At Ala denogo bagagi Keretus ako

hambimima iluk erogo mondok okbayogon, Daut elup atma iri dugwit,

An hambisagwima lagiluk hetbaninggya, An hambuluk, vidis agya neyagek, hetbaninggya, Ogarisogon dek o, yiluk, yagagi o.

<sup>32</sup> Yesus warogo bagagup ako andi, Ala en iluk erogo mondok okbagagi nit ovok ninil hagagup atma, vagalogo yukherelagwi o. <sup>33</sup> Ala en iluk erogo mondok okbagya lagagirik, inggis amotkan dogopwak yiluk, siyabagagirikmu, Asin en, Averiniki wokherayogon o, yiluk, yagagi ako wigya lagagirik, woknera wagagi vaga nit ogasagwi hinil ninugwis, yugwi henaruk hunggis, ogasagwi o. <sup>34</sup> At Daut ako mbogot-vaga enggetek ovara, aren iri dugwit,

'At Nenasin Inis Ombok Ala en, an Nasin Inis Ombok yugugu dugwit,

It ap ombok-ombok hinim ndup ogorek agindik menda,

An havema sovalogo bigitek neyagek, ninggis amot vikit hora yima' ‡ yiluk, yagagi.

<sup>36</sup> Daut en anderogo yagagi atma, at yo winik vaga hit llobalogo bagagup Yesus ako andi, Ala en hit Henasin Inis Ombok dogopwak yiluk, okbagya, eke, An denogo bagagis Keretus yi aro, yiluk, yukhirigya, ogagagi ako, hit Iserali menda ovok en, Yi avyarat, henelup arovovok yiluk yukheraliga o," yiluk, yugeragagi.

<sup>37</sup> Yugirigya ako hobaluk, "Yesus watugup andi, nit weyak ogagagup atma," yiluk, enendawi wakidugu lagagwarik, Peterus inim, it lakbogogi nin inim, hemerinigu dugwit, "Ayai, nenaswei. Nit weyak ogagurikmu, nit nggarogo ogaruk o?"

<sup>38</sup> Yugurugu lagagwama, at Peterus ako en, "Henomaluk dek erogo bigigapwak yiluk, hit henadik-henadik weyak ogasagwi ako henendawi wenggebaluk mbo bagu dogomundik, Yesus ambetaga lagu dogwes. Mbo bagwi hiniselok, Yesus Keretus inis vaga ima wombabigigaup. Eke, andi ogagu hiniselok, Ala en Averiniki ako un onngo dek wokherayogon o. <sup>39</sup> Ala en, 'Henendawi wenggelogo henomaluk mbo baluk, Yesus ambetaga lagu hiniselok, Averiniki wokherayogon o,' yiluk, avyarat nggatak erogo yukheragagi ako andi, hit inim, hit henaburi inim, it ap adumu menda inim, havis Nenasin Ala en yanggup yukherayogon ako ovok henake at yukheragagi o," yiluk, yugeragagi.

<sup>40</sup> Yugirigya lagagirik, wene nin wisane erogo yugirigya dugwit, "It ap Iserali o yogak endago menda weyak ogasagwi Yesus wegetek agarwik andi, hinim weyak okhinivugwi en yiluk, henagap wendak-hedavovok yiluk, hit Yesus welagwi menda inim mondok ogorek dogones o," yiluk, ane avuput vaga enaruk watya dugwit yugeragagi.

† Yoel 2:28-32 †† Mbuku Ndawi Wene 16:8-11

‡ Mbuku Ndawi Wene 110:7

<sup>41</sup> Yugirigya lagagimu, it ap akwa en at ane wogogwa ako ima wombabogogwa. O andi vaga inim hondalari nonggagagwa ako, eneyave dambulik ap wisane tiga ribu hudi agagwa. <sup>42</sup> It andi en enendawi ambiat dambulik dugwit, it lakbogogi en wene mamulirugwi ako des erogo hunggwis, inim erom amburup nungwi, samban ogagwi, anderogo adigat ogagu lagagwa.

**It avyarat umbutugwa menda en ogagu lagagwa wene**

<sup>43</sup> It lakbogogi ako en nggarogo ogarubuk menda ogagwi, inilup arup enalon werek menda ogagwi, ogaguselok, it ako ovok en, "Wi! Ninigut o," yiluk, vok yugu lagagwa. <sup>44</sup> It avakwa Yesus Ala abut denek menda avyarat umbutugwa menda ako ovok erogo enendawi ambiat dambulik dugwit, yi menda ndi menda ako, "Nit ovok ninangge aro," yiluk, <sup>45</sup> it ambi enangge dek halok, it enangge-enangge ako, onngo hubaluk, sumburirugu lagagwa. <sup>46</sup> It ako enendawi ambiat akluk, ndugerek-ndagarek Ala awi valekma mbumbumu homari nungugwi, enendawi sagain vaga adenggen dugwit enamwa adik-adik dugwit erom ugurogo baluk nungwi, <sup>47</sup> Ala siyabagwi, ogagusigik ap akwa Yesus ao avyarat embetetek menda ovok en it Ala aburi andi, enendawi adenggen umbutwi, ogagu lagagwa. Eke, Nenasin Inis Ombok ako en ndugerek-ndagarek it ap akwa enagap wendarogo ambi labok homakbugu lagagi.

**Peterus Yohanes en ap isok sek ogagagwa wene**

**3** Ndugwis ambi vaga o howam jam 3 it samban ogasagwi vaga, samban ogarusogon yiluk, Peterus Yohanes Ala awi valekma ungguggwa. <sup>2</sup> Ala awi valekma sup mbanggutmu inis 'Sup Sek', sanggugwarikmu akoma, ap erambo yidugup endaklagagi ambi en, it ap akwa Ala awi valekma nungugu-selok, ambenggino iri dogopwak yiluk, ndugerek-ndagarek wolok ba lagu lagagwa. O andi hudi vaga vage ba lagagwa andoma werekma, <sup>3</sup> it Peterus Yohanes Ala awi valekma nungugwi il inugu lagagirik, "Yoparip wokneres," yiluk, nggino yugeragagi. <sup>4</sup> Nggino yugirigya lagagimu, Peterus Yohanes en ap ako inil vurogo yokugu dugwit, Peterus en, "Hil biknininis," yugugu lagagimu, <sup>5</sup> "Nano woknirumwi?" yiluk, il yoginigigi.

<sup>6</sup> Il yoginigu lagagimu, at Peterus ako en, "Ninayoparip mbusi perak inim, emas inim, mondok dek ovara, an nandok agarik andi, ambi werekma, wokhirisogon o," yugugu lagagirik, "At Nasaret menda Yesus Keretus inis vaga mondok iri dogomindik lagya dogwen." <sup>7</sup> Yugugu lagagirik, at Peterus ako en inggis amotkan vagogo ao mondok okbagya hegek, ap ako isok inim, erambo inim, mbikit anye agya lagagimu, <sup>8</sup> soklok erogo mondok iri lagagirik, akoma nagu-wagu ogarit lagya lagagi. Nagu-wagu ogarit lagya lagagirik, soklok-soklok enggek wambegek yagan Ala siyabagek ogarit lagya dugwit Peterus Yohanes inim Ala awi

valekma nonggagagi. <sup>9</sup> Nunggwigya lagagimu, ap akwa ovok erogo ap ako isok vaga lagya dugwit, Ala inis siyabagek lagya, inil hugu lagagwarik, <sup>10</sup> "Ap yi, Ala awi valekma sup mbanggutmu inis Sup Sek sanggugwarikmu akoma dugwit, ambenggino iri laga ako sek aga yi, wi!" yiluk, vok yagagwa.

**Peterus en Ala awi valekma Ala wene yugeragagi wene**

<sup>11</sup> At ap ako en Peterus Yohanes ininggis vagogo werekma, it ap akwa ovok Ala awi ombok valek awi ambi adik ogarek ilim andoma inis Salomo sanggugwarikmua vupuk enadema ari lagu dugwit, "Wi!" yiluk, vok yagagwa. <sup>12</sup> Homari wagwi ako at Peterus il inugu lagagirik, it yugirigya dugwit, "Hit ap Iserali menda yi wai. Ap yi sek aga andi, nggarogo yiluk vok yagalagwi? Nit nenanye vaga sek ogagatek, ata, nit sek ogasagwi menda vaga sek ogagatek, halok, vok yuknerabuk! <sup>13</sup> Ninombawi Averaham inim, Isak inim, Yakup inim, Enasin Ala ayeloman Yesus ako, at Pilatus en hetbaup imbitya hegek, hit en, At yi, nenanggon o, yiluk, warupwak yiluk, wogoragagup ovara, Ala en vage siyabagagi o. <sup>14</sup> At Endawi Mot, Sek Adigat Denek Agarik ako, "Nenanggon o," yiluk, aveloma ap enasiga menda ambi hetbaup yiluk yagagup ako, hit Iserali menda aro. <sup>15</sup> Niniluk oknininisiga menda adem ako arat hegek hirenen watugup ovara, Ala en hambisagwima en iluk erogo mondok okbagagi ako ninil hagagup atma, vagalogo yukherelagwi o. <sup>16</sup> Yesus en ogarup sek o, yiluk, nenendawi at ova vanggabuluk avyarat imbita ako vaga ap isok weyak hit hinilup hinil helagwi yi ako, sek erogo anye okbagas. Nenendawi Yesus avyarat imbita vaga at sek aga hinim agarik yi, hit ovok hinil hegek o.

<sup>17</sup> Ai, nowa-nasin. Henasini ap ombok-ombok hinim ogagagup ako andi, hininggut dugwit ogagagup an nelup aro. <sup>18</sup> O muk Ala en iri dugwit, 'An Henowa Inis Ombok denogo bagagis Keretus ako, idup-mbidup erogo yagan warisogon o,' yiluk, yagagi ako, atma agatek hegek it ap navi-navi Ala yugirigya hegek yugu lagagwa ako, hit ogagagup vaga atma des yagagi. <sup>19</sup> Des iri lagagimu, Henasin Ala en hit henomaluk dek erogo bugugu vaga, henendawi adenggen ugun dogovovok yiluk, henendawi wenggebaluk henomaluk mbo bagu dogomundik Yesus ambetaga lagu dogwes. Andi ogagu hiniselok, henake denogo bagagi Keretus ako andi, Yesus atma, lakba wasogon o.

<sup>21</sup> O muk erogo At Ala en, Anderogo ogarisogon o, yiluk, it navi-navi at ane yugurugu lagagwa menda mondok adik denek yugu lagagwa ako, atma des yumwak yiluk, At Ala en wen-mbogot, yi menda ndi menda, ovok erogo adik swi menda ogarup ao helan, At Yesus mbogot-vaga andoma dogosogon o. <sup>22</sup> At Musa en iri dugwit,

'Henasin Ala en an lakbani wagagi hak, ap Ala en navi yugugu hegek yukheraliga menda ambi, hit menda at,

henake henadema lakba warisogon o. Lakba warisogon ako en yi wene ndi wene yukhirigya halok, henaruk des erogo hunggu dogop o. <sup>23</sup> At yukherami-ma hit ambi en henaruk des erogo hunggitek dogosogon halok, henanggelekma en denogo baluk elose dek erogo bayogon o," yiluk, yugeragagi.

<sup>24</sup> "It ap navi-navi Ala en yugirigya hegek yugu lagagwa menda, Samuel en yugirigya lagagi hudi en, at ambetaga wene yugurugu lagagwa hudi, it ako ovok erogo en yogak Yesus eyave vaga oklandiga yi, † agatek hegek, yugu lagagwa. <sup>25</sup> It navi-navi Ala en yugirigya hegek yugu lagagwa ako, enombawi hit aro. Ala en at Averaham yugugu dugwit, 'Yi ap akwa ndi ap akwa o wen vaga yoma ako ovok erogo hat endaginivisogon vaga enadenggen hugu dogosogon o', yiluk, wene avyarat nggatak erogo henombawi yugeragagi ako, hit menda mavorangge at yugeragagi o. <sup>26</sup> Andi halok, At Ala en at ayeloman mondok okbagya lagagarik, hit weyak ogasagwima en wokhiniviluk wagya dugwit, adenggen henovaga bigigapwak yiluk, endak hit at henadema lakba wagagi o," yiluk, at Peterus en wene andi at yugeragagi.

#### Peterus Yohanes enanggadi watugwa wene

**4** Peterus Yohanes en it ap akwa ao yugurugu-sigik, it ap imam-imam agama Yakuri vagago we-lagagwa menda inim, Ala awi valekma suwam watu lagagwa menda enowa inim, it Saduki menda inim, enadema wagagwa. <sup>2</sup> "At Yesus ap akwa hambisagwima en iluk erogo mondok okbagagi o," yiluk, Peterus Yohanes en ap akwa Yesus vaga hambuguselok, iniluk erogo mondok okbisaup wene ako mamulirugu lagagwama, enaninis en <sup>3</sup> eneyave vaginipu lagagwarik, o hup agya lagagimu, hutun en yugeraguluk wogenombolok lagu lagagwarik lembaga mabogogwa. <sup>4</sup> Mabogogwa ovara, it wene ako yugurugu-sigik hunggugwa ako eneyave wisane Yesus Ala abut denek avyarat umbutugwa. It ap adigat avyarat umbutugwa andi eneyave ovok dambulik lima ribu hudi agagwa.

<sup>5</sup> Nogo yiluk, hutun en it Yakuri enasini inim, ap ombok-ombok inim, it Musa wene mbalek mamulurugu lagagwa menda inim, homagagwa. At imam inis ombok winimen agarik Hanas inim, Kayapas inim, Yohanes inim, Alesander inim, at Hanas ako owa-aot nin inim, it ovok erogo o Yerusalem homakbaluk, <sup>7</sup> Peterus Yohanes enadema bisa wagu lagagwarik, yugurugu dugwit, "Hit en ap sek ogagep ako, sa inis vaga ogagep? Sa anye vaga ogagep?" yiluk, enaigwakma wogogwa.

<sup>8</sup> Enaigwakma wugu lagagwama, Averiniki en anye okbagya hegek Peterus en yugirigya dugwit, "Hit ap akwa Yakuri enasini inim, ap ombok-ombok inim,

† *Yogak Yesus eyave vaga oklandiga yi: Adem andi, Yesus waga-ga hudi en, at vivis warisogon hudi ovok erogo oklandiga yi aro.*

wene ambi yukheraliga o. <sup>9</sup> Ap isok weyak abwa umbutu dugwit, sek ogagyo ako andi, nggarogonggan sek ogagep o? yiluk, hit yogwak nenaigwakma welagwi andi, <sup>10</sup> hit inim, ap akwa Iserali menda ovok inim, henelup arovovok yiluk adem des erogo yukheraliga o. At ap sek aga henadema mendek agarik yi, At Yesus Keretus Nasaret menda hit yo winik vaga lobalogo watu lagagupmu, Ala en hambuluk lendagwima en iluk erogo mondok okbagagi ako inis vaga mondok sek aga o, yiluk, yukheraliga o. <sup>11</sup> Ala en iri dugwit, 'Hit o valisagwi menda en helep vaga vunggu dugwit, helep ambi mbo bagagwa ako, mondok-mondok helep owak ndalaga o,' †† yiluk, yagagi andi, At Yesus at yiluk yagagi o.

<sup>12</sup> It ap akwa yi awi ndi awi o wen vaga yoma menda ovok erogo, 'Ap yi en at henagap wendarisogon o', yiluk, inis ambi adik yukneregetek. Ata, 'At Yesus adik en at, henagap wendarisogon,' yiluk, yukneragagi."

<sup>13</sup> Yugirigya lagagimu, it homagagwa en Peterus Yohanes ako, sekolah ogagetek un ap menda welagagwa ovara, enalon dek dugwit, yugurugwi yedok inigu lagagwarik, "Yesus inim nagu lagagwa yi at inigup o," yiluk, vok yugeragagwa. <sup>14</sup> Ap sek aga ako Peterus Yohanes enadema mendek hugu lagagwarik, "Wene onggono nggarogo yuguruk?" yiluk, mbup yagagwa. <sup>15</sup> Mbup yugu lagagwarik, "Wene amburup mbalis-agwima en weram wilitales," yugurugu lagagwama, wunggu-sigik, enadik en wene mbanggu dugwit, <sup>16</sup> "Ap yi, nggarogonggan okbisamwi? Nggarogo ogarubuk menda iya ogagao ako it Yerusalem menda ovok erogo inilup agaorikmu, nit en, ap sek ogagetek, yup andi, meyan. <sup>17</sup> Ata, ombok vaga mbigalit lagup en, Ap andi inis vaga ambi inim yugeregek nagu dogop mondok moga. Ambi inim yugeregek nagu hiniselok, weyak erogo bigigasogon, yugerauk," yiluk, yagagwa.

<sup>18</sup> Yugu lagagwarik, yanggup yugeragagwa wagu lagagwama, yugurugu dugwit, "At Yesus inis ambi inim yugurugwi, mamulirugwi, ogarit laup mondok moga," yiluk, mbereragagwa. <sup>19</sup> Mbererugu lagagwa ovara Peterus Yohanes en it yugurugu dugwit, "Nit Ala ane hulup a, hit henane hulup a? Ala ivaga hiren wene nggatak hanes. <sup>20</sup> Nenaruk hunggwis, ninil hugwi, ogagyo wene andi, yugeregetek mbup yup meyan okninivisigama, yugurugu dogosogon o."

<sup>21</sup> Yugurugu lagagwama, ap ako sek aga halok, it ap akwa ovok en Ala siyabagwi inigu lagagwarik, enalon en, "Adem nano vaga yidilogo weyak okbisamwi o?" yiluk, we un enalon ombarupwak yiluk enane anye vaga mbererugu lagagwarik, heda visilogo wibogogwa. <sup>22</sup> At ap nggarogo ogarubuk menda vaga sek ogagagwa ako, endago hegek 40 tahun at ogagagi.

†† *Mbuku Ndawi Wene 118:22*

### Ala aburi en samban ogagagwa wene

<sup>23</sup> Visilogo wibugu lagagwama, Peterus Yohanes ako enaswei werekma lagu lagagwarik, it ap imam-imam agama Yakuri vagago agarwik menda enasini inim, ap ombok-ombok inim, yugeragagwa wene ako mbilino-go enaswei yugeragagwa. <sup>24</sup> Yugurugwi ako it enaruk hunggu lagagwarik, it inim enendawi ambiat akluk samban ogagu dugwit, "Nenasin Ala wa. Wen-mbogot inim, is ombok yanggadek inim, yi menda ndi menda ovok harenen hadigat ogagagin o. <sup>25</sup> Ninombao Daut hat hayeloman ako Averiniki endawima des iri lagagimu, Hat Ala en yugugu heyagek, aren Yesus oklarisogon avok iri dugwit,

It yi ap akwa ndi ap akwa naninis-haninis yagan lagu dugwit, weyak erogo bigik nagwis,

Ap ininis unggul adik-adik menda wene enam warogo hwilak-hwilak mbalit nagwis,

Ogagwi andi,

Nggarogo yiluk ogasagwi?

<sup>26</sup> At Nenasin Ala inim,

At denogo bagagi ako inim  
weyak okbisaguluk,

Ap ininis ombok yi awi ndi awi en dikduk ogagwi,

Ap akwa enasini ap ombok-ombok homakbaluk,

wene hologo bagwi,

ogasagwi o. †

<sup>27</sup> Yagagi ako, o kota yoma it Herodes inim, Pondiyus Pilatus inim, it weram Yakuri dek menda inim, it Iserali menda inim, iren hat hayeloman Endawi Sek Adik Denek Yesus, hat denogo mondok okbagagin ako, at warupwak yiluk avyarat o kota yoma homagagwa.

<sup>28</sup> Hat hinggis anye vaga yi ogagek ndi ogagek ogarup endak hologo bagagin ako, ogarusogon yiluk ogagagwa. <sup>29</sup> Nenaruguluk ogasagwi andi hil bigisin o, Nenasin. Inugu dogomindik, nenalon dek dugwit hat hane yugurugu dogosogon yiluk, nit hayelomani nenendawi wadok dek erogo bininin o.

<sup>30</sup> It aup warek andi iniselok, sek arupwak yiluk hinggis vakbisin. Eke, hayeloman Endawi Sek Adik Denek Yesus ako inis vaga nggarogo ogarubuk menda inim, inilup arup enalon werek menda inim, ogasiga menda ako, nit ogaruguluk okbininin o," yiluk, samban ogagagwa.

<sup>31</sup> Samban ogagu lagagwama, o it werekma ako wadok iri dugwit, Averiniki en anye okbugu lagagimu, inugutek dugwit, Ala wene yugeregek nagu lagagwa.

### Ala aburi enendawi dambulik dugwit ogagu lagagwa wene

<sup>32</sup> It awakwa Yesus Ala abut denek menda avyarat umbutugwa menda ako ovok erogo enendawi ambiat dambulik dugwit, enangge-enangge ako, "Yi hat menda o. Yi an menda o," yegetek ovara, we un, "Nit ovok

ninangge o," yugu lagagwa. <sup>33</sup> It lakbogogi ako en, "Nenasin Yesus hombagagirik iluk akluk mondok yagagi o," yiluk, enalon embetetek enane anye vaga wene ako vagalogo yugeregek nagu lagagwa. Yugeregek lagu-sigik, Ala en adenggen wisane enovaga bugu lagagi. <sup>34</sup> It enawen werek halok, ata it enawi valek werek halok, onngo hubaluk, yoparip ako it lakbogogi enadema ba laguselok, it ambi enangge dek halok sumburirugu lagagwa vaga, it enangge dek ambi we-lagetek.

<sup>36</sup> Anderogo ogagusim, ap Lewi menda ambi inis Yusup, awi adem Sipurus mendama, it lakbogogi en inis ambi Mbarenabas yugu lagagwa. Nit nenane vaga inis andi, "Enendawi Aik Wakbisaliga o," yagalagwi.

<sup>37</sup> At ap ako awen yavup yasigama ambi werekma, onngo hunggu lagagirik, yoparip ako wolok it lakbogogi enadema ba wagagi.

### Ananiyas ogwa Savira inim ogagagwa wene

**5** Ap ambi inis Ananiyas, at ogwa Savira inim it enawen ambi werekma, at Ananiyas en it enawen ako onngo hunggigi. <sup>2</sup> Onngo hunggu lagagirik, yoparip ako, at ogwa elup hegek, agun ako en nin higi-rogo it batugu lagagwarik, nin wolok lakbogogi ako enadema ba wagagi.

<sup>3</sup> Ogagya lagagimu, at Peterus en, "Ananiyas wai. Hawen onngo wokhigao nin higi-rogo hekbategen ako andi, hat nggarogo yiluk Sile hendawima des yi nung-gigya lagama, hat hane huluk yegen vaga Averiniki ambukmu enggen? <sup>4</sup> Hawen andi, onngo wokhigitek hegek, hat hawen at welaga ako dek a? Eke, yoparip wegen ako andi, hat hayoparip atma, Yoparip yi vaga nggarogo ogarik o, yiluk, hova dombok hulup sek ovara, hegek, venak vikit adigat wolok wagya dugwit, ovok ba waga nombarupwak yiluk, nggarogo yiluk nin adigat ba wagen? Nit ap akwa ninambukmu enggen dek o. Ata, Ala at ambukmu enggen," yiluk, yugogogi.

<sup>5</sup> Yugugu ako Ananiyas aruk hobaluk, wen vaga ndun iri lagagirik, andenam at hombagagi. Hombagas o, yugwi ako enaruk hunggugwarikmu it ovok en, "Wi!" yiluk, enalon wisane agagwa. <sup>6</sup> Eke, hombagagi ako it ap sawe wagu lagagwarik, eyave yum hain vaga ding-gibaluk, wolok wunggu lagagwarik, wenma huvur ok-ba lagagwa.

<sup>7</sup> Huvur okba lagagwa inigik, mo il henggam wela-gagwarik, ogwa ako agun hombagagi unggut dugwit, ugun nunggu wagya lagagimu, <sup>8</sup> Peterus en hwa ako yugugu dugwit, "Savira wai. Hit henawen onngo hun-ditip ako, yoparip yerogo at wokheraga? Iru o."

Yugugu lagagimu, "E o. Anderogo at wokneraga," ane huluk at yugogogi.

<sup>9</sup> Yugugu lagagimu, Peterus en at yugugu dugwit, "Hagun hit mberen wene ambiat mbabagu lagipik, nggarogo yiluk Nenasin Averiniki ambukmu enggep? Hit mberen Averiniki ambukmu enggep atma, it ap hat

† Mbuku Ndawi Wene 2:1,2

hagun wen huvur okba lagao ako en yogak hat ogo wokombolok laguluk, sup mbanggutmu nunggu wendagwi yi yogisin o.”

<sup>10</sup> Ao yugugu hegek, hwa ako Peterus adema andenam at ndun iri lagagirik, hombangagi. Hambigya lagagimu, it ap sawe ako en nunggu lagagwarik, nggorak hagagwa. Nggorak hugu lagagwarik, eyave wolok, agun adema akonam wen huvur okba lagagwa. <sup>11</sup> Ala aburi inim, it anderogo aga yugwi hunggugwarikmu ako inim, it ovok erogo, “Wi!” yiluk, enalon wisane ogonipigi.

#### Nggarogo ogarubuk menda ogarit nagu lagagwa wene

<sup>12</sup> It lakbogogi ako en ap akwa wisane enanggelekma inilup arup enalon werek menda inim, nggarogo ogarubuk menda inim, wisane at ogagu lagagwa. Eke, it awakwa Yesus Ala abut denek menda avyarat umbutugwa menda ako ovok erogo Ala awi valekma awi ogarek inis Salomo sanggugwarikmu akoma, homari lagek ogagu dugwit, enendawi ambiat welagagwa.

<sup>13</sup> It ap akwa nin ako en, “It yi andi sek at ogwasagwi o,” yiluk, enadenggen umbutu lagagwa ovara, enalon en inim homagetek at welagagwa. <sup>14</sup> Anderogo at ovara, it ap inim, akwa inim, Nenasin Yesus ovaga vanggalaluk avyarat umbutu lagagwarik, ambi labok nonggegek adik at ogagu dugwit, eneyave wisane agagwa.

<sup>15</sup> It lakbogogi anderogo ogarit lagwima, Peterus wagya halok at agur-agut enovaga arupwak yiluk, ap akwa aup warek sup vaga wogonombolok wagu lagagwarik, nogo yilagwi menda vaga ndalogo bogogwa. <sup>16</sup> It kota Yerusalem avilis ambot en ap akwa wisane homakluk wagu dugwit, it aup warek inim, it madis enendawima nonggagagi inim, wogonombolok bisa wagu lagagwarikmu, ovok sek agu lagagwa.

#### Lakbogogi anggin-mbanggin okbogogwa wene

<sup>17</sup> Andi okbaluk, at ap imam inis ombok winimen agarik ako inim, aori ap Saduki menda ovok inim en, “A! It ap akwa en it Yesus ane welagwi menda vok yugurugu dugwit, nit ako vok yuknerlagwi dek andi nenanggon!” yiluk, enaninis en <sup>18</sup> it lakbogogi ako vaginipu lagagwarik, lembaga mabogogwa. <sup>19</sup> Mabogogwarikmu o hup akoma werekma, Ala yonggo lakbisa wandiga menda malaikat ambi wagya lagagirik, lembaga sogop hurogo wibisiluk yugirigya dugwit, <sup>20</sup> “Hit Ala awi valekma andoma lagu dogomundik, Yesus avyarat umbutu-hiniselok, mondok hiniluk dogop wene ako ap akwa ovok yugerano,” yiluk, yugeragagi.

<sup>21</sup> Yugirigya lagagimu, o hutun en Ala awi valekma nunggu lagagwarik, malaikat en wene yugeragagi wane-wane ap akwa wene mamulirigu lagagwa.

Mamulirugusim, ap imam inis ombok ako inim, aori inim, it Iserali enasini wene amburup mbalisagwi menda ovok homari warupwak yiluk, yonggo lagagwa wagu lagagwama, it lakbogogi lembaga werekma ako wogonombolok warupwak yiluk, ap Ala awi valekma suwam agarwik ako lakbogogwa. <sup>22</sup> Lakbogogwa ako lagu lagagwarik, lembaga andoma belalinipugwa menda, eneyave dek agu lagagwama, wagu lagagwarik, yugurugu dugwit, <sup>23</sup> “O lembaga sogop mondok larik hugwi, eke, it ap sup suwam agarwik menda ogo, sup mbanggutmu mendek werekma inugwis, ogagyo ovara, sup hurugo yoginigu lagurik, eneyave dek at inugup o,” yiluk, it wene amburup mbalisagwi menda ako yugeragwa.

<sup>24</sup> Wene ako hunggu lagagwarik, At Ala awi valek suwam agarwik menda enowa inim, it imam-imam enasini ap ombok-ombok inim, enendawi obak dugwit, “Eneyave nggarogongan winggao embetep?” yiluk, yugusim, <sup>25</sup> ap ambi wagya lagagirik, it yugirigya dugwit, “Avyak wai! Ap heda marogo lembaga mabigip ako, Ala awi valekma lagu lagaorik, wene mamulirugusigik, wagi o,” yiluk, yugeragagi.

<sup>26</sup> Yugirigya lagagimu, ap Ala awi valek suwam agarwik menda enowa aori inim en it lakbogogi ako wogonivi lagu lagagwarik, “Ap akwa en helep vaga ninitwis hawen,” yiluk, enalon en initekek enewogo at wogonombolok wagagwa.

<sup>27</sup> Wogonombolok it wene amburup mbalisagwi menda enadema bisa wagu lagagwama, at ap imam inis ombok ako en hemeripulu dugwit, <sup>28</sup> “Ap andi inis vaga mamuliraup moga, yiluk, mbet yukhurugu ninigik, hit wene mamuleregep vaga o Yerusalem ovok hilit lagao andi, ap watugwa andi nit nenovaga dogopwak yiluk, yugeregek lendagwi yi?”

<sup>29</sup> Yugirigya lagagimu, at Peterus inim, it lakbogogi nin ako inim, iren wene onngo yugurugu dugwit, “Nasini. Ap akwa en yuknirugwi andi, nit hulup dek o. Ala en yuknirigya halok adigat hulup o. <sup>30</sup> Hit Yesus yo vaga lobalogo watugup ako, nenombawi Enasin Ala en hambisagwima en, iluk erogo mondok okbagagi o. <sup>31</sup> Mondok okbagya lagagirik, nit Nenowa inis ombok, nit nenagap wendarisiga menda ako, At Ala inggis amotkan dogopwak yiluk siyabagagi. Nit ap akwa Iserali menda weyak ogasagwi ako, nenendawi wenggebaluk weyak ako mbo bagu dogomundik, Yesus ambeta lagu niniselok, nenomaluk dek erogo bininaupwak yiluk siyabagagi o. <sup>32</sup> Ala en yuknirigya nit des erogo ogagu niniselok, Averiniki wokneragagi. At Averiniki ako ninim dugwit, nit wene yi ovok erogo vagalogo yukherelagwi o,” yiluk, yugeragagi.

<sup>33</sup> Wene andi hunggu lagagwarik, enendawi weyak enenaninis ane yugu dugwit, ‘Mondok inurusogon,’ umbutugwa. <sup>34</sup> Umbutugwa ovara, ap Parisi menda ambi Musa wene mamuleraliga menda, ap akwa ovok en agayuk wutu lagagwa, inis Nggamaliyel. Aren it ap wene amburup mbalisagwi menda inivaga mondok iri

lagagirik, yugirigya dugwit, "It sidok dukluk nunggu warupwak yiluk, wulupwak." <sup>35</sup> Yugirigya lagagimu, Peterus Yohanes wunggu-sigik, it wene amburup mbalisagwi menda ako yugirigya dugwit, "Hit ap Iserali menda yi, wene ambi yukherayogon o. Ap yi, okbisaup ako henendawi des erogo wenggenggu dogones.

<sup>36</sup> O endak en ap Teudas ako mendek iri lagagirik, An iya atma, vok yuknirupwak, imbitya dugwit, yagan wagya lagagimu, ap eneyave empat ratus at ane waguluk musek lagagwa ovara, at ako watwis, eke, at musek lagagwa ako sak okbugwis, ogagu lagagwama, ane ako dek agagi.

<sup>37</sup> Hivis, ap akwa ovok ininis dirup warupwak yiluk ogagusim, ap Nggalileya menda ambi inis Yudas, wagya lagagirik, ap nin at ane hulupwak yiluk nom-alinipigi menda, watu lagagwama, at ane wogogwa ako hoda sak yagan lagagwa.

<sup>38</sup> Anderogo atma, ap yogak mendek yagao yi, het-bisavovok yiluk, yukheraliga o. Enendawi hologo ogarit nagwis ako andi, we un ap akwa enendawi ombasagwi menda ogasagwi halok andi, mondok dek arisogon o. <sup>39</sup> Eke, Ala ombasiga menda ogasagwi halok andi, it enane sagalup meyan atma, Ala en, An ninim ogorek dugwit ogasagwi, hinimbitya hao en, hekbisenes o, yiluk, yukheraliga o," yugeragagi.

<sup>40</sup> Yugirigya lagagimu, it wene amburup mbalisagwi menda en, "Avyarat yagas," yiluk, it lakbogogi ako, yanggup yugeragagwa wagu lagagwama, yugurugu dugwit, "Yesus inis ap akwa yugeregek laup mondok moga o," yiluk, yo labirok initu lagagwarik, wibogogwa.

<sup>41</sup> Wene amburup mbalisagwima akoma en wibugu lagagwama, lagu dugwit, "Nit at inis yagan nagwis vagma nenanggadi warogo bininggao andi, sek aro," yiluk, enendawi adenggen wisane ombarit lagagwa. <sup>42</sup> Lagu lagagwarik, Ala awi valekma en, umwa en, ovok erogo ndugerek-ndagarek wene mamulirugwi, "Nenowa Inis Ombok Ala en denogo bagagi Keretus ako andi, Yesus aro," yiluk, sek wene ako yugurugwi, ogarit nagu lagagwa.

#### Yonggaragak eneyave 7 miginipugwa wene

**6** O andi hudi vaga Yesus ane wapwak yiluk ambi labok nonggegek adigat ogagu dugwit, it ap Yakuri menda ovara, Yunani enane yugu lagagwa en, "Ndugerek-ndagarek erom sumburirugu dugwit, nit ninisai akwa sogwa nggarogo yiluk erom wogeregetek hekbisalagwi?" yiluk, it Yakuri enawerek Iberani enane yugu lagagwa menda ako inim naburuk-haburuk yugu lagagwa. <sup>2</sup> Anderogo yugwi ako it ap 12 menda enaruk hobaluk, Yesus ane wogogwa menda ovok erogo homakbugu lagagwarik, yugurugu dugwit, "Naswei o. Nit Ala wene mamulherelagwi ako hekbaluk, erom sumbukirugu dogop meyan atma, <sup>3</sup> it ap Averiniki enendawima des yi nonggagagi, enendawi werek dug-

wit yagalagwi, henelup adigat, henanggelekma en ap eneyave 7 denogo mondok okbisines. Mondok ok-bisasogon yi, iren adigat ogagusigik, <sup>4</sup> nit andi, Ala wene adigat yugurugwi, samban adigat ogagwi, ogagu dogosogon o," yiluk, yugeragagwa.

<sup>5</sup> Yugeragagwa ako it ap akwa ovok homagagwa enaruk hobaluk, "Sek at yegep o," yiluk, denogo mondok okbogogwa ako, ininis yi o:

Ap ambi endawi avyarat imbitigi vaga yunggup yegetek, Averiniki endawima des yi nonggagagi Sepanus inim,

Pilipus inim,  
Porokorus inim,  
Nikanor inim,  
Timon inim,  
Paremenas inim,

ap ambi Yakuri menda dek, awi adem Andiyokiya welagagi ovara, it Yakuri enawene wokbaluk it ogasagwi menda inim ogarit lagagi, inis Nikolaus inim, <sup>6</sup> denogo bugu lagagwarik, it lakbogogi ako enadema bisa wagu lagagwama, inunggul ininggis vakbisiluk samban okbogogwa.

<sup>7</sup> Eke, Ala wene ako ombok at mbigalit lagya hegek, o Yerusalem andoma it at ane wapwak yiluk ambi labok nonggegek adigat ogagu dugwit, wisane at agwi, eke, it ap imam-imam agama Yakuri vagago welagagwa menda ogo wisane at, "Wene wasogon o," yiluk, Yesus Ala abut denek menda avyarat umbutwi, ogagagwa.

#### Sepanus vagatugwa wene

<sup>8</sup> At Sepanus ako Ala en adenggen eve wisane ovaga bagya, anye wisane okbagya, ogagya lagagimu, nggarogo ogarubuk menda ogagya, enelup arup enalon werek menda ogagya, ogarit lagagi. <sup>9</sup> Ogarit lagya hegek ovara, o it Yakuri samban ogasagwima ambi inis Heda Pisilogo Bigigigirikmu sanggugwarikmu akoma, it Yakuri menda o Kirene en, Alekandiriya en, Kilikiya en, Asia en, akoma homagu lagagwa. Ndugwis ambi vaga homari wagu lagagwarik, Sepanus inim wene watugwa. <sup>10</sup> Inim wene watugwa ovara, at Sepanus ako Averiniki en hologo yugugu hegek endawi werek dugwit, yugeragagi vaga iren ongggo yugurup meyan agya lagagimu, mbup yagagwa.

<sup>11</sup> Wene ongggo yugurup meyan agya lagagimu, it andi en, "At Sepanus andi, Ala inim, Musa inim, wiyi-knom-weyaknom erogo bagya higyo o," yiluk, ako enane huluk yegek lagu dogopwak yiluk, ap nin ongggo wogeragagwa.

<sup>12</sup> Wogerugu lagagwama, wene andi yugwi it ap akwa inim, ap ombok-ombok inim, it Musa wene mbalek mamulurugu lagagwa menda inim, enendawima mali wagu lagagwama, enaninis en ap Sepanus ako vagaluk, ap wene amburup mbalisagwi menda enadema ba lagagwa. <sup>13</sup> Ba lagu lagagwama, it huluk wene mo-

lalogo yugerapwak yiluk, mondok okbogogwa ako en, ap wene amburup mbalisagwi menda yugurugu dugwit, "Ap yi, hutun-howam mbup yegetek Ala awi valek mogama inim, Ala wene yugup Musa en dirup watigi wene ako inim, weyak erogo bagya higyo o. <sup>14</sup> At ap yi en iri dugwit, Yesus Nasaret menda ako en Ala awi valek yi, masalogo bagya, eke, Musa wene yerogo og-arup nderogo ogarup yukneragagi ninitok hunik ogasagwi menda ako adik okbagya, ogarisogon o, yiluk, iri higyo o."

<sup>15</sup> Yugurugu lagagwama, it wene amburup mbalisagwima horaik welagagwa ako ovok en, at Sepanus eyave inil vurogo yokugu dugwit, at elose andi, malaikat elose ovagak hagagwa.

### Sepanus en wene onngo yugeragagi wene

**7** Eke at ap imam inis ombok ako en Sepanus yugugu dugwit, "Ap wene yagas andi, hat avyarat yegen yi?"

Yugugu lagagimu, <sup>2</sup> at Sepanus ako en wene onngo yugirigya dugwit, "Nowa-nasin, henaruk holek dogones. Nenombao Averaham o Haran wagetek dugwit, ao o Mesopotamiya werekma, at mondok siyalek agarik Ala ako adema lagya lagagirik, Averaham yugugu dugwit, <sup>3</sup> 'Hawen inim, howa-hasin inim, hekbugu dogomindik, hat dogopim ambi yukhugu neyalok, andoma at elalo o,' yugogogi.

<sup>4</sup> Yugugu lagagimu, at Averaham ako ap akwa o Kasim enamwa o Mesopotamiya akoma nggelabisuluk, o adumu Haran mbup yi wagagi. Mbup yi wagagirik werekma, asin hambagagi. Hambigya lagagimu, o Haran hekbaluk yogak nit Iserali werekma yoma Ala en o adumu en at lakba wagagi. <sup>5</sup> Lakba wagagirik werekma, At Ala en Averaham andok dogopwak yiluk wen ambi mbanggitek, we un maduk mbalek ambi dogopwak yiluk wogigitek, ogagetek at ovara, at aburi mondok dek inigik, yugugu dugwit, 'Wen yi, hat inim, hat vaga wigalek inim, andok dogosogon o', yiluk, wene avyarat nggatak erogo yugogogi.

<sup>6</sup> Yugugu lagagirik, Ala en ambi inim yugogogi ako yi aro. 'Hat hambawi ako, o ap akwa hunogo enamwa andoma ap huru ovagak nagusim, it enayeloman okbisilik, anggin-mbanggin enovaga bigik adigat okbugusigik, 400 tahun arisogon o. <sup>7</sup> Anderogo ogarison ovara, it ap akwa hat hambawi en, it enayeloman ogonivusogon ako, anen enowak dilogo anggin-mbanggin okbugu neyalok, nin wisane enamwa akoma en wulu wagu dogomundik, o yoma wakluk, An siyabanunggu dogosogon o,' yiluk, Ala en Averaham yugogogi.

<sup>8</sup> Yugugu lagagirik, Ala en 'Wen yi, hat inim, hat vaga wigalek inim, andok dogosogon o', yiluk, wene avyarat nggatak erogo Averaham yugogogi ako elup dogopwak yiluk, enagamut mbanggu dogop wene ako yugogogi. Yugogogi vaga Isak at endaklagya lagagimu, nogo 7 yikbaluk, hutun agamut mbanggigi. Andi ok-

baluk, hivis Isak en Yakup endagya, eke, at Yakup en nit nenombawi 12 ako endaginipu, ogagagwa.

<sup>9</sup> Nit nenombawi en yugu dugwit, Nenasin en nenaot Yusup adigat sek okbagya yi, Nenanggon o! yiluk, it Mesir menda enayeloman arupwak yiluk, onngo hunggu lagagwama, o Mesir wolok lagagwa. Wolok lagu lagagwama, o andoma Ala inim werekma, <sup>10</sup> anggin-mbanggin higya ako Ala en dek erogo bagagi. Eke, at Yusup ako ap inis ombok o Mesir vagago welagagi Viraon ivaga sek adigat ogarit lagya hegek, Avyak yi, endawi werek atma, yiluk, Viraon adenggen ombarupwak yiluk, Ala en yonggathigya lagagi. Andi halok, at Yusup ako ap Viraon avema o Mesir vagago welagya, eke, at Viraon awi ombok valek ako suwam welagya, ogagya dogopwak yiluk Viraon en Yusup ako mendok okbagagi.

<sup>11</sup> Mendok okbagagi werekma, o Mesir yi awi ndi awi andoma inim, o Kanaan inim, o hivi adigat dugwit wen mbuk agya halok erom uvup en enovalenggen sigam erogo okbigik lagya lagagimu, it ap nenombawi ako en erom belanggugwa menda, mondok dek agya lagagimu, <sup>12</sup> at Yakup ako en o Mesir erom gandum werek aruk hunggu lagagirik, at aburi nit nenombawi ako erom hunupwak yiluk o Mesir andoma lakbogogi.

<sup>13</sup> Eke, hivis ndugwis ambi vaga lakbogogi lagu lagagwama, Yusup ako en, Henaot ako an aro, yiluk, owai enelup okbugu lagagimu, at Viraon ako ogo, at Yusup owa-aot yi at inigis, imbitigi. <sup>14</sup> Andi ogagu lagagwarik, Yusup en at asin Yakup inim, at aburi ovok dambulik eneyave 75 atma, Woginivi elales o, yiluk, lakbisa lagagi. <sup>15</sup> Lakbisa lagagi ako wagu lagagwarik, at Yakup aburi inim o Mesir at lagagwa andoma dugwit, at inim, at aburi nenombawi inim, hambit lagagwa. <sup>16</sup> Hambit lagagwa ako enowak wolok, o Sikem wagu lagagwarik, ap Sikem menda ambi inis Hemor aburi enadema, Averaham ap hambuguselok wimu mabisalagwima, yoparip vaga onngo bagagirikmu akoma, mabisa wagagwa.

<sup>17</sup> Andi okbaluk, Ala en Averaham wene avyarat nggatak erogo yugogogi ako † ogarup hudi horok vango yi wagya hegek, nit nenasini ako o Mesir andoma dugwit, eneyave wisane wigalagagwa. <sup>18</sup> Wigalarit lagu-sigik, enasin inis ombok Viraon adik ambi Yusup ogagya lagagi ako unggut hegek, o Mesir andoma vagago dogogiluk mondok yagagi. <sup>19</sup> Mondok iri lagagirik, nenasini enambutmu inggya dugwit, nadokhadok oginipu, avyak endaklagu iniselok, hambupwak yiluk, weram mbo bigik ogagu dogop o, yiluk, yugirigya, ogagya lagagi.

<sup>20</sup> Ogarit lagya andi hudi vaga Musa endaklagagi, avyak ako mondok segedok endago hugu lagagwarik, asin amwa hwilago hegek saut henggam okbaluk, <sup>21</sup> weram belagagwarikmu, hwa ndugum Viraon abut ako en heyakbagya lagagirik, An neyak at okhedayo-

† Wene avyarat nggatak erogo yugogogi ako andi, ayat 5 bikanes.

gon o, yiluk, amwa ba wagya lagagirik, sawe okhedagagi. <sup>22</sup> Avyak ako sawe agya dugwit, it Mesir menda enendawi werek dugwit ogagu lagagwa ovok erogo mamulhedagagi atma, ane iri halok iya umbutwi, ogarit lagya halok, Wi, yugwi, ogagu lagagwa.

<sup>23</sup> At umur 40 tahun ogagya dugwit, 'Nowa-nasin Iserali menda bigisa layogon o,' yiluk, <sup>24</sup> biginisa lagya lagagirik, andoma inim werekma, ap Mesir menda ambi en at Musa it menda ambi we un watya higya lagagirik, avikit agya dugwit, ap Mesir menda ako mondok watigi. <sup>25</sup> At endawi imbitya dugwit, an Viraon inim agirik atma, it Iserali menda en an nowa-nasin enagap wendarupwak yiluk Ala en lakbani wagagi nombarumwi a? imbitigi ovara, anderogo embetetek at welagagwa.

<sup>26</sup> Nogo ambi yikbaluk, hutun en at aori Iserali menda mberen yawi bagwi il inugu lagagirik, wendarinipu dugwit, 'Naori o. Hit mberen naswe-haswe at ovara, nano yiluk yawi war-wat yagalagwi o?' yiluk, yugirigya lagagimu, <sup>27</sup> it yawi bagwi ako ambi en at Musa vedalogo baluk, yugugu dugwit, 'Hat nenaruwam dugwit, nit ogasagwi amburup mbanggya dogop, sa en mondok okbagagamu, yagaliga yi? <sup>28</sup> Hat son ap Mesir menda watin ako hak, an narigiluk yagaliga yi? <sup>29</sup> Yugugu ako aruk hunggu lagagirik, o Mesir hekbaluk, o Midiyan hoda winggigi. Hoda wunggu lagagirik, ap huru hak andoma dugwit, aburi mberen endaginipigi.

<sup>30</sup> Akoma dugwit, 40 tahun at welagagi. Welagagirik, ndugwis ambi vaga harumu ndom Sinai akoma werekma, yo adok werek vaga, hali abya inggya angelekma Ala yonggo lakbisa wandiga menda malaikat ambi hagagi. <sup>31</sup> At Musa en hali abya inggya ako il higya lagagirik, Wi! Nano en ogagya hami? yiluk, bikkagiluk horok ari lagya lagagimu, Nenasin Ala ane iri dugwit, <sup>32</sup> 'Hat hambawi Averaham inim, Isak inim, Yakup inim, Enasin Ala ako an aro,' yugugu ako Musa aruk hunggu lagagirik, alon en owak wuruk iri dugwit, il bikaup mbup yagagi.

<sup>33</sup> Mbup iri lagagimu, Nenasin Ala en, 'Wen hat agindikmu andenam o mogama atma haropato heda visilogo bain. <sup>34</sup> An naburi o Mesir agarwik ako enarit lagwi nil inugu, yagan warit lagu dugwit enane yugwi ako naruk hunggu, ogasigama, enagap wendarogo bisagiluk wambu wagi o. Hat o Mesir lakbagagyama, elak o,' yiluk, yugogogi.

<sup>35</sup> Wene andi yugirigya lagagirik, Sepanus en adem vagalogo yugirigya dugwit, "It ap Iserali menda en, 'Nenaruwam dugwit, nit nenawene amburup mbanggya dogop, sa en mondok okbagagas? yiluk, Nenanggon', yugu lagagwa ako andi, at Musa at. It Iserali enowa enaruwam dugwit, enagap wendarupwak yiluk malaikat en yo adok werek adema yugogogi vaga Ala en lakba wagagi ako andi, at Musa aro. <sup>36</sup> At ako, ninombawi o Mesir akoma en wogonombolok wulu wagya dugwit, o Mesir inim, Is Yanggadek Merah em-

bet vaga inim, o harumu andoma nagu dugwit 40 tahun ogagagi inim, nggarogo ogarubuk menda ogagya, enelup arup enalon werek menda ogagya, ogarit lagagi.

<sup>37</sup> At 'Henasin Ala en an lakbani wagagi hak, ap navi Ala en yugugu hegek yukheraliga menda ambi, hit menda at, henake henadema lakba warisogon o,' yiluk, it Iserali menda yugeragagi ako andi, at Musa aro. <sup>38</sup> O harumu it Iserali homarek werekma enangelekma welagagi inim, ndom Sinai vaga malaikat en wene yugogogi ako inim, nit nenombawi o andoma inim, welagagi ako andi, at Musa aro. Eke, nit yuknirigya dogopwak yiluk Ala wene mondok-mondok dogop wene wegegi ako andi, at Musa adigat.

<sup>39</sup> Anderogo at ovara, nenombawi ako en, 'At yukneraliga ako hulup nenanggon,' yiluk, mbo bagu lagagwarik, eneyami vaga o Mesir laup enendawi wenggelek adigat dugwit, <sup>40</sup> at Musa ao ndom Sinai vaga andoma inggigi hegek at Harun yugugu dugwit, 'At o Mesir en woknenombolok waga Musa ako, nggoma laga nininggut atma, nit woknenombolok lagya dogopwak yiluk, nenagavuwak ambi ogovak higitneneran o,' yugogogwa. <sup>41</sup> Yugugu lagagwama, sapi eyak agur-amolok ogovak higitbaluk, anggom watu dugwit, it ininggi-vaga ogovak higitugwa ako agayuk wutwis, adenggen ogagwi, ogagagwa. <sup>42</sup> Ogagu lagagwama, At Ala endawi hologo baluk, mo il inim, saut inim, dadiwap inim, mbogot-vaga menda ovok at, siyabagek ogagu dogopwak yiluk hekbogogi. Andi ogagagwa ako andi, Ala en navi-navi yugirigya hegek yugu dugwit,

Hit Iserali menda andi, o harumu wokhenombolok wagya dugwit,

40 tahun ogagya hegek,  
henanggomi An nake warogo woknogogup,  
embetep yi!

<sup>43</sup> Dek ovara, henagavuwak Molok awi valek inim, henomadis Erepan dadiwap agur-amolok ogovak higurik ako inim,

Siyabagek wolok nagwis hinigiriku,  
An en wokhenombolok o Mbaben adumu andoma mbo bigiga layogon o,  
yiluk, yugeragagwa dirup watugwa ako wane-wane at haryogo lakbogogwa.

<sup>44</sup> Ala ninim agarik umbutu dogop Ala awi valupwak yiluk, Ala en, 'Agut wakhegek hil hegen ako wane-wane valup o', yiluk, Musa yugogogi ako, wane-wane vabaluk, nenombawi o harumu wolok nagu dugwit, ya vabagek-nda vabagek ogarit nagu lagagwa. <sup>45</sup> Eke, awi valek ako nit nenombawi havis andok agu lagagwarik, ap Yosua it inim Ala en ap weram Iserali dek menda haryogo wibigiriku yoma sovabigik nunggu wagu dugwit, o valek ako wolok ba nonggagagwa ao werek hegek at Daut inis ombok mondok okbagagwa.

<sup>46</sup> Mondok okbagu lagagwama, at Daut ogarit lagya vaga Ala adenggen ovaga bagya lagagi atma, Daut en



iri dugwit, 'Yakup Asin Ala dogopim o valisogon o,' yiluk, yugogogi ovara, <sup>47</sup> aren vanggitek, Salomo enat Ala awi vanggigi.

<sup>48</sup> Ala awi vanggigi ovara, At Siyalek Dombok Agarik ako, ap akwa enawi valekma agarikbuk o. Ala en yugugu hegek at navi en it yugirigya dugwit,

<sup>49</sup> Nenasin Ala en, Mbogot vaga andi, an nane denggalogo yugeraligama aro,

Eke, wen vaga andi, navema bisaligama aro. An nawi nggarogonggan valup yiluk yagalagwi?

Eke, an nambor sar yangganggya dogop, nggoma o?

<sup>50</sup> Yi menda ndi menda ogovak higerik yi andi, anen adigat ogovak higitigis ako dek? † yiluk, yugeragagi ako wane-wane, ap akwa enawi valekma agarikbuk o."

<sup>51</sup> Yugirigya lagagirik, Sepanus en it wene amburup mbalisagwi menda ako ambi yugirigya dugwit, "Henendawimbuk henendawi anye dugwit, Ala ane hunggitek hit at. Henombawi Ala ane saganggu lagagwa hak, Averiniki ane sagalisagwi hit aro. <sup>52</sup> Hit henombawi en it endak Ala yugirigya hegek yugu lagagwa navi-navi ako ambi wiyiknom-weyaknom okbigitek andi sa embetep? Dek o. Iren yugu dugwit, 'At Endawi Mot Sek Adigat Agarik ako warisogon o,' yiluk, wene avok vagalogo yugurugu lagagwa ako initu lagagwa. Eke, yogak hirenenat At wagagirikmu onngo mba-baluk watugup! <sup>53</sup> Ala wene yugup Musa en dirup wati-gi ako it malaikat enat yukhera wagagwa wogogup ovara, ogagetek agipik hit aro," yiluk, Sepanus en it wene amburup mbalisagwi menda yugeragagi.

#### Sepanus helep vaga watugwa wene

<sup>54</sup> Yugeragagi it wene amburup mbalisagwi menda ako enaruk hunggu lagagwarik, enaninis ane yagan lagu dugwit, enabis mam hambubaluk inigik, <sup>55</sup> at Sepanus ako Averiniki endawima des iri lagagimu, elose mbogot-vaga ilik laga dugwit, Ala siyalek agarikmu andoma Yesus inim inggis amotkan werek il inigigi.

<sup>56</sup> Inugu lagagirik, yugirigya dugwit, "Hinil yokanes! Mbogot heyatas anggelekma at mbogot-vaga en ap at endaklarupwak yiluk lakba wambu wagagi ako Ala inggis amotkan agarik higi o," yugeragagi.

<sup>57</sup> Yugirigya lagagimu, it ako enaruk nggedal-hedelok enane ombok erogo yandyak-handyak yagan lagu dugwit, at Sepanus mbikit vagari lagagwarik, <sup>58</sup> o kota weram nggigilogo wibaluk, helep vaga watugwa. It enane at ovaga bagagwa ako en sogwes yum weram menda nggolalogo ap sawe ambi inis Saulus adema bagu lagagwarik, <sup>59</sup> helep vaga watu-sigik, at Sepanus ako en, "Nasin Yesus wai, an nendawi woman o," <sup>60</sup> yiluk, erambo yunggubaluk ane ombok vaga iri dug-

wit, "It weyak ogasagwi yi, onngo okbisabuk! Hekbisin o, Nasin!" yiluk, yugugu lagagirik, hombagagi.

**8** At Saulus ogo Sepanus wasagwi andi sek imbitigi.

#### Saulus en Ala aburi anggin-mbanggin ogonivit lagagi wene

At Sepanus ako watu lagagwama, it ap Ala enalon ombasagwi menda en Sepanus warek wolok hambuguselok, bisa lendagwima ba lagu lagagwarik, abwa en, ayup ombok erogo yagagwa. Eke, at watugwa andi hudi vaga, it Ala aburi o Yerusalem welagagwa ako, inurusogon yiluk, iya erogo anggin-mbanggin ogonivit nagu lagagwama, it ovok o Yudeya Samariya avilis ambot andoma hoda sak yagan lagagwa ovara, it lakbogogi ako andi hoda winggitek at enamwa mbup yagagwa.

<sup>3</sup> Ayup yagu-sigik ovara, at Saulus en andi, it Ala aburi ako ap inim akwa inim dek erogo bigik laga dugwit, o ambima nunggwigya, nggigilogo wibisa waga, ambima nunggwigya, nggigilogo wibisa waga, ogarit wogonombolok heda marogo lembaga mabiselagwima akoma bisa laga lagagi.

#### Pilipus en o Samariya yugera lagagi wene

<sup>4</sup> It Ala aburi hoda sak yagan lagagwa ako en, yi awi ndi awi sek wene yugeregek nagu lagagwa. <sup>5</sup> Eke at Pilipus ako o Samariya kota ambima laga lagagirik, Ala en denogo bagagi Keretus avok it ap akwa andoma menda vagalogo yugeragagi. <sup>6</sup> Yugirigyama, ap akwa wisane homagu lagagwarik, Pilipus en yugirigya ako enaruk hunggwis, enelup arup enalon werek menda ogagya ako inil hugwi, ogagu lagagwarik, wene yugeragagi ako enendawi sek erogo dibagagwa. <sup>7</sup> It madis agoda werek menda enendawima nonggagagi ako, na hunik yugusigik nggigilogo wibugu, ininggis-inisok yidugup menda inim, enerambo weyak inim sek okbugu, ogagya halok, <sup>8</sup> it o kota andoma menda enendawi adenggen wisane agagi.

<sup>9</sup> Eke, o kota andoma ap ambi inis Simon, o endak en madis inis vaga oginivit laga halok, it Samariya menda ako en, "Ap ogasiga yi, wi!" yiluk, vok yugu lagagwa. "An nadigat iya," yiluk, okhidigya halok, <sup>10</sup> it ap akwa ovok ininis werek ininis dek iren at ogagya dibaluk yugu dugwit, "At Ala Anye Wisane Agarik yagalagwi ako andi ap yi atma, wi!" yiluk, vok yugu lagagwa. <sup>11</sup> O muk en madis inis vaga oginivit laga halok, vok yugu dugwit at ane adigat hunggu lagagwa ovara, <sup>12</sup> at Pilipus ako en Nenowa Inis Ombok Ala en denogo bagagi ako avema bisaup sek wene ako inim, Yesus Keretus wene inim, yugeragagi ako enendawi avyarat umbutu lagagwama, ap inim, akwa inim ima wombabigigi. <sup>13</sup> At Simon ogo endawi avyarat imbitigi halok, ima wombabagya lagagimu, at Pilipus inim laga dugwit, Pilipus en enelup arup enalon werek menda ogagya, ng-

† Yesaya 66:1

garogo ogarubuk menda ogagya, ogarit lagya il higya lagagirik, "Wi!" yiluk, vok yagagi.

<sup>14</sup> Eke, "It Samariya menda en Ala wene avyarat ombakluk wagao o," yiluk, yugwi ako, it lakbogogi menda o Yerusalem agarwik ako enaruk hunggu lagagwarik, Peterus Yohanes it mberen enadema lakbogogwa.

<sup>15</sup> Lakbogogwa ako lagu lagagwarik, it ap akwa Samariya menda ako Averiniki wapwak yiluk, enake samban ogagagwa. <sup>16</sup> It ako Nenasin Yesus inis vaga adigat ima wombabogogwa ovara, Averiniki ao enovaga wombabisa wagetekma, <sup>17</sup> inunggul ininggis vakbugu-sigik Averiniki wogeragagi.

<sup>18</sup> It lakbogogi en ap akwa ininggul ininggis vakbugu-sigik Averiniki wogorigya, at Simon ako inugu lagagirik, onngo yoparip wogeraup ogagya dugwit,

<sup>19</sup> "Ninggis inunggul vakbisiluk Averiniki wogorigya dogogiluk, an hit ogasagwi anderogo wane-wane ogagya dogoik en henawene andi, an ambi yukneres o," yiluk, nggino yugeragagi.

<sup>20</sup> Nggino yugirigya lagagimu, Peterus ako en at yugugu dugwit, "Ala en onngo dek un wokneraliga menda hegek, hayoparip vaga onngo baup, yiluk, hat yagaliga yi? Hayoparip andi, hedelok hali hunikmu lagya dogwen. <sup>21</sup> Ala en hendawi eve sek dek heyagas atma, wene yi menda ambi hat andok arisogon mondok dek aro. <sup>22</sup> Hat weyak ogarup embeten andi mbo baluk, hendawi embeten Hasin Ala en dek erogo bagapwak yiluk yuguru. <sup>23</sup> Homaluk hova durik-marek werek hegek, wam amumudi eda ovagak hane weyak iri heyagi o."

<sup>24</sup> Yiluk, mberugu lagagimu, at Simon en, "Ai! Hit yegep ako an oknitya hawen, Henasin Ala yugugu dogones o," yiluk, yugeragagi.

<sup>25</sup> It Peterus Yohanes ako en, Nenowa Inis Ombok Ala en denogo bagagi Yesus ako vagalogo yugurugwi, Ala wene yugurugwi, ogagu lagagwarik, enamwa Yerusalem eneyami vaga wagu dugwit, o Samariya o asoragoma wisane akoma sek wene yugeregek ya nonggegek nda nonggegek wagagwa.

#### Ap Etiyopiya menda ima wombabagagi wene

<sup>26</sup> Yugeregek wagusim, Nenasin Ala yonggo lakbisa wandiga menda malaikat ambi en at Pilipus ako yugugu dugwit, "Sup o Yerusalem en o Nggasa lendagwima o selatan vikit, ap akwa dekma andoma elak," yiluk, yugogogi.

<sup>27</sup> Andi yugugu lagagimu, lagyama, ap *pegawai* ambi owadi wogo Etiyopiya menda inim avuk agagi. O *negara* Etiyopiya akoma it ovok inisa inis ombok inis Handake avema welagagwa, eke, ap ako hwa Handake ayoparip vagago welagagi. At o Yerusalem Ala siyaba wanya lagagirik, <sup>†28</sup> andi okbaluk amwa eyami vaga wunggu lagagimu, *kuda kereta* vaga horaik dugwit,

† It ap Yakuri menda inim, eke it ap Yakuri dek ovara Ala enalon umbutu lagagwa menda inim, Ala awi valekma o Yerusalem akoma Ala ake bagwis, Ala siyabagwis, ogagu lagagwa. Andi halok, at ap

mbuku navi Yesaya en dirup watigi ako dombalit lagyama, Pilipus inim avuk agagi. <sup>29</sup> Avuk agya lagagimu, Averiniki ako en Pilipus yugugu dugwit, *Kuda kereta* andi adema lagya dogomindik hinim elak.

<sup>30</sup> Yugugu lagagimu, Pilipus ako en at adema vupuk lagya lagagimu, navi Yesaya dirup watigi ako dombangu dugwit iris aruk hunggu lagagirik, "Nasin wai. Hat mbuku warek dombalit lagya yi, dibaliga a, dek a?"

<sup>31</sup> Yugugu lagagimu, "Ap en sek erogo mamulurugwi iselok adigat dibelagwi atma an nadik nggarogonggan dibaup. Dek atma, yuknirinok yiluk nadema horayi dagama o," yugogogi.

<sup>32</sup> Dirup warek dombanggigi ako eyave yi aro: 'Ndomba waruguluk wolok lagu-sigik, mbup erek agarik hak,

Eke ndomba eyak iris mbangusigik,

Ane dek mbauk agarik andi hak,

At ane dek mbauk at welagagi o.

At anggadi warogo bagu dugwit, ogaga wane-wane okbagetek enane yimbu-dambuk erogo wolok lagagwa.

Eke at vaga wigalek ako dek atma, at awene mbanggitek aro.

Ap akwa agarwikmu o wen vaga yoma eloke dek at aga o,††

yiluk dirup warek ako mamungguma, horayi inggigi.

<sup>34</sup> Inggia lagagimu ap ako en Pilipus yugugu dugwit, "Ala en yugugu hegek navi yugirigya ako en yagagi yi, aren ogagagirikmu yagaliga a, ata ap adik en ogagagirikmu yagaliga a? Iru o," <sup>35</sup> yiluk, yugugu lagagimu, at Pilipus en "Yukirisogon o," yugugu lagagirik, wene dirup warek andi vaga At Yesus avok sek wene ako mbilinogo yugogogi.

<sup>36</sup> Yugurit it mberen sup vaga lagu dugwit, inamut yanggadakma ari lagu lagagwarik, ap ako en, "Inamut yi hil yokanen! An ima wombabanup meyan embeten a?" <sup>37</sup> [Yugugu lagagimu, Pilipus en, "Hat hendawi nggatak erogo Yesus avyarat embeten halok ima wombabagaup sek aro." Yugugu lagagimu, at ap Etiyopiya menda ako en, "Yesus Keretus andi Ala abut avyarat ombasiga o," yiluk, yugogogi.] <sup>‡38</sup> Yugugu lagagirik, kuda ako mbup yupwak yiluk yogogogi, mbup iri lagagimu, it mberen ima nunggugu lagagwarik, Pilipus en ap ako ima wombabagagi. <sup>39</sup> Wombabagya lagagirik, wulu wagyama, at Pilipus ako Averiniki en supuk erogo wolok wunggu lagagimu, ap ako en Pilipus ako ambi inim il hegetek ovara, endawi adenggen embetek amwa lagagi. <sup>40</sup> Eke, at Pilipus ako o Asotus akoma sigam ari lagya lagagirik, yi awi ndi awi o kota dombok andoma sek wene yugeregek o Kaisareya lagagi.

Etiyopiya menda ako o adumu wen Etiyopiya en o Yerusalem Ala siyabagiluk wagagirik umwa lagyama Pilipus ako inim avuk agagi.

†† Yesaya 53:7,8‡ Ayat yi andi bahasa Yunani enane vaga nin andi werek, nin andi dek.

### At Saulus weyak mbo bagagi wene

9 Andi ogagya hegek, at Saulus en it Nenasin Yesus ane wogogwa menda ako enarigiluk aninis ane yagan lagya lagagimu, at imam inis ombok winimen agarik ako adema lagya lagagirik, <sup>2</sup> yugugu dugwit, "Nasin wai. O kota Ndamasik it Yakuri samban ogasagwima enasini en inil hapwak yiluk, haren it ap akwa Yesus ane musek laguselok, vagogo heda magenom-bolok Yerusalem warigiluk, dirup ambi mbaniru o."

<sup>3</sup> Yugogogi ako, wogugu lagagimu, lagya lagagirik, o kota Ndamasik vanggo yi lagya lagagimu, supuk erogo mbogot-vaga en abya yovalogo at adema wombaba wagagi. <sup>4</sup> Wombaba wagya lagagimu, at Saulus ako wema ndun yi wambigya hegek, ane ambi yugugu dugwit, "Saulus wai, Saulus wai. Hat nggarogo yiluk anggin-mbanggin erogo narit landiga?"

Yugugu ako aruk hunggu lagagirik, <sup>5</sup> "Ai, Nasin, hat sa o?"

Yugugu lagagimu, "Dek o. Hat anggin-mbanggin erogo narit landiga ako an Yesus aro. <sup>6</sup> An atma, hat mondok iri dogomindik o kota ombokma andoma lagya heyalok ogarup wene yukhirisogonma, andoma elak o," yiluk yugogogi.

<sup>7</sup> At aswei inim lagagwa ako en ap eyave hegetek ovara, un ane iris adigat hunggu lagagwarik, enane dek mbuperek welagagwama, <sup>8</sup> at Saulus ako mondok iri lagagirik, il venggenek ovara, yi menda ndi menda il haup meyan atma inggis vagakluk wolok o kota Ndamasik balagagwa. <sup>9</sup> Balagagwa akoma dugwit, il mbuk agagi hegek, erom inim, is inim, nenggetek we un at nogo henggam yigigi.

<sup>10</sup> O kota Ndamasik andoma ap Yesus ane wogogi menda ambi inis Ananiyas. At ako en abi higya dugwit, At Nenasin Yesus en, "Ananiyas wai."

Yugugu lagagimu Ananiyas en "Yukniru o, Nasin."

<sup>11</sup> Yugugu lagagimu, At Nenasin ako en at yugugu dugwit, "Mondok yiluk, sup inis Mot-Mot yagalagwima ap Yudas amwa andoma ap ambi inis Saulus awi Tarusus menda belalit elak. Aren samban ogagyama, <sup>12</sup> hat Ananiyas en at adema nunggigya dogomindik, unggul hinggis vakbaluk, il mbuk aga ako sek ogagya abi vaga higya, andoma elak o."

<sup>13</sup> Yugugu lagagimu, at Ananiyas ako en, "Nasin. At ap ako o Yerusalem hat haburi adik denek weyak ogonavit lagya yugwi ako an naruk hunggis. <sup>14</sup> Eke, yagak it hiniis vaga samban ogasagwi menda ovok erogo vaginivit laik o, yiluk, it imam-imam enasini yugirigya lagama, E o, yagaorikmu, waga o."

<sup>15</sup> Yugogogi ovara, Nenasin en at Ananiyas yugugu dugwit, "Elak! Ap andi it weram Yakuri dek menda inim, it enasini ap ombok ininis werek menda inim, it Is-erali ovok erogo inim, An ninis enelup erogo yugirigya dogopwak yiluk, nayeloman denogo bagirikmu, yugirilak. <sup>16</sup> Eke, at Saulus ako, an navikit agyama, anggin-

mbanggin okbagu dogop ako anen yugugu dogosogon o," yiluk, abi vaga yugugu hagagi.

<sup>17</sup> Yugugu higya lagagimu, o andoma lagagi. Lagya lagagirik, ap ako amwa nunggigya lagagirik, inggis Saulus unggul vakbaluk, yugugu dugwit, "Naswe Saulus wai. Hat hil sek agya, Averiniki hendawima des yi nungwigya, ogagya hanok yiluk, hat sup vaga yoma wagyama At Nenasin Yesus hegen ako en, lakbani waga o," yugogogi. <sup>18</sup> Ao yugugu hegek, il agut agagi lobalek ako bonggo erogo wambigya dugwit, il sek agagi. Il sek agya lagagirik, mondok iri lagagimu, ima wombabagagi. <sup>19</sup> Ima wombabagya lagagimu, erom ninggya lagagirik anye agagi.

### Saulus en o Ndamasik Ala wene yugeragagi wene

Saulus ako it Yesus ane wogogwa menda o Ndamasik welagagwa ako ndugwis maren hudi inim welagagi. <sup>20</sup> Inim dugwit 'Yesus andi Ala abut aro,' yiluk, it ap Yakuri samban ogasagwima wene ako yugeregek lagya lagagi. <sup>21</sup> Yugeragagi enaruk hunggugwarikmu, it ovok erogo "Wi," yiluk vok yugu dugwit, "Avyak! O Yerusalem it Yesus inis vaga samban ogasagwi menda ovok enarit lagya laga andi, yogak o yoma it anderogo menda hawen, heda maginiviluk it ap imam-imam enasini enadema bisa lagiluk waga ako en yagaliga yi dek a?" yiluk, yugu lagagwa.

<sup>22</sup> Anderogo at yugu lagagwa ovara, at Saulus ako en, wene yugirigya dugwit, 'Yesus andi Nenowa Inis Ombok Ala en denogo bagagi Keretus aro', yiluk, avyarat ombarupwak yiluk, 'Anderogo ogagya lagagi o,' yiluk, yagan lagya ako adigat mbigalit lagu dugwit, it Yakuri menda o Ndamasik welagagwa ako enane nggarogo yubuk erogo okbogogi.

<sup>23</sup> Andi halok, hiviis it Yakuri menda en, 'Saulus warusogon o,' yiluk, hologo bagagwa. <sup>24</sup> Hologo bagagwa ako at Saulus aruk hobaluk werekma, ndugwis ambi vaga waruguluk, o kota nunggisagwima o hup dingga hanjalek welagagwa. <sup>25</sup> Welagagwa ovara, at Saulus aori en o hup mburin yum yugup vaga yedogo baluk, heda yidilogo leget ovasugorok weram wibagagwa.

### Saulus o Yerusalem lagagi wene

<sup>26</sup> Wibagu lagagwama, o Yerusalem lagya lagagirik, it Yesus ane wogogwa menda ako inim dambuligiluk ogagagi ovara, it ovok en at Yesus ane waliga menda dek atma yiluk, enalon en, 'Oma,' yugigitek mbup yagagwa. <sup>27</sup> Mbup yugu lagagwama, at Mbarenabas ako en wolok it lakbogogi ako enadema lagya lagagirik, at Saulus sup vaga lagya dugwit, Nenasin Yesus il hagagi wene inim, At Nenasin en yugogogi wene inim, eke, Ndamasik andoma alon dek dugwit Yesus inis vaga yugirigya lagagi wene inim, mbilinogo yugeragagi. <sup>28</sup> Yugirigya lagagimu at inim dambulik dugwit, at mondok alon dek, Nenasin Yesus inis vaga o Yerusalem wene vagalogo yugeregek lagya lagagi. <sup>29</sup> Yugeregek lagya

dugwit, it ap Yakuri menda ovara, Yunani enane yagalagwi menda ako inim enane yugu dugwit, wene onngo-onngo yugu-selok, it ako en at warup umbutugwa. <sup>30</sup> 'Warusogon o,' yugwi ako, it nenaswei Ala aburi enaruk hunggu lagagwarik, Saulus wolok, Kaisareya lakluk, andoma en o Tarusus lakbagagwa.

<sup>31</sup> Lakbagu lagagwarik, it Ala aburi o Yudeya menda inim, o Nggalileya menda inim, o Samariya menda inim, nadok-kadok ogonivit lagatek iniselok, enendawi ugun dugwit, enendawi hoda agwi, Averiniki en yonggarinipu hegek Enasin Yesus enalon umbutu dugwit, eneyave wisane wigalagwi, ogagagwa.

#### Peterus o Lida o Yope dugwit ogagagi wene

<sup>32</sup> Wigalagu-sigik, at Peterus ako yi awi ndi awi andoma yogonigik lagya dugwit, Ala aburi adik denek o Lida agarwik ako bigisa lagagi. <sup>33</sup> Bigisa lagya lagagirik, andoma dugwit, ap ambi inis Eneas inggis-isok yidugup menda nggilik hegek 8 tahun ogagagi werekma, il hagagi. <sup>34</sup> Higya lagagirik, Peterus en at yugugu dugwit, "Eneas wai. Yesus Keretus en sek okhetarikmu, mondok iri dogomindik, ndalek nogo yiliga menda andi yunggul hedoman o," yiluk, ao yugugu hegek, mondok yagagi. <sup>35</sup> At mondok yagagi ako, it o Lida menda inim, o Saron menda inim, ovok erogo inil hugu lagagwarik, it weyak ogagu lagagwa mbo baluk, Nenasin Yesus ane wogogwa.

<sup>36</sup> Eke, hwa Yesus ane wogogi ambi inis Tabita o Yope welagagi. (Hwa inis andi Yunani enane vaga, Ndorokas.) At hwa ako ap akwa sek adigat ogarit lagya, ininggis dek iniselok yonggarinipu, ogagya lagagi. <sup>37</sup> Ogagya werekma, eyave aup edup agya lagagirik hombagagi. Hambigya lagagimu, nggamo warogo handimen kamar ogorekma hombalogo bagagwa. <sup>38</sup> O Lida en Yope horok atma, "Peterus waga o Lida agarik," yiluk, yugwi it Yesus ane wogogwa enaruk hunggu lagagwarik, at ako hodorigo warupwak yiluk ap mberen yonggo lakbogogwa.

<sup>39</sup> Lakbogogwa yugiri lagu lagagwama, at Peterus inim wagu lagagwarik, wolok handimen kamar ogorek ap nggorakma akoma unggugwa. Akoma it akwa sogwa ako en, "Hwa yi, ninim dugwit, yum ilim inim, weram inim manggatu laga yi hil o," yiluk likugu dugwit, yup yagagwa.

<sup>40</sup> Yup yagusim Peterus en, "Hit ovok erogo wilitalas," yugirigya lagagirik, erambo yunggubaluk, samban ogagagi. Samban okbaluk, at hombagagi ako avikit bikhigya dugwit, "Tabita wai. Mondok iru," yugugu lagagimu, il huvunik ako venggenogo Peterus il higya lagagirik, nggilik ako mondok yagagi. <sup>41</sup> Mondok iri lagagimu, at Peterus ako en inggis vagogo mondok okbagya lagagirik, it akwa sogwa ako inim, it avyarat umbutugwa ako inim, "Omanes," yugeragagi wagu lagagwama, "Iluk aga yi, bikkanes," yugeragagi.

<sup>42</sup> At Peterus hwa iluk erogo mendok okbagagi wene o Yope andoma ovok erogo wigalarit lagya lagagimu, ap akwa wisane enendawi Nenasin Yesus ovaga vangabaluk avyarat umbutugwa. <sup>43</sup> Eke, at Peterus ako, o Yope andoma ap sapi agamut bunggulik sek ogagya lagagi menda inis Simon inim dugwit, ndugwis wisane welagagi.

#### At Peterus Korenelius it mberen ogagagwa wene

**10** O Kaisareya ap enayegen werek menda ambi homago "Italiya menda," yugu lagagwa enasin inis Korenelius o andoma welagagi. <sup>2</sup> At ap ako aburi inim [it weram Yakuri dek menda ovara] ovok erogo Ala enalon umbutu dugwit, Ala wene Musa inim, it navi-navi inim dirup watugwa ako dibaluk ogagu lagagwa. Aren it Yakuri menda wisane erogo enangge dek halok, yonggarinipu, samban adigat ogagya, ogagya lagagi. <sup>3</sup> Ndugwis ambi vaga o howam mo il yam 3 ari wagya hegek, nogo heda abi vaga sigam hagagi. Higya dugwit, Ala yonggo lakbisa wandiga menda malaikat ambi at adema wagya lagagirik, yugugu dugwit, "Korenelius wai."

<sup>4</sup> Yugugu lagagimu, at Korenelius anggela wunggu lagagirik, alon en il vurek yugugu dugwit, "Nasin. Ngarogo yiluk wagen?"

Yugugu lagagimu, at malaikat en "Dek o. Ap akwa ininggidek halok yonggarinipu, samban ogagya, ogasiga ako vaga At Ala il heyakbagagirikmu, endawi hovaga wenggelek agarik. <sup>5</sup> Hovaga wenggelek werekma, yogak ap ambi inis Simon, inis ambi Peterus yagalagwi ako, ap ambi adik inis Simon sapi agamut bunggulogo sek ogasiga menda awi inamut yanggadek amban vaga valekma, it mberen andoma werekma, warupwak yiluk, harwi yonggo o Yope lakbisin," yiluk, abi vaga yugugu hagagi.

<sup>7</sup> At malaikat wene yugogogi ako lagya hegek, at Korenelius ayeloman mberen inim, at aot yegen werek menda Ala wene dibaluk ogasiga ambi inim, "Warupwak o," yiluk, yanggup yugeragagi wagu lagagwama, <sup>8</sup> abi vaga yugogogi wene ovok mbilinogo yugirigya lagagirik, yonggo o Yope lakbogogi.

<sup>9</sup> Lakbogogi ako, nogo yiluk suvaga o Yope horok vanggo yi lagu-sigik, at Peterus ako, o dingga mo il yam 12 vaga samban ogarigiluk, o helep vaga valek viril vaga andoma inggigi. <sup>10</sup> Andoma inggya lagagirik samban ogagya dugwit, erom uvup agya lagagimu, "Nano nami?" imbitya lagagirik, erom isagu-sigik, nogo heda abi vaga hagagi. <sup>11</sup> Abi higyaim, mbogot heyakbaluk yum obak atok venak-venak vakbagu lagagwarik, swa-bagas inim, ndimbu-nggusa inim, mindommbolom inim, ovok erogo yum ndalek vaga bagao ako wen vaga wombaba wagya hagagi. <sup>13</sup> Higya, ane ambi at yugugu dugwit, "Peterus wai. Mondok yiluk, yi ambi warogo namin," yiluk, yugugu aruk hunggigi.

<sup>14</sup> Aruk hunggu lagagirik, "A, Nasin. Nelagwidek menda inim, naup moga yugup hegek inim, an mondok naligadekma naup nanggon." †

<sup>15</sup> Yugugu lagagimu, ambi inim at yugugu dugwit, "Dek o. At Ala en we ugun nunggu dogop bagagi hegek, haren 'Naup moga' yubuk," yiluk, <sup>16</sup> abi henggam vaga higya lagagirik, yum obak ako mbikit mbogot-vaga wolok inggya hagagi.

<sup>17</sup> At Peterus ako, 'Nabi higyi, eyave nggarogongan higyi,' yiluk, endawi ao wengggenguma it Korenelius lakbisa wagagi ako "Simon awi ngga agarik?" yiluk, hemerinit sup mbanggut vaga ari wagu lagagwarik, enane ombok vaga yugu dugwit, <sup>18</sup> "Ap yoma, wai. Ap huru Simon inis Peterus yagalagwi ako, o yoma werek a dek a?"

<sup>19</sup> Yiluk, yugu-sigik, at Peterus ako en, "Nabi andi nggarogo higyi o?" yiluk, endawi ao wengggenguma, Averiniki en at yugugu dugwit, "Simon wai, ap henggam belalhetek wagao wasim agarwik atma, <sup>20</sup> hat mondok yiluk wambigya dogomindik, ap andi anen at lakbisa wagima, [it weram Yakuri dek menda ovara,] hendawi yunggup yegetek hinim elalo."

<sup>21</sup> Yugugu lagagimu, it enadema wambigya lagagirik, yugirigya dugwit, "Belalnetek wagep ako an atma, nggarogo ogarup yiluk, nadema wagep?"

<sup>22</sup> Yugirigya lagagimu, it ako en "Dek o. Ap yegen werek menda enasin Korenelius en, lakbinina waga o. At ako endawi mot Ala alon ombasiga halok, it Yakuri menda ovok erogo at andogon sek yugwi atma, Ala ayonggo malaikat adik denek menda ambi wagya lagarik, at Korenelius ako yugugu dugwit, 'Peterus en wene yukhiri warupwak yiluk yonggo lakbisin o,' yiluk, yugigas. Yugugu lagama yonggo lakbinina wagarikmu belalhetek wendagwi o," yiluk, yugogogwa. <sup>23</sup> Yugugu lagagwama, "Andi halok nunggumanes," yugirigya lagagimu nunggu lagagwarik, inim nogo yogogwa.

Nogo yiluk, iluk agya lagagirik, Peterus it wagagwa ako inim at aswei Yope menda nin maren inim lagagwa. <sup>24</sup> Lagu dugwit, suvaga nogo ambi yiluk o Kaisareya nonggagagwa. At Korenelius ako at owa-aot inim, aswei inim, it wagusawen, homakbaluk inil werekma <sup>25</sup> Peterus o mbumbumu nunggu wagya lagagimu, at Korenelius ako en at adema lagya lagagirik, agayuk wutu dugwit, avema seve yi lagya lagagimu, <sup>26</sup> at Peterus ako en "An ogo un ap atma, mondok iru," yiluk, inggis vagogo mondok okbagagi.

<sup>27</sup> Mondok okbigya lagagirik, it mberen wene mbanggwis umwa nunggu lagagwarik, at Peterus ako ap akwa wisane homago inugu lagagirik, <sup>28</sup> yugirigya dugwit, "Nit Yakuri hit weram Yakuri dek menda

† Naup moga yugup hegek yagagi ako, it Yakuri menda en Musa en yagagi ako vaga swa-bagas, ndimbu-nggusa, mindom-mbolom nin andi naup sek, nin andi naup moga, yugu lagagwa ovara Ala en Peterus yugogogi ako vaga ovok naup andi moga dek yugogogi. (Imamat pasal 11 yokanes.) Eke, it Yakuri menda en ap weram Yakuri dek menda inim dogop andi moga, yugu lagagwa ako, abi yi vaga Ala en 'Inim dogop sek at,' Peterus yugogogi.

ako ninim dambungwis, bikhinisa wagwi, ogarup moga yagalagwi ako henelup ovara, Ala en "It ap akwa weram menda andi, inim avuk arubuk," yup andi moga,' yiluk, yuknigarikmu, <sup>29</sup> an belalnetek wagep ako nanggon yegetek, mbikit at wagi. Nggarogo yiluk, belalnetek wagep?"

<sup>30</sup> Yugugu lagagimu, at Korenelius ako en "Dek o. O inikak howam mo il yam 3 yerogo vaga wane-wane an namwa samban ogagya lagima, nabi higya lagi ako yukhirisogon o. Nabi higya neyagek mbikit supuk erogo ap ambi yum mudu abya amumulip abigal werek an nadema mondok yi wagya lagarik, yuknugu dugwit, <sup>31</sup> 'Korenelius wai. Hat samban ogagen ako Ala aruk hunggu, eke, ap akwa ininggidek menda yonggarinipu lagen ako Ala il heyakbagagya, ogagya lagarikmu, <sup>32</sup> ap Simon inis ambi Peterus ako o Yope werekma, warupwak yiluk, yonggo lakbisin o. At ako ap Simon ap sapi agamut bunggulik sek ogasiga menda awi inamut yanggadek omban vaga valekma, inim andoma agarik o,' yiluk, <sup>33</sup> yuknugu lagama, mbikit yonggo lakbigis yukhiri lagu lagaoma, neya wagenma, naswe wa. Neya wagenma, yogak Hasin Ala en, 'Anderogo yugerano' yukhigas ako ovok yukneranak yiluk, Ala ivaga homagyo o," yiluk, yugogogi.

#### Peterus en yugeragagi wene

<sup>34</sup> Yugugu lagagimu, at Peterus ako en yugirigya dugwit, "Naswei o, At Ala en, ap ambi anggon, eke, ap ambi endawi hunik ombasigadek, andi avyarat imbiti o. <sup>35</sup> Nit yi ap akwa ndi ap akwa ovok en at vaga n-nalon umbutu dugwit, sek adigat ogagu niniselok, At Ala endawi hunik ninombarisiga. <sup>36</sup> Yi ap akwa ndi ap akwa ovok Nenasin ako andi, Yesus Keretus ako, At vaga Ala ninim dambulogo bininaliga o, yiluk, sek wene ako nit Iserali menda nenelup arupwak yiluk, lakba wagagi ako henelup aro. <sup>37</sup> At Yohanes ima wom-babisaup wene yugeregek lagya lagagimu, o Nggalileya en Yudeya yi awi ndi awi ovok oklagagi ako ogo henelup aro. <sup>38</sup> At Ala en Yesus Nasaret menda Averiniki ovaga wombaba wagya dugwit, denogo bugu, anye wogugu, ogagya lagagirik, Ala inim atma, sek ogarit lagya, it madis sile ap akwa enendawima dugwit, molok-molok okbisilin landiga menda ako haryogo wibisa wagya, ogarit lagya lagagi.

<sup>39</sup> Eke, it ap akwa Yakuri enamwa andoma inim, o Yerusalem inim, ogonavit lagya lagagi ako ovok at ninil helok, yukherelagwi o. At Yesus ako yo winik vaga llobalogo watugwa hombagagi ovara, <sup>40</sup> nogo mberen yikbaluk, hutun, Ala en iluk erogo mendok okbagagi ako eyave ninil hapwak yiluk inuk neragagi. <sup>41</sup> It ap akwa ugun inil hapwak yiluk, inuk eregetek. Ata, at iluk akluk mondok iri lagagirik, nit endak denogo bininggigi ako ninim erom nunggwi, is nunggwi, ogagagup ako adigat ninil helok yugurugu dogosogon yiluk, inuk neragagi. <sup>42</sup> Iluk agya lagagimu, 'It iniluk agarwik inim,

hombagagwa inim, enowak dilinivup Ala en denogo mondok okbagagi ako andi Yesus aro, yiluk, des erogo vagalogo yugeregek nagu dogones o,' yukneragagi. <sup>43</sup> It ap *navi-navi* Ala en yugirigya hegek yugu lagagwa ako ovok erogo at avok adigat vaganggu dugwit, 'Henendawi at ovaga vanggabuluk avyarat umbutu hiniselok, At Yesus anye vaga henomaluk dek erogo bigigayogon o,' yiluk, yugurugu lagagwa o," yugeragagi.

**It weram Yakuri dek menda Averiniki wogeragagi wene**

<sup>44</sup> At Peterus ao anderogo yugirigya hegek, it wene hunggugwarikmu ako ovok erogo Averiniki enovaga agagi. <sup>45</sup> Averiniki enovaga agya lagagimu, it ap enagamut mbalek avyarat umbutugwa menda Peterus inim lagagwa ako en, it ap akwa enane unggut adik-adik menda yugwi, Ala inis siyabagwi, ogagagwa ako enaruk hobaluk, it ap weram Yakuri dek menda hegek, Ala en it ogo Averiniki wane-wane wogeraga yiluk, "Wi," yiluk, vok yagagwa.

Vok yugu lagagwarik, at Peterus ako en it yugirigya dugwit, <sup>47</sup> "Ala en Averiniki nit wokneragagi hak it wogeragarikmu, ima wombabisaup andi, moga embetep? <sup>48</sup> Dek o. Yesus Keretus inis vaga ima wombabisenes," yiluk, yugirigya lagagimu, "Ninim ambukum dogomundik lanok o," yiluk, Peterus yugogogwa.

**Peterus en Ala aburi o Yerusalem yugeragagi wene**

**11** It lakbogogi inim, enaswei o Yudeya andoma menda inim, iren ap weram Yakuri dek menda ogo Ala wene welagwi enaruk hunggugwarikmu, <sup>2</sup> at Peterus o Yerusalem inggya lagagimu, it enagamut mbalek menda nin en at Peterus enane weyak yugugu dugwit, <sup>3</sup> "Hat nggarogo yiluk it enagamut mbalek dek menda enamwa isa nunggwigya lagindik, hinim dambulik erom nenggen?" yiluk, yugogogwa.

<sup>4</sup> Enane weyak yugugu lagagwama, at Peterus ako en wene eyave adem oklagagi ako ovok des erogo mbilinogo yugirigya dugwit, <sup>5</sup> "Dek o, nasini. An o kota Yope akoma samban ogagya lagima, nogo heda nabi vaga higya dugwit, yum obak atok venak-venak vakbaluk mbogot-vaga en nadema wombaba wagya nil higi. <sup>6</sup> Nil higya lagirik, swa-bagas inim, ndimbu-nggusa inim, mindom-mbolom inim, ovok erogo yidik higi. <sup>7</sup> Higya lagima, ane yuknugu dugwit, 'Peterus wai. Mondok iri dogomindik, yi ambi warogo namin,' yuknugu naruk hunggis."

<sup>8</sup> "Yuknugu naruk hunggis ovara, 'A, dek o, Nasin. Nelagwi dek menda inim, naup moga yugup hegek inim, an mondok naligadekma, naup nanggon o,' yugugu lagima, <sup>9</sup> mbogot-vaga en ane ambi inim yuknugu dugwit, 'Dek o. At Ala en we ugun nunggu dogop bagagi hegek, haren "Naup moga" yubuk,'

yuknugu higi. <sup>10</sup> Abi henggam vaga higya lagirik, yum obak ako mbogot-vaga wolok inggya higi."

<sup>11</sup> "Wolok inggya higya lagirik, an umwa andoma werekma ap henggam o Kaisareya en an belalnetek lakbisa waga wasim ari wagao inigik, <sup>12</sup> Averiniki en an yuknugu dugwit, 'Hendawi yunggup yegetek, ap andi hinim at elalo,' yuknugu lagama, naswei eneyave 6 yi, ninim lagu lagurik, ap Korenelius amwa nunggwigyo.

<sup>13</sup> Nungguvu lagyoma, at Korenelius ako en wene mbilinogo yuknirigya dugwit, 'Malaikat ambi an namwa nonggagagi mendek werekma nil higya lagi-ma, yuknugu dugwit, "Ap Simon inis ambi salek Peterus ako warupwak yiluk belalit o Yope lakbisin. Lakbisamima yugiri lagu iniselok, wagya dogomindik, <sup>14</sup> hat haburi hinim henagap wendarupwak yiluk, wene yukhera wasogon o," ' yiluk, malaikat en yugigas wene ako Korenelius en an yuknigas."

<sup>15</sup> "Yuknugu lagama, an it yugeragiluk ogagya neyagek, endak Averiniki nenovaga wombabinina wagagi hak, it ogo enovaga wombabisa waga. <sup>16</sup> Wombabisa wagya lagama, Nenasin Yesus en iri dugwit, 'At Yohanes ima wombabugu lagagi ovara, havis anen Averiniki henovaga wombabigiga wasogon,' yagagi wene ako at, nendawi wenggelaga o. <sup>17</sup> Anderogo atma, nenendawi Nenasin Yesus Keretus ovaga vanggabuluk avyarat umbutu lagagupmu, Averiniki we un at wokneragagi hak, it weram Yakuri dek menda ako wogeragarikmu, Ala en ogarup imbitirikmu, an ogarubuk yup meyan atma, mbup yigi o," yiluk, Peterus en enagamut mbalek menda yugeragagi.

<sup>18</sup> Yugirigya ako enaruk hobaluk, it ogo enane dek mbup yagagwa. Mbup yugu lagagwarik, "Andi halok, Ala en it weram Yakuri dek menda ako ogo, it weyak ogwasagwi menda enendawi wenggelogo mbo baluk Yesus ambetaga lagu-selok, mondok iniluk dogop hologo bogogi higyo o," yiluk, Ala siyabagagwa.

**Ala aburi o Andiyokiya ogagu lagagwa wene**

<sup>19</sup> At Sepanus helep vaga watu lagagwarik, it nin inurusogon yiluk anggim-mbanggin ogonivit lagu lagagwama, enugut en hoda sak yagan wunggu lagagwarik, o adumu andoma yanonggegek yagan lagu dugwit, o Venisiya inim, Sipurus inim, Andiyokiya inim, it Yakuri menda adigat wene enaruk hulupwak yiluk, yugeregek nagu lagagwa ovara, <sup>20</sup> it nin o Sipurus menda inim, o Kirene menda inim, o Andiyokiya nungguvu lagagwarik, it ap akwa Yunani menda † ako inim enaruk hulupwak yiluk, Nenasin Yesus sek wene ako yugurugu lagagwa. <sup>21</sup> Nenasin Ala anye okbugu hegek yugurugu lagagwama, ap akwa wisane enendawi hobaluk, avyarat umbutu lagagwarik, Nenasin Yesus ane wugu lagagwa.

† It ap Yunani menda andi ap Yakuri menda dek, it weram menda.

<sup>22</sup> It Ala aburi o Yerusalem homago ako en wene it Yunani menda o Andiyokiya avyarat umbutu lagagwa ako enaruk hunggu lagagwarik, at Mbarenabas o Andiyokiya lakbagagwa. <sup>23</sup> At Mbarenabas ako endawi sek, Yesus ovaga vanggaluluk mondok avyarat imbitigi vaga Averiniki endawima des yagagi atma lakbagagwa. Lakbagagwa lagya lagagirik, At Ala enabwa en okbugu ako il higya lagagirik, endawi adenggen wisane akluk, "Hit henendawi mondok wadok dek dugwit, Nenowa inis ombok Yesus ovaga vanggaluluk dogones o," yiluk, enendawi aik wakbugu lagagi. Enendawi aik wakbugwiam, ambi labok nonggegek adigat ogagu dugwit, Ala aburi wisane agagwa.

<sup>25</sup> Eke, hivis, at Mbarenabas ako en Saulus belaligiluk o Tarusus lagya lagagirik, <sup>26</sup> havedogo o Andiyokiya wolok wagagi. Wolok wagya lagagirik, it mberen tahun ambiat ogagu dugwit, Ala aburi inim homagwi, ap akwa wisane wene mamulirugwi, ogagagwa. It Yesus ane welagwi menda ako, 'Avakwa Kerisen menda' yagalagwi ako andi, endak o Andiyokiya enat yugu lagagwa.

<sup>27</sup> Andoma mamulirugu-sigik, it navi Ala en yugirigya hegek yugerelagwi menda nin o Yerusalem en o Andiyokiya unggugwa. <sup>28</sup> It unggugwa ako ap ambi inis Agabus mendek iri lagagirik, yugirigya dugwit, "It ap yi awi ndi awi o Oroma avema agarwik menda ovok erogo erom uvup wisane arisogon o," yiluk, Averiniki en endawi hologo yugugu hegek, yugeragagi. (Andi arisogon yugeragagi ako andi, at Kaisar Kolauidiyus inis ombok dugwit *wene denggalogo* yugirigya hegek, atma agagi.) <sup>29</sup> Yugeragagi ako erom uvup agya lagagimu, it Yesus ane wogogwa menda o Andiyokiya ako en enendawi hologo bugugu dugwit, "Nit nenadik ninangge agarik bikegek, wonggaluluk, nenaswei Ala aburi o Yudeya agarwik ako enake lakbisasogon o," <sup>30</sup> yiluk, wonggalogo baluk, Mbarenabas Saulus inim lakbugu lagagwama, iren wolok, Ala aburi enasini o Yerusalem ako wogora lagagwa.

### Anggin-mbanggin erogo enarit lagagwa wene

**12** Wogora wagu lagagwarik akoma werekma, ap inis ombok o Yudeya vagago welagagi Herodes ako en it Ala aburi nin edup-mbedup erogo bisagiluk vaginivit lagu dugwit, <sup>2</sup> "At Yohanes owa Yakubus ako, yaga vaga wares," yiluk, yugeragagi ako vaga watu lagagwama, hombagagi. <sup>3</sup> Yakubus watugwa andi vaga it Yakuri enendawi adenggen agya inugu lagagirik, at Peterus ogo, heda marigiluk lakbegegi. (It Erom Roti Virisigadek Menda ako isogo ogagu-sigik ogagagi.) <sup>†4</sup> Lakbisa lagya lagagirik, heda marogo lembaga ma-

† Isogo Pasikainim, Isogo Erom Roti Virisigadek Menda ako inim, saut Maret a, April a, minggu ambiat vaga ogagu lagagwa. Ndugwis endak andi Isogo Pasika, eke ndugwis nin andi Isogo Erom Roti Virisigadek menda ogagu lagagwa. Isogo Pasika ogagu dugwit, wam ndomba eyak warogo nunggu lagagwa, eke Isogo Erom Roti Virisigadek menda ako ogagu dugwit erom roti rahi dek ogarek

baluk, isogo ombok Pasika nelok, selekma avakwa ini-vaga owak dilup imbitya dugwit, it ap enayegen werek menda 4 homago eneyave 4 denek adigat aruwam dogopwak yiluk bogogi.

<sup>5</sup> At Peterus ako lembaga akoma aruwam inigik ovara, it Ala aburi en enendawi hora yiluk, at ake samban adigat ogagu lagagwa.

### Peterus lembaga en wulu wagagi wene

<sup>6</sup> At Herodes en hutun owak diluguluk at Peterus o hup mbusi heda vaga inggis venak-venak mago nogo yugu hegek, it ap enayegen werek menda eneyave mberen venak-venak inigik, it nin sup mbanggut vaga aruwam werekma, <sup>7</sup> Ala yonggo lakbisa wandiga menda malaikat ambi, it kamar ilim akoma werekma, yukdekma mondok yi nunggwigya lagagirik, abya yevedogo bagya lagagirik, ombandu vaga inggis yogovot-yogovot ogagya dugwit, "Peterus wai. Hodorogo mondok iru," yiluk, ao yugugu hegek, inggis mbusi heda vaga mago ako endagen visilogo wombagagi.

<sup>8</sup> Visilogo wambigya lagagimu, malaikat ako en at yugugu dugwit, "Hayum yikidgya, haropato yikhidigya, ogaru," yugugu lagagimu, yikedagagi. Yikhidigya lagagimu, "Sogwes yum weram yikhidigya dogomindik, ninim lasogon yiluk oma," yugogogi.

<sup>9</sup> Yugugu lagagimu, wunggu lagagirik, it mberen lagagwa. At malaikat ako en avyarat okbagya hegek, Peterus endawi en, "Un nabi haliga ai?" embetek it mberen lagagwa. <sup>10</sup> Ilim-weram suwam watu-sigik wulu wagu lagagwarik, o kota nunggwisagwima sogop mbusi vaga larik ako andenam ari lagusigik, endagen hutlagya lagagimu, it ako wunggu lagagwarik, sup atokma ari lagu lagagwarik, at malaikat ako andenam en hekbaluk winggigi.

<sup>11</sup> Wunggu lagagimu, at Peterus ako endawi anggat agya lagagirik, "Wi! yiluk, "It Yakuri menda inim, Herodes ako inim, okbanup embetao ako ovok erogo ao ogagetek inigik, At Ala yonggo lakbisa wandiga menda malaikat ambi lakba wagya lagarik, nagap wendatnetas avyarat higi o," yiluk, imbitigi.

<sup>12</sup> Imbitya lagagirik, at Yohanes inis ambi salek Marakus ako, isa Maria amwa ap akwa wisane homakbaluk, samban ogagusim enadema lagagi. <sup>13</sup> Enadema lagya lagagirik, sogop weram vikit larik ako inggi-vaga suvupuk ogagya lagagimu, hwavyak enayeloman inis Orode en, "Sa wagya lagarik, ogasiga?" yiluk, bika winggigi. <sup>14</sup> Bika wunggu lagagirik, "Peterus ane iri higi," yiluk, endawi adenggen en sogop huthegetek, "Peterus ako wasim agarik o," yiluk, yugera nonggagagi.

<sup>15</sup> Yugera nunggwigya lagagimu, it ako en, "Hwavyak yi nenek hovaga danggup yagarik yagaliga?" yiluk,

nunggu lagagwa. It ogagagwa andi, it enombawi o muk Ala en o Mesir en visilogo wogenombolok wulu wagagi ako inilup dogoguluk adenggen ogagu lagagwa. Keluaran 12:17-20 yokanes. Eke it nin en, inis Isogo Pasika yugu dugwit, adem isogo mberen yi yugu lagagwa. (Wakhegek ambi ayat 4 yokanes.)

yugugu lagagwama, at hwavyak ako en, "Dek o. Avyarat waga higi!" yiluk, ane avuput vaga yugirigya lagagimu, "Andi halok, malaikat ambi at aruwam dogopwak yiluk lakba waga hegen a?"

<sup>16</sup> Yugusigik, at Peterus ako suvupuk hunik adigat ogagya lagagimu, sogop huthugu lagagwama, at eyave at halok, "Wi!" yiluk, vok yagagwa. <sup>17</sup> Vok yugu lagagwama, at ako inggis lap-lap iri dugwit, "Mbauk dogones," yugirigya lagagirik, Asin Ala en lembaga akoma en wolok wulu waga ako mbilinogo yugeragagi. Yugurigya lagagirik, "At Yakubus † inim, nenaswei nin inim, wene andi yugeregek elales," yugirigya lagagirik, hekbisiluk, o adikmu lagagi.

<sup>18</sup> Hutun o yanggo iri lagagimu, it ap yegen werek menda ako en, "Peterus nggarogongan winggas?" yiluk, nane-hane yugu dugwit belalit nagu lagagwa. <sup>19</sup> At Herodes en, "Des erogo belalit elales," yugirigya lagagimu, belalit lagagwa menda, dek halok, we un wagu lagagwama, "Hit nano ogagu hinigik, winggas?" yiluk, yugirigya lagagirik ap en it aruwam welagagwa ako inurupwak yiluk yugeragagi.

#### At Herodes hombangagi wene

Andi okbaluk at Herodes o Yudeya en o Kaisareya lagya lagagirik, andoma welagagi.

<sup>20</sup> Andoma dugwit, it ap akwa o Tirus menda inim, Sidon menda inim, mbet irigya dugwit, inim ogorek welagagwa. Welagagwa ovara, it ako enendawi ambiat agu lagagwarik, Herodes inim dambuluguluk, homari wagu lagagwarik, at Herodes yugiri nungguguluk, ap ambi Herodes eyavup ogasiga menda endawi hunik inis Belatus ako yugogogwa. Yugugu dugwit, "Nit erom nelagwi ako andi, Herodes andok agarikmu, ogorek dogop andi weyak atma, ninim dambuluguluk wagyoma, yuguru," yiluk, yugugu lagagwama, "Eo! Yugirisogon o," yugeragagi.

<sup>21</sup> "Wene andi o yi vaga ogarusogon o," yiluk, iri lagagirik, o andi vaga at Herodes ako yum ap ininis ombok yikedelagwi menda yikhidigya lagagirik, wene amburup mbalisigama akoma hora inggya lagagirik, avakwa andoma wene yugeragagi. <sup>22</sup> Yugurigya lagagimu, it ap akwa ako en, "Wi! Yi ap en yagaliga dek. Madis ane vaga yagaliga," yiluk, enane naik-naik yugu dugwit siyabagagwa. <sup>23</sup> Siyabagu lagagwama, aren Ala siyabagetek, 'An iya neyalok, yagao' yiluk, siyabatiga lagagimu, Ala yonggo lakbisa wandiga menda malaikat ambi mbikit waga lagagirik, warogo bagagi. Warogo bagya lagagimu, wanggo en endawi libinggu-sigik, hombangagi.

<sup>24</sup> Nenasin Ala wene Yesus avok ako ombok at mbigalit lagya hegek, it ap akwa wisane avyarat umbutu dugwit, wugu lagagwa.

<sup>25</sup> Eke, at Mbarenabas Saulus it mberen o Yerusalem ogaruguluk lakbogogwa ako, mondok at ogagu lagagwarik, at Yohanes inis ambi salek Marakus ako wolok eneyami vaga o Andiyokiya lagagwa.

#### Mbarenabas Saulus it mberen lakbogogwa wene

**13** O Andiyokiya andoma it Ala aburi homagu lagagwa enanggelekma it nin en *navi-navi* Ala en yugirigya hegek yugurugwi, nin en wene mamulirugwi, ogagu lagagwa ininis andi, Mbarenabas inim; Simion inis ambi salek 'Mudis' inim; ap awi Kirene menda Lukiyus inim; ap ambi ap inis ombok Herodes ako inim dugwit sawe agagi inis Manahem inim; Saulus inim; it ako enat ogagu lagagwa. <sup>2</sup> It ako erom nenggetek dugwit Nenasin Ala siyabagusigik, †† at Averiniki en yugirigya dugwit, "Mbarenabas Saulus it mberen an neyavup ogagu dogop hologo bogogis ako, ogagu dogopwak yiluk denogo mondok okbisines o," yiluk, yugeragagi.

<sup>3</sup> Yugirigya lagagimu, it ovok erogo erom nenggetek dugwit, inunggul ininggis vakbisiluk, samban okbugu lagagwarik, lakbogogwa.

#### O Sipurus lagagwa wene

<sup>4</sup> It Mbarenabas Saulus it mberen Averiniki en lakbugu lagagimu, o Seleukiya wambugu lagagwarik, andoma en, mburis ombok vaga o is enggema Sipurus andoma lagagwa.

<sup>5</sup> Lagu lagagwarik, o kota Salamis nonggagagwa. Andoma dugwit, it Yakuri samban ogasagwima adigat Ala wene yugeregek nagu lagagwa. Yugeregek nagusim, at Yohanes Marakus ako inim yonggarinigik lagya lagagi.

<sup>6</sup> O is enggema akoma en ambima nonggegek ogarit o Papos nonggagagwa. Nunggugu lagagwarik, ap Yakuri menda ambi inis Mbareyesus madis inis vaga ogagya dugwit, 'An *navi* Ala wene yagaliga menda' yiluk, ane huluk molalit landiga ako inim avuk agagwa.

<sup>7</sup> At aswe andi ap endawi anggat menda inis Seregiyus Paulus, at o is enggema andoma Gubenur welagagi. At ako en Mbarenabas Saulus it mberen Ala wene yuknerapwak yiluk enayonggo bagagi. <sup>8</sup> Enayonggo bagagi ovara, at madis inis vaga ogasiga ako, inis it Yunani enane vaga Elimas, eke, nit nenane vaga 'Madis Inis vaga Ogasiga' yagalagwi ako en, Mbarenabas Saulus inim ogorek dugwit, Ala wene avyarat ombarugwi en yiluk, ap Gubenur ako wene adik menda endawima mabagiluk yugigik adigat ogagagi.

<sup>9</sup> Ap Elimas ako en wene adik menda ap Gubernur endawima yugigik adigat ogagya lagagimu, at Saulus

†† Ap Yakuri menda erom nenggetek ogagu lagagwa ako adem andi yi o: It Ala siyabagwis, Ala en yonggat ninisaupwak en yiluk nggino yugugwis; "Ai nenomaluk yi o," yiluk, Ala yugugwis; ap ambi hambigya halok, ayup yagwis; enendawima ilim en dibaluk, Ai, yiluk, Ala wene mamulhedugwi, samban ogagwi; ogagu dugwit erom nenggetek wulugu lagagwa.

† Yakubus ako Ala aburi o Yerusalem vagago welagagi. At Yesus aot ambetaga menda.



inis ambi salek Paulus ako Averiniki endawima des iri lagagimu, ap Elimas ako il vurek dugwit, <sup>10</sup> "Ee! Hat sile abut yi, hane huluk wisane erogo yugeregek naliga, eke sek ogarup hanggon dugwit weyak ogarup adigat ombasiga andi, hat aro. Hat Ala arup mot ova mbirik ogasiga ako mera hudi mbup yimi?" <sup>11</sup> Yogak hat hil dogop! At Nenasin Ala en angginn hovaga bagasogon! Hil mbuk akluk, o awiya hil hegetek heyagek, ndugwis maren hudi dogogun o," yiluk, ao yugugu hegek, il agut agya lagagirik, hwis agagi. Il hwis agya lagagimu, "An ninggis vakbanupwak o," yiluk, inggirenden ogagagi.

<sup>12</sup> Enowa Gubernur ako en ap il mbuk agagi higya lagagirik, Enasin Yesus wene mamulirugwi andi "Wi" yiluk vok iri dugwit, Yesus Ala abut denek menda avyarat imbitigi.

### O Pisidiya, Andiyokiya lagagwa wene

<sup>13</sup> At Paulus aswei inim o Papos hekbaluk, mburi-vaga nunggugu lagagwarik, inamut ombok *laut* yang-gadek vaga o Pambiliya wunggu lagagwarik, o *kota* Peraga andoma lagagwa. Andoma inigik, at Yohanes Marakus ako it hekbisiluk, o Yerusalem eyami vaga lagagi. <sup>14</sup> O *kota* Peraga andoma en lagagwa, lagagwa, o Pisidiya Andiyokiya † lagu lagagwarik, it Yakuri samban ogasagwi vaga it samban ogasagwima nunggugu lagagwarik hora yagagwa. <sup>15</sup> Hora yiluk werekma, it samban ogasagwima vagago agarwik menda ako en Ala wene yugup Musa en dirup watigi wene †† inim, *navi-navi* wene dirup warek inim, bikegek yugurugu lagagwarik, "Nit nenendawi aik wakbininaup wene ambi werek halok yuknerapwak yiluk, nenaswei andi, hemerisenes o," yiluk, yagagwa. <sup>16</sup> Yagagwa ako hemerininu lagagwama, at Paulus ako mondok iri lagagirik, inggis lap-lap ogagya dugwit "Mbauk dogones," yugeragagi.

Yugirigya lagagirik, "Hit ap Iserali menda inim, hit Yakuri dek menda ovara Ala henalon ombasagwi andi inim, henaruk holek dogwes o, naswei. <sup>17</sup> Nit Iserali menda Nenasin Ala en nenombawi miginipu lagagirik, o Mesir andoma huru hak inigik, ininis unggul ombok arupwak yiluk, enaruwam welagagirik, Ala en anye ombok vaga o andoma en wogonombolok wulu wagagi. <sup>18</sup> O harumu ap akwa dekma akoma 40 tahun ogagu dugwit, enandogon weyak ogarit lagu-sigik ovara, Ala endawi seve yiluk welagagi. <sup>19</sup> Eke, it ap akwa o Kanaan menda ininis unggul 7 ako dek erogo bisiluk, enavoloma at aburi nenombawi ako andok dogopwak yiluk mavorangge hak it enawen mbalogo bogogi. <sup>20</sup> Yakup aburi o Mesir lagagwa hudi en, Ala en

† O inis Andiyokiya mberen werek. Ambi o Siriya (Lakbogogi Wene 11, 13:1-3) ambi o Pisidiya. Aguramolok mbuku Lakbogogi Wene yi atokma andoma yokhanes. †† Ala wene yugup Musa en dirup watigi weneandi Indonesia enane vaga 'Lima Kitab Taurat' yagalagwi.

wogonombolok wulu wagya hegek o Kanaan nonggagagwa hudi andi, ara-dek a 450 tahun ogagagwa.

Ogagu lagagwama, vivis, yi wene ndi wene yugurugu dogopwak yiluk, wene ambi agya halok enowak dilisagwi menda ambi avoloma, ambi mondok okbagek, ogarit lagu dugwit havis atok vaga Ala en yugugu hegek yugirigya lagagi navi Samuel ako at yi wene ndi wene yugirigya dogopwak yiluk, mendok okbagagi. <sup>21</sup> Mendok okbagya lagagimu, vivis, it ap akwa en, 'Nit at avema dogop nenowa inis ombok ambi mondok okbininin o,' yiluk, yugugu lagagwama, At Ala en Kis abut Saul inis unggul Mbenyamin menda ako, mondok okbagya lagagimu, **wene denggalogo** yugirigya hegek, 40 tahun at ogagagi. <sup>22</sup> Eke, at Saul ako hekbaluk, avoloma, 'At Isai abut Daut ako an nendawi ombasiga ndatak, wane-wane ombasiga menda atma, an nendawi ombasiga adigat ogagya dogosogon highi o,' yiluk, enowa inis ombok Daut at mendok okbagagi.

<sup>23</sup> Ala en avyarat nggatak erogo yagagi wane-wane Daut ombawi wigalek ambi vaga en ap akwa Iserali enagap wendarisiga menda, At Yesus at endaklagagi.

<sup>24</sup> At Yesus ako ao warigiluk ogagya hegek, at Yohanes en it Iserali menda ovok erogo yugirigya dugwit, 'Hit henomaluk andi, henendawi wenggebaluk mbo bagu hiniselok, ima wombabigigayogon o,' yiluk, yugirigya lagagi. <sup>25</sup> Yugirigya lagagirik, vivis, at ogagya lagagi ako mondok atok mbup yup agya hegek, at Yohanes en iri dugwit, 'An sa, nombasagwi o? At warup sokhelagwi ako, an dek o. Andi an dek ovara, at an nambetaga warisogon ako, wagya halok, at ap ombok atma, anen arepato nggolalogo baup meyan,' yugirigya lagagi o," Paulus en yugeragagi.

<sup>26</sup> Yugirigya lagagirik, "Naswei. Hit Averaham ombawi inim, hit Yakuri dek ovara Ala henalon ombasagwi menda ogo inim, hit ninim nenagap wendarupwak yiluk, nenake wene yi at lakba wagagi o! <sup>27</sup> Anderogo at ovara, it ap akwa Yerusalem menda enasini ap ombok-ombok inim ako en, 'At Yesus andi, nenagap wendarisiga menda aro,' yiluk, yedok hegetek ovara, ndugurek-ndagarek it Yakuri samban ogasagwi vaga, it ap *navi-navi* wene dirup warek bikegek yagalagwi ako, at warup hobaluk, warogo bagagwa vaga, wene andi atma at agagi. <sup>28</sup> 'At ngga ogaga vaga waruk?' yiluk, adem belanggugwa menda, adem dek at hegek ovara, waruguluk, at Pilatus yugogogwa. <sup>29</sup> Eke, 'Anderogo okbasogon o,' yiluk, yugu lagagwa dirup watugwa ako wane-wane okbagu lagagwama, yo winik vaga lobalogo bagagwa ako visilogo wombaba wagu lagagwarik, hambuguselok wimu mabiselagwima akoma mabagagwa. <sup>30</sup> Wimu mabagagwa ovara, Ala en hambuluk lendagwima en iluk erogo mendok okbagagi. <sup>31</sup> At ao watitek hegek, at inim Nggalileya en Yerusalem lagagwa ako, at mendok okbagya lagagimu, eyave inil neyapwak yiluk inugirigya dugwit, ndugwis wisane welagagi. Eke, it inil hagagwa ako en

yogak nit ap akwa Iserali menda vagalogo yukneregek lendagwi o.

<sup>32</sup> Ala en nit nenombawi avyarat nggatum erogo yugeragagi ako, Yesus hambuluk lendagwima en iluk erogo mendok okbagagi ako vaga, it enombawi nit nenake atma des iri lagagimu, sek wene yi at yukheralagwi. Anderogo atma, At Ala en iri dugwit,

O yogak hat An nabut agya,  
Eke, An hat Hasin agya,  
Ogagyo o,

yiluk, Mbuku Ndawi Wene † pasal 2 vaga dirup watigi.

<sup>34</sup> Ala en 'At hambuluk lendagwima en iluk erogo mondok okbagya neyalok, havis vidis arisogon dek o,' yiluk, iluk erogo mendok okbagagi ako andi, At Ala en iri dugwit,

An sek okbayogon o, yiluk,  
Wene eve adik denek mondok avyarat ombarup menda Daut yugogogis ako, hit at okbigigayogon o, †† yiluk, yagagi. <sup>35</sup> Eke, Daut en ambi inim iri dugwit, Habut Endawi Sek Adigat Denek ako, Eyave hambuluk, vidis agya hawen, hekbayogon dek o, ‡

yiluk, yagagi ako dirup warek agarik.

<sup>36</sup> Ala en at Daut ogagya dogopwak yiluk vulogo bagagi ako, wane-wane at ogagya lagagirik, hombagagi. Hambigya lagagimu, ombawi hombagagwa inim saba lagagwa vidis agagi ovara, <sup>37</sup> At Ala en iluk erogo mendok okbagagi ako andi, vidis agetek. <sup>38</sup> Vidis agetek, iluk at werekma, hit weyak ogasagwi andi, At Yesus vaga Ala en dek erogo bigigaup hinilup arovovok yiluk, yukheraliga o, naswei.

<sup>39</sup> Ala wene yugup Musa en dirup watigi ako vaga nenendawi mot okbininaliga dek. Ata, Yesus ovaga vangabaluk avyarat ombasagwi vaga andi, Ala en nenendawi mot okbininaliga, yiluk, yukheraliga. <sup>40</sup> Anderogo atma, Ala en yugirigya hegek yugurugu lagagwa *navi-navi* ako en yugu dugwit,

Hit Ala weyak-edok erogo belagwi yi,  
Hit agipik yi hudi vaga an ambi okbigigaup ako,  
Hit yukheraup ovara, avyarat ombarusogon dek menda ogarisogon atma,

Hit vok yugu dugwit, mondok dek at arusogon o, yiluk, yugeragagwa ako, hit anderogo at okbugugu hao en, henendawi suwam watu dogones o," yiluk, at Paulus ako en yugeragagi.

<sup>42</sup> Yugirigya lagagimu, Paulus Mbarenabas it mberen it Yakuri samban ogasagwima akoma wunggu-sigik, it ap akwa en, "Wene yukneregep ako, nin havis samban vaga yukneravovok," yiluk, yugurugu lagagwama, wungugwa. <sup>43</sup> It ap akwa samban okbaluk wunggu lagagwarik, it Yakuri menda inim, it weram Yakuri dek

† Mbuku Ndawi Wene 2:2 †† Yesaya 55:3. Eke 1 Tawarikh 17:7-14 yokanes. Ala en Daut yugugu dugwit, "Hat vaga wigalek menda ambi, adigat, mondok-mondok yerogo ogarup, nderogo ogarup, yugirigya dogopwak yiluk, Anen mondok okbayogon o," yiluk, yugogogi. ‡ Mbuku Ndawi Wene 16:10

menda Ala enalon umbutu dugwit Yakuri wene wugu lagagwa inim, wisane erogo Paulus Mbarenabas inim lagu dugwit, "Ala henabwa en Yesus vaga henomaluk dek okbigigiluk henagap wendarisiga ako, henendawi dibaluk, ogarit lagu dogones," yiluk, wene mamulirugwi, enendawi aik wakbugwis, ogagagwa.

<sup>44</sup> Havis samban ogasagwi vaga o kota andoma ap akwa ovok erogo Nenasin Yesus wene huluguluk, homagagwa. <sup>45</sup> Homagwi ako vaga it Yakuri menda inil inigu lagagwarik, "A! Nit nenane hulup ova hera, it enane adigat hulup, nenanggon!" yiluk, enaninis en at Paulus ane iris ako saganggu dugwit, wiyiknom-weyaknom yagagwa.

<sup>46</sup> Wiyiknom-weyaknom yugu-sigik, it Paulus Mbarenabas enalon dek yugurugu dugwit, "Ala wene hit Yakuri menda henendak yukheraup ovara, 'Nit *niniluk dogop* wene andi, waup ndak dek o, yiluk, nenanggon,' yegep atma, hit hekbigiluk, it weram Yakuri dek menda ako at yugeregek nagu dogosogon. <sup>47</sup> Nenasin Ala en iri dugwit,

'Ap akwa enagap wendarogo bisaup wene hologo bogogis ako,

It ap akwa ininis unggul adik-adik o atok-atokma andoma

enangelekma awiya erogo bugu dogonyok yiluk, anenen denogo bagagigis o,' ††

yiluk, yagagi ako, yogak yukneraliga atma, it weram Yakuri dek menda yugeregek lendagwi o," yiluk, yugeragagi.

<sup>48</sup> Yugeragagi ako, it weram Yakuri dek menda ako en enaruk hobaluk, enendawi adenggen wisane umbutu dugwit, "Nenasin Ala wene yi andi, iya!" yiluk, siyabagagwa. Eke, it ap akwa iniluk mondok-mondok dogop denogo bogogi ako en wene andi vaga enendawi vangabaluk Yesus ako avyarat umbutugwa.

<sup>49</sup> Nenasin wene ako, o andoma ovok at wigak yagagi ovara, <sup>50</sup> Paulus Mbarenabas it mberen anggim-banggin okbisapwak yiluk, it Yakuri menda ako en akwa ininis werek menda Ala enalon umbutu lagagwa inim, it o kota andoma menda enasini ap ombok-ombok inim, enendawima mali wagu lagagwama, o andoma en haryogo wibogogwa. <sup>51</sup> Haryogo wibugu lagagwama, it ako en, "Hirenen" yiluk, inisok vaga mupwak hak horogo mbo bisiluk, o Ikoniyum lagagwa. <sup>52</sup> Lagu lagagwama, it o Andiyokiya andoma Yesus ane wogogwa ako, Averiniki enendawima des yi nunggwigya lagagimu, enendawi adenggen wisane agagwa.

#### O Ikoniyum dugwit, ogagu lagagwa wene

**14** O Ikoniyum andoma o Andiyokiya ogagagwa ako wane-wane ogagagwa. Paulus, Mbarenabas ogo, it Yakuri samban ogasagwima nungugugu lagagwarik, wene eve des erogo yugeragagwa vaga it Yakuri menda inim, Yunani menda inim, wisane enendawi

†† Yesaya 49:6

Yesus Ala abut denek menda ako avyarat umbutugwa. <sup>2</sup>Avyarat umbutu lagagwama, it Yakuri nin 'Yesus andi Ala abut dek atma, nenanggon,' umbutugwa ako en it weram Yakuri dek menda ako enaninis okbugu dogo-mundik, Yesus aburi inim ogot larupwak yiluk enendawima mali lagu lagagwama, <sup>3</sup>at Paulus Mbarenabas it mberen andoma ipi erogo dugwit, enalon dek Nenasin Yesus avok vagalogo yugurugu lagagwa. Eke, vagalogo yugurugu dugwit, Ala enabwa en okbisaliga wene avyarat ombarupwak yiluk, Paulus Mbarenabas it mberen Ala anye wogoragagi vaga, enelup arup enalon werek menda ogagwi, nggarogo ogarubuk menda ogagwi, ogagu lagagwa. <sup>4</sup>It o kota andoma menda ako ogot lagu dugwit, it nin Yakuri enane wugwi, eke, it nin lakbogogi ako enane wugwi, ogagagwa.

<sup>5</sup>Ogagu dugwit, it weram Yakuri dek menda ako inim, it ap Yakuri menda inim, it enasini ap ombok-ombok inim, enendawi ambiat okbaluk, Paulus Mbarenabas it mberen nadok-hadok erogo helep vaga inurusogon yiluk, hologo bagagwa. <sup>6</sup>Hologo bagagwa ovara, it okbisaup hologo bagagwa wene ako Paulus Mbarenabas it mberen enaruk hobaluk, hoda o Lika-woniya lagu lagagwarik, o kota Lisera inim, o kota Nderebe inim, o andoma avilis ambot yanonggegek lagu dugwit, <sup>7</sup>sek wene andoma yugeregek lagu lagagwa.

#### O Lisera, Nderebe dugwit, ogagagwa wene

<sup>8</sup>O Lisera andoma ap ambi isok weyak endaklagagirikmu, isok anye dek en sup mondok lagatek welagagi. <sup>9</sup>Ap ako at Paulus wene yugirigya aruk hunggiyam, Paulus en il vurek dugwit, "Ap yi Ala ova vangabaluk avyarat imbitya dugwit sek okbanup ombasiga," yedok higya lagagirik, <sup>10</sup>at yugugu dugwit, "Hisok ngges erogo mondok iru," yiluk, ane ombok vaga yugugu lagagimu, at ako soklok erogo mondok iri lagagirik, sup lagagi.

<sup>11</sup>At Paulus ogagagi ako, it ap akwa homagagwa ako inil hugu lagagwarik, it Likawoniya enane vaga, "Madis ap ova hak agu lagaruk, ninisa wambu wagao o," yiluk, enamitmit yagagwa. <sup>12</sup>Enamitmit yugu lagagwarik, enomadis inis ako at Mbarenabas inis Seus sanggwis, eke, Paulus wene wisane yagaliga menda halok, inis Heremes sanggwis, ogagagwa.

<sup>13</sup>Ogagu lagagwama, ap madis Seus moga awi valek o kota weram vikit vagago welagagi ako en, "Ap akwa ninim en it lakbogogi ako enanggom warogo wogorasogon o," yiluk, sapi nggulok inim, mbungga mudimudu mendago inim, sup o kota nunggwisagwima andenam wolok wagagi. <sup>14</sup>"Wogoraguluk ogasagwi" ako it lakbogogi Mbarenabas Paulus it mberen enaruk hunggu lagagwarik, enasum yirik libilogo baluk, ap wisane homarek werekma vupuk nunggu lagagwarik, enane ombok vaga yugurugu dugwit, <sup>15</sup>"Avyak wai. Nit eve ap at, hit ndatak atma, hit nggarogo yiluk

yerogo ogasagwi? Hit yi ogagek ndi ogagek enam warogo ogwasagwi menda yi, mbo baluk, at mbogot inim, wen inim, inamut yanggadek inim, yi menda ndi menda ovok Ala iluk agarik ako en bagagi at awene wavovok yiluk, sek wene wolok yukhera wagygo hegek ovara, ogasagwi o.

<sup>16</sup>O muk en, yogak yi hudi vaga yi ap akwa ndi ap akwa enendawi ombakluk ogarit lagu-sigik, Ala en hekbisaliga ovara, <sup>17</sup>at ako yedok havovok yiluk, okbigigaliga. Henabwa en sek okbugugu dugwit, mbogot-vaga en musu wokhirigya, yi menda ndi menda enggen yupwak yiluk, ogagya, erom wisane erogo wokhirigya, henendawi adenggen okbugugu, ogasiga o," yiluk, <sup>18</sup>enane anderogo yugeragagwa ovara, hegek, enanggom warogo wogeraguluk ogagagwa menda, moga hunik adigat yugurugu lagagwama, hetbagagwa.

<sup>19</sup>Yugu lagagwama, it ap Yakuri menda o Andiyokiya inim, o Ikonyum inim, wagu lagagwarik, nit ninim aruguluk, ap akwa enendawima manggu lagagwama, Paulus helep vaga wakbagu lagagwarik, "Mondok hombagas," yiluk, nggigilogo o kota weram vikit mbo ha wunggugwa. <sup>20</sup>Mbo ha wunggu lagagwama, it Yesus ane wogogwa ako en at eyave ilim hegek, walinbaluk welagagwama mondok iri lagagirik, o kota akoma nonggagagi. Nunggwigya lagagirik, nogo yiluk, hutun Mbarenabas im o Nderebe lagagwa.

#### Eneyami vaga o Andiyokiya lagagwa wene

<sup>21</sup>Ap akwa o kota Nderebe andoma sek wene yugeragagwa vaga ap akwa wisane avyarat ombakluk Yesus ane wogogwa. Wugu lagagwama, eneyami vaga lagu dugwit, o Lisera nungugwi, Ikonyum nungugwi, ogarit o Andiyokiya nonggagagwa. <sup>22</sup>O akoma yanonggegek lagu dugwit, "At Nenowa Inis Ombok Ala en denogo bagagi ako avema nunggup andi, angginmbanggin wisane nenovaga ari wagya hegek nunggu-sogon," yiluk, it Yesus ane wogogwa ako, enendawi hoda okbugwis, "Wene avyarat embetep ako hekbaup moga o. Ata, henendawi wadok dek okbaluk dogones," yiluk, mbilape yugurugwi, ogarit lagagwa.

<sup>23</sup>Ap akwa Ala wene homarisagwima adik-adik akoma enasini dogopwak yiluk, Paulus Mbarenabas it mberen en ap denogo mondok okbugu lagagwarik, erom nenggetek samban ogagu dugwit, "Nenasin o. It ap yi, enendawi hovaga vangabaluk avyarat embetao atma, ogarit lagu-sigik, des erogo enengge dogenyok," yiluk, enake samban ogagagwa.

<sup>24</sup>Enake samban okbaluk, o Pisidiya nonggegek, o Pambiliya nonggagagwa. <sup>25</sup>O kota Peraga akoma wene yugurugu lagagwarik, o Ataliya wombagagwa. <sup>26</sup>Andoma en mburi-vaga o Andiyokiya nonggagagwa. "Ala eyavup ogarit lavovok yiluk, Ala henabwa en okbugugu dogosogon o," yiluk, lakbogogwa ako ogarit lagu lagagwarik, mondok nggabup erogo okbaluk, lakbogogwarikmu akoma at wagagwa.

<sup>27</sup> O Andiyokiya nunggu wagu lagagwarik, Ala aburi ako homakbisiluk, Ala okbugu hegek ogonivit lagu lagagwa ako inim, eke, Ala en it weram Yakuri dek menda Nenasin Yesus ane avyarat ombarupwak yiluk, sup hurogo bogogi ako inim, wene mbilinogo yugurugu lagagwarik, <sup>28</sup> it o Andiyokiya Yesus ane wogogwa menda ako inim dugwit, ndugwis wisane welagagwa.

#### Yerusalem homagagwa wene

**15** Akoma werekma, ap ambetap o Yudeya en o Andiyokiya ungu lagagwarik, nenaswei Ala aburi andoma mamulurugu dugwit, "At Musa en, Ap enagamut mbalup wene yukneragagi ako andi, wane-wane hit okbigitek halok, henagap wendarisogon dek," yiluk, mamulurugu lagagwama, <sup>2</sup> it Paulus Mbarenabas ako en, it Yudeya en unggugwa ako inim wenemuk ombok erogo onngo-onggo yagagwa. Yugu lagagwama it mberen inim, it Andiyokiya menda avyarat umbutugwa ambetap inim, denogo bisiluk, yugurugu dugwit, "Hit Yerusalem lagu dogomundik, it lakbogogi ako inim, Ala aburi enasini ako inim, wene andi hinim mbali lales," yiluk yugeragagwa.

<sup>3</sup> Yugurugu lagagwarik, it Ala aburi andoma homago ako en lakbugu lagagwama, o Venisiya, Samariya inim, ya nonggegek lagu dugwit, it weram Yakuri dek menda enomaluk mbo baluk Ala wene wogogwa ako, mbilinogo yugeregek lagu dugwit, nenaswei Ala aburi andoma agarwik ako enendawi adenggen wisane okbogogwa. <sup>4</sup> Okbisilit it ako o Yerusalem nunggugu lagagwama, it Ala aburi o Yerusalem homago inim, it lakbogogi inim, it Ala aburi enasini inim, ako en heyaga wakbugu lagagwama, "Ala en okbininggu hegek anderogo at ogagy," yiluk, ovok erogo mbilinogo yugeragagwa.

<sup>5</sup> Mbilinogo yugeragagwa ovara, it Parisi menda Yesus Ala abut denek menda avyarat umbutugwa nin ako en mendok yugu lagagwarik, "Dek o. It weram menda ogo, enagamut mbabaluk, Ala wene yugup Musa dirup watigi ako ogagu dogopwak yiluk yuger-aup," yiluk, yugeragagwa.

<sup>6</sup> Yugurugu lagagwama, it lakbogogi inim, it Ala aburi enasini inim, wene andi mbaluguluk, homagagwa. <sup>7</sup> Wene ako wisane erogo mbanggugwarikmu, at Peterus mendek iri lagagirik, yugirigya dugwit, "Naswei. O muk erogo Ala en, it weram Yakuri dek menda sek wene hobaluk avyarat ombarupwak en yiluk, yugeregek lagya dogogiluk, denogo baninggigi ako henelup o. <sup>8</sup> Ap akwa enendawi Ala ovok elup atma, it ap weram menda ogo, Averiniki nit wokneragagi ako hak, it wogeragagi. Andi vaga, Ala en it ap weram Yakuri dek menda at aburi okbigas ako yedok helagwi. <sup>9</sup> Ala en, it yi iya, it andi meyan, nenombasigadek, nit ovok ndatak nenombasiga atma, irogo, enendawi Yesus avyarat ombasagwi vaga enomaluk dek erogo bisaliga.

<sup>10</sup> Anderogo atma, nit ninim, nenasini-nenombawi inim, Musa wene anggin nenovaga durik hegek ogarup mondok meyan hugu lagagup ako, hit yogak nggarogo yiluk wene andi, it Yesus ane welagwi menda anggin enovaga durogo bisiluk, Ala nggarogo okbugu hamwi? yiluk, avut mbaluguluk yagalagwi? <sup>11</sup> Enagap wendarup andi, anderogo dek! Nit Nenasin Yesus nenabwa en okbininaliga andi vaga, nit avyarat umbutu niniselok, nenagap wendaknininivisiga hak, it anderogo avyarat umbutu-selok, enagap wendaginivisiga, yiluk, avyarat ombasagwi o," yugeragagi.

<sup>12</sup> Yugirigya lagagimu, it ap homagagwa ako ovok enane dek mbup yugu lagagwarik, enaruk hunggusigik, Mbarenabas Paulus en yugurugu dugwit, Ala en okbugu hegek, it weram Yakuri dek menda ova, enanggelekma enelup arup enalon werek menda ogagwi, nggarogo ogarubuk menda ogagwi, ogagagwa wene mbilinogo yugeragagwa. <sup>13</sup> Wene andi, enaruk hunggu lagagwarik, Yakubus en it lakbogogi menda inim, it Ala aburi enasini inim, yugirigya dugwit, "Nowa-nasin. An nane yukheraliga yi, henaruk holes. <sup>14</sup> Ala en endak it ap akwa weram Yakuri dek menda enanggelekma en nin At aburi denek belalogo miginipigi wene ako Simon en mbilinogo yukneraga.

<sup>15</sup> Wene Simon yukneraga andi, it *navi-navi* Ala yugirigya hegek yagagwa en dirup watugwa ako wane-wane at yukneraga o. Dirup watugwa ako andi ambi yi:

<sup>16</sup> Eke, havis an waga dogomindik,

It Iserali agako higirek, avakwa enanggelekma agarwik ako inim,

Eke, it ap akwa weram Yakuri dek menda An naburi denek dogopwak yiluk yanggup yugeragagis ovok erogo inim, it ako en

Enasin Ala An namusek wagu dogopwak yiluk, Daut awi valek masalagagi ako † avoloma vanggya, O danggop avoloma vanggya dugwit, endak valek welagagi hak ogarogo bagya,

Ogarisogon.

At anderogo ogasiga menda o muk yagagi ako Henasin Ala enat yagagima, yukheraliga o, †† yiluk, yugeragagi wene dirup watugwa atma, yukheraliga.

<sup>19</sup> Yakubus en ambi yugirigya dugwit, "Dirup anderogo watugwarikmu, an ombasiga andi, it weram Yakuri dek menda enendawi wenggebaluk Ala wene welagwi ako, enendawi anggin erogo okbisaup dek ovara, <sup>20</sup> nit un surat vaga dirup watu dugwit, 'Wam madis anggom warek naup moga. Wanggi waup moga. Yi menda ndi menda honak warek amuya winggitek halok naup moga. Amuya naup moga,' yiluk, dirup

† Adem Daut awi valek masalagagi akoandi, at Daut inis ombok werek hegek, it avakwa Iserali menda at avema sek welagagwa ovara, Daut hambigya hegek ap ambi vivis avoloma mondok iri hegek adik-adik sak yagagwa. Andi vaga, o danggop agagi halok, it navi-navi en wene wakhegek Daut awi valek masalagagi yagagwa.

†† Amos 9:11-12

warogo wogorasogom o.<sup>21</sup> Musa wene ako † o muk endak en yogwak yi hudi yi awi ndi awi ndugerek-ndagarek Yakuri samban ogasagwi vaga it samban ogasagwima bikegek yugerelagwi atma, dirup andero-go warogo wogeraup sek ombasiga,” yiluk, yugeragagi.

#### Ap akwa weram Yakuri dek menda enake dirup watugwa wene

<sup>22</sup> Yugirigya lagagimu, it lakbogogi inim, it Ala aburi enasini inim, Ala aburi andoma homagu lagagwa ovok erogo inim, “Paulus Mbarenabas it mberen nit yoma menda inim denogo o Andiyokiya lakbisasogom o,” yiluk, Ala aburi enasini ap ombok-ombok ambi Yudas, inis ambi Mbarenabas inim, ap ambi Silas inim, denogo bogogwa.<sup>23</sup> Denogo bisiluk, dirup watu dugwit,

“Nenaswei wa.

Henaswei nit Yesus en lakbininggigi inim, Ala aburi enasini inim, ako en nenaswei hit Yakuri dek menda avyarat ombasagwi o Andiyokiya, Siriya inim, o Kilikiya inim, hit andoma agipik ovok erogo wa yukherelagwi o.

<sup>24</sup> It nin ninim welagagup ako, niren yugeregetek hegek, henadema wagu lagarwik, yukhurugu dugwit, “At Musa en, Ap enagamut mbalup wene yukneragagi ako andi, wane-wane hit okbigitek halok, henagap wendarisogon dek,” yiluk, yukheragao ako vaga, henendawi weyak okbugugu lagaoma, henendawi anggin agipik ako, nenaruk hunggup.<sup>25</sup> Nenaruk hunggurikmu, yogak nit homagu dugwit nenendawi ambi at okbaluk, ap ambetap denogo bisiluk henadema lak bigiga wendagwi. It ako nenaswei nenendawi hunik Paulus Mbarenabas ako, Nenowa Yesus Keretus ake yiluk enalon dek hambup sek at umbutu dugwit Ala wene yugeregek nelagwi menda inim lakbisa wendagwi.<sup>27</sup> Anderogoma, it ap Yudas Silas en dirup warek yi wane-wane mbilinogo yukheramwak yiluk wolok lakbigiga wendagwi.<sup>28</sup> Averiniki ninim en hit ogagu dogop imbitito ako andi, nit Yakuri nenombawi ogagu lagagwa mamulik menda ako anggin menda ambi inim henovaga durogo bigigitek, we un, ogarup menda halok adigat ogagu dogop imbitito ako yi aro:  
<sup>29</sup> Madis anggom warek nungwi, amuya nungwi, yi menda ndi menda honak warek amuya winggitek halok, ugun nungwi, wanggi wugwi, ogasagwi ako, mondok ogarubuk. Mondok ogagatek halok andi, hit mondok sek at ogagu dogosogon o.

Wene andi at yukhirigyo o, nenaswei wa.”

yiluk, dirup warogo, it ap 4 ako inim lakbogogwa.

<sup>30</sup> Lakbugu lagagwama, o Andiyokiya nungugu lagagwarik, it Ala aburi andoma ako homakbisiluk, dirup warek andi wogeragagwa.<sup>31</sup> Wogurugu lagagwama,

bikugu dugwit, wene enendawi aik warogo dirup warek hugu lagagwarik, enendawi adenggen wisane agagwa.<sup>32</sup> It Yudas Silas ogo, *navi-navi* Ala en yugirigya hegek yagalagwi menda atma, it enaswei Ala aburi andoma ako yi wene ndi wene wisane yugurugu dugwit, enendawi aik wakbugwis, enendawi hoda okbugwis, ogagagwa.<sup>33</sup> Andoma maren hudi welagagwarik, it enaswei Ala aburi andoma en “Yogo, hit sek erogo elalo,” yiluk, it Ala aburi enasini lakbisa wagagwa ako enadema eneyami vaga lakbogogwa. [ <sup>34</sup> Lakbogogwa ako wagagwa ovara, at Silas andi, “Mbup yisogon,” yiluk, andoma at mbup yagagi.] ††

<sup>35</sup> It Paulus Mbarenabas it mberen o hunogoma lagetek, o Andiyokiya andoma dugwit, it inim, ap nin wisane inim, Nenasin Yesus ogagya lagagi wene ako mamulirugwi, yugurugwi, ogagu lagagwa.

#### Paulus Mbarenabas it mberen ogot-hedagagwa wene

<sup>36</sup> Akoma welagagwarik, hewis Paulus en Mbarenabas yugugu dugwit, “Yi awi ndi awi Nenasin Yesus wene ako yugeregek nagu lagagurikmu akoma, nenaswei Ala aburi ako, Nggarogo agarwik inisamwi? yiluk, biginigik lasogom o,” yiluk, yugogogi.<sup>37</sup> Yugugu lagagimu, at Mbarenabas en, Yohanes inis ambi salek Marakus ako ninim lasogom, yagagi ovara,<sup>38</sup> Paulus en, “At ninim laup meyan,” yiluk, yugugu dugwit, “Nit o Pambiliya dugwit, ninim wene yugeregek laup ovara hekbiniluk winggirikmu, † yogak ninim laup dek,” yugogogi.

<sup>39</sup> Yugugu lagagimu, it wenemuk yugu lagagwarik, it mberen ogot-hidugu lagagwarik, at Mbarenabas en Marakus wolok mburi-vaga o Sipurus lagagwa.<sup>40</sup> Eke, at Paulus ako andi, Silas migitu lagagimu, it nenaswei Ala aburi en, “Nenasin Ala henabwa ombasigama, hinim lasogon,” yiluk, yugurugu lagagwama, lagu lagagwarik,<sup>41</sup> o Siriya inim, Kilikiya inim, yi awi ndi awi ya nonggegek nagu dugwit, at Paulus ako en it Ala aburi homago ako enendawi wadok dek dogopwak yiluk, yugeregek nagu lagagi.

#### Timotius ako Paulus Silas inim lagagwa wene

**16** Yugeregek nagu dugwit, o Nderebe lagya lagagirik, o Lisera lagagi. O Lisera andoma ap ambi Yesus ane wogogi inis Timotius. At isa andi, Yakuri menda ovara, avyarat imbitigi, eke, asin andi, Yunani menda.<sup>2</sup> It nenaswei Ala aburi o Lisera menda inim, o Ikonyum menda inim, Timotius andi endawi sagain hugu lagagwarikmu,<sup>3</sup> Paulus en, “Timotius nit mberen nagu dogosogon,” imbitiya lagagirik, it Yakuri o andoma menda ovok erogo Timotius asin andi, ap Yunani menda enelup atma, Paulus en agamut mbalupwak yiluk yugeragagi.

†† Ala wene Bahasa Yunani mondok endak menda ayat 34 yi dek. It ap Ala wene inilup menda en “Ayat 34 ako andi ap Lukas ako dirup watitek. Ap adik en hewis dirup watigi,” yiluk, yagalagwi. † Lakbogogi Wene 13:13 bikanes.

† Imamat 17:10-18:30

<sup>4</sup> It Paulus Timotius it mberen yi awi ndi awi o kota adik-adik nagu dugwit, wene o Yerusalem it lakbogogi inim, Ala aburi enasini inim, o Yerusalem nggatuk erogo mbanggugwa ako, it dibaluk ogagu dogopwak yiluk yugeregek nagu lagagwa. <sup>5</sup> Anderogo yugeregek nagu lagagwa vaga, it Ala aburi o adik-adik homagu lagagwa andoma it Yesus avyarat ombasagwi ako enendawi wadok dek agya lagagimu, ndugerek-nda-garek ambi labok, ambi labok, ogagu dugwit, Ala aburi wisane agagwa.

#### O Terowas en Paulus abi hagagi wene

<sup>6</sup> Eke, at Averiniki en, "O Asia andoma Ala wene yugeregek labuk," yugirigya lagagimu, Paulus eya-ganggom inim lagwi ako, o Virigiya en o Nggalatiya nagu lagagwarik, <sup>7</sup> o Misiya nunguguluk hudi mbalekma vanggo yi lagu lagagwarik, o Mbitiniya nunguguluk ogagagwa menda, At Yesus Averiniki en, "Nunggup," yugeregetekma, <sup>8</sup> o Misiya hegek mbikit o Terowas nonggagagwa. <sup>9</sup> O Terowas nungugu lagagwarik, andoma nogo yugu dugwit, at Paulus abi vaga ap Makedoniya menda ambi mendek dugwit, "Nit yonggatnisanok yiluk, o Makedoniya yoma oma," yiluk, nggino yugugu hagagi. <sup>10</sup> Higya lagagirik, "Ala en nit sek wene ap Makedoniya menda yugeregek lagu-luk, ninayonggo bagas higyo," yiluk, Paulus, Silas, Timotiyus, an Lukas ninim, nit mbikit laguluk vipuk ogagap.

#### O Pilipi hwa Lidiya avyarat imbitigi wene

<sup>11</sup> O Terowas en mburi vaga nungugu lagagurik, mbikit o Samotarake wunggu lagagurik, hutun en, o Neyapolis lagagap. <sup>12</sup> Lagu lagagurik, o Makedoniya kota eve iya inis Pilipi, it ap Oroma menda en vagago welagagwarikmu akoma, nungugu lagagurik, andoma dugwit, ndugwis maren hudi welagagap.

<sup>13</sup> It Yakuri samban ogasagwi vaga o kota sup nunguwisagwima en wunggu lagagurik, "Is amban vaga samban ogasagwima andoma werek," yiluk, lagu lagagurik, itakwa homago werekma ninim hora yiluk, wene yugeragap. <sup>14</sup> Yugeragap hunggugwarikmu ako, hwa o kota Tiyatira menda ambi yum mudu heda ndimbup-ndimbup enggen hak sek adigat onngo hundutu lagagi menda inis Lidiya ako en Ala inis siyabaligama, at Paulus yugeragagi wene ako wapwak yiluk Nenasin Ala en endawi sup hurugo bagagi. Endawi sup hurugo bagagi vaga wene wigya lagagimu, <sup>15</sup> hwa ako at amwa agarwik menda inim ima wombabogogi. Ima wombabugu lagagimu, at hwa ako en, "Hiren, Hwa yi, Nenasin Yesus avyarat embetas o, nembetep halok, an namwa ninim dogoguluk omanes," yiluk, hunik adigat yuknirigya lagagimu, "E o," yiluk, amwa nonggagap.

#### O Pilipi en heda magago mabogogwa wene

<sup>16</sup> Ndugwis ambi vaga samban ogasagwima lagusim, hwavyak ap enayeloman ambi madis endawima nonggagagirikmu, madis inis vaga wene enunggut vivis arup menda yugirigya halok yoparip wisane erogo lugurogo asini wogoraligama, suvaga ninim avuk agu lagagurik, lagusim, <sup>17</sup> hwavyak ako en, "At Siyalek Adigat Agarik Ala ayeloman henagap wendarup wene yukhera wendagwi yi, yogisenes o," yiluk, hwidyak hunik yagan Paulus ninim nenambetaga wagagi. <sup>18</sup> Anderogo adigat iri hegek, ndugwis wisane ogagya lagagimu, ndugwis ambi vaga at Paulus anggon imbitiya lagagirik, hwavyak avikit elose nomalogo madis ako yugugu dugwit, "Yesus Keretus inis vaga hwavyak yi endawima en wilinyok yiluk, yukhisiga," ao yugugu hegek, madis ako nggigilogo winggigi.

<sup>19</sup> Wunggu lagagimu, hwavyak ako asini en, "Ai! Yoparip lugurogo woknirigya dogop nenape wenggelek agurik ako dek aga o," umbutu lagagwarik, at Paulus Silas it mberen vakbisiluk, liginiviluk, o pasar hunisagwima ambi agya halok wene mbalisagwima akoma enasini ap ombok-ombok enadema bisa lagagwa. <sup>20</sup> It enasini ap ombok-ombok o kota andok ako enadema bisa lagu lagagwarik, yugurugu dugwit, "Nit ap Oroma menda en ogagu dogop moga yugup hegek, ap Yakuri yi, it ogwasagwi menda mamulnirugu dugwit, nit nenawi o kota yoma nadok-kadok erogo bagwi inigup," yiluk, yugeragagwa. <sup>22</sup> Yugurugu lagagwarik, ap apik homarek mondok yugu dugwit, inurusogon yiluk ogagu lagagwama, enasini ap ombok-ombok o kota vagogo ako en, "Enasum yirik andi libilogo bisiluk, yo enares," yugeragagwa. <sup>23</sup> Yugurugu lagagwama, yo sagalogo initu lagagwarik, nggigilogo o heda marogo mabiselagwima mabugu lagagwarik, ap enaruwam welagagi ako, "Mondok des erogo enaruwam watya dogwen," yiluk, yugogogwa. <sup>24</sup> Yugogogwa ako hobaluk, o kamar ogorek o ilim akma andoma mabugu lagagirik, inisok yo vaga silup okbisiluk sovalogo bogogi.

bogogi.

<sup>25</sup> Sovalogo bogogi andoma welagagwa ovara, o hup agako vaga it nin heda mago andoma enaruk hunggusigik, it Paulus Silas it mberen samban ogagwi, Ala inis siyabagu dugwit ndawi watwis, ogagusim, <sup>26</sup> mbikit supuk erogo o wadok ombok iri dugwit, o valek heda marogo mabiselagwima akoma o owak ngguvulik ovok wadok yagagi. Iri lagagimu mbikit sogop ovok erogo hut lagya, mbusi heda mago ovok erogo visilogo lagya, ogagagi. <sup>27</sup> Ogagya lagagimu, at ap heda mago enaruwam welagagi ako en iluk akluk, heda marogo mabiselagwima sogop hutlagagi il higya lagagirik, "It heda mago ako mondok winggyao higi," imbitiya lagagirik, yaga varam nggigis erogo wakedagiluk ogagyama, <sup>28</sup> at Paulus en, "Nasin! Hat wakedabuk! Nit

ovok erogo yoma agurik," yiluk, ane ombok vaga yugogogi.

<sup>29</sup> Yugugu lagagimu, at heda mago enaruwam welagagi ako en, "Yunda yividiluk wolok omanes," yugirigya lagagirik, alon en owak dede yagan vupuk Paulus Silas it mberen enavema hora yi lagagi. <sup>30</sup> Hora yi lagya lagagirik, it mberen wogonombolok weram wibugu lagagirik, "Ai nasini, an nagap wendak-hedagiluk, nggarogo ogarik?"

<sup>31</sup> Yugirigya lagagimu, it ako en, "Dek o. Hendawi Nenasin Yesus ovaga vanggabaluk avyarat imbitya heyalok, hat hinim, hat hamwa agipik inim, henagap wendarisogon o," yugogogwa. <sup>32</sup> Yugugu lagagwarik, at inim, it ap akwa at amwa agarwik inim, it ovok erogo Ala wene yugeragagwa. <sup>33</sup> O hup andi vaga at heda mago enaruwam welagagi ako en it wogonombolok lagya lagagirik, heda mago dugwit enagamut mbalarit lagagi ako horinipu lagagimu, at inim, at amwa agarwik inim, ima wombabogogwa. <sup>34</sup> Ima wombabugu lagagwama, wogonombolok at amwa nunggugu lagagwarik erom wogoragagi. At inim, at aburi inim, enendawi Ala ovaga vanggabaluk avyarat umbutugwa vaga enendawi adenggen wisane agagwa.

<sup>35</sup> O yanggo iri lagagimu, it enasini ap ombok-ombok o kota andok ako en, "Ap heda mago enaruwam agarik en it ap mberen heda marek ako heda visilogo wibisapwak yiluk, yugiri elales," yiluk, it inarwi yegen werek menda lakbisa lagagwa.

<sup>36</sup> Lakbisa lagagwa yugiri lagu lagagwama, ap heda marek mabiselagwima aruwam welagagi en Paulus yugugu dugwit, "Nasini o kota vagogo agarwik ako en hit mberen heda visilogo wibisaup, yagao, yukniri wagaoma, wunggu dogomundik, henendawi ugun at elales o."

<sup>37</sup> Yugeragagi ovara, at Paulus en it yegen werek menda yugirigya dugwit, "Dek o. Nit Oroma menda arovara, † adem sek erogo yenaga wokbaluk nenowak dinggitek dugwit, ombok vaga yo yawi nenakbaluk lembaga mabininggaoma, nit yogak yonggo yegetek mbauk erogo wibininaup yiluk yagaoma, yagalagwi yi? Dek! It enadigat en nit woknenombolok wulupwak yiluk warupwak."

<sup>38</sup> Yugeragagi ako, it yegen werek menda en it o kota vagogo agarwik enasini ap ombok-ombok ako enadema lagu lagagwarik, "Paulus Silas ako it Oroma menda hegek oginivup," yugeragagwa ako enaruk hunggu lagagwarik, "Nit ogagyo wi," yiluk, enalon agagwa.

<sup>39</sup> Enalon agu dugwit, it ako enadema wagu lagagwarik, "Ai, nenaswei! Weyak okbugugup atma," yiluk, it ako lembaga en mo bisa lagu lagagwarik, "O kota

yoma dogop dek. Elales o," yugurugu lagagwama, <sup>40</sup> akoma en, wulu wagu lagagwarik, hwa Lidiya amwa akoma nonggagagwa. Nunggugu lagagwarik, andoma enaswei nin inim dambunggu lagagwarik, enendawi aik wakbisiluk, lagagwa.

### O Setalonika dugwit, ogagagwa wene

**17** Lagu lagagwarik, o Ambipolis nunggugwi, Apoloniya nunggugwi, ogarit o Setalonika nonggagagwa. Nunggugu lagagwarik, it Yakuri samban ogasagwima andoma werekma, <sup>2</sup> at Paulus itok it Yakuri samban ogasagwi vaga inim samban ogasigama, nonggagagi. Ndugwis henggam it samban ogasagwi vaga aren Ala wene dirup warek vaga at inim it inim wene amburup mbalogo yugu lagagwa. <sup>3</sup> Yugirigya dugwit, "At Ala en Nenowa Inis Ombok denogo bagagi Keretus ako, edup yagan wakbaluk, hambuluk lendagwima en iluk akluk mondok yup mirik welagagirikmu, mondok yagagi o," yiluk, yedok hapwak yiluk des erogo yugirigya lagagirik, "An Paulus en Yesus avok yukheraliga yi, Nenowa Inis Ombok Ala en denogo bagagi Mesias †† ako, araro," yiluk, mbilino-yugeragagi. <sup>4</sup> Yugeragagi ako, wene andi avyarat enendawima ndun yi nunggwigya lagagirik, it Yakuri menda nin inim, it Yunani menda Ala enalon umbutu lagagwa nin wisane inim, akwa ininis werek eneyave wisane inim, Paulus Silas inim hondo yi lagagwa.

<sup>5</sup> Hondo yi lagu lagagwama, it ap Yakuri en, "Nit hekininiluk it inim hondo yi lagao andi, nit nenanggon!" yiluk, enendawi weyak yugu dugwit, ap enendawi weyak vasat dagalek agarwik menda homakbisiluk, it awakwa o kota andoma nadok-kadok okbisapwak yiluk, enendawima manggugwa. Manggu lagagwama, iren awakwa andoma agarwik ako enendawima malit lagu lagagwama, awakwa wisane nadok-hadok yagan, at Paulus Silas it mberen ombokma enawene mbaluguluk, ap Yason awi enda mbanggugwa menda, <sup>6</sup> it mberen eneyave dek iniselok, at Yason inim, nenaswei nin inim, ligenombolok enasini ap ombok-ombok o kota vagogo agarwik menda enadema bisa lagagwa. Bisa lagu lagagwarik, it yugurugu dugwit, "O yi awi ndi awi ovok erogo weyak ogarit lendagwi menda ako, eneyave yoma wagaoma, <sup>7</sup> at Yason en wogonipas. It ap andi, at Kaisar en wene yugup ako weyak erogo bagu dugwit, Nenasin inis ombok adik ambi Kaisar hak agarik ako andi, inis Yesus aro, yiluk, yagalagwi o," yugeragagwa. <sup>8</sup> Yugeragagwa ako it enasini ap ombok-ombok o kota vagogo agarwik menda inim, awakwa homagagwa ako inim, enaruk hunggu lagagwarik, nane-hane yagagwa. <sup>9</sup> Eke, at Yason aswei

† Ap Oroma menda halok, wene hudi bago werekma, enanggadi watu dugwit enowak dilup andi moga. Eke, yawi initwis, yo vaga lobalogo bugwis ogarup and moga. It ap nin Oroma dek menda enanggadi watu dugwit enowak dilup andi sek at. Eke yawi initwis, yo vaga lobalogo bugwis, ogarup andi moga dek. At Paulus ako ap Yakuri menda ovara o kota Tarusus endaklagagirikmu, ap Oroma menda at yugu lagagwa. Andi halok at yawi warup andi moga.

†† Inis 'Keretus' inim, inis 'Mesias' inim adem ambiat. Andi, 'Ala en Daut ombao inis ombok ambi nit at avema ninigik nenagap wendarigiluk denogo bagagi'. Eke Keretus andi Yunani enane vaga yugu lagagwa, Mesias andi, Iberani enane vaga yugu lagagwa. 1 Tawarikh 17:11-14, Yesaya 9:6-7, Yeremia 23:5, Daniel 9:25, Lukas 1:30-32 yokanes.

inim en heda marek onngo bagu lagagwama, visilogo hekbogogwa.

### O Mbereya dugwit, ogagagwa wene

<sup>10</sup> O hup agya lagagimu, it nenaswei Ala aburi andoma en Paulus Silas it mberen o Mbereya lakbogogwa. Lakbugu lagagwama, o hup lagu lagagwarik, it Yakuri samban ogasagwima nonggagagwa. <sup>11</sup> It avakwa Setalonika menda andi, enendawi mbuk ovara, it Mbereya menda andi, enendawi mondok sekma, Ala wene yugeragagwa ako, enendawi adenggen vaga wugu lagagwarik, "At Paulus en wene yukneraliga yi, avyarat a, dek a," yiluk, hutun-howam Ala wene dirup warek bikugu lagagwa. <sup>12</sup> Bikugu dugwit, it Yakuri menda wisane avyarat umbutugwa. It Yunani menda akwa ininis werek inim, ap inim, it ogo, wisane at avyarat umbutugwa.

<sup>13</sup> Avyarat umbutu lagagwama, it Yakuri menda o Setalonika ako en at Paulus o Mbereya Ala wene yuger-aliga yugwi ako enaruk hunggu lagagwarik, ap akwa o Mbereya menda enendawi burup yupwak yiluk wene enendawima mali wagu lagagwama, <sup>14</sup> it nenaswei Ala aburi o Mbereya menda ako en Silas Timotius it mberen andoma inigik, Paulus inamut ombok yang-gadek embet vaga wolok balagagwa. <sup>15</sup> It ap Paulus wolok balagagwa ako en o Atena balagu lagagwama, Paulus en, "Timotius Silas it mberen hodo erogo warupwak yiluk, lakbisa omano," yiluk, wene sadi erogo lakbogogi.

### Paulus o Atena dugwit, ogagagi wene

<sup>16</sup> At Paulus ako it Timotius Silas it mberen wagu-sawen, o Atena enabyam dugwit, o kota andoma huvuwak moga-moga ap ininggi-vaga ogarek wisane umwa-wasim werek higya lagagirik, endawima en mondok anggon imbitigi. <sup>17</sup> Anggon imbitiya lagagirik, it Yakuri menda inim, it avakwa Yunani Ala enalon ombasagwi menda inim, it Yakuri samban ogasagwima andoma, "Wene yi avyarat higi," ombarupwak yiluk, wene mbanggwis, hutun-howam erom hunisagwima andoma inim avuk agya lagagirik, wene yugirigya, ogagya lagagi.

<sup>18</sup> Ogagyama, o akoma it ap yi wene ndi wene adem hivilisagwi menda Epikuros wene vagago welagagwa inim, Setoa wene vagago welagagwa inim, yagan nagu lagagwa ako, werekma, iren, Paulus inim wene onngo-onngo yugu dugwit, "Wene yugwi ako eke hambok yagan landiga menda yi, nggarogonggan wokbaluk yagan landiga embetep?" yugwi, eke, at Paulus en At Yesus avok sek wene ako inim, at iluk ak-luk mondok yagagi wene inim, yugirigya halok, it nin en, "Dek o. Avakwa adik enomadis awene wolok wagya lagarik, iri higyo o," yiluk, yugwi, ogagu lagagwa.

<sup>19</sup> Yugu lagagwarik, Paulus wolok, o Areyopagus wene amburup mbalisagwi menda enadema ba wagu lagagwarik, yugu dugwit, "Hat wene adik swi menda mamuleraliga andi, nit ninelup aruguluk yukneran.

<sup>20</sup> Hat wene adik hak yagan lagya hunggurikmu, 'Wene eyave adem yi at yagaliga,' ombaruguluk, iru o," yugogogwa. <sup>21</sup> (Andi, yugogogwa ako, enawerek Atena menda inim, huru inisa wagagwa welagagwa inim, it ako en wene adik swi menda adigat hunggwis, yugwi, ogagu dugwit, yi ogagek ndi ogagek ogagatek at welagagwa.)

<sup>22</sup> "Iru o," yugu lagagwama, Paulus ako en o Areyopagus it wene amburup mbalisagwi menda enanggelekma mendek yiluk, yugirigya dugwit, "Hit naswei o Atena menda yi wai. Hit huvuwak amuli hubaluk, henen-dawi andi vaga adigat vanggaluk musek lagu hinigis o. <sup>23</sup> O kota yoma hit huvuwak awi valek nil hegek lagya dugwit, huvuwak awi valek ambi, inis 'Nenasin Inis Nininggut' salek dirup warek nil higi. Hit hininggut dugwit, inis siyabelagwi ako andi anen yukheraliga o."

<sup>24</sup> Yugirigya lagagirik, "At wen inim, yi menda ndi menda wen vaga menda ovok inim, ogagagi Ala ako andi, wen-mbogot vagogo aratma, at huvuwak awi ap en vanggugwarikmu akoma agarikbuk o. <sup>25</sup> At adigat en yi ap akwa ndi ap akwa iniluk oginipu, enelagap agavuk wogirigya, yi menda ndi menda wogirigya, ogasigama, At angge ambi dek halok, avakwa enangge ambi At wogorup andi mondok dek o. <sup>26</sup> Ala en adem ap ambiat vaga yi ap akwa ndi ap akwa ininis unggul adik-adik dombok yi awi ndi awi wigalarupwak yiluk ogagya, o ndugerek-ndagarek ogarit nagu dogopwak yiluk, hologo bagya, eke o yi awi ndi awi dogop hudi ogorogo bugu, ogagagi. <sup>27</sup> At ogagagi ako andi, At Ala adumu dek horok-korok ninim at agarik hegek, belalit lagu dogomundik, 'Avyarat ai,' yiluk enendawima yedok hapwak yiluk ogagagi o. <sup>28</sup> Eke, ap hit menda ambi ndawi bagya dugwit,

'Nit ogo at vaga wigalek aro,'

yiluk, yagagi ako wane-wane, niniluk agurik inim, o wen vaga nagwis inim, nit agurik inim, andi, at vanggaluk dugwit ogasagwi o.

<sup>29</sup> Andi halok, nit Ala vaga wigalek agurik atma, at eyave adem andi, avakwa enendawi hologo baluk mbusi emas vaga, mbusi perak vaga, helep vaga, huvuwak ogovak higirik andi hak, ombarubuk o. <sup>30</sup> O muk en nininggut dugwit ogagu ninigik, Ala en ugun welagagi ovara, yogak andi, nit yi ap akwa ndi ap akwa ovok erogo nenomaluk mondok mbo baluk Yesus ambetaga lagu dogop yiluk yukneraliga.

<sup>31</sup> Ap ambi denogo mondok okbagagi en avakwa ovok ogasagwi wane-wane enowak dilinivup ndugwis ambi hologo bagagi o. Eke, nenowak dilnininisogon ako, nit avakwa ovok nenelup dogoguluk, At ako andi, hambuluk lendagwima en iluk erogo mendok okbagagi o, yiluk, yukheraliga o," yiluk, yugeragagi.



<sup>32</sup> At Paulus en hambuluk iniluk arup wene ako iri hugu lagagwarik, it nin ako en Paulus wiyiknom-weyaknom erogo agonda yagagwa ovara, it nin en andi, "Wene andi, vivis ambi inim yukneranok," yiluk, yugu lagagwama, <sup>33</sup> at Paulus ako it wene amburup mbalisagwi menda enanggelekma en winggigi. <sup>34</sup> Wunggu lagagimu, ap ambetap andoma Paulus inim dambungu lagagwarik, avyarat umbutugwa. Ambi andi ap wene amburup mbalisiga menda inis Dionisius. Ambi andi hwa ambi inis Damaris, eke it nin inim, avyarat umbutugwa.

### O Korendus dugwit, ogagagi wene

**18** Andi ogagya lagagirik, at Paulus ako o Atena hekbaluk, o Korendus lagagi. <sup>2</sup> O Korendus lagya lagagirik, andoma dugwit, ap Yakuri menda ambi o Pondus endaklagagi inis Akwila, eke, ogwa inis Pirikila it mberen inim avuk agagwa. Ap inis ombok *Kaisar* Kolaudiyus en, "It Yakuri menda o Oroma yoma dogop dek o," yiluk, wene yugeragagi vaga, ap andi ogwa im ao swi at o Italiya hekbaluk, o Korendus wagagwa. Wagu lagagwarik, andoma inigik, Paulus biginisa lagagi. <sup>3</sup> It yum *tenda* eravo valuguluk monggadisagwi menda halok, at Paulus ogo ilup atma, inim dugwit, inim yum *tenda* eravo valumenda monggatu lagagwa. <sup>4</sup> Ogagu dugwit, at Paulus ako ndugurek-ndagarek it Yakuri samban ogasagwi vaga it samban ogasagwima nonggegek iri dugwit, it Yakuri inim, it Yunani menda inim, it enendawi Yesus avyarat ombarupwak yiluk, Ala wene amburup mbalogo yugirigya lagagi.

<sup>5</sup> Andenam werekma, Silas, Timotius inim, o Makedoniya en wagu lagagwarik, inim dugwit, at Paulus ako yavup adik ambi ogagya lagetek, Ala wene andi adigat yugirigya lagagi. Yugirigya dugwit, "Nenowa Inis Ombok Ala en denogo bagagi Keretus ako andi, Yesus aro," yiluk, it Yakuri menda yugirigya lagagi. <sup>6</sup> Yugirigyama, it ako inim ogot-hidugu dugwit, wiyiknom-weyaknom erogo bagu lagagwama, Paulus en, "Hit dek erogo bigigaup andi, an novavut vaga dek o. Hit henovadombok okhedasogom vaga dek erogo bigigayogon. Eke, an yogwak en it ap weram Yakuri dek menda yugeregek nagu dogosogon," yiluk, it dibapwak yiluk, yum mupwak davulagagi ako yumbulogo enovaga lakbalagagi.

<sup>7</sup> Andi ogagya lagagirik, it Yakuri samban ogasagwima akoma en wulukluk, ap Ala inis siyabaliga menda inis Titius Yutus amwa it Yakuri samban ogasagwima horok andenam werekma adema lagagi. <sup>8</sup> It Yakuri samban ogasagwima enasin Kiripus ako inim, at abut ogwa at amwa agarwik menda inim, enendawi Nenasin Yesus ovaga vanggabuluk avyarat umbutugwa. Eke, it Korendus menda wisane at Paulus en yugeragagi ako hobaluk, avyarat umbutu lagagwama, ivaga wombabogowa.

<sup>9</sup> Andi okbaluk, ndugwis ambi vaga o hup Nenasin Yesus en at Paulus abi vaga yugugu dugwit, "An hinim werekma, ap akwa en vakbagaluk harusogom dekma, halon en mbauk dogobuk. O kota yoma an naburi wisane agarwikmu, yugirigya dogwen," yiluk, <sup>11</sup> yugogogirikmu, Ala wene mamulirigya hegek saut 18 hudi ogagagi.

<sup>12</sup> Ala wene mamulirigya werekma, ap inis Nggaliyo awakwa Akaya menda enowa gubernur mendek hegek, it Yakuri menda ovok dambubuluk ambivaga mendek yugu lagagwarik, Paulus vakbaluk eyave wolok, wene amburup mbalisagwima ba lagagwa. <sup>13</sup> Balagu lagagwarik, "At ap yi, Musa wene yugup ako hegek, Ala siyabagu dogop adik ogagu dogopwak yiluk, awakwa enendawi nomalinivit lagya halok, wolok wago o."

<sup>14</sup> Yugurugu lagagwama, Paulus ako yugeragilik ogagya hegek, Nggaliyo en it Yakuri ako yugirigya dugwit, "At weyak ambi ombok ogagya, ata it o Oroma menda en wene yugup hegek, mondok adik ogagya, ogaklipmu en, hit ap Yakuri en yuknisagwi andi, naruk des erogo hulili ovara, <sup>15</sup> hit Yakuri wene yugup ogagu dugwit maduk-maduk ogasagwi ako vaga yidibaluk wene wasagwima, anen wene amburup mbalogo yukheraup nanggon. Hit henadik henovadombok hologo bugu dogones," yiluk, <sup>16</sup> wene amburup mbalisagwima andoma en haryogo wibisapwak yiluk yugeragagi. <sup>17</sup> Yugirigya lagagimu, wibugu lagagwama, it ovok en it Yakuri samban ogasagwima enasin at Sotenes ako, vagogo, wene amburup mbalisagwima andenam en watu-sigik, at Nggaliyo en, "It inovadombok," yiluk, at asuk, mbup yagagi.

### Paulus eyami vaga o Andiyokiya lagagi wene

<sup>18</sup> At Paulus o Korendus andoma dugwit, ndugwis wisane welagagirik, nenaswei Ala aburi andoma inigik, at Akwila ogwa Pirikila it mberen inim mburi-vaga o Siriya laguluk, ogagu dugwit, at Paulus en ambi ogarup Ala ivaga yugogogi atma, ovok ogagya lagagirik, o Kanggereya andenam en iris mbanggigi. <sup>19</sup> Iris mbanggya lagagirik, o Epesus lagagwa. Lagu lagagwarik, Paulus en Pirikila Akwila it mberen andoma bisiluk, at adigat it Yakuri samban ogasagwima nungwigya lagagirik, it Yakuri menda andoma en hemetugwi, onngo yugirigya, ogagagwa.

<sup>20</sup> Yugirigya lagagimu, "Ninim yoma ambi inim dogosogom o," yugogogwa ovara, "Dek o," yugirigya lagagirik, <sup>21</sup> lagilik ogagya dugwit, "Ala en, 'Warup,' imbitya halok, hivis henadema wasogon o," yiluk, heyaga wakbisiluk, o Epesus andoma en mburi-vaga <sup>22</sup> o Kaisareya lagagi. Lagya lagagirik, akoma en at Paulus

† Paulus iris mbanggigi ako, it Yakuri menda en ambi ogarup Ala ivaga yuguselok, ovok ogagu lagagwarik iniris mbangu lagagwa. Mbanggu lagagwarik, Ala ake inim, iniris mbalek ako inim, Ala awi valekma akoma Ala ake yiluk bagu lagagwa. Bilangan 6:1-21 bikanes.

o Yerusalem wagya lagagirik, it Ala aburi andoma homagwi ako heyaga wakbisiluk, o Andiyokiya lagagi.

<sup>23</sup> Andoma ndugwis wisane welagagirik, hivis o andoma hekbaluk, yi awi ndi awi o Nggalatiya, o Virigiya inim, yanonggegek lagya dugwit, Yesus ane wogogwa menda ako enendawi wadok dek dogopwak yiluk, yugeregek lagya lagagi.

#### Apolos en o Epesus, Korendus ogagagi wene

<sup>24</sup> Andi yugeregek lagya hegek, ap Yakuri menda ambi awi adem Alesandiriya inis Apolos ako en, Ala wene dirup mbalek † ovok elup dugwit, wene enendawi ndin yagaliga menda o Epesus lagagi. <sup>25</sup> Endak At Nenasin Yesus wene at yugugu iniselok, des erogo wogogima, o Epesus lagya lagagirik, Yesus wene avyarat maulirigya, endawi adenggen vaga yugirigya, ogagya lagagi ovara, Averiniki wambu wagagi inggut atma, we un Yohanes ima wombabugu lagagi wene ako adigat elupma yugirigya lagagi. <sup>26</sup> At alon dek dugwit, it Yakuri samban ogasagwima akoma wene yugirigya lagagi. Yugirigyama, it Pirikila Akwila it mberen enaruk hunggu lagagwarik, at Apolos wolok, enamwa lagu lagagwarik, Ala ap akwa enapwa en enagap wendarinivisiga wene ako des erogo mbiluk-mbaluk yugogogwa.

<sup>27</sup> Hivis at Apolos en o Akaya lagiluk ogagya lagagimu, it nenaswei Ala aburi o Epesus menda andoma en, at laup sek yiluk, Yesus ane wogogwa menda o Akaya agarwik en at heyaga warogo wapwak yiluk, dirup mbalogo lakbagagwa. Lakbagu lagagwama, wolok lagya lagagirik, Ala enabwa en okbogogi vaga Yesus avyarat umbutugwa ako inim dugwit, mondok iya dombok yonggarinipu lagagi. <sup>28</sup> It Yakuri menda at inim ombokma wene onngo-onngo yugu dugwit, at Apolos en Ala wene dirup mbalek vaga, "Nenowa Inis Ombok Ala en denogo bagagi Keretus ako andi, Yesus aro," yiluk, onngo yugurup dek mondok ane hunik yugirigya lagagi.

#### At Paulus Epesus dugwit, ogagagi wene

**19** At Apolos o Korendus hegek, Paulus ako o Nggalatiya-Virigiya o ndom vaga andoma lagya lagagirik, o Epesus nonggagagi. Nunggwigya lagagirik, Ala wene wogogwa menda nin andoma avuk agu lagagwarik, <sup>2</sup> it yugirigya dugwit, "Hit avyarat umbutu lagagupmu, Averiniki wogogup a, dek a?"

Yugirigya lagagimu, iren, "Dek o. Averiniki andi werek a, dek a? Nit ao ninunggut at agurik o."

<sup>3</sup> Yugugu lagagwama, "Andi halok, nano wene hunggu lagagupmu, ima wombabigigagwa?"

Yugirigya lagagimu, iren, "Dek o. At Yohanes yagagi wene hunggugup ako vaga ima wombabininggugwa," yugogogwa.

† O andi hudi Ala wene dirup mbalek andi Perjanjian Lama adigat werekma, Perjanjian Baru ao dirup watusigik ogagu lagagwa.

<sup>4</sup> Yugugu lagagwama, at Paulus en, "At Yohanes ima wombabugu lagagi andi, enomaluk mbo bagu-selok, ima wombabugu lagagi. Aren avakwa wisane yugirigya dugwit, 'At an nambetaga warisogon andi, henen-dawi ovaga vanggabuluk avyarat umbutu dogones,' yugirigya lagagi andi, eyave Yesus aro."

<sup>5</sup> Yiluk yugeragagi ako enaruk hunggu lagagwama, Nenasin Yesus inis vaga ima wombabogogwa. <sup>6</sup> Ima wombabugu lagagwama, Paulus inggis inunggul vabugu hegek, Averiniki enovaga wambu wagya lagagimu, it ap akwa enane unggut adik-adik menda yugwi, Ala en enendawima yugirigya hegek, yugurugwi, ogagagwa. <sup>7</sup> It ap Averiniki enovaga wambu wagagi ako andi, eneyave dambulik, 12 hudi agagwa.

<sup>8</sup> Andi okbaluk, at Paulus en it Yakuri samban ogasagwima nunggwigya lagagirik, alon dek dugwit, Nenowa Inis Ombok Ala en denogo bagagi ako avema bininaup wene andi, "Avyarat yagaliga," ombarupwak yiluk, wene mbilinogo yugeregek adigat ogagya hegek, saut henggam ogagagi. <sup>9</sup> Yugirigya lagagi ovara, it nin enendawi lakot dugwit, "Avyarat ombarup, nenanggon," yiluk, ombok vaga Sup Yesus Ambetaga Lagu Dugwit Iniluk Mondok Dogop Wene ako, wiyiknom-weyaknom erogo bagu lagagwama, at Paulus en it hekbisiluk, Yesus ane wogogwa menda ako enadigat wogonombolok, ap Tiranus *sekolah* awi vanggigirikmu andoma nunggwigya lagagirik, ndugerek-ndagarek inim wene yugirigya, iren heme-tugwi, ogagu lagagwa. <sup>10</sup> Ala wene yugirigya hegek, tahun mberen ogagagirikmu, it Yakuri menda inim, it Yunani menda inim, o Asia welagagwa ako ovok erogo Nenasin Yesus wene enaruk hunggu lagagwa.

#### At Sekewa aburi en ogagagwa wene

<sup>11</sup> Ala en okbagya hegek, Paulus en nggarogo ogarubuk menda mondok iya erogo ogagya lagagi. <sup>12</sup> Nggarogo ogarubuk menda iya erogo ogagya lagagi andi, at adigakot inim, asum mudis arugwi en yiluk yirik welagagi menda inim, wolok lagu lagagwarik, it ap akwa aup edup ako, enovaga bugusigik, aup edup ako dek agwi, madis enendawima nonggagagi ako nggigilogo wibugu, ogagya lagagi.

<sup>13</sup> Ogagusigik, ap Yakuri madis ap akwa enendawima nggigilogo wikbigik nagu lagagwa menda en, avakwa madis enendawima nonggagagi halok, Nenasin Yesus inis vaga, madis nggigilogo wibisaguluk yugurugu dugwit, "Paulus yugeraliga menda Yesus ako inis vaga wilin," yiluk, ogagagwa. <sup>14</sup> Ogagagwa ako andi, it ap imam Yakuri menda enasin Sekewa aburi eneyave 7 en, anderogo at ogagagwa.

<sup>15</sup> Anderogo ogagagwa ovara, madis ako en, "Yesus andi nelup, eke, Paulus ogasiga menda ogo, an nelup ovara, hit yi andi, sani?" <sup>16</sup> Yugirigya lagagirik, ap madis alon edok erek endawima welagagi ako en soklok erogo enovaga ndan iri lagagirik, sovalogo bisiluk, inita

lagagimu, it ako umwa akoma en enagap sigam ena-muya ndek yagan, hoda sak yagan lagagwa.

<sup>17</sup> Ogagao yugwi ako, it ap akwa o Epesus agarwik Yakuri menda inim, Yunani menda inim, ovok erogo enaruk hobaluk enalon agu lagagwarik, Nenasin Yesus inis siyabagagwa. <sup>18</sup> Avakwa avyarat umbutugwa menda wisane wagu lagagwarik, "Nit ogo weyak ogagu lagyo o," yiluk, ombok vaga enomaluk vaganggu lagagwa. <sup>19</sup> It madis vagogo nin ogo, madis inis vaga ogwaruguluk mbuku mbalek bikegek ogagu lagagwa ako, wolok ap akwa ovok inivaga hali hunggugwa. Eke, enambuku hali hunggugwa ako onngo ininggis dingginggu dugwit, yoparip wisane, *satu milyar* wane-wane hagagwa ovara, hegek hali hunggugwa. <sup>20</sup> Nenasin inis ombok Yesus ane wokbaluk anderogo ogagu lagagwa vaga, Ala wene andi wigalit lagya halok, avakwa en wene andi, dibagwi, wugwi, ogarit lagagwa.

### O Epesus en nane-hane yugu lagagwa wene

<sup>21</sup> O Epesus andoma anderogo ogagu lagagwama, at Paulus ako o Makedoniya inim, o Akaya inim, yanonggegek ogarit o Yerusalem lagiluk, endawi imbitigirikmu, "O andoma lagya dogomindik, o Oroma akoma ogo layogon aro," yagagi. <sup>22</sup> Iri lagagirik, at yonggat hegek eneyave mberen Timotius Eratus enendak o Makedoniya lakbugu lagagirik, lagusigik, at o Asia ambukum dogogiluk mbup yagagi.

<sup>23</sup> O andi hudi Sup Yesus Ambetaga Lagu Dugwit Iniluk Mondok Dogop Wene ako vaga nane-hane ombok yagagwa. <sup>24</sup> Ap mbusi perak ogasiga menda ambi inis Ndemeteriyus en enomadis Aretimis awi mbusi perak agut ogovak higrisiga mendama, onngo lugut hedaguluk arwi wisane yugirigya hegek ogovak higitwis selok, onngo ombok wogirigya lagagi. <sup>25</sup> At arwi ako inim, it ap nin yavup andi menda ogagu lagagwa inim, homakbisiluk, yugirigya dugwit, "Narwi o, nit ogasagwi yi vaga onngo ombok hedelagwi henelup ovara, <sup>26</sup> ap inis Paulus ako en, 'Huvuwak avakwa en yi ininggi-vaga ogovak higririk andi, eve menda dek,' yagaliga ako, o Epesus yoma en adigat dek. Ata, o Asia yi awi ndi awi andoma ovok erogo avakwa wisane enendawima malit lagya dugwit, nomalinivit lagya hinil hugwi, henaruk hunggwis, ogasagwi o.

<sup>27</sup> Anderogo atma, nit onngo hedelagwi yi adigat inis dek arisogon dek ovara, nit o Asia yoma ovok agurik inim, it yi awi ndi awi ovok agarwik inim, nenomadis hwa ombok Aretimis nit ovok erogo ninisa siyabelagwi ako, at awi valek meyan umbutu dugwit, at agayuk dek, anye werek ako dek aga higo, yugusawen yiluk, nenalon aga o," yiluk, yugeragagi.

<sup>28</sup> Yugeragagi ako enaruk hunggu lagagwarik, enanis ane yagan lagu dugwit, "Nit Epesus menda nenomadis Aretimis ombok aro," yiluk, yanjak-hanjak yagagwa. <sup>29</sup> Yanjak-hanjak yugu lagagwama, o kota an-

doma en ovok nane-hane yugu dugwit, it ap o Makedoniya menda Paulus inim nagu lagagwa, Nggayus Aritakus it mberen vaginiviluk, wene homarisagwima ambi homago hoda vupuk bisa nonggagagwa. <sup>30</sup> Bisa nonggagagwarik werekma, at Paulus ako, ap wisane homari lagagwa ako enanggelekma nunggwigiluk ogagagi ovara, it Yesus ane wogogwa menda ako en, "Vuk," yiluk, sovabaluk werekma, <sup>31</sup> it o Asia menda enasini ap ombok-ombok at Paulus inim hunik wela-gagwa ako en, o wene homarisagwima akoma nunggwigya hawen, Moga, yugurupwak yiluk, enarwi lakbisa lagagwa.

<sup>32</sup> Yugusigik, it homagagwa nin wisane ako en, 'Nggarogo yiluk homagyo' ininggutmu, wene ambi yegek, ambi yegek, yugu dugwit, nadok-kadok yugusim, <sup>33</sup> it Yakuri menda en ap inis Alesander ako vagago vokal hegek enelesema mendok okba nonggagagwarikmu, it avakwa nin en, "Yukneran o," yugugu lagagwama, wene sigam erogo yugeragiluk inggi-vaga, "Mbauk dogones," yugeragagi ovara, <sup>34</sup> at Alesander ako ap Yakuri menda yedok hugu lagagwarik, "Nit Epesus menda nenomadis Aretimis ombok aro," yiluk, enane ombok vaga hunik adigat yugusigik, mo il mberen agagi.

<sup>35</sup> Mo il mberen agya lagagimu, ap sekerataris kota Epesus en, "Henane moga o," yugirigya lagagimu, mbup erek inigik, yugirigya dugwit, "Hit ap Epesus menda yi, wene ambi yukheraliga o. At nenomadis inis ombok Aretimis awi valek inim, helep mbogot-vaga en wambu wagagi, "Nenomadis yi aro," yiluk, agut vago-gago agurik ako inim, andok ako nit Epesus menda atma, yi ap akwa ndi ap akwa ininggutmu, yagalagwi?

<sup>36</sup> Dek o. Wene yi huluk dek, avyaratma, hit henendawi dek ovagak akluk yi ogagek ndi ogagek ogarubuk. Mbauk dogones o. <sup>37</sup> It ap yi, nenomadis awi valekma yi menda ndi menda agarik ako wugwi, eyave miyukmeyak erogo bagwi, ogagetek inigik, wogonombolok wagepma, <sup>38</sup> it wene amburup mbalisagwi menda inim, it nenasini *pemerintah* menda inim, agarwik atma, at Ndemeteriyus inim, aori mbusi perak ogovak higrisagwi menda inim, ako en, 'Ninawene amburup mbalupwak o,' umbutwi selok, it enadema andoma yugera lapwak o. <sup>39</sup> Eke, wene ambi adik werek umbutu hiniselok, havis nenasini inim ovok homakbaluk amburup mbalusogom o. <sup>40</sup> Wene yogak avok yagalagwi yi, iren 'Nggarogo yiluk nane-hane yugu dugwit, weyak ogagep o?' yuknirugwi selok, adem dek hegek, ap yi wogonombolok wagyoma, nit onngo nggarogo yugerabuk erek," yiluk, <sup>41</sup> yugirigya lagagirik, it ap akwa homago ako "Wilitalis o," yugeragagi.

### Paulus o Makedoniya, Yunani, lagagi wene

**20** Wene nane-hane yugu lagagwa ako dek agya lagagimu, Paulus en Yesus ane wogogwa menda ako warupwak yiluk, eneyanggup yugeragagi,

wagu lagagwama, enendawi aik wakbugu lagagirik, "Yogo," yugerelok, o Makedoniya lagagi.

<sup>2</sup> Lagya lagagirik, o yi awi ndi awi andoma ya nonggegek lagya dugwit, enendawi aik wakbigik lagagi-lagagi o Yunani ari lagagi.

<sup>3</sup> Andoma hegek saut henggam nggao iri lagagimu, o Siriya mburi-vaga lagiluk ogagya lagagimu, it Yakuri en enendawi ambi okbaluk, "Warup," hunggu lagagwama, "Sup neyami vaga o Makedoniya laup," imbitigi.

<sup>4</sup> At inim lagagwa ako andi, ap Mbereya menda Pirus abut Sopater inim, o Setalonika menda Aritakus, Sekundus inim, o Nderebe menda Nggayus, Timotius inim, eke, o Asia menda Tikikus, Toropimus inim, lagagwa. <sup>5</sup> It andi, ovok enendak o Terowas lagu lagagwarik, nenabyam welagagwa. <sup>6</sup> Eke, nit ako isogo *Roti* Virisigadek Menda ako nelok, o Pilipi en mburi vaga lagu dugwit, ndugwis 5 hudi welagagurik, o Terowas nenaswei nenabyam werekma avuk agagup. O Terowas andoma ndugwis 7 hudi welagagup.

#### Apsawe nggedek wombagagi wene

<sup>7</sup> O hari minggu vaga erom ugurogo naguluk homagagurikmu, at Paulus hutun lagiluk ogagya dugwit, wene adup yugurigya hegek, o hup ilikis agagi. <sup>8</sup> Eke, nit homagagup o *tingkat* winimen akoma hali undwa wisane yebetbaluk, <sup>9</sup> at ako wene adup likelok lagya dugwit, apsawe ambi inis Eyotikus yendela mbalek vaga horaik werekma, nggunguk nogo yugu lagagimu, nogo agako agya dugwit *tingkat tiga* en nggedek wombagagi. Nggedek wombagagirikmu, hambagagi. Hambigya lagagimu, lekugu lagagwama, <sup>10</sup> Paulus ako wambigya lagagirik, ambor seve yiluk, elola wigya lagagirik, "Henendawi mbigya yubuk. Eyave iluk agarik," yiluk, yugeragagi. <sup>11</sup> Yugerelok, eyami vaga inggya lagagirik, roti ugurogo nelok, at inim wene mbanggusigik, o yanggo yigiluk het lagatu hegek, hekbisiluk winggigi. <sup>12</sup> Wunggu hegek, it avakwa en avyak ako iluk wolok lagu lagagwarik, enendawi sek adenggen wisane hagagwa.

#### O Terowas en Miletus lagagwa wene

<sup>13</sup> Eke, Paulus en, "An wen vaga o Asos laup imbitirikmu, hit henendak o Asos andoma nabyam ari lales," yuknirigya lagagimu, at wen vaga lagya hegek, nit nenendak mburi-vaga o Asos abyam ari lagagup. <sup>14</sup> O Asos andoma avuk agya lagagimu, Paulus mburi-vaga nunggwigya lagagirik, ninim o Metilene wagagup. <sup>15</sup> Andoma en wagu lagagurik, heveret o *laut* is enggema inis Kios malhegek, dogovit o Samos ari wagagup. Eke, dogovikak o Miletus ari wagagup. <sup>16</sup> Ari wakluk, at Paulus en, "Hari Pendakota o Yerusalem neyagek ogarup atma, o Asia adigat arabu neyagek horok vanggo iri hawen, o Epesus nonggegetek mbikit o Yerusalem hodo erogo lasogom," yiluk, yugeragagi.

#### Paulus Ala aburi o Epesus hekbisiluk, lagiluk, yugeragagi wene

<sup>17</sup> Anderogo, imbita lagagirik, Miletus nunggugu lagagurik, andoma en at Paulus ako, it Ala aburi enasini ako warupwak yiluk, o Epesus enayonggo lakbogogi.

<sup>18</sup> Enayonggo lakbugu lagagwarik, at adema wagu lagagwama, yugurigya dugwit, "An o Asia yoma henadema wagagis hudi en ninim dugwit ogagya lagagis ako henelup. <sup>19</sup> It Yakuri en enendawi ambiat okbaluk, an naruguluk hologo baluk anggin novaga banunggusigik ovara, Nasin ayeloman dugwit, nendawi seve yiluk, henayup yagya dugwit, yonggat hinipu lagagis. <sup>20</sup> Sek okbigaup wene ako, nin yup nalon en hekbagya, nin yukhirigya, ogagya lagetek. Ombok vaga inim, henamwa vaga inim, mamulheregek lagya lagagis henelup. <sup>21</sup> Mamulhirigya lagagis ako andi, hit Yakuri menda inim, hit Yunani menda inim, hit weyak ogasagwi henendawi wenggelogo, mbo bagu dogomundik, Ala adema wagwi, henendawi Nenasin Yesus Keretus ovaga vanggabaluk avyarat umbutwi, ogarovovok yiluk, des erogo yukhirigya lagagis."

<sup>22</sup> "Eke, yogak andi, Averiniki en nomalik-nomalek yuknugu halok, o Yerusalem en okneraup ninggut hegek ovara, layogon. <sup>23</sup> Ndugwis ambi vaga o ambima yugirigya, ndugwis ambi vaga o ambima yugirigya, ogarit lagyama, 'Heda makitwis, anggin-mbanggin hovaga bagagwi, ogarusogom,' yiluk, Averiniki en vagalogo yuknisiga nelup aro. <sup>24</sup> Anderogo ovara, An neyave niluk dogop iya dek. Ata, Ala nenabwa en we un okbininaliga menda sek wene yugurigya dogogiluk, Nasin Yesus en yavup andok okbaninggigi ako, hekbagetek weralogo ogarup andi adigat iya ombasigama, ogarit landiga."

<sup>25</sup> "Eke, yogak andi, an ako Nenowa Inis Ombok Ala en denogo bagagi ako avema bigigaup wene yukhirigya lagagis hit yi, havis ambi yukheregek wagya hinil neyagupuk andi, an nelup. <sup>26</sup> Ala endawi hologo bagagi wene ako nin hekbagetek, ovok yukhirigya lagagisma, hit ambi dek erogo bigigaup halok andi, an novadombok dek. Hit henovadombok okhedasogom vaga dek erogo bigigayogon, yiluk, o yogak yi vaga avyarat yukheraliga."

<sup>28</sup> "At Nenasin Yesus amuya vaga Ala aburi homago enonggo bagagi ako andi, at andomba ovagak atma, enaruwam dogovovok yiluk, Averiniki en mikkinipigima, hit henendawi suwam wakidugu dugwit, it inim des erogo yugurugu dogones. <sup>29</sup> An hekbigiluk lagya neyagek, yangge do henanggelekma nunggu wagu dogomundik, hekbigigasogom dek hivit hinivusogom andi, an nelup aro. <sup>30</sup> Hit menda en ogo, henanggelekma en mendok yiluk, hit Yesus ane welagwi menda henendawi nomalhinivuguluk, huluk wene ako andi sek wene heda yukhurugu dogosogom. <sup>31</sup> Anderogo atma, henendawi suwam wakidugu dogones! O hup

dingga mbup yegetek henayup yagya dugwit, henadik-henadik hurimbis yukhirigya neyagek, tiga tahun ogagagis ako henendawi wengggenggu dogones.

<sup>32</sup> Eke, yogwak andi, At Ala henabwa en okbigigaup wene andi vaga, henendawi hoda erogo bigigiluk at aburi at ake denek halok, mavorangge hak enake vulogo bogogi ako hinim andok arovovok yiluk, Ala ave-ma bigigigis o. <sup>33</sup> Hit henayoparip mbusi *perak emas* inim, henasum inim, an hogop imbitya lagibuk o. <sup>34</sup> Ninangge dek halok, 'Wokneres,' andi yukhirigya lagibuk. Ata, an nake inim, it ninim lagya lagagis enake inim, andi, an ninggis anye vaga en adigat ogarogo hidigya lagagis henelup aro. <sup>35</sup> At Nenasin Yesus en iri dugwit, 'Hedelagwi vaga enadenggen maduk hugwi, eke, wogorugwi vaga andi, enadenggen wisane hugwi, ogasagwi o,' yagagi ako, imbitya dugwit, an ovok erogo ogagya lagagis ako andi, yavup sadida-mbakdida ogagu dugwit, it enanye dek menda yonggarinipu dogop, higyo, yiluk, ombarovovok yiluk, ogagya lagagis," yugeragagi.

<sup>36</sup> Wene andi mondok yugirigya lagagirik, it ovok inim enerambo yunggubaluk hora yiluk, samban ogagagi. <sup>37</sup> Samban okbugu lagagirik, Paulus eyave enelola okbaluk, ayup yagwi, heyaga warogo dinggik-hambuk okbagwi, ogagek adigat ogagagwa. <sup>38</sup> At Paulus en, "An havis nelose ambi neyagup dek," yugeragagi andi vaga enendawi mondok mburup yugu lagagwarik, ayup yagwi, heyaga wakbagwi, okbagu lagagwarik, wolok mburis is amban vaga werekma andenam ba lagagwa.

#### At Paulus o Yerusalem lagagi wene

**21** Nenendawi it vaga ngges iri hegek, hekbisiluk, mburi-vaga nunggugu lagagurik, andoma en mbikit o is enggema Kos lagu lagagurik, hutun en o Orodos nunggugwi, andi okbaluk, o Patara nunggugwi, ogagagup. <sup>2</sup> O Vatara akoma werekma, mburis adik o Venisiya laguluk ogagu lagagwama, ninim nunggugu lagagurik, lagagup.

<sup>3</sup> Lagu lagagurik, o Sipurus neneyave hwarenggan ninil malhegek lagu dugwit, yi menda ndi menda mburi-vaga yidik ako o Tirus hudilogo womba bagek laguluk, o Siriya nonggagagup. <sup>4</sup> Andoma nunggugu lagagurik, Yesus ane wogogwa menda andoma haverinipu lagagurik, ninim dugwit, ndugwis 7 welagagup. It andoma menda ako Averiniki en yugurigya hegek Paulus yugugu dugwit, "Hat Yerusalem labuk o," yugogogwa ovara, <sup>5</sup> andoma dukluk laup ako ndatak agya lagagimu, it Yesus ane wogogwa menda ako enabur-enogwa inim ovok erogo o kota en woknenombolok is omban vaga binani lagu lagagwama, nenerambo yunggubaluk samban ogagagup. <sup>6</sup> Samban okbaluk, it ninim deden war-wat yugu lagagurik, enamwa lagusigik, nit mburi vaga nonggagagup.

<sup>7</sup> O Tirus andoma en wagu lagagurik, o Votolemais nunggu wakluk, andoma nenaswei Ala aburi heyaga wakbisiluk, ninim ndugwis ambi welagagup. <sup>8</sup> Ndugwis ambi welagagurik, heveret wunggu lagagurik o Kaisareya nonggagagup. Nunggugu lagagurik, o Yerusalem en it ap 7 erom sumburerapwak yiluk miginipugwa menda ako ambi sek wene yugeregek landiga menda Pilipus ako amwa nunggu lagagurik, ninim welagagup. <sup>9</sup> At aburi hwavyak ndugum eneyave 4 Ala en enendawima yugurigya hegek yugurugu lagagwa.

<sup>10</sup> Ninim dugwit, ndugwis maren hudi welagagurikmu, ap navi Ala en yugugu hegek yugirigya lagagi menda ambi inis Agabus o Yudeya en nenadema wambu wagagi. <sup>11</sup> Nenadema wambu wagya lagagirik, at Paulus amboranis visilogo inggis-isok heda makidiga lagagirik, iri dugwit, "An hamboranis vaga makidigi yi hak, it Yakuri o Yerusalem menda en ap amboranis werek ako, anderogo at heda marogo it weram Yakuri dek menda wogorasogom, yiluk, at Averiniki en yuknugu halok, yukheraliga o," yukneragagi. <sup>12</sup> Yukneragagi ako nenaruk hobaluk, it andoma menda ninim en Paulus yugugu dugwit, "O Yerusalem andoma dagabuk," yiluk, nenabwa edok dugwit, yugugu lagagumu, <sup>13</sup> at Paulus en, "Hit an nayup yagwi vaga nendawi anggin arupwak yiluk, nggarogo yiluk yagalagwi? An Yerusalem dargasogon atma, andoma neyagek Nasin Yesus ake heda maknitu-selok andi, sek aro ombasiga. Eke, narusogom halok ogo, sek atma, hit nggarogo yiluk yagalagwi?" yukneragagi. <sup>14</sup> Yuknirigya lagagimu, yugigik adigat ogagagup ovara, hunggitek welagagimu, "Ala endawi ombasiga adigat arumwak," yiluk, mbup yagagup.

<sup>15</sup> Andoma welagagurik, nenayum yubetaup mbalogo hedelok Yerusalem unggugup. <sup>16</sup> It Kaisareya menda Yesus ane wogogwa menda nin ako en ap Sipurus menda ambi o endak Yesus ane wogogi inis Manason amwa akoma ninim dogoguluk, woknenombolok binani unggugwa.

#### At Paulus Yakubus adema lagagi wene

<sup>17</sup> O Yerusalem nunggu lagagumu, nenaswei Ala aburi ako en enendawi adenggen vaga wokninipugwa. <sup>18</sup> Wokninipu lagagwama, nogo yiluk, hutun at Paulus ninim it Ala aburi enasini ovok erogo werekma Yakubus bika lagagup. <sup>19</sup> Bikugu lagagurik, at Paulus ako en heyaga wakbisiluk, Ala en okbagya hegek, it weram Yakuri dek menda ogonivit lagya lagagi ako ovok erogo mbilinogo yugeragagi.

<sup>20</sup> Mbilinogo yugeragagi ako enaruk hunggu lagagwarik, Ala siyabagagwa. Siyabagu lagagwarik, it Ala aburi enasini ako Paulus yugugu dugwit, "Nenaswei, Paulus wai. It Yakuri menda yi ap ndi ap ovok Yesus avyarat umbutugwa ovara, it ovok Ala wene Musa dirup watigi ako enendawi andi adigat wenggelek

dugwit, ogarit lagwi yi, inisaliga? <sup>21</sup> Ap en yugurugu dugwit, 'At Paulus en, it Yakuri menda ap-akwa weram menda enanggelekma agarwik ako mamulirigya dugwit, "Ala wene Musa dirup watigi ako mbo bas," iri dugwit, "Hit henaburi enagamut mbanggwis, it ap Yakuri ogasagwi menda ako ogagwi, ogarubuk," yugeraliga,' yiluk, yugeregek nagwis ako it enaruk honggao. <sup>22</sup> Eke, hat wagen enaruk hulusogom atma, nit nggarogo ogaruk? <sup>23</sup> yiluk, wene mbanggup yukhisagwi yi ogaru."

"Ap eneyave 4 en ambi ogarup hologo Ala yugigao ninim werekma, <sup>24</sup> yogak hat hinim lagya dogomindik, nit Yakuri nenandogon it ap imam en neneyave 'horek' hak arupwak yiluk is ndilisagwi andi, it eneyave is ndibugwis, hat ogo heyave anderogo is ndibagagwi, † ogagu dogomundik, it iniris mbalupwak yiluk, Ala ake belagwi ako haren belalo. Andi ogarimi vaga Ala wene yugup Musa dirup mbanggigi ako hat ogo ogagya heyalok, Paulus ogasiga hunggup ako, adem dek hegek yagalagwi inigup, ombarusugom atma, andero-go ogarit elalo. <sup>25</sup> Eke, it weram Yakuri dek menda en Yesus ane avyarat ombasagwi ako andi, nit un surat vaga watu dugwit: Wam madis anggom warek naup moga. Amuya naup moga. Yi menda ndi menda honak warek amuya winggitek halok naup moga. Wanggis waup moga, yiluk, hologo bagagup ako vage dirup mbalogo lakbogogup," yiluk, yugogogwa. <sup>26</sup> Yugugu lagagwama, nogo yiluk, hutun, Paulus en ap eneyave 4 ako wogonombolok lagya lagagirik, it inim is enovaga ndibogogwa. Ndibugu lagagwama, Ala awi valekma nunggugu lagagwarik, it is enovaga ndibisiluk dogop hudi andi, o ngga vaga atma akluk enadik-enadik Ala ake baup ako yugeragagi.

#### At Paulus vagatugwa wene

<sup>27</sup> Ndugwis 7 hudi agya hegek, it Yakuri o Asia menda Paulus eyave Ala awi valekma andoma inil hugu lagagwarik, it awakwa ombok homago ovok enendawima manggu dugwit, eyave vakbaluk, <sup>28</sup> "Ap Iserali menda wai! Hodo erogo vagarimanes! Ap yi en, yi awi ndi awi mamuleregek lagya dugwit, nit nenavok mbalit lagya, Ala wene yugup Musa dirup mbanggigi ako inim, Ala awi valek yi inim, weyak erogo baik lagya, ogasiga menda yi vakneranes. Eke at ako en ap Yunani menda wogonombolok, Ala awi valekma nunggu wagu lagarwik, o mogama weyak erogo bagas," †† yiluk, enane yanjak-hanjak yugeragagwa. <sup>29</sup> (At Toropimus o Epesus

† It ap Yakuri menda en, ap weram Yakuri dek menda inim welagagwarikmu enendawi inim eneyave inim 'horek dek' hak agwi umbutu lagagwa. Andi halok, enendawi inim, eneyave inim 'horek' hak arupwak yiluk, ap imam en is ambukumat enovaga ndibugu lagagwa, enandogon anderogo ogagu lagagwa. At Paulus ako ap weram Yakuri dek menda inim welagagwarikmu it Yakuri menda enendawi sek arupwak yiluk at ogo anderogo ogarupwak yiluk yugogogwa. †† Ap Yunani menda andi ap Yakuri dek menda halok, Ala awi valekma nunggup moga. Nunggugu-selok, o mogama ako weyak erogo bagas yugu lagagwa. Paulus en ap Yunani menda wogonom-

menda Paulus it mberen o kota Yerusalem nagwis inigu lagagwarik, Paulus en wolok, Ala awi valekma nonggagao ai, ombakluk, yagagwa.)

<sup>30</sup> Yugurugu lagagwama, o kota akoma awakwa ovok mendok yiluk, vupuk homari wagu lagagwarik, Paulus ininggis vakbaluk, Ala awi valekma en nggigilogo wibaluk, sogop latugwa. <sup>31</sup> Nggigilogo wibagu lagagwarik, waruguluk ogagusigik, "O kota Yerusalem ovok nadok-kadok ogasagwi," yiluk, it yegen werek Oroma menda enasin ako yugiri lagu lagagwama, <sup>32</sup> at ako en arwi yegen werek menda inim, it enowai enaruwam agarwik inim, wogonombolok, vupuk it awakwa homago ako enadema lagagwa. Awakwa en it yegen werek menda enasin inim wagwi inil inigu lagagwarik, it Paulus watwis ako mbup yagagwa.

<sup>33</sup> Mbup yugu lagagwama, at yegen werek menda enasin ako wagya lagagirik, Paulus inggis vagogo, "Mbusi heda mberen vaga mares," yiluk, yugirigya lagagirik, "Ap yi sa? Eke, at ngga ogaga halok yagalagwi? Eres," yiluk, hemerinipigi. <sup>34</sup> Hemerinipu lagagimu, it awakwa wisane homago ako enane ombok vaga ambi yegek, ambi yegek, yugu dugwit, enane nadok-kadok yugu-selok, adem belalup meyan agya lagagimu, "Wolok o nit yegen werek menda nenamwa akoma elales," yugeragagi. <sup>35</sup> Yugeragagi wolok ndanggi vaga ari wagusim, it awakwa wisane homago ako waruguluk linggiluluk lagu lagagwama, it yegen werek menda ako en Paulus eyave legogo o it enamwa maba laguluk, wolok lagusigik, <sup>36</sup> it awakwa wisane homago ako musek yanjak-hanjak yagan wagu dugwit, "Mondok elese dek erogo basogom!" yagan lagagwa.

#### Paulus wene sigam erogo yugeragagi wene

<sup>37</sup> O yegen werek menda enamwa mabaguluk ogagusigik, Paulus en it ap yegen werek menda enasin ako yugugu dugwit, "Nasin o. An wene ambi yukhisogon."

Yugugu lagagimu, Paulus yugugu dugwit, "Hat Yunani enane helup a?" <sup>38</sup> Yugugu lagagirik, "O endak, ap Mesir menda ambi en, 'Nenadik dogop,' yiluk, awakwa enendawi nggaganggu dugwit, sale-vale ogonetek lagya lagagirik, ap enedup enayegen werek menda wisane empat ribu wogonombolok, harumu awakwa dekma bisa lagao ako andi, hat a dek a?"

<sup>39</sup> Yugugu lagagimu, Paulus en, "Andi an dek o. An ap Yakuri menda aro. Eke, o Kilikiya kota Tarusus akoma, 'Ai, andoma dukli ale,' ombasagwima endaklagagis nawerek atma, it awakwa an wene ambi yugeraup sek a?"

<sup>40</sup> Yugugu lagagimu, it yegen werek menda enasin ako en, "E o. Yugeran," yugugu lagagimu, Paulus ndanggi vaga mendek dugwit, inggi-vaga, "Mbauk do-

bolok nonggegetek ovara, enane huluk wolok nonggwagas yagagwa.

gones," yugurigya lagagirik, enane mbup yugu lagagwama, Iberani enane vaga yugurigya dugwit:

**22** "Nowa-nasin o. Hit wene novaga lobalogo bagep ako adem mbilinogo yukherayogon, henaruk holek dogwes," yiluk, <sup>2</sup>Iberani enane vaga yugurigya enaruk hunggu lagagwarik, enane ovok mbup yugu lagagwama, at Paulus en yugurigya dugwit <sup>3</sup>"An yi, ap Yakuri menda. Eke, o Kilikiya kota Tarusus endaklagagis ovara, o kota yoma dugwit sawe agagis. Ap Nggamaliyel en wene des erogo mamulnugu dugwit, Musa wene yugup nenasini nenombawi ogagu lagagwa ako inim yuknugu lagagi. Yuknugu lagagi andi vaga hit yogak henendawi henanggon dek dugwit Ala ake yiluk ogasagwi hak, an ogo anderogo at Ala ake yiluk, nendawi nanggon dek dugwit ogagya lagagis.

<sup>4</sup>Ogagya dugwit, it avakwa Sup Iniluk Dogop Wene mussek lagwi ako, enarigiluk anggin-mbanggin oginipu dugwit, ap inim, akwa inim, heda magago lembaga mabugu lagagis. <sup>5</sup>An ogagya lagagis andi, at imam inis ombok winimen agarik ako inim, nenasini wene amburup mbalisagwi menda inim, inil neyagu lagagwama, iren yukheramwak. Eke, it ako en enaswei o Ndamasik agarwik ako inil hapwak yiluk, dirup warogo woknugu lagagwama, wolok, it ap Sup Iniluk Dogop Wene mussek lendagwi ako heda magogo o Yerusalem o yoma en anggin-mbanggin okbisauguluk, enamusek o Ndamasik lagagis," yiluk, yugeragagi.

#### Paulus avyarat imbitigi ako yugeragagi wene

(Nap 9:1-19; 26:12-18)

<sup>6</sup>Yugurigya lagagi ambi inim yugurigya dugwit, "O Ndamasik horok vanggo yi lagya lagagimu, o dingga supuk erogo mbogot-vaga en abya yovalevet higya lagagimu nil amumwis igya dugwit nadema wombaba wagagi. <sup>7</sup>Wombaba wagya lagagimu, an wema ndun yi wombagirik werekma, ane ambi iri dugwit, 'Saulus. Saulus. Hat nggarogo yiluk anggin-mbanggin erogo narit landiga?' yiluk, ane iris naruk hunggis.

<sup>8</sup>Iris naruk hunggu lagagirik, 'Ai, Nasin. Hat sa o?' Yugugu lagagimu, 'Dek o. Hat anggin-mbanggin erogo narit landiga Yesus Nasaret menda an aro,' yiluk, yuknogogi. <sup>9</sup>An ninim lagagup ako abya adigat hagagwa ovara, at ane yuknogogi ako andi, dibagatek at welagagwa.

<sup>10</sup>Yuknugu lagagimu, 'Nasin o. An nggarogo ogarik?' yugugu lagagimu, At Nasin en, 'Mendok yiluk, o Ndamasik andoma elak. Andoma nunggwigya heyalok, hat yi ogagek ndi ogagek ogagya dogop hologo bagagi ako yukhirisogon.' <sup>11</sup>Yuknugu lagagimu, abya yevedogo mo inggis-angangga hak ogagagi vaga nil mbuk agya lagagimu, an ninim wagagis ako en ninggis vaknombolok Ndamasik bani lagagwa.

<sup>12</sup>Bani lagagwa, o Ndamasik andoma werekma ap ambi inis Ananiyas nadoma wagagi. Ap andi, Ala alon imbitiya dugwit, Ala wene yugup Musa en dirup watigi ako des erogo ogagya lagagi, it ap Yakuri andoma

ovok erogo agayuk wutu lagagwa. <sup>13</sup>At ako an nadoma mendek yi wagya lagagirik, 'Naswe Saulus wai, hil awiya akluk yokanen,' yiluk, ao yuknugu hegek nil awiya agya lagagirik, eyave hagagis.

<sup>14</sup>Higya lagagimu, aren yuknugu dugwit, 'Nenom-bawi Enasin Ala endawi ombasiga menda helup agya, At Endawi Mot Sek Adigat Agarik ako hil higya, eke, At ane iris ako haruk hunggu, ogagya dogonyok yiluk denogo bagagagi o. <sup>15</sup>Hil higya, iris haruk hunggu, ogagen ako vagalogo yi avakwa ndi avakwa ovok yugeregek lagya dogonyok yiluk, denogo bagagagi.

<sup>16</sup>Eke, yogwak andi, hendawi yunggup yegek ogarubuk. Mendok yiluk, ima wombabagasogon. Homa-luk ako Hasin Inis Ombok Yesus en hotheramwak yiluk, hodo erogo nggino yuguru,' yiluk, yuknogogi o" yugeragagi.

#### It weram Yakuri dek menda yugerapwak yiluk ayonggo bagagi wene

<sup>17</sup>Yugurigya lagagirik, Paulus en ambi inim yugurigya dugwit, "Andi okbaluk, neyami vaga o Yerusalem yoma wagya lagagirik, Ala awi valekma samban ogagyama nogo heda nabi vaga higya dugwit, <sup>18</sup>Nasin en yuknugu dugwit, 'An navok vagalogo yugerami ako hulusogom dekma, o Yerusalem hekbaluk, hodo erogo o adikmu hunogoma elak.'

<sup>19</sup>Yuknugu lagagimu, 'Nasin o. Avakwa Yakuri samban ogasagwima dombok it ap enendawi hovaga vanggabuluk avyarat umbutugwa ako, heda marogo lembaga mabugu, yawi inita, ogagya lagagis ako, enelup o. <sup>20</sup>Eke, Hat havok yugurigya lagagi Sepanus ako, watu-sigik, an andenam dugwit, "At ogo Warup", ombakluk, sogwes yum weram menda nggolalek andenam vagogo welagagis,' yiluk, yugogogis.

<sup>21</sup>Yugugu lagagimu, Nasin en an yuknugu dugwit, 'It ap weram Yakuri dek menda agarwikmu o adumu andoma lakbagaup, imbitirikmu, elak,' yuknugu hagagis," yiluk, yugeragagi.

<sup>22</sup>It avakwa homago ako at Paulus ap weram Yakuri dek menda Yesus wene ako yugeregek laup wene andi iris enaruk hobaluk, "Ap yerogo menda yi, iluk dogop dek. Mondok elese dek erogo basogom," yiluk, enane yanjak-kanjak yagagwa.

<sup>23</sup>Enane yanjak-kanjak yugu dugwit, sogwes yum nggolalogo mbo bagwi, wen mupwak havedogo lisilogo lakbagwi, ogagusigik, <sup>24</sup>it ap yegen werek menda enasin ako en, "Ap yi, o nit yegen werek menda nenanwa mabagu dogomundik, mbup yawi watu dugwit, adem ngga ogaga vaga warupwak yiluk yanjak-kanjak yagalagwi ako, aigwakma womanes!" <sup>25</sup>Aori yugurigya lagagimu, wolok lagu lagagwarik, yawi warupwak yiluk heda magu lagagwama, it ap yegen werek menda enasin avema menda ambi o andenam werekma, Paulus en at yugugu dugwit, "Hiren ap Oroma menda sek ogaga weyak ogaga owak dibagatek

dugwit, yawi initu dogop wene yugup ambi werek a, dek a?" †

<sup>26</sup> Yugugu ako aruk hobaluk, at yegen werek menda ako owa adema lagya lagagirik, yugugu dugwit, "At ap andi, Oroma menda atma, hat nggarogo ogarup yiluk yagaliga?" Yugugu lagagimu, <sup>27</sup> Paulus adema lagya lagagirik, yugugu dugwit, "Hat Oroma menda avyarat a? Yukniru o."

Yiluk, hemet higya lagagimu, "Avyarat," yugogogi.

<sup>28</sup> Yugugu lagagimu, it yegen werek enasin ako en, "Ninis unggul Oroma menda arigiluk onngo ombok bagagis o."

Yugugu lagagimu, at Paulus ako en, "Hat Oroma menda arigiluk onngo bagagin ovara, an andi, an nasin-nisa Oroma menda atma, an ogo Oroma menda endaklagagis," yugogogi.

<sup>29</sup> It at aigwakma waguluk yiluk ogagagwa menda, yugogogi ako enaruk hunggu lagagwarik, "Avyak! Hekbasogom," yiluk, mbup yi lagagwa. Eke, at yegen werek menda enasin ako en ogo, "Paulus o Oroma menda hegek, heda magima, wi!" yiluk, alon wisane agagi.

**It wene amburup mbalisagwi menda yugeragagi wene**

<sup>30</sup> Nogo yiluk, hutun ap yegen werek menda enasin ako en, "It Yakuri nggarogo yiluk enane ovaga lobalogo bagao des erogo nelup arisogon," imbita dugwit, Paulus visilogo hekbagya lagagirik, it ap imam-imam enasini inim, it wene amburup mbalisagwi menda inim, homari warupwak yiluk enayonggo bagya lagagimu, homari wagagwama, Paulus ako wolok, enadema ilim mendok okbagagi.

**23** At Paulus ako wolok, ilim mendok okbagya lagagimu, it wene amburup mbalisagwi menda ako il vurek dugwit, "Naswei o. An Ala avema dugwit, o muk en yogak hudi ogarit lagya dugwit an ogagya lagi ako ambi weyak ogagatek nendawi ugun seyalek at agirik o." <sup>2</sup> Yugeragagi andi vaga, at imam inis ombok winimen agarik Ananiyas en it ap Paulus adema mendek welagagwa ako yugirigya dugwit, "Abis sagalogo wares," <sup>3</sup> yugirigya lagagimu, Paulus ako en at yugugu dugwit, "Yo weyak hegek agamut adigat amburup warek sek agarik hak, hagamut adigat sek agindik yi, Ala en mondok harisogon aro. 'At Ala wene yugup Musa dirup mbanggigi ako wane-wane ogaga a, dek a?' yiluk, nawene amburup des erogo mbaluguluk horaik agindik ovara, an narupwak yiluk ap yugeregen andi vaga haren wene yugup ako weyak erogo bagya heyagi o," yugogogi.

† Ap Oroma menda halok, wene yugup werekma, enanggadi watu dugwit enowak dilup andi moga. Eke, yawi initwis, yo vaga lobalogo bugwis ogarup and moga. It ap nin Oroma dek menda enanggadi watu dugwit enowak dilup andi sek at. Eke yawi initwis, yo vaga lobalogo bugwis, ogarup andi moga dek. At Paulus ako ap Yakuri menda ovara o kota Tarusus endaklagagirikmu, ap Oroma menda at yugu lagagwa. Andi halok at yawi warup andi moga.

<sup>4</sup> Yugugu lagagimu, Paulus adema welagagwa ako en at Paulus yugugu dugwit, "Hat Ala ayeloman ap imam nenasin inis ombok yi meyan imbitya dugwit, yagaliga yi?"

<sup>5</sup> Yugugu lagagwama, at Paulus en, "At imam inis ombok winimen agarik ako andi, ninggutma yigi o, naswei. Ap akwa enasin hinim agarik ako, henane weyak at ovaga babak, yiluk, dirup mbalek agarik ako an nelup aro," yugeragagi.

<sup>6</sup> Yugirigya lagagirik, at Paulus ako en it wene amburup mbalisagwi menda nin andi, Saduki menda, it nin andi, Parisi menda inim, werek yedok inugu lagagirik, "Naswei. An ap Parisi menda aro. Eke, nasini ogo Parisi menda adigat. Nit hambuluk niniluk erogo mendok yup wene andi, avyarat arugwi atma yiluk, nape wenggelek neyalok, nawene amburup mbaluguluk agipik hinigis," yiluk, ane ombok vaga yugeragagi.

<sup>7</sup> Yugirigya lagagimu, it Parisi menda inim, Saduki menda inim, wenemuk yugu lagagwarik, it homagagwa ako, ir-it ogot-hedagagwa. <sup>8</sup> (It Saduki menda ako en, "Ap akwa hambuluk iniluk erogo mendok yusogonbuk. Malaikat inim, ap akwa enanggela inim, andi ogo agarwik mondok dek o," yagalagwi ovara, it Parisi menda en andi, "Andi ovok erogo agarwik, eke ap akwa hambuluk iniluk erogo mendok yusogon," yugu dugwit, inim ogot-hedagagwa.)

<sup>9</sup> Ogotbaluk, enane yanjak-hanjak yugu dugwit, it Parisi menda Musa wene mbalek mamulurugu lagagwa menda nin en, mendek yiluk yugurugu dugwit, "At yi, weyak ambi ogagetek higyo o. Ap akwa enanggela ambi en yugogogi vaga yagaliga a, malaikat ambi en yugogogi vaga yagaliga a?" yiluk, enane winimuk ombok yagagwa.

<sup>10</sup> Enane winimuk yugu dugwit, it wene ombok alelo watu-selok, it ap yegen werek menda enasin en Paulus lirilik-mariluk ogagu-sawen, at aori ako yugirigya dugwit, "It homago enanggelekma wa nunggugu dogomundik, eyave wolok o nit nenamwa akoma mabelales," yiluk, yugirigya lagagimu, ndatak ogagagwa.

<sup>11</sup> Nogo yiluk, heveret hup akoma werekma, Nenasin Yesus at Paulus adema wagya lagagirik, mendek dugwit, "An Yesus Henowa Inis Ombok dogogilik Ala en denogo baninggigi wene ako o Yerusalem des erogo yugirigya lagen ako wane-wane, havis o Oroma andoma yugeregek laupma, hendawi wadok dek dogwen," yugogogi.

**Paulus waruguluk avok mbanggugwa wene**

<sup>12</sup> Hutun o yanggo iri lagagimu, it Yakuri menda homakbaluk wene mbauk erogo mbangu dugwit, "At Paulus watitek dugwit, nit erom inim, is inim, andi naup mondok dek," yiluk, Ala inis vaga hanum mbanggugwa. <sup>13</sup> It eneyave dambulik 40 nin inim homakbaluk, eyave warup yiluk wene mbauk erogo mbanggugwa.



<sup>14</sup> Wene mbabaluk, it ap imam-imam enasini ap ombok-ombok ako inim, it Yakuri enasini inim, it werékma, enadema lagu lagagwarik, yugurugu dugwit, "At Paulus watitek dugwit, nit yi menda ndi menda naup mondok dek o, yiluk, Ala inis vaga mondok hanum mbanggup. <sup>15</sup> Andi atma, yogak hit inim, it wene amburup mbalisagwi menda inim, un huluk Paulus ambi inim des erogo aigwakma wapwak yiluk, at yegen werék menda enasin ako en wolok warupwak yiluk, yonggo lakbisamima yuguri lagusigik, nit sup vaga hanjalek werékma, wolok yoma ari wagetekma, sup vaga andenam wakbasogom aro," yiluk, yugeragagwa.

<sup>16</sup> At Paulus waruguluk sup vaga hanjali laup yagagwa ako ambonggo en aruk hunggu lagagirik, at Paulus it yegen werék menda enamwa werékma nunggwigya lagagirik, hurimbis yugogogi.

<sup>17</sup> Hurimbis yugugu lagagimu, at Paulus ako en it yegen werék menda enasin avema menda ambi, yanggup yugogogi wagya lagagimu, yugugu dugwit, "At apsawe yi en, henasin wene ambi yugurupwak yiluk wagarikmu, wolok elak."

<sup>18</sup> Yugugu lagagimu, apsawe ako wolok it enasin adema balagya lagagirik, yugugu dugwit, "At Paulus heda mago ako, neyanggup yuknugu lagama, lagya lagirik, 'Apsawe yi en, henasin wene ambi yugurupwak yiluk wagama, wolok elak,' yuknugu lagama, yukhurupwak yiluk wolok wagi."

<sup>19</sup> Yugugu lagagimu, enasin ako en apsawe ako inggis vagakluk, enadikmu lagu lagagwarik, mbauk erogo yugugu dugwit, "Hat wene yuknirigilik wagen ako iru o."

<sup>20</sup> Yugugu lagagimu, at apsawe ako en, "It ap Yakuri en un huluk hutun hat Paulus wolok, it wene amburup mbalisagwi menda en ambi inim des erogo aigwakma waup wolok lanok yiluk yukhiri warup hologo bagaorikmu, <sup>21</sup> yukhiri waguselok, enane hulup mondok dek. It Yakuri menda eneyave dambulik 40 nin inim en, 'At Paulus watitek dugwit, erom inim, is inim, nit naup mondok dek,' yiluk, Ala inis vaga hanum mbabaluk hanjalek dugwit, hat iri heyao adigat enaruk agarwik," yugogogi.

<sup>22</sup> Yugugu lagagimu, enasin ako en apsawe yugugu dugwit, "Hat yuknigin andi, ap hunogo ambi mondok yugerabuk," yiluk, aruk wakbaluk, "Elak," yugogogi.

#### Paulus Gubernur Velikis adema ba lagagwa wene

<sup>23</sup> Yugugu lagagirik, it yegen werék menda enasin at avema menda mberen eneyanggup yugirigya lagagirik, wagu lagagwama, yugirigya dugwit, "O hup jam 9 vaga o Kaisareya laguluk ap yegen werék menda eneyave 200 inim, ap yegen werék kuda ambot-vaga horaik lendagwi menda eneyave 70 inim, eke, ap enaregowa werék eneyave 200 inim, mondok dikduk ogagu dogomundik, <sup>24</sup> at Paulus ako, kuda ambot-vaga horabaluk, enewogogo ap nenowa gubernur Velikis

adema balapwak yiluk yugeranes," yiluk, yugurigya lagagirik, <sup>25</sup> vipuk ogagusigik, surat-vaga dirup mbanggya dugwit, yerogo yagagi:

<sup>26</sup> "Hinis mondok siyalek agindik nenasin Gubernur Velikis wa. An Kolaudiyus Lisiyas en wene ambi yukhisogon.

<sup>27</sup> Ap yi, it Yakuri menda en vakbaluk, mondok waruguluk ogagao menda, 'An Oroma menda,' iris ako naruk hobaluk, naori yegen werék menda ninim agap wendari lagu lagurik, <sup>28</sup> Adem ngga vaga warup yugu-samwi? yiluk, wolok it wene amburup mbalisagwi menda enadema lagi. <sup>29</sup> Enadema lagya lagimu, iren yugu dugwit, 'At ako nit Yakuri wene yugup dirup mbalek yerogo-nderogo ogarup wene saganggas', yiluk, yugu-sigik ovara, 'Mondok warup. Heda marogo lembaga mabaup', yagao andi, adem dek hegek yagao highi. <sup>30</sup> Eke, 'Warup, wene mbauk erogo mbanggao,' yiluk, yuknugu naruk hunggu lagirik, mbikit hat hadema lakba wagya, eke, it enane ovaga lobalogo bagao ako, vagalogo yukhurupwak yiluk, Yuguri elales, yiluk, yugurigya, ogagi o, yiluk, an Kolaudiyus Lisiyas en yukhisiga, nasin wa," yiluk, dirup mbanggigi.

ambot-vaga horaik lendagwi menda.

<sup>31</sup> Dirup mbanggya lagagirik, "Wolok elales," yugeragagi wane-wane it yegen werék menda ako o hup Paulus wolok, o Andipatiris hudi balagagwa. <sup>32</sup> Eke, nogo yiluk, hutun en it yegen werék kuda ambot-vaga nelagwi menda ako en Paulus ba lapwak yiluk, lakbugu lagagwarik, wolok lagusigik, it yegen werék menda ako en eneyami-vaga enamwa lagagwa. <sup>33</sup> It kuda ambot-vaga lendagwi menda en Paulus wolok o Kaisareya nunggu lagagwarik, ap enowa gubernur ako dirup mbalek ako wogugu dugwit, Paulus eyave ako at inggimu bagagwa. <sup>34</sup> Dirup warek ako bikhigya lagagirik, "Hat hawi ngga menda?" yiluk, hemetigya lagagimu, "Dek! An nawi Kilikiya aro," yugugu lagagimu, <sup>35</sup> "Enane hovaga lobalogo bagao ako, waguselok, adem belalusogom," yugugu lagagirik, "Herodes awi ombok valekma wolok lagu dogomundik, aruwam dogones," yiluk, aburi yugeragagi.

#### Enane Paulus ovaga bagagwa wene

**24** Ndugwis 5 nogo yiluk, ap imam inis ombok inim, ap Oroma wene yugup ilup it Yakuri enavitik agagi menda inis Terutulus inim, ako en enowa gubernur ako adema lagu lagagwarik, "Paulus weyak ogagagi ako yi o," yiluk, wene yugogogwa.

<sup>2</sup> Yugugu lagagwama, Paulus warupwak yiluk ayonggo bagagi wagya lagagimu, at Terutulus en, "Paulus ogagagi ako yi o," yiluk, gubernur yugugu dugwit,

"Ai wa! Nenasin Velikis hat nenengge heyagek o muk en yogak hudi nenendawi ugun adenggen vaga agurik. Hat wene sek hulisiga vaga, o yoma ovok ne-

nake sek erogo bininggigin. <sup>3</sup>Yi awi ndi awi yi ogagek ndi ogagek mot-mot adigat ogagya heyalok, Nenasin, wa! yukhisagwi. <sup>4</sup>An wene adup yagan lagya neyalok, hanggon okhita hao en, dul erogo iri neyagek, hendawi sagain vaga haruk hunggu dogonyok yiluk, Yu, yukniru."

<sup>5</sup>Iri lagagirik, "Ap yi, avakwa nadok-hadok ogonivit lagya dugwit, it Yakuri yi awi ndi awi ovok enendawima malit lagya higyo. Ap Nasaret menda ane welagwi ako enasin araro. Eke, Ala awi valekma weyak erogo bagiluk ogagyama vagatup. <sup>8</sup>At yerogo ogaga, nderogo ogaga, yiluk, ovaga bagyo ako, ovok erogo hat des erogo adem senggu dogomindik, 'Avyarat weyak ogaga,' ombarugun." <sup>9</sup>Yugugu lagagimu, it Yakuri homagagwa ako en ogo, "At wene ovaga bagas andi, avyarat higyo," yiluk, yugogogwa.

### Paulus en Velikis yugogogi wene

<sup>10</sup>Yugu lagagwama, it enasin gubernur ako inggi wene vaga, "Hat iru," yugugu lagagimu, Paulus ako en yugugu dugwit, "Nit avakwa Yakuri menda ovok haren ninawene amburup mbanggya heyagek, yi tahun ndi tahun oklaga an nelupma, nalon dek dugwit, an novaga lobalogo bagao wene ako vagalogo yukhisogon."

<sup>11</sup>Yugugu lagagirik, "An ndugwis 12 hudi endak vaga o Yerusalem samban ogarigilik lagagis andi, haren, 'Yi avyarat yuknigas,' embetetek halok, it avakwa hemet inisaup sek aro. <sup>12</sup>An andoma dugwit, Ala awi valekma ninim wene watya, eke, it Yakuri samban ogasagwima inim, o kota Yerusalem inim, andoma ap homago nane-hane yagan lagu dogopwak yiluk enendawima molanggu, ogagya ambi neyagetek. <sup>13</sup>Eke, yogak wene an novaga banilagwi andi ogo, adem dekma, it yugwi hat avyarat ombarinyok yiluk yukhirup andi, dek hayogon o, nasin.

<sup>14</sup>Ala wene yugup Musa dirup mbanggigi inim, buku navi-navi dirup warek ako inim, ovok avyarat ombasigama, Sup Yesus Ambetaga Lagu Dugwit Iniluk Mondok Dogop Wene ako musek landiga andi, it Yakuri menda ako en, 'Wene andi huluk wene aro,' yiluk, yagalagwi ovara, an wene andi ndatak musek lagya dugwit, nenombawi Enasin Ala siyabaliga, andi avyarat vagalogo yukhisiga, nasin. <sup>15</sup>It weyak ogasagwi menda inim, sek ogasagwi menda inim, hambuluk lendagwima Ala en iniluk erogo mendok okbisaup, nape wenggelek agirik andi, irogo enape wenggelek agarwik. <sup>16</sup>Anderogoma, Ala inim, avakwa inim, inivaga an okbisayogon vaga nendawi ugun seyalek ogagya dogogilik dibaluk ogasiga.

<sup>17</sup>Eke, tahun maren hudi o hunogoma welagagirik, an naswei Yakuri menda enabwa en un wogeraup inim, Ala ake bago inim, wolok neyami vaga o Yerusalem wogora lagi. <sup>18</sup>Wogora lagya lagirik, Ala awi valekma avakwa wisane ninim homagwi, nadok-kadok ogagya, ogagetek, ugun horek hak neyagek, <sup>19</sup>it ap Yakuri Asia

menda nin andenam werek inigis ako en an ambi ogagya neyagao hawen, iren hat hivaga enane novaga banup sek ovara, nanggadi wakbani wagaobuk! <sup>20</sup>Yi wene ndi wene yugirigi vaga dek. Ata, it wisane inivaga, 'Nit hambuluk niniluk erogo mendok yup andi, nendawi wenggelek halok, nawene mbaluguluk wagu hinigis,' yiluk, wene maduk andi nane ombok vaga yugirigi andi † nelup ovara, ambi inim ogagya neyagao hawen, iren adigat vagalogo yukhurupwak," yugeragagi.

<sup>22</sup>Yugirigya lagagimu, Velikis ako en Sup Yesus Ambetaga Lagu Dugwit Iniluk Mondok Dogop Wene yugwi ako, des erogo elup werekma, "Hivis it yegen werek menda wisane homago enasin Lisiyas ako wagya halok, awene an amburup mbalisogonma, wilitala." <sup>23</sup>Yugirigya lagagirik, at yegen werek menda enowa ako yugugu dugwit, "Paulus andi, heda mago hak enewogogo vagogo werekma, aswei en ake wogori waguselok andi, sek, yugerano," yiluk, yugogogi.

### Ap Velikis ogwa inigik, yugeragagi wene

<sup>24</sup>Ndugwis maren hudi welagagwarikmu, Velikis ogwa Ndurusila hwa Yakuri menda it mberen wagagwa. Wagu lagagwarik, Paulus warupwak yiluk ayonggo bagya lagagimu, wagya lagagirik, Yesus Keretus avyarat ombasagwi wene iris enaruk hunggugwa. <sup>25</sup>Eke, Paulus en sek adigat ogagu dogop wene inim, enendawi en ogarup oginivisiga ovara, sovalogo baup wene inim, hivis owak dilinivup wene ako inim, yugirigya lagagimu, at Velikis ako alon agya lagagirik, "Ovok yugurikmu, elak. Ndugwis ambi vaga yup nanonggal werek agya halok, warinyok yiluk yanggup yukhisogon," yiluk, yugogogi. <sup>26</sup>Andi yugogogi ako, "Heda mago ako visilup onngo woknirumwak," ombakluk, ape wenggelek dugwit, Paulus eyanggup yimi wagya halok, it mberen wene mbanggwis ogagu lagagwa.

<sup>27</sup>Anderogo ogagya lagagimu, tahun mberen okbaluk, at Velikis aveloma Perikiyus Vetus mondok okbagagwa. Eke, at Velikis en, "It Yakuri enendawi hunik nombarupwak o," yiluk, Paulus heda mago ako visilogo wibagetek winggigi.

### Kaisar en nawene amburup mbalupwak, yagagi wene

**25** At Vetus ako mondok okbagu lagagwama, o *provinsi* andoma wagya lagagirik, ndugwis henggam nogo yiluk, o Kaisareya en o Yerusalem inggigi. <sup>2</sup>Yerusalem inggiga lagagirik, werekma, it imam-imam enasini inim, it Yakuri enasini ap ombok-ombok inim, ako en Vetus adema wakluk, Paulus wene ovaga bagagwa ako mbilinogo yugogogwa. <sup>3</sup>Sup vaga wagyama, hanjabaluk, Paulus waruguluk wene mbanggu lagagwarik, at Vetus en, "E o," yumwak yiluk, ambukmu unngu dugwit, "Nasin. Hendawi hunik

† Lakbogogi Wene 23:6-8 Paulus en Saduki menda inim, Parisi menda inim, yugeragagi ako yokanes.

okninipu dugwit, Paulus o Yerusalem warupwak yiluk, ayonggo bain," yiluk, enane hunik adigat yugugu lagagwama, <sup>4</sup>"Dek o. Paulus ako, o Kaisareya vagogo agarwik atma, an vage dogomindik andoma layogon halok, <sup>5</sup>henasini ap ombok-ombok wene hulisagwi menda nin ninim lagu dogomindik, avyarat weyak ogagagi halok, andoma en adigat yugurupwak," yiluk, yugeragagi.

<sup>6</sup>It inim dugwit, ndugwis 8 vaga a, 10 vaga a, inim welagagirik, o Kaisareya eyami vaga wambigya lagagirik, hutun en wene owak dilupma, owak dilisagwima nunggwigya lagagirik, Paulus wolok warupwak yiluk yugeragagi. <sup>7</sup>Wolok wagu lagagwama, at eyave ilim hegek, it Yakuri Yerusalem en wagagwa ako, walibaluk, adem dek hegek, "Yerogo ogagagi, nderogo ogagagi," yiluk, wene iya erogo adik ovaga bagagwa.

<sup>8</sup>Ovaga bagu lagagwama, Paulus ako sek-sek okhidi-ga dugwit, "Dek o, naswei. Ala wene yugup Musa wene mbalek it Yakuri ogasagwi ako saganggya; Ala awi valekma weyak erogo bagya; eke, nenasin Kaisar inis weyak erogo bagya; ogagagi, yuknisagwi yi, an ambiat mondok weyak ogagetek aro," yiluk, yugeragagi.

<sup>9</sup>Yugurigya lagagimu, at Vetus ako en it Yakuri enendawi hunik ombarupwak yiluk, Paulus ako yugugu dugwit, "Hat anderogo ogagagin, yukhisagwi yi, Yerusalem lagya dogomindik, an nivaga andoma howak dili laup sek a?"

<sup>10</sup>Yugugu lagagimu, Paulus en, "At nenasin inis ombok Kaisar owak dilisagwima yi atma, an novaga bagao yi, yoma en nowak dineraup. Anen it ap Yakuri menda ambi weyak okbugu lagetek andi, hat mondok helup aro. <sup>11</sup>Weyak ogaguselok, enasagwi ako menda ambi avyarat ogagagis halok andi, narup sek ovara, wene adem dek hegek yuknuguma, it narupwak yiluk, neyave wogeraup hiren ambi yup mondok dek aro. At Kaisar o Oroma agarik ako en nawene amburup mbalupwak," yugogogi.

<sup>12</sup>Yugugu lagagimu, Vetus ako en at arwi wene amburup mbalisagwi menda ako inim wene mbabagu lagagwarik, at Paulus yugugu dugwit, "Kaisar en adigat nawene amburup mbalupwak o,' yiluk, yegenma, Kaisar werekma at labagasogon o," yiluk, yugogogi.

#### Agiripa Mberenike it mberen yugeragagi wene

<sup>13</sup>Andi okbaluk, ndugwis maren hudi welagagirik, it Yakuri enasin inis ombok Agiripa arup hwa Mberenike it mberen en at Vetus heyaga waruguluk, o Kaisareya wagagwa. <sup>14</sup>Wagu lagagwarik, it andoma ndugwis maren hudi dukluk eneyami vaga laup umbutugwarikmu, Vetus ako en, "At Velikis wunggu dugwit, ap ambi heda mago hekbagas yoma agarik," yiluk, Paulus avok mbilinogo it Yakuri enasin inis ombok ako yugogogi.

<sup>15</sup>Yugugu dugwit, "An o Yerusalem lagya lagirik, werekma, it ap imam-imam enasini inim, ap ombok-

ombok inim, ako en, 'Anderogo ogagagi o,' yiluk, enane ovaga lobalogo baluk, waruguluk, 'Haren owak dilu,' yuknigao."

<sup>16</sup>"Yuknugu lagaoma, anen it yugirigya dugwit, 'Nit Oroma menda ninitok andi, ap ambi en it nin en wene ovaga lobalogo bagao halok andi, aren it at ovaga bagao ako enadema "Wene novaga bagep yuknires o," yugeregetek hegek, eyave weyak okbapwak yiluk wogerelagudek,' yugirigya lagima, <sup>17</sup>it ovok ninim yoma homari wagu lagarwik, werekma, an arabu dek, heveret hutun wene owak dilisagwima nunggwigya lagirik, eyave wolok warupwak yiluk yugirigi. <sup>18</sup>Yugirigya lagima wolok wagao, it ovaga bagagwa ako en mendok yiluk, 'Weyak anderogo ogagagi o,' yusogon imbiti andi, ndatak yegetek inigis. <sup>19</sup>Ata, un, it Yakuri en Ala inim hunik dogoguluk ogasagwi menda inim, eke, ap ambi inis Yesus mondok hombagagi ovara, Paulus en, 'Iluk agarik,' yagan landiga wene inim, yugu dugwit, nawene-hawene yagaoma, <sup>20</sup>wene andi menda, an dibagetek halok, nggarogonggan adem belalimi, imbitiya lagirik, 'Hat hovaga bagao yagalagwi andi, o Yerusalem en hawene mbalupwak yiluk lakbagaup sek a?' <sup>21</sup>Yugugu lagima, Paulus ako en, 'At Kaisar enat nawene mbalupwak yiluk, heda marogo mabiselagwima yoma dogosogon,' yuknugu lagama, anen, hivis Kaisar adema lakbaup atma, vagogo dogones, yugirigi," yiluk, mbilinogo yugeragagi. <sup>22</sup>Mbilinogo yugugu lagagimu, Agiripa ako en Vetus yugugu dugwit, "At ap andi, wene iris ako an ogo hulup hogop ai, ombasiga," yugugu lagagimu, Vetus ako en, "Heveret aren iri halok, hulisogon," yugogogi.

<sup>23</sup>Yugugu lagagimu, heveret hutun en Agiripa Mberenike it mberen inim, it yegen werek menda enasini ininis werek inim, it o kota andoma menda enasini ap ombok-ombok inim, mondok iniris inovagangge yirik, ap akwa enagayuk wutusigik o wene mbalisagwima akoma nunggu lagagwarik, Vetus ako en, "Paulus wolok ba omanes," yugirigya lagagimu, bawagagwa. <sup>24</sup>Bawagu lagagwama, Vetus ako en, "Nenasin hinis ombok Agiripa inim, hit yoma homagyo inim, hit ovok, Wa! yukheraliga. It Yakuri o Yerusalem en, o Kaisareya yoma en, yanjak-hanjak yugu dugwit, 'Ap yi iluk dogop dek. Wares', yuknigao ako eyave yi bikhanes. <sup>25</sup>Wares, yuknigao ovara, weyak ogaguselok, enasagwi andi menda ndatak ambi ogagetek higi ovara, at ako en, Inis ombok Kaisar en adigat nawene mbalupwak, yuknugu lagama, o Oroma andoma Kaisar werekma lakbaup imbiti. <sup>26</sup>Anderogo imbiti ovara, at ogaga ambi an dirup mbalogo nasin Kaisar ake lakbaup dek atma, at ogaga ambi adem des erogo yuknugu hiniselok, dirup Kaisar ake mbalogo lakbaup yiluk, at eyave wolok hit ovok henadema wagi. Wene adem des erogo andi, hat nenasin Agiripa en belalinyok yiluk hadema wolok wagi. <sup>27</sup>Wene ovaga bagao ako adem des erogo belanggitek

hegek, inggis heda marogo lakbaup andi, meyan higi," yiluk, yugeragagi.

### Agiripa ivaga yugeragagi wene

**26** Yugirigya lagagimu, at Agiripa en Paulus yugugu dugwit, "Hat ogagagin ako iru," yiluk, yugugu lagagimu, Paulus agap wendak-hedagiluk wene adem sigam erogo avyarat yugeragiluk, inggi-vaga en, "Mbauk dogones," yugirigya lagagirik, <sup>2</sup> "Ai, nasin *Raja* †Agiripa wa. It Yakuri en, 'Yerogo ogagagi, nderogo ogagagi,' novaga belagwi andi, o yogak hat hivaga vagalogo yukhirsogon andi, nendawi adenggen agirik o. <sup>3</sup> Nit Yakuri ogasagwi menda inim, wene ngga menda yidibaluk yagalagwi inim, hat ovok helup atma, yegek lagya neyagek, 'Hanggon,' nom-barubuk, nasin."

<sup>4</sup> "O muk avyak maduk nawi adem vaga dugwit, ogarit lagya, andi okbaluk, o Yerusalem dugwit ogagya, ogagya lagagis ako, it Yakuri menda ovok enelup aro. <sup>5</sup> Nit Yakuri wene yugup wokbaluk ogasagwi menda andi, it nin enane anye vaga yagan nagu lagagwa Parisi menda ako, an ogo it ninim yagan lagya lagagis ako, o muk en enelupma, vagalogo yukheraup embetao halok andi, yukheramwak."

<sup>6</sup> "Eke, yogak Ala en nenasini avyarat nggatuk erogo yugeragagi ako †† wene nape wenggelek agirik andi vaga woknombolok nawene diluguluk, bani wagao inigis. <sup>7</sup> Avyarat nggatuk erogo yugeragagi ako nit Yakup aburi nininis unggul 12 suku ako en, 'Atma arisogon, ail!' yiluk, umbutu dugwit, o hup-dingga, nendawi eve vaga, Ala siyabelagwi. An ogo wene andi, nape wenggelek agirik andi vaga it Yakuri en naruguluk, wene novaga bagaoma, nasin! <sup>8</sup> Anderogoma, hit nggarogo yiluk At Ala en avakwa hambisagwima en iniluk erogo mondok okbisaup andi meyan ombasagwi?"

<sup>9</sup> "Eke an ogo endak At Yesus Nasaret menda andi, inis wiyiknom-weyaknom erogo bayogon imbitya lagagirik, <sup>10</sup> o Yerusalem dugwit, anderogo ogagya lagagis. Ogagya dugwit, it ap imam-imam enasini ako en yu-knogogwa vaga it Ala aburi adik denek eneyave wisane heda marogo lembaga mabisa lagya, eke, 'Enarup a, dek a?' yugu-selok, anen, 'Enarup aro,' yugirigya, ogagya lagagis. <sup>11</sup> It Yakuri samban ogasagwima dombok edup-mbedup okbugu, eke, 'At Yesus inis wiyiknom-weyaknom erogo bas o,' yiluk, nane anye vaga yugirigya, ogagya lagagis. It avyarat ombasagwi andi, mondok nanggon inimbita dugwit, nani-nis ane yagan lagya neyalok, avakwa nin wisane enamwa o adumu andoma at enarigiluk, enamusek-enamusek lagya lagagis," yiluk, yugeragagi.

<sup>12</sup> Yugirigya lagagirik, "Anderogo ogarit lagyama, o ambi vaga it imam-imam enasini en, 'Anderogo og-

† Inis *Raja* adem andi, ap ombok negara ambi vagago welagagi halok, inis *Raja* yugu lagagwa. Ap Agiripa ako andi negara maduk ambi o *Palestina* akoma vagago welagagi. †† *Buku Daniel 12:2 yokanes.*

warup o,' yiluk, lakbanunggu lagagwama, o Ndamasik sup vaga lagya dugwit, <sup>13</sup> dingga naswei ninim la-gusim, mbogot-vaga en abinak yevedogo nit nenadema wambu wagagi. Mo il abya andi horok maduk, nasin. Eke, andi ogagagi ako andi, abya mondok eve iya erogo higya lagagirik, <sup>14</sup> nit ovok wen vaga ndun yugu lagagumu, Iberani enane vaga yuknugu dugwit, 'Saulus wai. Saulus wai. Hat nggarogo yiluk an anggin-mbanggin erogo nasiga? Hat ninim ogorek dogosogon halok, hat havis hilup arisogon atma, hat nggarogo yiluk anderogo ogarit landiga yi?' yiluk, iris naruk hunggu lagagirik, <sup>15</sup> 'Ai, Nasin. Hat sa o?'

Yugugu lagagimu, 'Dek o. Haren anggin-mbanggin erogo narit landiga ako An Yesus aro. <sup>16</sup> Hat nayeloman akluk, yogak ogagya neyagen inim, havis ogarit lagya dogop yukhirsogon ako inim, wene andi menda yugeregek lagya dogop denogo bagagiluk, yukhiri wagima, mendek iru. <sup>17</sup> It ap Yakuri inim, it weram Yakuri dek menda inim, enadema lakbagamima, iren andoma weyak okbagagu-selok, hagap wendatya dogosogon. <sup>18</sup> It o hup ovagak agarwik ako, inil venggenogo bisiluk, awiyama nunggu wagwi, eke, at ibilis avema bogogirikmu en wulukluk, Ala avema nunggu wagwi, ogarusogom, yumwak yiluk, lakbagasogon. It ako enendawi novaga vanggabaluk avyarat numbutwi-selok, enomaluk Ala en dek erogo bisiluk, at aburi denogo bogogirikmu inim lobalogo bisamwak yiluk, lakbagasogon,' yiluk, yuknogogi," yugeragagi.

### Paulus ogagya lagagi mbilinogo yugeragagi wene

<sup>19</sup> Yugirigya lagagirik, ambi inim yugirigya dugwit, Nasin Agiripa. Mbogot vaga en an nogo heda nabi heda yuknugu sigam hagagis ako, an ogagetek agirik andi dek. <sup>20</sup> Yuknogogi ako endak erogo it o Ndamasik agarwik ako yugirigya, o Yerusalem agarwik ako yugirigya, andi okbaluk, o Yudeya avilis ambot inim, it weram Yakuri dek menda inim, yugeregek lagya, ogagya dugwit, Hit ovok henendawi wenggebaluk, henomaluk vagalogo mbo bagu dogones. Eke, henomaluk mbo baluk, Ala musek lagwi avyarat henombarupwak yiluk, yi ogagek ndi ogagek eyave adigat ogarit lagu dogones, yiluk, yugirigya lagagis.

<sup>21</sup> "Anderogo yugeregek lagya lagagis andi vaga it Yakuri en Ala awi valekma andoma vakbaniluk, naruguluk ogagagwa menda, <sup>22</sup> o endak en yogak hudi, Ala en yonggatnita hegek niluk dugwit, it ap ininis werek inim, ininis dek inim, yugeraliga. Yugeraliga andi, wene adik menda ambi yugeregetek. Ata, ap Ala en yugirigya hegek yugurugu lagagwa navi-navi ako inim, at Musa inim, 'Anderogo ogarisogon o,' yiluk, avok yugurugu lagagwa wene ako vagalogo yugeraliga.

<sup>23</sup> At Ala en denogo mekbagagi Keretus ako, nit Yakuri menda inim, it weram Yakuri dek menda inim, o awiya erogo bugu dogogiluk, † yagan warogo hambigya dogomindik, hambuluk lendagwima en endak iluk akluk

mendok yisogon o, yiluk, yugu lagagwa ako yugeralliga," yiluk, yugeragagi.

<sup>24</sup> Paulus en wene andi ao yugirigya hegek, at Vetus ako ane ombok vaga iri dugwit, "Paulus wai. Hat nenek heyagi! Yi wene ndi wene mamulhedegek lagya vaga nenek hak yagan lagya heyagi."

<sup>25</sup> Yugugu lagagimu, Paulus en, "Hinis mondok siyalek agindik nasin Vetus wai. An nenek dek o. An nendawi sek en avyarat yukhisiga. <sup>26</sup> Nasin Agiripa wai. An wene yugeralliga andi, mbauk hwilago yugirigya lagibuk o. Wene an yugeralliga ako andi, hat nasin Agiripa ogo, hinggut andi dek, mondok helup imbiti. Wene andi ovok helupma, nalon dek dugwit, yukhisiga. <sup>27</sup> Nenasin Agiripa. It ap navi-navi Ala en yugirigya hegek yugurugu lagagwa wene ako, hat avyarat ombasiga a, dek a? Avyarat ombasiga an nelup."

<sup>28</sup> Yugugu lagagimu, at Agiripa en Paulus yugugu dugwit, "O yogak yi vaga at un mbikit an ap Kerisen menda okbanup embeten?"

<sup>29</sup> Yugugu lagagimu, at Paulus en, "Nasin o. Hat hadigat wanok yiluk yukhisigadek. Hat inim, it yogak hulisagwi ovok inim, an heda maknetao hak makinivup dek ovara, an Keretus wene wagagis hak, yogak waup halok, yogak at wugwi, eke, havis waup halok, havis at wugwi, ogarovovok yiluk, an henake Ala yugisiga," yiluk, yugogogi.

<sup>30</sup> Yugugu lagagimu, enasin inis ombok ako inim, enasin gubernur ako inim, hwa Mberenike inim, it avakwa horaik welagagwa ako inim, ovok mendok yiluk, <sup>31</sup> wunggu lagagwarik, "Weyak ogaguselok, heda marogo mabiselagwima mabugwis, ininitwis, ogasagwi menda anderogo ambi ogagetek higyo," yiluk, ambi yugigik ogagu lagagwarik, <sup>32</sup> at Agiripa en Vetus ako yugugu dugwit, "At ap andi, nasin Kaisar nawene amburup mbalupwak o, yilipuk en, yogak heda mago agarik ako visilogo balip," yiluk, yugogogi.

#### Mburi-vaga lagagwa wene

**27** O Italiya woknenombolok laup yiluk wene mbabaluk, Paulus inim, ap nin heda mago inim, at Kaisar avema menda yegen werek enowa inis Yulius en wogonombolok lapwak yiluk, yugogogwa. <sup>2</sup> Yugu lagagwama, mburis ombok o Adaramitium en wagya lagagirik, andoma werekma, o Asia inamut ombok yanggadek laut amban vaga kota andoma ya nonggegek ogagyama, nonggagagup. Ap Aritakus o Makedoniya awi Setalonika menda ninim nunggugu lagagurik, lagu dugwit, <sup>3</sup> hutun en nogo yiluk, o Sidon ari lagagup. Ari lagu lagagurik, at Yulius ako en Paulus abwa imbitya dugwit, "Haswei yi menda ndi menda wokhirupwak en biginigik lagya dogomindik, warup sek," yugogogi.

‡ *Adem ap akwa awiya erogo bisaup ako andi, Ala wene vaga nit Ala endawi ombasiga menda inim, Ala en nenagap wendarisiga inim, Yesus avyarat umbutu niniselok mondok-mondok niniluk dogop inim, ninilup asagwi. Lakbogogi Wene 13:47 yokanes.*

<sup>4</sup> Mburi-vaga nungguluk, andoma en lagusim havut en mburis abi nomalhegek iri dugwit, nomaliluk lagya lagagimu, o Sipurus nenena malegek alilis o havut dekma, andoma lagagup. <sup>5</sup> Lagu lagagurik, o Kiliikiya, Pambiliya inim, nenena malegek lagu dugwit, o Likiya kota Mira andoma ari lagagup. <sup>6</sup> Andoma ari lagagurik, werekma, ap yegen werek menda enowa ako en mburis Alekandiriya menda ambi, o Italiya lagiluk ogagya higya lagagirik, mburis andi vaga mabininggu lagagimu, lagagup.

<sup>7</sup> Lagu dugwit, mburis ako havut en nomaliluk lagek ogagya dugwit, mondok meyan okninipu hegek, nogo wisane yigik, o Kinidus vanggo yi lagagup. O havut ako hunik anderogo adigat ogagya halok, dilwarit lagu dugwit, o Kereta alilis andoma o Salomone nenena malegek lagagup. <sup>8</sup> Lagu lagagurik, mondok meyan okninipu hegek, o inis Avolok Dek Sek Agarikmu o, yagalagwima o kota Laseya horok andoma ari lagagup.

<sup>9</sup> Sup vaga ya nogo yigik lagu ninigik, it Yakuri *Hari Puasa* adenggen ogagu lagagwarikmu o havut endengga ogasigama, mburi-vaga laup alon edok werek agya halok, Paulus en enelup arupwak yiluk yugirigya dugwit, <sup>10</sup> "Naswei o. Nit lasogom halok, mondok weyak okninivisogon higi. Nenangge inim, mburis inim, ako adigat dek arisogon andi dek. Ata, neneyave inim dek okninivisogon higi," yugeragagi menda, <sup>11</sup> at yegen werek Yulius ako en Paulus iris ako meyan imbita lagagirik, at mburis eyave wolok naliga menda ako inim, at amburis werek inim, it yugwi adigat musek lagagi. <sup>12</sup> Lagya lagagimu, o sogwes ogagyama, † mburis andoma dogop meyan agya lagagimu, it nin wisane mbikit andoma en lakluk o Venikis dogop, umbutugwa. O is enggema Kereta o Venikis mburis nunggisigama andi, mo huruk yagaligama amot vikit inim, hware vikit inim, ogarekma o sogwes hegek dogop sek o, umbutugwa.

<sup>13</sup> Anderogo umbutugwa ovara, o selatan vikit en havut anye dek mbauk-mbauk wagya lagagimu, "Nit yerogo ogagya hegek laup imbitoma, lauk en," yiluk, mburis is en wolok lagwi en yiluk mbusi wombalek agarik ako nggolalogo mburi-vaga baluk lagu lagagurik, o Kereta horok is amban vaga andoma nenena wombalehegek lagagup.

#### Mburis inim sopal ninivup ogagagi wene

<sup>14</sup> Lagusim, iya erogo lagatekma, ndom is enggema mo it daga wandigama amot vikit en havut endengga ombok ogakluk wagya hegek, <sup>15</sup> laguluk ogagagup menda, mburis ako abi nomaliluk lagek adigat ogagya lagagimu, "Woknenombolok lapwak aro," yiluk, yugu lagagurik mburis ako lek-yamuk ogarit wolok lagya hegek, mbauk mbup yagagup. <sup>16</sup> Woknenombolok, wen ilim is enggema maduk ambi inis Kauda alilimu

† *O andoma sogwes ogagya mbeda saut henggam vaga ogasiga.*

andoma lagu lagagurik, havut en meyan okninipu hegek, mburis ombok ako en maduk ambi heda likelok lagyama, libilogo lagya hawen,<sup>17</sup> viyalogo mburis ombok vaga mabagagup. Mabagu lagagurik, mburis ombok ako eyave yanggo iri hawen, heda anye erogo makbaluk, o Siritis alilimu andoma en mburis abi yinggi-vaga denggwes yilagya hawen yiluk, enalon en yum havut wolok landiga menda sivilinik ako owatu lagagumu, havut en adigat woknenombolok lagagi.<sup>18</sup> Havut endengga en mburis ako mondok lek-yamuk okninipu lagagimu, ndugwis ambi nogo yiluk, hutun en yi menda ndi menda yidik ako hudilogo ima mbo wombabagagwa.<sup>19</sup> Andi okbaluk, ndugwis henggama vaga, mburis sek ogasagwi ako menda nin andi bagu dugwit, nin andi anggin halok ininggi-vaga wogogo ima mbo wombabagagwa.<sup>20</sup> Ndugwis wisane ninigik, mo il inim, dwadiwap inim, wulu wagetek hegek, havut adigat ogagya lagagimu, "Ai, nit is en ndokalnininisogon atma, nenagap wendak-hedaup meyan higyo o," yiluk, umbutugup.

<sup>21</sup> It ovok erom nenggetek ndugwis wisane welagagwama, Paulus ilim mendek iri lagagirik, yugirigya dugwit, "Naswei o. O Kereta en laup dek yukheragagis ako hulilipmu en nenangge dek agya, weyak okninipu, anderogo okbininelapak enewogo duklu ovara,<sup>22</sup> heneyave ambi is mondok-mondok wambusogom dek. Mburis adigat weyak asogonma, henendawi wadok dek dogovovok yiluk, yukheraliga.<sup>23</sup> An Ala abutma, avema dugwit, at eyavup ogasiga ako en yonggo lakbisa wandiga menda malaikat ambi hup ilikis nadoma lakba waga ako, yuknugu dugwit,<sup>24</sup> 'Paulus wai. Halon habuk. Hat Kaisar adema mendek yisogonma, Ala habwa en hinim mburis vaga agipik yi, hat vaga ovok enagap wendarisogon', yiluk, yuknigasma,<sup>25</sup> wen is enggema ambi vaga mburis abi denggwes yimi ovara, Ala en yuknigas andi avyarat arisogon ombasigama, henendawi wadok dek dogones, naswei," yiluk, yugeragagi.

<sup>27</sup> Is ombok yanggadek *laut* inis Adiriya o havut en lek-yamuk okninivit lagya hegek, ndugwis 14 welagagurikmu, eke, o hup ilikis agya hegek, it mburis wolok nelagwi menda ako, enendawi en, "Is amban vaga mondok vanggo yi wagyo," yiluk, umbutu lagagwarik,<sup>28</sup> helep heda magogo, "Is agurukmu ngga hudi hamwi?" yiluk, wakhegek ako wombabagu lagagwarik, agurukmu 37 meter hudi agya hagagwa. Andi okbaluk, ambukum dukluk wakugu lagagwarik, agurukmu 27 meter hudi agya hagagwa.<sup>29</sup> Hugu lagagwarik, helep vaga vanggo iri dugwit, abi denggwes iri hawen, enalon en mburis mbup yupwak yiluk, mbusi anggin werek menda 4 hudi mburis elakamu heda magogo is endawima wombabagu lagagwarik, "O hodo erogo yanggo yupwak dek, ai," umbutugwa.<sup>30</sup> Umbutwi dugwit, it mburis wolok nelagwi menda ako enagap wendak-hedaguluk hoda wulup umbutu dugwit, huluk at mbusi anggin werek menda sivilinik ako mburis abima

en is endawima wombabaup yagagwa ovara, wuluguluk mburis maduk ako ima wombabaguluk ogaguselok, Paulus en yedok inugu lagagirik,<sup>31</sup> "It mburis wolok nelagwi menda yi, mburis elola dogop dek halok andi, nenagap wendak-hedasogom dek," yiluk, at yegen werek arwi inim yugeragagi.<sup>32</sup> Yugirigya lagagimu, it yegen werek ako en mburis maduk ako is wolok lapwak yiluk, heda mbalogo wombabagagwa.

<sup>33</sup> O yanggo yigiluk ogagya hegek, Paulus en it ako erom napwak yiluk ane hunik yugirigya dugwit, "Erom nenggetek henendawi virik hinigik, ndugwis 14 hudi nogo yigik wagepma, erom nanes.<sup>34</sup> Erom nelok, henanye vaga henagap wendak-hedelok wolovovok yiluk, erom yi nanes. Hiniris ambiat ambi dek asogon dek."<sup>35</sup> Yugirigya lagagirik, erom ambi wogogo it inivaga, "Ala wa," yiluk, ugurogo ninggya lagagimu,<sup>36</sup> it enendawi hora yiluk, ovok erogo inim erom nungugwa.<sup>37</sup> Nit avakwa mburis vaga lendagwi ako, neneyave dambulik 276 hudi.<sup>38</sup> Eke, erom enagaum erogo nunggu lagagwarik, mburis so arupwak yiluk, erom gandum awi yidik ako hudilogo ima mbo wombabagagwa.

#### Mburis yinggima dililup yi lagagi wene

<sup>39</sup> O yanggo iri lagagimu, o andoma ininggut ovara, wen is yinggi leyalek inil hugu lagagwarik, "Mburis vaga andoma duk erogo lasogom," yiluk,<sup>40</sup> mbusi heda mago ako mbalogo hekbagwi, mburis abi amot ogasiga menda elakas vokot sivilinik ako visinggis, ogagagwa. Okbaluk, havut en woknenombolok yinggi leyalekma lapwak yiluk, yum sivilinik abima ilikbagu lagagwama, lagagup menda,<sup>41</sup> is anye en mburis ako yinggima aguruk dekma dililup yi lagya lagagimu, is ombak en elakamu ndino-ndano yegek ogagya dugwit, mburis elakas ako yanggalagya hegek,<sup>42</sup> it yegen werek menda ako en, "It ap heda mago ako sambu vaga wunggu-sawen, ovok inarusogom," umbutugwa menda,<sup>43</sup> it yegen werek menda enasin ako en, "Paulus agap wendarisogon," imbita dugwit, "Enarubuk," yugeragagi. Yugirigya lagagirik, "Hit sambu wasagwi henelup halok, henendak is endawima andoma soklok-soklok wambuluk, sambu vaga, is amban vaga andoma wilitala.<sup>44</sup> Eke, hit nin sambu wasagwi hininggut halok andi, mburis hobat masalek inim, yo masalek inim, andi vaga hininggis vakbaluk, enambutmu elales," yiluk, yugirigya lagagimu, nit ovok sek is amban vaga wungugup.

#### Paulus o Malata welagagi wene

**28** Is amban vaga sek wunggu lagagurik, "Wen is enggema yi inis Malata at higyo," yiluk, nenelup agagup.<sup>2</sup> Wungugurik werekma, musu wagya dug-

† It ap Oroma menda ako, ap heda mago werekma hoda wunggu-selok, it enayegen werek menda enaruwam welagagwa ako, it enasini en initu lagagwa. Andi halok, it yegen werek menda ako enalon en ap heda mago ako enarusogom umbutugwa.

wit, sogwes wisane okninipigirikmu, it avakwa enawerek andoma menda en nenabwa wisane hugu lagagwarik, hali monggalbaluk, heyaga warogo sogwes werakninipugwa. <sup>3</sup> Eke, Paulus hali erasak havedogo wolok wagya lagagirik, hubagyama, hali edup en mbas avakwa enasiga menda nggigis erogo wulu wagya dugwit, Paulus inggis mbas en aik hivitigi. <sup>4</sup> It avakwa enawerek andoma menda ako en, Paulus inggis mbas hivitigi ako ao aik hunik inil hugu lagagwarik, ambi yugigik yugu dugwit, "Ap yi, ima en sek wulu waga ovara, mbas edup watas yi vaga ap enasiga menda sigam higyoma, madis inis 'Enowak Dilisiga menda' ako at iluk dogop dek imbitirikmu, avyarat hambisogon o," yagagwa ovara, <sup>5</sup> mbas ako inggis weralogo hali hunikmu mabagagi. Hali ninggya hegek, edup yagan watitek sek welagagi. <sup>6</sup> It ako en, "Inggis virimi a, ata supuk erogo ndun yiluk, hambimi a," yiluk, inil welagagwa menda, ugun sek at welagagimu, "Ap yi, madis higyo," yiluk, yagagwa.

<sup>7</sup> Wen is enggema andok enasin ombok inis Pupiliyus ako eyavup adumu dek horok atma, helagu lagagumu, heyage wakinipu lagagirik, enendawi adenggen vaga erom menaknerelok, ninim sek ninigik, ndugwis henggam welagagup. <sup>8</sup> Ako hudi vaga at Pupiliyus asin amwa dugwit, sogwes-sogwes ogagya, irut inim ogagya lagagimu, Paulus ako adema nunggigya lagagirik, unggul inggis vakbaluk ake samban ogagya lagagimu, sek agagi. <sup>9</sup> Sek agya lagagimu, it avakwa wen is enggema edup welagagwa menda Paulus adema wagu lagagwama, sek okbogogi. <sup>10</sup> Okbugu lagagimu, it avakwa ako en, "Sek okbininggas," yiluk, enadenggen en, yi menda ndi menda woknera wagek yagagwa, eke havis nit mburi-vaga laguluk ogagu lagagumu, yi menda ndi menda dek menda, wolok woknera wagagwa.

### O Malata en Oroma lagagwa wene

<sup>11</sup> Mburis Alekandiriya menda enomadis embeklabwa inis Diyosikuri abi vaga agur-agut ogovak higiogo bagoma, wagya lagagirik, o sogwes ogagya halok, wen is enggema andoma abyam werekma, nit ako saut henggam welagagup. Welagagurik, mburis ako vaga nungguluk, lagu lagagurik, <sup>12</sup> o Sirakusa ari lagagurik, andoma ndugwis henggam welagagup. <sup>13</sup> Ndugwis henggam welagagurik, mburis vaga nunggugu lagagurik, o kota Eregiyum ari lagagup. Lagu lagagurik, hutun o selatan vikit en havut lavuliluk ogagya halok, nogo ambi yiluk, o Putioli ari lagagup. <sup>14</sup> Ari lagu lagagurik, nenaswei it Ala aburi andoma menda ninim avuk agu lagagurik, "Ninim dogosogom," yiluk, yuknurugu lagagwama, ninim samban ambiat welagagup. Anderogo ogarit o Oroma nonggagup.

<sup>15</sup> It nenaswei Ala aburi Oroma menda ako nit wendagwi enaruk hunggu lagagwarik, o vasat Apiyus,

sup vaga lagu dugwit nogo yilagwima inis O Henggam Valek, andenam en wokninivi wagu lagagwama, Paulus il inugu lagagirik, "Nasin Ala wa," yiluk, endawi adenggen agagi.

### O Oroma dugwit, ogagagi wene

<sup>16</sup> O Oroma nunggugu lagagumu, at Paulus ako o adikmu dogop sek yagagwa ovara ap ayegen werek menda ambi aruwam dogopwak yiluk bagagwa.

<sup>17</sup> Ndugwis henggam nogo yiluk, Paulus en it Yakuri enasini ap ombok-ombok andoma menda enayonggo bogogi homari wagu lagagwama, yugirigya dugwit, "Nowa-nasin. An nowa-nasin Yakuri menda sovalogo bugu, nenasini-nenombawi ogagu lagagwa ninitok hunik ogasagwi ako, sale-vale erogo bagya, ogagya lagagibuk ovara, o Yerusalem andoma en neyave vago heda maknitu lagagwarik, it ap Oroma menda en nawene mbalupwak yiluk, neyave wogeragagwa.

<sup>18</sup> An ogagagis adem belanggu lagagwarik, weyak ogaguselok, enasagwi ako menda novaga agagi ambi dek halok, visilogo banup yiluk ogagagwa ovara, <sup>19</sup> it Yakuri ako en, 'Heda visilogo hekbaup moga,' yiluk, hunik adigat yugu lagagwama, 'Kaisar en adigat nawene mbalupwak,' yugeragagis. Yugeragagis ako andi, it nowa-nasin en weyak okbanunggugwa, yiluk, yugirigiluk, yugeregetek. We un, nawene amburup mbalupwak yiluk, yugeragagis. <sup>20</sup> Wene andi yukheragiluk, wagya lagirik, 'Warupwak,' yiluk, henayonggo bagi. Eke, nit Iserali nenape wenggelek agurik nenagap wendarisiga menda ako vaga mbusi heda maknitu wene yukheragiluk henayonggo bagi," yiluk, yugeragagi.

<sup>21</sup> Yugirigya lagagimu, it ako en, "Hat ogagagin wene Yudeya en dirup mbalogo lakba waga ambi hegetek. Eke, nit nenaswei andoma en wagu lagarwik, Paulus weyak anderogo ogaga, yiluk, yuknera wagetek ovara, <sup>22</sup> avakwa yi awi ndi awi ovok en hit wene yugup musek lendagwi menda andi enanggon henombasagwi ninelupma, hat hendawi nggarogo yiluk yagaliga ako, iri heyaguluk wagyo," yiluk, yugogogwa.

<sup>23</sup> Eke, "O andi vaga ambi inim yuknerapwak," yiluk, hologo bagagwa hudi ari wagya lagagimu, Paulus werekma eneyave wisane homari wagu lagagwama, Paulus ako o hutun en Nenowa Inis Ombok Ala en denogo bagagi avema dogop wene ako sigam erogo yugirigya, eke, Yesus wene ako des erogo enelup arupwak yiluk, Ala wene yugup Musa dirup mbanggigi wene inim, navi-navi wene inim, mbilinogo yugirigya, wisane ogagya hegek, o hup agagi.

<sup>24</sup> Yugeragagi ako it nin en, "Avyarat ai?" umbutugwa ovara, it nin en andi, avyarat embetetek dugwit, <sup>25</sup> wene visibaik-danggabaik yugu lagagwarik, wuluguluk ogagusigik, Paulus en atok vaga yugeragagi ako yi: "Averiniki en navi Yesaya yugugu hegek hit henombawi yugeragagi ako andi, avyarat yugogogi. Andi,

<sup>26</sup> 'It avakwa yi, inil hugwi, enaruk hunggwis,  
 Enomaluk mbo baluk, namusek wagwis,  
 Ogaguselok,  
 An en sek okbugu neyawen,  
 'Nenendawimbuk agwi, nenaruk nggulup agwi,  
 Ninil huvulagwi,  
 Ogarup andi it mikedagagwarikmu,  
 Enaruk hunggik adigat ogarusogom ovara, dibaso-  
 gom dek.  
 Eke, inil hegek adigat ogarusogom ovara, yedok ha-  
 sogom dek,  
 Yiluk, yugeregek elak.'  
 yiluk, Yesaya wene ako yugirigya lagagirik, ambi inim  
 yugirigya dugwit, <sup>28</sup> "Anderogoma, Ala en nenagap  
 wendarup wene yi ako andi, it weram Yakuri dek men-

da hulupwak yiluk yugeregek lasogom atma, it andi,  
 hulusogom hinilup arovovok yiluk yukheraliga," yiluk,  
 yugeragagi.

[ <sup>29</sup> Wene andi, yugirigya lagagimu, it Yakuri menda  
 ako wenemuk yagan wunggugwa.]

<sup>30</sup> Tahun mberen elola en, o sidok dogop onngo  
 bagek ogagya akoma werekma, at adema wagu-selok,  
 ovok erogo endawi sek vaga woginipu lagagirik,  
<sup>31</sup> alon dek dugwit Nenowa Inis Ombok Ala en denogo  
 bagagi avema dogop wene ako yugirigya, Nenowa inis  
 ombok Yesus Keretus wene mamulirigya, vagalogo yu-  
 girigya hegek, yeok-teok okbagatek welagagwa.

Amin

Lakbogogi wene ako andi, ovok yi hudi belagwi o.



# 1 Tesalonika

**1** Ai wa, nowa-nasin. Hit Ala aburi, Nenasin Ala Nenowa Inis Ombok Yesus Keretus Ala en denogo lakba wagagi ako, hinim hunik dugwit o Tesalonika homarisagwi ako, an Paulus ogo, Silas ogo, Timotius ogo, niren wene ambi yukherasogom o.

Ala henabwa en okbugugu, henendawi ugun seyalek adenggen dogovovok yiluk, okhinipu, ogagya dogop-wak o.

## It o Tesalonika menda avyarat umbutugwa wene

<sup>2</sup> Nit hit henake samban ogagu dugwit, hit ovok agipik andi vaga ninggi-nanggi Ala, "Wa," yugisagwi.

<sup>3</sup> Hit Yesus ovaga vanggaluk avyarat ombakluk ogarit lagwi; ap akwa henendawi hunik en sek okbigik lagwi; eke, Nenasin Inis Ombok Yesus Keretus Ala en denogo lakba wagagi ako vaga vanggaluk wenggelek werekma, anggin henovaga agya hegek henendawi mbuk dugwit wugwi; ogasagwi ako andi, o ndugerek-ndagarek nenendawi wenggelek dugwit, Nenasin Ala yugisagwi o.

<sup>4</sup> Ai, nowa-nasin wa, Ala henabwa ombasiga. Niren Yesus ninim hunik dugwit, niniluk mondok dogop sek wene yukhera wagagup ako andi, we un nit nenane menda yukheregetek. Ata, Averiniki anye okbininggu hegek, yukhurugu ninigik, henendawima en, "Wene yi, mondok avyarat yuknerlagwi o," umbutu dugwit wogogup. Anderogo wugu lagagupmu, Ala mikhinipigi andi, ninelup aro.

Nit henanggelekma dugwit, hit henake nggarogo ogarit lagu lagagup ako andi, henelup aro. <sup>6</sup> Avakwa en mondok anggin-mbanggin okbugugu-sigik, Averiniki en henendawi adenggen okhinipu hegek, wene Yesus ninim hunik dugwit, niniluk mondok dogop sek wene yukhera wagagup ako, wugu lagagupik, nit Nenasin Inis Ombok Yesus ogasiga inim, nit ogasagwi inim, hit ndatak at ogagu lagagup.

<sup>7</sup> Anderogo ogagu lagagupmu, it ap akwa avyarat ombasagwi ako o Makedoniya inim, o Akaya inim, ovok erogo hit Tesalonika menda ogasagwi vaga il wakhegek ogasagwi. <sup>8</sup> Hit ogasagwi vaga Nenasin ane ako o Makedoniya inim, o Akaya inim, andoma adigat mbigalit lagetek. Ata, yi awi ndi awi ovok erogo hit Ala avyarat umbutugup ako mbigalit lagagima, nit wene ambi yugurugu dogop dek at higyo o. <sup>9</sup> It avyarat umbutugwa menda akoma en yugu dugwit, "Paulus melen it Tesalonika menda enadema wagu lagagumu, wokhinipwis, huvuwak ogagu lagagwa ako mbo baluk,

Ala iluk agarik avyarat ako At ake denek dugwit eyavup ogagu dogoguluk mikedugwi, ogagagwa o," yiluk, yugu-selagwi. <sup>10</sup> Eke, Ala en At abut Yesus hambuluk lendagwima en iluk erogo mondok okbagya lagagimu, havis aninis en nit weyak okbininggu hao en, nenagap wendasiga Yesus mbogot vaga en wambu warup yiluk, it sokhelagwi o," yiluk, hit ogasagwi ako ovok erogo nit yugu-selagwi.

## Paulus o Tesalonika dugwit, ogagya lagagi wene

**2** Ai wa nowa-nasin. Nit un enam warogo bikhinisa wagetek ako, hit andi, henelup aro. <sup>2</sup> Nit o Pilipi werekma, anggin-mbanggin nenovaga bininggwis, wiyiknom-weyaknom erogo okninipwis, ogagagwa henelup ako ovara, vivis, o Tesalonika dugwit, Ala wene sek wene ako it wisane en, "Nenanggon o," yiluk, ninim ogorek inigik, Ala yonggat ninivisigama, nenalon embetetek yukhurugu lagagup. <sup>3</sup> Andi, nit henaruk watu dugwit, yukherlagwi ako andi, nit nininggut dugwit yukhirugwi, nit ambi hedaguluk yukhirugwi, henambutmu dagaluguluk, huluk wene yukhirugwi, ogasagwidek. <sup>4</sup> Ata, Ala en ninavut mbabaluk, niren Yesus ninim hunik dugwit, niniluk mondok dogop sek wene andok okbininggigi ako ndatak at yukherlagwi. Hit henendawi sek nenombarovovok yiluk yukherlagwi dek. Ata, at nenendawi avut mbalisiga Ala ako endawi sek nenombarupwak yiluk, yukherlagwi.

<sup>5</sup> Nenane agilamok yukhurugu lagetek andi, henelup aro. Hit henangge ambi hedaguluk, nenane, "Ai-au" yagalagwi andi, at Ala elupma, yiluk, nenane yukhurugu lagatek. <sup>6</sup> Hit inim, it ap akwa adik inim, nit nininis wogobininapwak yiluk, wagetek. Eke, Keretus wene yugeregek nagu dogoguluk lakbigik menda bininggigi halok, nenane anye vaga yukheraup sek ovara, dek. <sup>7</sup> Ata, hwa ambi at eyak abwa en elola okbaluk yonggonisiga hak, nit henanggelekma dugwit, anderogo at nenane sagain erogo yukhurugu lagagup. <sup>8</sup> Henabwa adigat umbutu dugwit, hit nenendawi hunik okhinipugup atma, sek wene Ala en yukneragagi ako adigat yukheraup embetetek. Ata hit hinim hondo yup halok andi, sek at umbutugup.

<sup>9</sup> Ai, nowa-nasin. Nit ogarit adigat lagu dugwit, nenanyedek erogo bininggigi ako andi, henendawi wenggeles. Sek wene Ala en yukneragagi ako yukhurugu dugwit, "Hit ambi anggin henovaga bugugu sao en," ombakluk, niren hit henadema ambi nggino

yukheregetek, ata, o hup-dingga nenadigat neneyavup okhedegek nagu lagagup. †

<sup>10</sup> Nit hit avyarat ombasagwi menda henanggelekma dugwit, Ala wene dibaluk ogagwi, eke, weyak ogagetek mondok sek ogagagup vaga henane ambi nenovaga bininggitek dugwit, ogarit lagagup ako andi, Ala ogo nenugu, eke hit ogo ninugwis, ogagagup. <sup>11</sup> Ala mondok siyalek dugwit, "Hit An siyalek nabinak agirikmu yoma, navema omanes," yiluk, yanggup yukheraliga ako, endawi ombasiga ndatak ogarit lagu dogovovok yiluk, ap ambi aburi halok yugaliga ako hak, nit anderogo at hit henadik-henadik henendawi yonggonhinipwis, henendawi aik wakbugugwis, hit henaruk watwis, ogagu lagagup ako henelup aro.

<sup>13</sup> Anderogo atma, Ala wene yukheragagup hunggu dugwit, "Yi we un avakwa enane dek o. Yi Ala wene nit avyarat ombasagwi menda nenendawima holbininaliga wene avyarat o," yiluk, wagagupma, nit mbup yegetek ndugurek-ndagarek "Ala wa," yugisagwi.

<sup>14</sup> Ai, nowa-nasin. It ap Yakuri ako en it Ala yugirigya hegek yugurugu lagagwa navi-navi ako inutwis, Nenasin Yesus warogo bagwi, eke, nit ogo haryogo lakbinungwis, ogagu lagagwa ako en it Ala aburi o Yudeya homarisagwi Keretus Yesus inim hunik agarwik ako, weyak okbigik lagu lagagwa. Anderogo ndatak, it henowa-henasin en hit anderogo at okbugugu-sigik henendawi mbuk dugwit, wugu lagagupma, it enendawi mbuk dugwit, wugu lagagwa ndatak, hit anderogo at welagwi hinigis o. It Yakuri menda ogagu lagagwa ako andi, it ap akwa ovok enanggon umbutu dugwit, inim ogorek werekma, Ala ogo, endawi sek enombasigadek, anggon ombasiga.

<sup>16</sup> It ako andi, avakwa weram Yakuri dek menda Ala en enagap wendarup wene, nit yugurugu dogogup en yiluk, sup ando mbalogo bininilagwi halok, it weyak ambi labok adigat ogarit wagagwa-wagagwa, "Andi hudi ari labuk," hudi bagoma ako ari lagya halok, Ala aninis ap akwa enovaga bisaliga ako ndatak, yogwak ogo aninis mondok it enovaga bisaliga o.

#### Ndugwis ambi vaga bigisa laup imbitigi wene

<sup>17</sup> Ai, nowa-nasin. Nit andi, nenendawi henovaga wenggelek adigat agurik ovara, ndugwis ambiat neneyave adik-adik welagagup, vage bikhinisa warup, "Ai," adigat umbutu dugwit, wal okhegek adigat ogagagup ovara, dek agagi. <sup>18</sup> Naswei ninim bikhinisa warup ombasagwi, eke, an Paulus nadik ndugwis ambi vaga bikhinisaup dek o. Ata, ninggi-nanggi bikhinisa warup yiluk, wal okhagagis ovara, madis sile en sup monggalogo bininaliga halok, agurik. <sup>19</sup> Nit nenape wenggelek inim, nenendawi adenggen ombasagwi inim, sek ogagu niniselok nggudit-nggudit mendago yikbinunggu halok, nenendawi sek ombarup ako inim, an-

† Paulus ako o ambima Ala wene yugirigya dugwit, avakwa andoma 'An anggin enovaga bisagwis en, yiluk, nadik neyavup okhedayogon, 'yiluk, yum tenda monggatu lagagi.

di sa vaga embetep? Dek o. Hit vaga yikbininayogon o. Nit Nenasin Yesus wagya halok okbininup ako andi, hit avyarat ombakluk ogarit lendagwi vaga aro. <sup>20</sup> Nit siyabinungwis, nenendawi adenggen erogo bininggwis, ogarup andi, hit heneyave vaga aro.

**3** Anderogo atma, hit nggarogo agipik ninggut dogop meyan agya lagagimu, nit nenadik o Atena andenam mbup yup umbutu lagagurik, <sup>2</sup> at nenaot Ala ayeloman dugwit, sek wene Nenasin Inis Ombok Yesus Keretus Ala en denogo lakba wagagi wene ako ninim yugalagwi menda Timotius ako henadema lakba wagagup. At ako en, it avakwa anggin henovaga bigilagwi vaga wene andi, "Nenanggon o," yiluk, mbo bagu hinisao, hit Yesus avyarat ombasagwi ako wadok dek erogo bugugu, hit henendawi aik wakbugugu, ogagya dogopwak yiluk, at henake lakba wagagup. Nit anggin-mbanggin nenovaga okbininup denek agurik ako andi henelup aro. <sup>4</sup> Eke, hit ninim dugwit, ao okbininggitek hegek, "Anggin okbinunggu dogosogom o," yukhurugu lagagup ako, ovok oklagagi andi, henelup aro.

<sup>5</sup> Anderogo atma, hit nggarogo agipik nunggut dogop meyan oknita lagagimu, at nit weyak ogarupwak yiluk nenendawi nggagalisiga menda ako en hit henendawi nggagalup hegek nit enam warogo wene yukhurugu lagagup hao en, nendawi anggin dugwit, hit henendawi Yesus ovaga vanggalaluk avyarat ombasagwi ako nggarogo ogasagwi an nelup arigiluk, henake ap Timotius lakba wagagis.

<sup>6</sup> Eke, yogwak andi, at Timotius vage hit werekma en nit nenadema waga o. Nenadema wagya lagarik, hit Yesus avyarat ombasagwi wene inim, ap akwa hinim henendawi hunik okbugwis wene inim, eke, niren, "Hit bikhisaup ai," ombasagwi hak, hiren, "It bigisaup ai," nenombakluk, ninggi-nanggi henendawi nenovaga wenggenggu dugwit, henadenggen ombasagwi ako inim, sek wene andi yuknera waga o.

<sup>7</sup> Anderogo ma, ai, nowa-nasin. Anggin-mbanggin nenovaga binunggu-selok, nenendawi anggin duvup yagan hulut lagusim, Yesus vaga avyarat ombakluk hit musek lagwi ako yuknera wagya lagama, nenendawi hora yigyo o. <sup>8</sup> Eke, yogwak hit Henasin Inis Ombok henendawi hunik dugwit, mondok wadok dek hiniselok, nit anggin en nenendawi wakedasogom dek. Nenadenggen dugwit, ogarit lagu dogosogom aro. <sup>9</sup> Hit ogarit lagwi vaga nit nenendawi adenggen wisane okninivisiga ma, nit Ala ombok erogo "Wa, wa, wa" yiluk, yugisagwi. <sup>10</sup> Nit heneloke hinugu dogomindik, Yesus vaga vanggalaluk hit avyarat ombasagwi ako ambi ao henendawi hoda agatek halok, ambi inim yukheraguluk, hup-dingga nenendawi adenggen ombok erogo umbutu dugwit henake samban ogasagwi.

<sup>11</sup> Nit bikhinisa warup ako Nenasin Ala Nenowa Yesus iperen en sup mbilogo amot erogo okbininapwak yiluk, samban ogasagwi. <sup>12</sup> Niren hit nenendawi mon-

dok hunik okbigilagwi ako ndatak, hit-hit inim, ap akwa ovok inim, ambi inim nendawi-hendawi hunik ogonupu dogop Nenasin Inis Ombok en okbugugu, <sup>13</sup> eke, Nenasin Yesus at aburi ake denek menda † inim wagu dogomundik, hit weyak ogagetek mondok sek adigat ogagu hiniselok, Nenasin Ala anggin henovaga bigigayogon buk yiluk, henendawi wadok dek okbugugu, ogagya dogopwak o.

#### Ala en sek nenombarupwak yiluk yugeragagi wene

**4** Ai, nowa-nasin o. Wene atok vaga ambi yukheraup umbuturikmu yukherasogom. Ala endawi sek henombarupwak yiluk, "Nggarogo ogarit lagu dogop?" mamulheragagup ako, ovok ogarit lendagwi ovara, ambi inim mondok ombok erogo ogarit lagu dogovovok yiluk, Nenasin Inis Ombok Yesus en yuknirigya halok yukheralagwi. <sup>2</sup> Nenasin Yesus en, "Yugeranes o," yiluk, yuknirigya lagagimu, wene, "Yerogo ogarup, nderogo ogarup," yiluk, yukhurugu lagagup andi, henelup aro.

<sup>3</sup> At Ala en hit weyak ogagetek At ake denek adik dogop ombasiga ako andi, hit avakwa ugun ogarup moga yiluk, yagagi. <sup>4</sup> It avakwa weram menda ako en Ala ininggut dugwit, enendawi ninggya halok akwa ugunugun ogonivit nagwis ako hak, hit anderogo ogagu dogop dek. Ata, hininis sek dogopwak yiluk, "Ala inis vaga dambubininaup o," yiluk, weyak ogagetek enabwa umbutu dugwit, henogwai hidugu dogop. <sup>6</sup> Nit weyak ogagu dogopwak yiluk, at Ala en miknini-pigibuk. Ata, weyak ogagetek at ake denek adik dogoguluk, miknini-pigirikmu, nit endak nenane anye vaga yukhurugu lagagup ako ndatak, it avakwa weyak anderogo ogaguselok, Ala en onngo hologo okbininiliga atma, henaswei weyak okbugu dugwit, wanggis waup moga. <sup>8</sup> Anderogo atma, ap ambi en, "Wene yi, Ala en yagas dek. Ap enat yagao o," yiluk, weyak erogo mbo bagya halok, aren ap akwa mbo bisaliga andi dek. Ata, at sek adik denek Averiniki wokneraliga Ala ako at mbo baliga.

<sup>9</sup> Henaswei Yesus avyarat ombasagwi menda hinim henendawi hunik okbisilin lendagwi ako andi, Ala en ovok mamulheragagirikmu, wene andi menda ambi dirup mbalheraup dek higi. <sup>10</sup> Hit henowa-henasin ovok erogo o Makedoniya menda ako, avyarat henendawi hunik okbisalagwi ovara, ambi inim henendawi hunik oginipu dogovovok yiluk, yukheralagwi.

<sup>11</sup> It ap akwa Yesus avyarat ombasagwidik menda en hit des erogo ogarit lagu hiniselok, henagayuk wutu dogopwak yiluk, it nin enawene ako ilimik-ilimik yubuk. Ata, hit hininis sek dogovovok yiluk, henamwa des erogo dugwit, ap it nin enovaga henendawi vonggabigitek hit hininggis en okbetaluk nunggi, eke, nit

endak henaruk watugup ako des erogo ogagwi, ogagu dogovovok yiluk, yukheralagwi.

#### Nenasin Inis Ombok warup wene

<sup>13</sup> Ai, nowa-nasin. It ap akwa hambuluk nggarogo oklendagwi wene ako, hininggut dogop andi, nenanggon. Avakwa nin hambuluk iniluk okbisaup wene ako enendawi Yesus vaga vonggabagatek halok, enaswe ambi hambigya halok enendawi wakedelagwi hak, hit henendawi anderogo at wakidugu dogogup en yiluk mbilinogo yukherasogom. <sup>14</sup> At Yesus hambigya lagagirik, iluk mendok yagagi ako nit avyarat ombasagwi halok, it ap akwa Yesus inim hunik dugwit, hombagagwa ako at Ala en iniluk erogo mendok okbisaup avyarat ombasagwi.

<sup>15</sup> Nenasin Inis Ombok yagagi ndatak, niren yukheralagwi o. At wagya halok, it ap akwa hombagagwa ako ao iniluk mondok yegetek inigik, nit ao niniluk agurik ako nenendak dagasogom buk. <sup>16</sup> Ata Nenasin Inis Ombok ako en hum iris, yonggo lakbisa wandiga menda enowa ombok malaikat ako en ane iris, Ala angge ane ombok ogasiga menda trompet ako ane ogagya, ogagu dugwit, Nenasin mbogot vaga en wambu wagya hegek, it ap Keretus inim hunik dugwit, hombagagwa ako, at Ala en enendak iniluk mendok okbisayogon. <sup>17</sup> Iniluk mendok okbugu dogomindik, nit niniluk ao agurik ako, it ninim hena anggelekma ilim andenam Nenasin Yesus ninim dambuluguluk, woknenombolok dagasogon. Woknenombolok inggya halok, Nenasin Yesus ninim mondok-mondok dogosogom. <sup>18</sup> Wene andi, Nenasin enat yukneragagirikmu, andi vaga henendawi aik war-wat yugu dogones.

#### Nenasin wagya hao en suam watu dogop wene

**5** Ai, nowa-nasin. Yi ogarup wene yukhirigyo ako andi, "O ngga vaga warimi, saut nggao irisim warimi a, tahun ogagusim warimi a?" henelup arovovok yiluk, dirup mbalheraup dek. <sup>2</sup> At Nenasin warup hudi ako andi, ap enonggop welagwi menda en o hup wendagwi ako hak wasogon andi, ovok henelup aro. <sup>3</sup> It ap akwa en, "Wene ambi nenovaga agatek nit ovok sek atma, nenendawi ugun adenggen at agurik o," yugu-sigik, hwa avula eyak endaklarup unggutmu, idup en yagan wasiga ako hak, Nenasin mbikit supuk erogo wagya dugwit, mondok weyak erogo bisa warisogon atma, it ambi hoda wulusogon mondok dek aro.

<sup>4</sup> Anderogoma, nowa-nasin. Hit andi, henendawi o hup ovagak hininggut agipik dek. Ap enonggop welagwi menda en o hunogoma nunggigya halok, enanggela wilisiga ako hak, o andi hudi hit anderogo henanggela wilisogon dek. <sup>5</sup> Hit ovok erogo avakwa o hup vaga dugwit ogasagwi ako hak dek. Ata, dingga vaga dugwit ogasagwi menda ako hit aro. Eke, it ap akwa o hwiserek vaga dugwit ogasagwi hak hit dek.

† Nenasin Yesus aburi ake denek andi, it avakwa avyarat ombasagwi menda.

Ata, it o awia vaga dugwit, ogasagwi ako hak hit atma,  
<sup>6</sup> it ap akwa nin nogo yilagwi menda ako hak nit an-  
 derogo nogo yugu dogop dek. Nit nggungguk nogo  
 yigitek suam watu dogosogom.

<sup>7</sup> It ap akwa nogo yilagwi menda ako andi, o hup at  
 nogo yilagwi. Eke, it amburup nenek okninivupwak  
 yiluk, nelagwi menda ako andi, o hup at nelagwi ovara,  
<sup>8</sup> it dingga ogasagwi ako menda nit atma, nit nggung-  
 guk nogo yigitek suam adigat watu dogosogom. Ap  
 yegen werek en, meda narugup en yiluk, sin agap va-  
 ga yikedalagwi andi hak, niren, madis sile, weyak ok-  
 bininagwi en yiluk, nenendawi Yesus vaga vongga-  
 baluk avyarat umbutwi, ap akwa nenendawi hunik ok-  
 bugwis, ogagu dogosogom. Eke, ap yegen werek men-  
 da narugup en yiluk, unggul agasum mbusi menda  
 danggulik ako vonggabuluk agarik hak, nit ogo, madis  
 sile ako en, ninarugwi en yiluk, Ala en nenagap wen-  
 daknininisogon umbutu dugwit nenendawi vongga-  
 belagwi.

Roman Soldier LB 000196

<sup>9</sup> At Ala en aninis nenovaga bininigiluk, denogo bin-  
 inggitek. Ata, at Nenasin Yesus Keretus en nenagap  
 wendarupwak yiluk, denogo bininggigi. <sup>10</sup> Nit niniluk  
 agurik halok, ata hambugu niniselok, at ninim niniluk  
 mondok dogoguluk, nit nenake hambagagi. <sup>11</sup> Andero-  
 goma, hit henendawi aik war-wat yugwi, eke, at ambi  
 en at ambi endawi hoda okbagwi, ogarit lagwi ako yo-  
 gwak ndatak ogarit lagu dogones.

#### Enaruk watigi wene

<sup>12</sup> Ai nowa-nasin. It ap Ala aburi enasini  
 tenanggelekma enanyedek erogo okbugugwis, Ne-  
 nasin inim hunik dugwit henaruwam agarwik, eke,  
 mbilape yukhurugwi, ogasagwi ako enagayuk wutu  
 dogovovok yiluk, yukheralagwi. <sup>13</sup> It ogarit lagwi andi  
 vaga hit henendawi hunik okbugu dugwit, wogobugu  
 dogovovok yiluk, yukheralagwi. Hit henendawi ambiat  
 dambulik dogones.

<sup>14</sup> Ai, nowa-nasin. It ap yavup okhedaup enanggatek  
 iniselok, enaruk watwis, eke, it Yesus avyarat umbutu

dugwit ogagu dogop inugut adigat embetek nagu-  
 selok, enendawi hora okbugwis, enendawi ao hoda  
 agatek halok, enendawi hoda okbugwis, eke, avakwa  
 ovok henane sagain yugurugwi, ogagu dogones.

<sup>15</sup> Weyak onngo-onngo ogagu hinisao en, dibatugu do-  
 gones. Hit-hit inim, it ap akwa ovok erogo inim, sek  
 adigat ogagek yumwak yiluk, dibatugu dogones.

<sup>16</sup> Henendawi adenggen adigat umbutu dogones.

<sup>17</sup> Mbup yegetek samban adigat ogagu dogones. <sup>18</sup> Hit  
 Keretus Yesus hinim hunik dugwit, ogarit lagu dogop  
 hinimbitigi ako andi, yi menda ndi menda okbigalag-  
 wi ako, Ala adigat "Wa," yugugu dogones.

<sup>19</sup> Hali nagaup yagaliga hak, henendawi Averiniki  
 yukheraliga ako nagalogo baup andi moga. <sup>20</sup> Eke,  
 Averiniki en yugirigya hegek, yukherelagwi wene ako,  
 wiyiknom-weyaknom erogo baup andi, moga. <sup>21</sup> Yi  
 wene ndi wene yagalagwi ako avut mbabaluk, eyave  
 halok adigat nggitik-nggetok erogo vagogo dogones.

<sup>22</sup> Yi weyak ndi weyak andogon yedok halok, mbo bagu  
 dogones.

#### Heyaga wakbogogi wene

<sup>23</sup> Nenendawi ugun seyalek adenggen okbininaliga  
 Ala ako, hit heneyave at ake denogo bugugu dugwit,  
 henendawi weyak mondok horogo bigigapwak. Eke,  
 Nenasin Yesus Keretus warugwi hudi, hit heneyave-  
 henendawi ovok erogo weyak ogagatek dogosogon  
 vaga, ane ambi henovaga bigigagwi en yiluk, ok-  
 bugugu dogopwak. <sup>24</sup> At yanggup yukneragagi ako en,  
 yagaliga ako andi adik ambi asigadek, ovok des erogo  
 ogasigama, ako at ogagya dogosogon o.

<sup>25</sup> Ai, nowa-nasin. Nenake samban ogagu dogones.

<sup>26</sup> Heyaga war-wat yugu dugwit, henendawi hunik  
 vaga dinggik-hambup yugu dogones.

<sup>27</sup> Nit dirup mbanggup yi, it nenowa-nenasin avyarat  
 ombasagwi ovok inivaga mbilinogo yugeravovok yiluk,  
 Nenasin inis vaga yukheraliga o.

<sup>28</sup> Nit Nenasin Yesus Keretus henabwa en okbugugu  
 dogopwak o.

Wa nowa-nasin!

## 2 Tesalonika

**1** Ai nowa-nasin. Hit Ala aburi Nenasin Ala Nenowa Inis Ombok Yesus Keretus Ala en denogo lakba wagagi ako hinim hunik dugwit o Tesalonika homaris-agwi ako, an Paulus inim, Silas inim, Timotius inim, niren wene ambi yukherasogom o.

<sup>2</sup> Nenasin Ala Nenowa Yesus Keretus iperen henabwa en okbugugwis, hit henendawi ugun seyalek adenggen dogovovok yiluk, okhinipwis, ogagu dogopwak o.

### Keretus wagya dogomindik, nenowak dilisogon wene

<sup>3</sup> Ai, nenowa-nenasin. Hit vaga Ala "Wa," yugurup adigat okninivisiga. Hit Yesus vaga vanggabuluk avyarat ombasagwi ako, hoda arit lagya, eke, nendawi-hendawi hunik okbugwis andi, wisane arit lagya, ogasagwima, "Ala wa," yugisagwi ako andi, sek at ogasagwi. <sup>4</sup> Anderogo atma, hit edup-mbedup okbugugu-sigik, henendawi mondok wadok dek dugwit Yesus vaga avyarat umbutwi, eke, anggin henovaga agya hegek, henendawi mbuk dugwit wugwi, ogasagwima, nit Ala aburi yi awi di awi homarit lendagwi yugeregek lagu dugwit, siyabigilin nelagwi o.

<sup>5</sup> Hit Ala avema dogop mikedagagup halok, edup-mbedup okbugugwis ako andi, henendawi mbuk dugwit welagwima, Ala en, "Hit sek atma, an werekma yoma nunggu warup sek aro," yukherayogon halok, Ala en nenowak dilisogon ako andi, weyak dek sek at nenowak ndilisogon yedok hagup. <sup>6</sup> At Ala ilup dugwit atma nggedok ogasigama, iren anggin hit henovaga bigigalagwi ako, onngo aren it anggin enovaga bisayogon. <sup>7</sup> At Nenowa Yesus, it malaikat wakangget mondok enagayuk werek ako inim mbogot vaga en hali abya angelekma wambu wagu dugwit, it ap akwa Ala enanggon dugwit, sek wene Nenowa Inis Ombok Yesus Keretus yagagi wene ako sek erogo wegetek halok, weyak onngo wogora wasogon. Yogwak anggin hit henovaga agarik ako, o andi hudi, nit ninim nenendawi seyabininayogon.

<sup>9</sup> Andi hudi vaga nit at aburi ake denek ako en at eyave siyabagwi, eke, nit wene vagalogo yukheragagup vaga avyarat umbutugup atma, hit ninim avyarat ombasagwi menda ovok at, "Vok!" yugwi, ogarupwak yiluk, warisogon. Wagya halok, it Ala enanggon dugwit sek wene wegetek menda ako, weyak onngo mondok-mondok hunik oginipu dogopwak yiluk, at Ala en, "An nabinak segedokma nanye agirikmu nelese

vaga yenam dogop dek o," yiluk, weram haryogo wibisayogon.

<sup>11</sup> Andi atma, At Nenasin Ala en sek ogarit lagu dogovovok yiluk, henayanggup yukheragagi ako, hit ndatak ogarit lagu hiniselok, "Sek ogagep o," yiluk, yukhirigya dogopwak yiluk, henake samban hunik ogasagwi. Eke, Yesus vaga avyarat ombakluk sek ogarup embetep ako, ndatak ogarovovok yiluk, henanye okbugugu dogopwak yiluk, henake samban hunik ogasagwi. <sup>12</sup> Nenasin Ala At Nenowa Yesus Keretus iperen henabwa en okbugugu-sigik, hit anderogo at ogarit lagu dugwit, At inis siyabagwi, aren hit ogo wogobigigu, ogagu dogosogon o.

### At weyak adigat ogasiga ako en ogagya dogosogon wene

**2** Ai wa, nenowa-nenasin. At Nenasin Yesus Keretus wagya halok, nit at ninim homakbininup wene ako yukherasogom. <sup>2</sup> It ap akwa en, "Nenasin warup ako ovok vanggo yi waga o," yiluk, yagan wagu dugwit, at ambi en, "Ala en wene yuknugu halok, yukheraliga o," eke, at ambi en, "Dek o. Paulus en yuknogogimu, yisogon o," ata, "Paulus en dirup mbanggigirikmu, yukherayogon o," yiluk, it yagan wagu-selok, mbikit henalon en henendawi dek agu hinisao en yiluk, yukheraliga o. <sup>3</sup> It ap akwa huluk anderogo yagan wagu dugwit, henambutmu dagagup en, dibugu dogones. Nenasin warup ako andi, ap akwa wisane en Ala wene, "Nenanggon o," yiluk, mbo bagatek hegek, eke, at ap mondok weyak dombok ogasiga, elese dek erogo baup ake denek ako, sigam ari wagatek hegek, warisogon buk o. <sup>4</sup> It awakwa en yi menda ndi menda mikbaluk, "Nenasin Ala aro," yiluk, agayuk wutwis, huvuwak ogovak higiogon baluk, siyabagwi, ogasagwi menda ovok erogo at ap mondok weyak dombok ogasiga ako en sovalogo bisiluk, at adigat siyabatigya dugwit, Ala awi valekma o Yerusalem mendok yi nunggigya dogomindik, "Henasin Ala an aro," yiluk, yugirigya dogosogon.

<sup>5</sup> An endak hit ninim dugwit, wene yi ovok yukheragagis ako henunggut agagup a, ao hinilup agipik a?

<sup>6</sup> At mondok weyak dombok ogasiga ako andi, o ngga vaga sigam ari warup mirik agarik ako vaga warupwak yiluk, at ambi sa en sovabaluk agarik ako henelup aro.

<sup>7</sup> At madis sile anye vaga weyak ogarit lendagwi ako andi, awakwa vage ogarit lendagwi ovara, at sovalogo baliga ako wolok enggetek hegek, weyak ombok

wigalarisogon buk. At sovalogo balin lagyama, sovalogo balin lagya dogosogon aro.

<sup>8</sup> At wolok inggya halok andi, at mondok weyak dombok ogasiga ako sigam ari wasogon. Sigam ari wagya dogomindik, sile ogasiga wane-wane at anye vaga ogarit lagya dugwit, "Ala anye vaga ogasiga," ombarupwak yiluk, huluk enalon werek menda ogagya, nggarogogogarubuk menda ogagya, nadok-hadok wisane ogagya, ogarisogon. Ogagya dugwit, it awakwa Ala en enagap wendarupwak yiluk, avyارات wene Yesus avok ako enendawi sek embetek waup enanggon dogosogom vaga weyak erogo bisaup ako, enambokan dagaligiluk, ane adik wisane molalogo yugirigya dogosogon. It ako, huluk wene yagan wagya ako avyارات ombarupwak yiluk, Ala en enendawi apik erogo bisayogon. Eke, it awakwa avyارات wene ako wegetek weyak ogarup adigat enendawi hogop ombarit lendagwi ako ovok erogo enowak dibaluk, weyak enovaga bisayogon. Andi en, at mondok weyak dombok ogasiga anderogo ogarit lagyama, Nenasin Yesus mondok siyalek agayuk werek wagya dugwit, elagap agavuk vaga eyave mondok dek erogo warogo ba wasogon.

#### Enagap wendarupwak yiluk miginipigi wene

<sup>13</sup> Ai wa, nowa-nasin. Hit Ala henabwa ombasiga ako vaga Ala wa yugurup adigat oknininisiga. Ala en, henagap wendarigiluk, hit endak erogo mikhinipigi. Mikhinipigima, Averiniki en hit henendawi weyak horogobugugu, avyارات wene Yesus avok avyارات umbutwi, ogasagwi ako vaga henagap wendarisiga. Anderogo atma, hit vaga "Ala wa," hunik-hunik yugisagwi. <sup>14</sup> Hit anderogo at henagap wendarigiluk, nit sek wene yukheragagup ako vaga yanggup yukheragagi. Nit Nenasin Yesus Keretus mondok abinak agarik ako hit hinim ndatak abinak dogovovok yiluk, yanggup yukheragagi. <sup>15</sup> Anderogo atma, naswei o. Yi wene ndi wene nenane vaga yukhurugu lagagup inim, dirup warek vaga yukhurugu lagagup ako inim, henendawi wadok dek dugwit, wene andi, nggitik-nggetok erogo vagogo dogones.

<sup>16</sup> Nenasin Ala ako nenabwa en endawi hunik okbininggu dugwit, nenendawi mondok-mondok aik wakbininggu, nenendawi wenggelek mbogot vaga menda ako woknirigya, ogasiga ako andi, At Nenasin Yesus Keretus inim it mberen en hit sek ogarit lagwi, henane sek adigat yugeregek lagwi, ogagu dogovovok yiluk, henendawi aik wakbugugwis, henanye erogo okbugugwis, ogagu dogopwak.

#### Nenake samban ogagu dogop wene

**3** Ai, nowa-nasin. Wene ovok at yukhirigyo ovara, atok vaga ambi yukherasogom o. Nenasin Yesus ninim hunik dugwit, niniluk mondok dogop wene ako hit wugu lagagupik, mbigalit lagu dugwit, wene ako

wogobalin nagu lagagup ako ndatak, nit anderogo at yi awi di awi hodo erogo yugeregek nagu dogoguluk, nenake samban ogagu dogones. <sup>2</sup> Eke, it ap akwa wisane Ala en denogo bagagi Yesus ako avyارات embetekma, it ap weyak ogasagwi menda ovok weyak adigat ogarit lendagwi andi en, nit weyak erogo bininggu hao en, Nenasin en nenagap wendarupwak yiluk, nenake samban ogagu dogones.

<sup>3</sup> At Nenasin andi, at yagaliga andi adik asigadek, mondok des erogo ogasigama, Aren henanye okbugugu, eke, at weyak ogasiga menda ako en weyak okbigigagwi en yiluk, henaruwam watya, ogagya dogosogon. <sup>4</sup> Hit ogagu dogop wene yukherelagwi ako andi, vage ogasagwi ninelup. Eke, hit ambi inim ogagu dogovovok yiluk, Nenasin en okbigigayogon.

<sup>5</sup> At Ala en yi ap akwa ndi ap akwa endawi hunik ogininisiga ako hinilup okbugugu, eke, Keretus anggin-mbanggin ovaga agya hegek, endawi mbuk dugwit wogogi ako ndatak, hit anderogo at henendawi mbuk dugwit wugu dogovovok yiluk, okbugugu, Nenasin en ogagya dogopwak o.

#### Ininggis anye vaga ogagu dogop wene

<sup>6</sup> Ai wa, nowa-nasin. Nit Nenasin Yesus Keretus inis vaga wene ambi yukherasogon o. Wene, "Anderogo ogagu dogones," yukhurugu lagagup ako, henaswei nin ogagetek yavup enanggon en un nagu hiniselok, hinim nagu dogop dek. <sup>7</sup> Hit ninim dugwit, nit un welagetek sadida ogarit lagagup ako, hit wakhegek ndatak ogarit nagu dogop andi hinilup aro. <sup>8</sup> Nit hit hinim dugwit, henagarom onggodek un nunggu lagetek. Nit andoma wagu lagagurik, hit anggin ambi inim henovaga bugugu ninasao en, nenagarom namunda nggino yukheregetek hutun-howam nininggis vaga okhedegek nagu dugwit, nenanyedek erogo bininggugwa ako henelup aro. <sup>9</sup> Henangge-henangge nggino yukherelok un naup sek ovara, nit ogarit lendagwi vaga wakhegek hit ndatak ogagu dogovovok yiluk, ogagu lagagup. <sup>10</sup> Ninim dugwit, "Ap ambi yavup ogagetek halok, erom wogurubuk," yukhurugu lagagup.

<sup>11</sup> Hit nin henovadombok okhedegetek it nin enawene ako ilimik-ilimik yegek nagu dugwit, yavup ogagetek enanggatek ugun-ugun ogarit lendagwi yugu-sugupma yiluk, yukherelagwi. <sup>12</sup> "It ap anderogo ogasagwi andi, eneyavup des erogo okhudugu dugwit, it enagarom adigat nunggu dogopwak," yiluk, wene andi Nenasin Yesus Keretus inis vaga henaruk wasagwi.

<sup>13</sup> Ai wa, nowa-nasin. Hit andi, sek okbigik lendagwi ako henanggon okbugugu halok, "Nenanggon," ombarubuk. <sup>14</sup> Nit wene yukherelagwi dirup warek yi, at ambi en, "Ogarup, nanggon o," iri halok, ap andi, eyave dibagu dogomundik, anggadi arupwak yiluk, hinim avuk arubuk. <sup>15</sup> Ninim ndup ogorek ovagak do-

gop andi dek. Ata, "Nenaswe atma," yiluk, wene aruk des erogo wares.

### Heyaga watbigigi wene

<sup>16</sup> Yogwak nenendawi ugun wadok dek adenggen okbininaliga menda Nenasin ako en yi ogagek di ogagek ovok erogo ogarit lagu hinigik, henendawi ugun wadok dek adenggen dogovovok yiluk, okbisilin lagya dogopwak. Hit ovok erogo Nenasin hinim dogosogon o.

<sup>17</sup> "At Paulus enat dirup yi lakba waga higi," ombarupwak yiluk, atok vaga heyaga wakbisiliga wene andi, an ninggis vaga en mbalisigama, dirup yi, "At enat yukneraga," ombarovovok yiluk, atok vaga heyaga wakbigigaliga wene yi, an ninggis vaga enat mbalheraliga o.

<sup>18</sup> Nit Nenasin Yesus Keretus hit ovok erogo henabwa en okbugugu dogopwak o. Ai wa, wa!

# 1 Timotius

**1** Nabut Timotius wai. At nenagap wendarisiga menda Ala inim, Nenowa Inis Ombok Yesus Keretus Ala en denogo lakba wagagi ako nenape wenggelek agurik ako inim, iperen en wene denggalogo yuknogogwa vaga an Paulus Keretus Yesus lakbigik menda okbanunggugwa ako en, nit Yesus avyarat ombasagwi ako vaga nabut dombok agagindikmu, wene ambi yukhisogon o.

At Nenasin Ala, Nenowa Keretus Yesus iperen habwa en okbagagwi, enaigwak abet en okhitwis, eke, hendawi ugun adenggen wadok dek dogonyok yiluk, okbagagwi, ogagu dogopwak.

## Huluk wene yagan wagu iniselok ogagu dogop wene

<sup>3</sup> An o Makedoniya warigiluk, ogagya dugwit, "Hat o Epesus yenam dogwen o," yiluk, nane abet erogo yukhogogis ako andi, ambi inim yukhisiga. It ap nin avyarat wene enunggut dugwit wene adik huluk wene yagalagwi ako, "Mamuleraup moga," yiluk, yugirigya, <sup>4</sup> eke, "It awakwa mukpilin mbilinggis, ap enadem endago mbilinggu dugwit, mbup yegetek likhelok lagwi, ogasagwi andi, moga," yiluk, yugirigya dogonyok yiluk, yenam dogwen yukhogogis ako ambi inim yukhisiga. Wene andi menda mbilinggu dugwit, nenendawi Yesus vaga vanggabuluk avyarat ombasagwi vaga Ala en okbininup imbitigi ako nenelup arumwak yiluk yuknerelagudek un wene adem belanggu dugwit, nane-hane yagalagwima, moga, yiluk, yugirigya dogwen. <sup>5</sup> Eke an wene yukhisiga yi, awakwa nabwahabwa ombarupwak yiluk, yukhisiga. It enendawi weyak embetetek sek adigat ogagwi, enendawi eyave vaga Yesus avyarat umbutwi, ogasagwi ako vaga awakwa enabwa ombasagwi atma, anderogo ogagu dogopwak yiluk "Yugirigya dogwen," yiluk, yukhisiga. <sup>6</sup> Awakwa nabwahabwa ombarup wene an yukhisiga yi, ogarup hegek awakwa nin en nomalogo hekbaluk, wene dek arup menda adigat enam warogo mbilinisagwi. <sup>7</sup> It ap andi en, "Musa wene mamuleralagwi menda nirat dogosogom," ombasagwi ovara, it mamuleralagwi inim, eke, enane anye vaga, "Andi avyarat ninilup o," yiluk, yagalagwi inim, it enendawi we ugun ininggut dugwit, yagalagwi. †

† Musa wene ako sek ovara, Musa yagagi ako nin andi Yesus vaga dek agagi. Wakhegek, Musa en iri dugwit, ap ambi en ap ambi watyama hambigya halok, at ogo onngo hambupwak en warogo baup yagagi ovara, Yesus en andi onngo-onngo ogarup moga yagagi. Amba andi, Musa en Ala aburi dogoguluk ap enagamut mbalup

<sup>8</sup> Ala wene yugup Musa en dirup mbanggigi ako des erogo ogaruguluk, welagwi halok andi, sek helagwi.

<sup>9</sup> Musa wene ako andi, ap enendawi sek iniselok yugeregetek andi, ninilup. Eke, it ap Ala wene yugup sagalisagwi menda inim, enasini enane hulup enanggon ombasagwi menda inim, Ala agayuk wurup enanggon ombasagwi menda inim, it weyak ogasagwi menda inim, samban ogarup enanggon umbutu dugwit ugun-ugun ogarit lendagwi menda inim, inisai-enasini enasagwi menda inim, awakwa ugun-ugun enarit lendagwi menda inim, <sup>10</sup> awakwa wanggis welagwi menda inim, ap-ap ogasagwi menda inim, awakwa eneyak enaburi hwilak inivisagwi menda inim, enane huluk yagalagwi menda inim, enane huluk wene enovaga biselagwi menda inim, andi ogasagwi ovok erogo wene Ala aburi nggarogo ogarit lagu dogop modo wene ako hegek adik ogaguselok, Musa wene ako enake yugeragagi nenelup aro. <sup>11</sup> Modo wene ako at Ala siyalek abinak agarik ako en sek wene Yesus ninim hunik dugwit, niniluk mondok dogop wene ako, an vagogo dogopwak yiluk, andok okbaninggigi ako, aro.

## Okbagya vaga, Ala "Wa," yugogogi wene

<sup>12</sup> An nanye okbaniliga menda Nasin Keretus Yesus ako en, "Ap yi, ambi ogagya dogopwak yiluk, denogo bayogon halok, des erogo at ogagya dogosogon," nimbata lagagirik, an yavup ambi ogagya dogopwak yiluk, denogo baninggigima, "Wa," yugisiga. <sup>13</sup> An endak "Yesus andi Ala abut dek," yiluk, wiyiknom-weyaknom erogo bagya, naninis en, at ane welagwi menda enarit lagya, wiyiknom-weyaknom erogo bugu, ogagya lagagis ovara, an Yesus vaga vanggabuluk avyarat embetetek un ninggut dugwit, ogagya lagagimu, Ala aigwak abet en hekbaninggigi. <sup>14</sup> Nenasin Keretus Yesus nabwa en okbanenggek adigat ogagya dugwit, Yesus ako Ala abut an avyarat ombarupwak yiluk okbaninggya, eke, awakwa nendawi hunik ogonipu dogogilik okbaninggya, ogagagi.

<sup>15</sup> "Awakwa weyak ogasagwi menda ako enagap wendarigiluk, Keretus Yesus o yoma wambu wagagi," yiluk,

yagagi ovara, Yesus en nenendawi avyarat ombasagwi vaga Ala aburi dogosogon yagagi. Amba andi, Musa en, henomaluk dek arupwak yiluk, wam warogo Ala ake baup yagagi ovara, Yesus eyave vaga nit nenomaluk onngo bagagi. It ap huluk wene yugu lagagwa ako en, Ala inim hunik dogovovok yiluk, Musa wene ako adigat vagago dogwes yugurugu lagagwa.



yagalagwi ako andi, avyarat wene atma, waup sek aro. Avakwa ovok erogo weyak ogasagwi ovara, an ako mondok eve weyak ogagya lagagis, <sup>16</sup> adem andi vaga At aigwak abet en hekbaninggigi. Hivis it avakwa iniluk mondok dogop ombasiga ako en enenedawi At ovaga vanggabuluk, avyarat ombasagwi vaga wugu dogop ako, il wakhegek ogagu dogop an neyave aro. Niren Yesus Keretus weyak okbelagwi ovara, onngo mbikit okbininaliga dek dibaluk okbininaliga ako, weyak ogagya eyave iya an neyave ako vaga sigam arupwak yiluk, aigwak abet en hekbaninggigi. <sup>17</sup> Eke, avakwa endak welagagwa inim, yogak agarwik inim, o hivis dogogup inim, Nenasin inis ombok hambisigadek iluk mondok itok menda ninil helagudek Ala adigat agarik ako inis mondok-mondok abinak agayuk werek dogopwak o. Amin!

### Timotius yavup vagago dogopwak yiluk okbagagi wene

<sup>18</sup> Eke, nabut Timotius wai. Hat ao ogagetek heyagek, Averiniki en Ala aburi enasini yugirigya hegek yukhugu dugwit, "Hivis anderogo ogagya dogogun o," yiluk, yukhogogwa wene ako hat vagago dogonyok yiluk ambi inim yukhisiga. Vagago dugwit ogagya heyalok, ap ndup wakangget agarik ovagak, hat anderogo hanye erogo halon dek dugwit ogarit lagya dogosogon. Hat hendawi Yesus avyarat ombasiga inim, hendawi sek ombasiga halok adigat ogarup inim, mondok nggitik-nggetok erogo vagogo dogosogon. It ap Himeneyus, Alekander ogo, ap nin inim Yesus vaga vanggabuluk avyarat umbutugwa ako mbo baluk, adik ogarit lendagwi. <sup>20</sup> It anderogo ogasagwima, anen Ala inis miyuk-meyan erogo baup enalon ombarupwak yiluk, madis sile inggimu okbogogis.

### Samban ogagu dogop wene

**2** Andi halok, wene endak yukhirup imbiti ako yukhisogon o. Yi avakwa ndi avakwa ovok erogo enake samban ogarup. It vaga Ala wa yugugwis, enake nggino yugugwis, ogagu dogovovok yiluk, nane avuput vaga yukhisiga. <sup>2</sup> It ap ombok-ombok inim, ap ininis werek ovok erogo inim, enake samban ogagu dogwes. Iren sek erogo nenaruwam inigik, nenendawi sek vaga Ala musek lagu dugwit, ugun adenggen wadok dek dogoguluk, it enake samban ogagu dogwes. <sup>3</sup> Anderogo ogagu hiniselok, sek at ogasagwi. Eke, nenagap wendarisiga Ala ako endawi adenggen nenombasiga. <sup>4</sup> Aren yi avakwa ndi avakwa ovok erogo At avyarat wene Yesus avok ako enelup akluk enagap wendarup ai, ombasiga.

<sup>5</sup> Andi, At Ala ambiat agarik. Eke, avakwa inim, Ala inim, serak enake yonggo lakbagek ap ambiat Keretus Yesus aro. <sup>6</sup> Yi avakwa ndi avakwa ovok erogo heda visilogo bisagiluk, eyave vaga enonggo bagagi. Enonggo bagagi ako andi, At abut lakba warup imbitigi ako

sigam arup hudi vanggo iri lagagimu, sigam agagi. <sup>7</sup> Ala en yi avakwa ndi avakwa ovok okbisaup imbitigi ako, it ap weram Yakuri dek menda avyarat wene Yesus ovaga vanggabagu-selok, enagap wendarisogon wene ako mamuleregek lagya dogogiluk mendok okbaninggigi. Eke, yi awi ndi awi yugeregek lagya dogogiluk, lakbigik menda baninggigi. Wene andi, huluk dek mondok avyarat yukhisiga.

<sup>8</sup> Anderogoma, it ap yi awi ndi awi ovok erogo enaninis umbutwi, winimuk yugwi, yegetek sek adigat dugwit, ininggis ilikbaluk, samban ogagu dogopwak yiluk, "Ai!" dombok ombasiga.

<sup>9</sup> Eke, it akwa enendawi werek en enayum des erogo yikhedelagwi hak, yi akwa ndi akwa ovok erogo enendawi werek akluk, anderogo at enayum enanggem nggitik-nggetok erogo yikhidugu dogopwak o. Ap enendawi napwak yiluk iniris heda makbaluk danggis, mbusi abinak werek menda yiritwis, laut helep enggen mudu segedok ako <sup>†10</sup> Ata, it akwa Ala wene wokbaluk, musek lendagwi menda en enayum dibaluk yikhedelagwi hak, yi sek ndi sek ogarup ako andi, ndatak dibaluk ogagu dogopwak.

<sup>11</sup> It akwa ako andi, enane dek dugwit, ap enavema seve yiluk wene mamulhidugu dogopwak. <sup>12</sup> At Hawa endak wakhegetek o. Ap Adam endak wakhagagi. Eke, sile ako en ap Adam ambokan enggetek. Ata, hwa Hawa ambokan inggirikmu, hwa ako en weyak ogagagi. Andi atma, anen "Akwa andi, enane dek dugwit, Ala wene des erogo hunggu dogopwak. Ap mamulirugwi, eke, it akwa en ap enavema bisiluk, Yi ogaru, ndi ogaru, yugurugwi, ogagu dogop andi dek," yiluk, yagaliga. <sup>15</sup> Hwa ako andi weyak ogagagi ovara, it akwa ako enendawi werek dugwit, Yesus avyarat umbutwi, avakwa enendawi hunik okbugwis, eke, weyak ogagetek Ala ake denek dugwit, ogaguselok andi, it eneyagi endak inipu-sinigik, Ala en enagap wendarinipu dogosogon.

### Ala aburi enaruwam dogop mendok okbisaup wene

**3** "Ap ambi en, an Ala aburi enaruwam dogosogon o, ombasiga halok, yavup ogarup embetas andi, iya aro," yiluk, avakwa en yagalagwi menda ako andi, avyarat yagalagwi.

<sup>2</sup> Ap ambi Ala aburi enaruwam dogop mendok okbaup ombasagwi halok andi, avakwa enane at ovaga belagudek halok, ogwa ambiat wogo halok, endawi suam watya halok, endawi werek halok, endawi luvuk erek halok, enaganiya isagya halok, avakwa sek mamulirigya halok, <sup>3</sup> amburup nenek oginivisiga menda agaum erogo nalgadek halok, aninis mbikit agya dek, endawi yanggalek halok, yo yawi war-wat iridek halok, yoparip endawi hogoup ombasigadek halok, ap an-

† Laut helep enggen mudu segedok ako, Indonesia enane andi mutiara yagalagwi. menda yikhidugwi, eke, yum onngo ombok halok adigat hunogo yiritwis, ogarup andi moga.

derogo menda andi, Ala aburi enaruwam dogopwak yiluk mendok okbisaup sek aro.

<sup>4</sup> Ap ambi Ala aburi enaruwam dogop andi, at aburi des erogo unde waginipu, mamulirigya, aburi en at ane hunggwis, ogagya halok adigat mendok okbaup.

<sup>5</sup> Ap ambi en at aburi des erogo unde waginivup inggut halok, Ala aburi andi, nggarogonggan holinipu dogosogon embetep? <sup>6</sup> Ap ao swi at Yesus vaga vanggaluk avyarat embetas halok mendok okbaup dek. Sile endawi siyabatigya lagagimu, anggin ovaga okbagagi ako hak, ap andi, anderogo endawi siyabetaliga vaga anggin ovaga okbagya hao en, mendok okbaup dek. <sup>7</sup> At mendok okbaup ako, it ap avyarat ombasagwi dek menda en at ogasiga vaga avok mbanggu dugwit, "Ap andi, andogon sek aro," yagalagwi halok adigat mendok okbaup. Ata, at weyak ogarimi vaga, it ap avyarat ombasagwi dek menda en at ogasiga vaga avok mbanggu dugwit, "Ap andi, andogon weyak," yugu-sigik mendok okbaup halok, bagas heda bago ma adonggop nggeto yagaliga hak, sile en ap andi, anderogo endawi nomalisogon.

#### Ap yonggaragak mendok okbisaup wene

<sup>8</sup> Eke, it ap yonggaragak ako, anderogo it enovavut sek halok, enane mberen dek ambiat adigat yagalagwi halok, anggur amburup nenek oginivisiga menda enagaum erogo nelagwidek halok, yoparip hogop ombaluk avakwa we-wes oginavisagudek halok, <sup>9</sup> eke, Ala en ninim dambubininagiluk at abut Yesus lakba wagagi wene mbauk hwilago welagagi ovara yogak sigam agagi ako, vagago dugwit, enomaluk horogo baluk enendawi seyalek vaga ogagu-selok, ap andi menda mendok okbisaup sek aro.

<sup>10</sup> It ap yonggaragak dogop andi, endak enavut mba-baluk, enane enovaga biselagudek halok, mendok okbisaup sek.

<sup>11</sup> It enogwai andi anderogo enovavut sek dugwit, wene enabis atok vaga wolok nelagwidek halok, enendawi werek halok, eke, it yagalagwi ndatak ininggis anye vaga ogagu-selok, akwa anderogo menda iniselok, it enaguni ap yonggaragak mendok okbisaup sek aro.

<sup>12</sup> It ap yonggaragak andi, enogwa ambiat wogo halok, eke, inaburi inim, it inim agarwik menda inim, unde waginipu iniselok adigat mendok okbisaup sek aro. <sup>13</sup> It ap yonggaragak ogarit lendagwi menda ako it eneyave hwalogo ogaguselok, ininis werek dogosogom o. Eke, it eneyave hwalogo ogaguselok, nit nenendawi Keretus Yesus ovaga vanggaluk avyarat ombasagwi wene ako, it enalon embetetek dugwit, yugeregek nagu dogosogom aro.

#### Wene mbauk hwilago welagagi wene

<sup>14</sup> An vage hadema warup ombasiga ovara, an ambi yidup iri hao en, Ala aburi dugwit, nggarogo ogarit

lagu dogop helup arinyok yiluk, nape wenggelek dugwit, dirup yi mbalhisiga. Nit Ala aburi ako Ala mondok iluk itok menda angge aro. Eke, o valek ako owak sek ngguvulik vaga ndun yagaliga dek itok-itok agarik hak, avyarat wene Yesus avok ako nit Ala aburi vaga sigam erogo itok-itok agarik. <sup>16</sup> Ala wene wokbaluk nenendawi eve vaga ogarit lagu dogop wene mbauk hwilago dombok welagagi ako mondok iya aro. Andi, "At ap at ari wagya lagagimu, Yi Ala abut, ombarupwak yiluk, Averiniki en sigam okbagagi.

Sigam okbagya lagagimu, it malaikat en At eyave inil hugwi,

At awene it weram Yakuri dek menda werekma yugeregek lagwi,

It ap yi awi ndi awi Yesus Ala abut avyarat ai, umbutwi,

ogagu lagagwama,

O segedokma abinak adigat agarikmu wolok inggigi o,"

yiluk, yagalagwi menda ako mondok avyarat higyo.

#### "Huluk wene yagan warusogom," yugogogi wene

<sup>4</sup> At Averiniki en sigam erogo iri dugwit, "O hivis arup hudi vaga ap en avakwa enambukmu dagaguluk, madis en huluk wene yugirigya hegek mamulirugu-sigik, it nin en wene ako dibaluk, musek lagu dugwit, Yesus avyarat umbutugwa ako mondok hekbasogom o," yiluk, yagaliga. <sup>2</sup> It ap wene andi menda yagan nagwis ako andi, enagavoval sek ova heda enane huluk molalogo yagalagwi. Nenagavelo yaga mbalekma omap agarikmu edup helagwi dek andi hak, it ap andi, enendawima anderogo at, yi sek, yi weyak, enendawi dibelagwi dek.

<sup>3</sup> It ap huluk wene yagalagwi menda ako en, "Ap murik adigat dogop," yiluk, yugurugwi, eke, yi menda ndi menda nelagwi menda "Naup moga," yiluk, mamulurugwi, ogasagwi. Naup moga yagalagwi andi, nit ap avyarat wene Yesus avok nenelup akluk avyarat ombasagwi menda ako en, "Ugun naup sek yiluk Ala en bagagima, Wa, yiluk, menak-menak naup sek," umbutu-ninigik, it ako moga yagalagwi. <sup>4</sup> Yi menda ndi menda Ala en wakhagagi ako andi, sek adigat bagagima, nit nenendawi en, "Wa," yugugu dugwit, welagwi halok andi, moga dek. <sup>5</sup> Ala wene † inim, samban ogasagwi inim, andi vaga sek asigama, yi menda ndi menda ugun naup sek aro.

#### Keretus Yesus ayeloman sek dogop wene

<sup>6</sup> An wene yukhisiga yi, howa-hasin Ala aburi mamulirigya heyalok, hat Keretus Yesus ayeloman mondok segedok menda dogogun. Eke, Yesus avyarat ombasagwi wene inim, wene Ala aburi nggarogo ogarit lagu dogop modo wene mamulik musek landiga inim, wogogo hendawi wenggelit landiga vaga, hendawi

† Kejadian 1:31 inim, 9:3 inim yokanes.

mondok wadokdek hoda at dogogun. <sup>7</sup> It akwa enanggok enarivit mbilinisagwi hak, yi wene ndi wene mondok eve sek menda dek hegek enam warogo yagalagwi andi menda ako, wabuk. Ala wene wogogin ako, hendawi eve vaga ogarit lagya dogonyok yiluk, hunik-hunik mamulhidigya dogwen.

<sup>8</sup> An wakhegek ambi yukhisogon. Avakwa nin andi eneyave anye aruguluk wal okhelagwi, eke, it nin andi Ala wene wokbaluk, enendawi eve vaga ndatak ogarit lagu dogoguluk, wal okhelagwi. Neneyave anye aruguluk wal okhelagwi andi sek ovara, un horok at okninivisiga. Eke, Ala wene ndatak ogaruguluk wal okhelagwi andi Ala en o yogak inim, o hivis inim, mondok ombok erogo sek okninivisiga ninilupma, ogasagwi. †

<sup>9</sup> Anderogoma, wene wakhegek nit Ala wene ndatak ogaruguluk wal okhelagwi andi, avyarat wene atma, waup sek aro.

<sup>10</sup> At Ala mondok iluk itok agarik ako, yi avakwa ndi avakwa ovok erogo enagap wendarup yiluk ombasiga ovara, nit nenendawi Yesus ovaga vanggabuluk avyarat ombasagwi andi nenagap wendarisiga. Andi vaga nenendawi vonggabuluk wenggelek agurik atma, dilwatu dugwit, hunik-hunik adigat ogarit landagwi.

<sup>11</sup> An wene yukhisiga yi ako yugirigya, mamulirigya, ogagya dogwen. <sup>12</sup> Hat heyave ao sawe atma yiluk, avakwa en sovalogo bagaup andi moga. Yagaliga inim, ogasiga menda inim, avakwa hendawi hunik oginivisiga inim, Yesus Keretus avyarat ombasiga inim, weyak ogagya heyao en hil sovalek landiga ako inim, ogasiga andi vaga it ap avyarat ombasagwi menda hat il wakhegek dugwit, ogagya dogwen. <sup>13</sup> An ao wagetek neyagek, mbuku Ala wene ombok vaga dombanggya, avakwa mbilinigya, enaruk watya, wene mamulirigya, ogagya dugwit, des erogo ogagya dogwen. <sup>14</sup> Endak, it Ala aburi enasini ako en hunggul sovabagagugigik, Averiniki en yukhugu hegek, "Hat hivis Ala eyavup ambi anderogo ogagya dogop," yiluk, Averiniki anye wokhogogi ako, moma erogo hekbaup andi moga.

<sup>15</sup> Hendawi hoda agya avakwa ovok erogo yedok heyapwak yiluk, wene yukhigis andi vaga avyarat vanggabuluk, ogarit lagya dogwen. <sup>16</sup> Handogon hovavut ogasiga menda inim, wene mamuleraliga menda inim, dibagya dogwen. Wene yi, mondok vipak erogo vagogo dogwen. Vipak erogo vagogo heyalok, it avakwa hat hane hulisagwi ako enagap wendatya, eke, harogo hagap wendakhidigya, ogagu dogosogon o.

#### Avyarat ombasagwi halok, okbugu dogop wene

**5** It ap enanggok iniselok, hane anye vaga mbererabuk. "Yi nasini ndatak atma," yiluk, enendawi

† Ala wene ndatak ogagu dogoguluk wal okhelagwi andi yerogo: Samban ogasagwi, Ala wene dombalisagwi, Ala aburi inim homarisagwi. Andi menda ogagu niniselok, Ala en nit Ala wene ndatak ogaruguluk, nenendawi anye okninivisiga.

aik wakbugu dogwen. It ap sawe andi, hat haswei ndatak, <sup>2</sup> it akwa enanggok andi, hat hisai ndatak, eke, akwa sawe andi, hat harupwi ndatak, it vaga hendawima weyak mondok embetetek dugwit, yugirigya dogwen.

<sup>3</sup> It akwa sogwa eneyagi-enwai enarum des erogo agarwikbuk halok, dibugu dogwen. <sup>4</sup> Akwa sogwa eneyagi-enwai werek iniselok verak, it ako en Ala wene ndatak ogarupwak yiluk, inisai-enambeyagi it enendak yonggarinipu dogopwak. It inisai-enambeyagi en eneyagi-enwai endarinipu lagagwa ako onngo yogak it anderogo yonggarinipu dogopwak. Anderogo ogaguselok, Ala endawi sek ombasiga. <sup>5</sup> Hwa ambi sogwa ovara, eyagi en yonggat hegetek halok, "Ala en yonggatnita dogopwak," yiluk, Ala ovaga vanggabuluk endawi wenggelek dugwit, hup dingga Ala adema hunik adigat nggino yugugu, samban ogagya, ogasiga menda halok, hwa andi, eyave sogwa aro.

<sup>6</sup> It akwa sogwa ininggis-vaga yavup ogagetek dugwit, amburup werek adigat nela ombarit nagu iselok andi, iniluk agarwik ovara, Ala wene enendawima dek halok, nggorak ndatak at agarwik. <sup>7</sup> Akwa sogwa anderogo ogaguselok, avakwa enane enovaga bisaguvan, wene yi, enaruk watya dogwen. <sup>8</sup> Ap ambi, ata hwa ambi, at owa-aot unde waginivisigadek andi, weyak ovara, at abut-ogwa, isa-asin, agun-eyak dombok unde waginivisigadek halok andi, weyak mondok ombok ogasiga. It avakwa Yesus Keretus avyarat embetetek menda andi, un weyak horok at ovara, at verak, weyak mondok ombok ogasiga. At Yesus Keretus avyarat imbitigi ako andi, hekbogogi agarik.

<sup>9</sup> It akwa sogwa Ala aburi en yonggarisaguluk ininis dirup wasagwi andi, hwa ambi endaklagagi hegek 60 tahun agetek halok, inis dirup warup dek. Ata, hwa sogwa ambi, agun ambi nggelabigitek sogwa bago halok, <sup>10</sup> "Hwa andi sek ogasiga menda," yuguselok, eyagi des erogo sawe oginipu halok, ap huru enaganiya isagya halok, it Ala ake denek menda †† enayeloman ndatak oginipu halok, ‡ it avakwa anggin enovaga agya yonggarinipu halok, eke, yi yavup ndi yavup sek okbisaup ovok erogo "An neyavup at," yiluk, ogasiga halok, inis dirup warup sek ovara, <sup>11</sup> it akwa sogwa ao ndugum iniselok andi, ininis dirup warup dek.

It akwa andi, enendawi ninggya halok, Keretus wene wogogwa ako hekbaluk, ap adik hedaup ombarusogoma, ininis dirup warubuk. <sup>12</sup> It endak "An Ala eyavup adigat ogagya dugwit an hwa sogwa mondok dogosogon," yagagwa ako Yesus adigat musek laup umbutugwa ako hekbagwi vaga weyak okhedugu dogosogom. <sup>13</sup> O ya nogo yigik nagu dugwit, yavup ogarup enanggon okhedelagwi. Andi adigat ogarit nagwis an-

†† Ala ake denek menda andi, Ala aburi avyarat ombasagwi menda ovok erogo. ‡ Ala wene Yunani enane dirup watigi andi 'inisok horinipu halok' watigi ovara, adem andi, endawi sovalek dugwit enayeloman ndatak oginipu dogop.

di dek. Ata, wene enabis atok vaga wolok nagwis, o ambima ya nggao yagan nagu dugwit, it nin enawene ako it ilimik-ilimik yugwi, ogarit nagu dugwit, wene yup dek ako menda hegek ugun yagan nelagwi. <sup>14</sup> Anderogoma, it akwa andi en ambi ogarusogom vaga it ninim ogorek ako en nenanggadi wakbinanuguvun, it akwa ndugum sogwa bisamwi ako, enaguni hidugwi, eneyagi endak inipwis, enaguni eneyagi unde waginipwis, ogagu dogop sek ombasiga. <sup>15</sup> Akwa sogwa nin andi, madis sile musek nagu dogoguluk, vage inisok vaga yunggululuk wendagwi.

<sup>16</sup> Hwa endawi avyarat ombasiga ambi en isa sogwa werek halok, it Ala aburi evenuk anggin enovaga bisaguven yiluk, at eyak ako en yonggatigya dogopwak. Eke, it akwa sogwa ovara, eneyagi dek iniselok verak, it Ala aburi en yonggarinipu dogopwak.

### Mbilape wene

<sup>17</sup> Ala aburi enasini enavok ambi yisogon. It ap Ala aburi enasini enagayuk werek ovara, sek erogo enaruwam iniselok, ambi inim onngo enagayuk wurup andi sek aro. It Ala wene ombok vaga yugurugwi, wene mamulirugwi, mondok hunik adigat ogaguselok andi, evenuk ambi inim onngo enagayuk wutu dogopwak. <sup>18</sup> Andi, Ala wene andi, "Sapi en inisok gandum enggen enggenit lagya hegek nin naguven yiluk, enelagap heda marogo bisaup moga," eke, ambi, "It ap yavup ogasagwi menda yavup onngo hedaup sek aro," yiluk, yagagwa dirup mbalek agarik.

<sup>19</sup> Ap mberen a, henggam a, "Anderogo ogaga o," yiluk, yegetekma, at ambi en adigat ap Ala aburi enasin ambi ane ovaga bagya halok, at ane hulup andi, dek. <sup>20</sup> Ala Aburi enasin ambi en weyak ogagya dogosogon halok, it avakwa ovok erogo enalon ombarupwak yiluk, avakwa ombokma anggadi watya dogop.

<sup>21</sup> Avakwa yerogo ogarup, nderogo ogarup, wene yukhisiga yi, ovok ogagya dugwit, hat hinim hunik halok ogagu dogop yugeregetek hekbigya, eke, avakwa ugun halok ogagu dogop yugirigya, ogagya dogobuk. Ata, avakwa ovok erogo enelup akluk, ogagu dogopwak yiluk, yugirigya dogwen. An ako, Ala inim, Keretus Yesus inim, it Ala ake denek malaikat ako inim, ovok inivaga an wene yi, yukhisiga.

<sup>22</sup> Avakwa hinggis vakbugu, ininggul sovabugu, mbikit ogarubuk. † Avakwa weyak ogaguselok, hat hinim avuk arup andi moga. Hat hendawi mondok sek adik denek dogwen.

<sup>23</sup> Hagaum edup okhita, heyave anyedek okhita, ogasigama, hat is adigat ninggya dogobuk. Ata, anggur amburup ambukumat inim ninggya dogwen.

<sup>24</sup> It ap mendok okbisaup yiluk, enavut mbanggya dugwit, ap nin weyak ogagao sigam agya halok, hek-

biselagwi ovara, it ap nin andi, enomaluk hwilago hegek, mekbigarikmu, hivis enomaluk sigam asiga. <sup>25</sup> Anderogo hak, it sek ogasagwi andi, yedok iniselagwi. Eke, it nin sek ogasagwi hwilago agarik andi, vivis hwilago anderogo dogosogon buk. Sigam arisogon o.

### Avakwa enayeloman dugwit ogagu dogop wene

**6** It avakwa enayeloman andi, it nin en Ala inis inim, nit wene mamuleralagwi ako inim, miyukmeyan erogo bagusao en, iren "Nenasini aro," yiluk, enane hunggu dugwit, enagayuk wutu dogopwak. <sup>2</sup> It avakwa enayeloman andi, it nin enasini avyarat ombasagwi menda, it nin enasini avyarat ombasagwidek menda. Eke, it enayeloman ako en enasini avyarat ombasagwi menda halok, "Nit ogo avyarat ombasagwima, Ala aburi ninim ndatak aro," yiluk, enane sovabisaup moga. Ata, it ako en, "Nenasini yavup okbiselagwi andi, avakwa it nin andi dek. Nit ninim ndatak avyarat ombasagwi atma nenendawi hunik aro," yiluk, ambi inim enake ombok erogo ogarit nagu dogopwak.

Wene yukhisiga yi ako ovok erogo mamulirigya, enaruk watya, ogagya dogwen.

### Huluk wene mamuleralagwi menda avok yukhisigon

<sup>3</sup> Ap ambi modo wene Nenasin Yesus Keretus wene ako inim, eke, nit Ala wene wokbaluk, ogarit lagu dogop mamuleralagwi wene ako inim, anggon imbita dugwit, wene adik huluk menda mamulirigya halok, <sup>4</sup> aren, "An nelup o," yiluk, siyabategek landiga ovara, inggut hegek ugun yagan landiga. At ap andi en wene, "Yi yerogoma ndi anderogoma," iri dugwit, wene watya, eke wene maduk yup hegek wenemuk iris, ogarit lagya dogop andi mondok endawi hunik dombok ombasiga. At anderogo ogarit lagya halok, it ap nin en avyarat wene Yesus avok ako mondok enunggut dugwit, weyak adigat ombasagwi ako en "An iya, hat iya," yugu dugwit, ogotlagwi, meyan umbutu dugwit avok mbalit lagwi, eke, huluk enova-enova bagwi, inim mondok war-wat yugwi, ogasagwi. It ap wene adik huluk yagalagwi menda ako, "Nit Ala wene ogarit lagu dugwit, nininggis mondok werek okhedaogon," ombasagwi ovara, <sup>6</sup> nit andi, yoparip werek hegek, dek hegek, Ala wene wokbaluk, nenendawi eve vaga ogarit lagu dugwit, nenendawi ugun adenggen agurik halok andi, Ala en mondok iya erogo okbininaliga o.

<sup>7</sup> Ninisai enendawima en endaklagu dugwit, nenangge-nenanangge ambi nininggimu wolok wulu wagetekma, lagu dugwit ogo, ambi nininggimu hede lok lasogombuk. <sup>8</sup> Nenagarom-nenayum ambi werek halok andi, "Yi ovok aro," yiluk, nenendawi ugun adenggen dogosogom. <sup>9</sup> It ap, "Nininggis werek okhedaup," umbutu-selok, Sile en, "Nanonggal aga o," yiluk, enendawi nggaganggu hegek, bagas heda bagoma adonggop nggeto erogo waklandiga hak, it ap andi anderogo at verak erogo weyak ogagwi, eke,

† *Ininggis vakbugwis, ininggul sovabuguwis, ogasagwi andi, Lakbogogi Wene 6:6, 8:17-18, 9:12,17, 13:3, 19:6, 28:8 yokhanes.*

“Yi an neyave weyak okhedaliga,” embetetek enendawi ugun nenggek lagwi, ogarit lagwi vaga nggedek wambugu dugwit, eneyave mondok wakhedasogom aro. <sup>10</sup>Yi weyak-ndi weyak adem andi, yoparip adigat hogoup ombarit lendagwi andi aro. It avakwa nin en hogoup yiluk, belalit lagu dugwit, Yesus ovaga vanggaluk avyarat umbutugwa ako hekbaluk, sup adik vaga nomaliluk lagusim, ap segowa vaga nagalhidugu lagarwik, edup helagwi andi hak, it ap andi, anderogo enendawi wakhedelagwi.

### Timotius ogagya dogop yugogogi wene

<sup>11</sup> Hat verak, Ala angge atma, ogasagwi andi menda wagun en yiluk, agoda wunggu dogwen. Sek halok adigat ogagwi, Ala wene wokbaluk ogarit lagwi, enendawi avyarat umbutwi, avakwa enendawi hunik okbugwis, anggin enovaga agya hegek, enendawi mbuk dugwit wugwi, enendawi yanggalek vaga yugurugwi, ogasagwi andi menda musek lagya dogwen.

<sup>12</sup> Nit Yesus avyarat ombakluk musek lendagwi ako, harogo nin ogorek inigik, mondok hanye erogo musek adigat lagya dogwen. Eke, hiluk mondok dogonyok yiluk, heyanggup iri lagagimu, hat Keretus avyarat imbitigin avakwa wisane inivaga hane vaganggigin ako, nggirik-nggerok erogo vagogo dogwen.

<sup>13</sup> Wene endak hat ogarit lagya dogop yukhugu lagagis ako inim, yogak yukhisiga yi inim, ambi wombabagetek ovok erogo enewogogo vagogo dugwit, Nenasin Yesus Keretus sigam ari warugwi hudi des erogo ogarit lagya dogwen. Ala yi menda ndi menda iniluk oginivisiga menda adem ako inim, eke, at avyarat wene Pondiyus Pilatus adema vaganggigi † Keretus Yesus ako inim, iperen inivaga nane anye erogo yukhisiga.

<sup>15</sup> Ala en Nenasin Yesus Keretus, “O andi hudi vaga sigam okba warup,” hologo bagagi ako ndatak sigam okba warisogon.

† *Matius 27:11, Markus 15:2, Lukas 23:3, Yohanes 18:33-37 yokhanes. Yesus ako Pilatus adema hegek, Pilatus ako en Yesus yugugu dugwit, “It Yakuri enowa inis ombok Hat at ai?” yugugu lagagimu, Yesus ako en Pilatus ivaga, “Yu. Hat yegen andi aro,” vaganggigi.*

Nit siyabelagwi At adigat mondok anye werek menda andi, Ala aro.

Avakwa enasini ap ombok-ombok enasin Araro.

Yi ap ndi ap ininis werek enasin inis ombok andi, At adigat o.

<sup>16</sup> At hambisigadek mondok iluk itok agarik Araro.

At werekma andoma awia wisane atma, avakwa At adema ari laup meyan o.

Avakwa en endak At eyave inil hegetekma, yogak ogo inil hegetek adigat agarwik o.

At inis mondok siyalek yi avakwa ndi avakwa ovok erogo avema seve yiluk, At ane adigat hunggu dogopwak o, yiluk, amin.

<sup>17</sup> It avakwa o yogak ininggis werek agarwik ako, andi vaga enendawi wogobatugu dugwit, yi menda ndi menda dek arup hegek, enendawi andi vaga vanggaluk wenggelek dogogoven, yugirigya dogwen. Nit adenggen ombaruguluk, At yi menda ndi menda nggilup-nggilup erogo wokneraliga Ala vaga vanggaluk wenggelek dogopwak yiluk, yugirigya dogwen.

<sup>18</sup> It avakwa ininggis werek agarwik ako yi sek ndi sek ogagu dugwit, avakwa sek okbigik nagwis, enendawi dek avunya weyak avakwa wogeraup adigat enendawi hunik okbugwis, ogagu dogopwak yiluk, mamulirigya dogwen. <sup>19</sup> Andi ogaguselok, heveret o eyave valuguluk, yogak o owak wadok dek wombalisagwi ako andi ndatak, it havis iniluk mondok segedok menda hidugu dogop enendawi anggin dek, “Okbininayogon,” ombakluk, enangge eyave hunhedaguluk, enayoparip wonggal hedelagwi hak, yogak sek adigat ogarit lagu dogopwak yiluk, yugirigya dogwen.

<sup>20</sup> Timotius wai. Wene des erogo yegetek enane agil amok amburup werek vaga yagan nagwis, huluk wene arovara, “Wene swi menda yi aro,” yiluk yagan wagwi vaga winimuk yugwi, yagalagwi ako menda wabuk. Ata, hat vagogo dogonyok yiluk, Ala en mikbagagagi ako des erogo ogagya dogwen. <sup>21</sup> Wene andi menda yagan nagwis vaga avakwa nin wugu lagagwarik, Yesus Keretus ovaga vanggaluk avyarat umbutugwa ako hekbaluk, sup adik vaga nomaliluk lendagwi.

Nenasin habwa en okbagagya dogopwak o.

## 2 Timotius

**1** Nabut Timotius nendawi hunik wai. An Paulus Ala endawi imbitigi vaga Keretus Yesus en yonggo lakbigik menda baninggigi ako wene ambi yukhisogon o. An ako, Ala en Keretus Yesus ninim hunik dugwit niniluk mondok-mondok dogop yagagi ako yugirigya dogogiluk an lakbigik menda banininggigi yi ako en yukhisiga.

At Nenasin Ala, Nenowa Keretus Yesus iperen habwa en okbagagwi, enaigwak abet en okhitwis, eke, hendawi ugun adenggen wadok dek dogonyok yiluk, okbagagwi, ogagu dogopwak o.

### Endawi aik wakbagagi wene

<sup>3</sup> An hup-dingga samban ogagyama, hat vaga nape wenggelek dugwit, "Nenasin Ala wa," yiluk, yugisiga. An nombawi weyak embetetek enendawi eve vaga Ala ake ogagu lagagwa ako hak, an ndatak at ogasiga o.

<sup>4</sup> Hat yup de yagagin ako nendawi wenggel lagya halok, an nendawi adenggen iya erogo hagiluk, "Bikeya warik dek ai," ombasiga. <sup>5</sup> Hat hendawi eyave vaga Yesus ovaga vanggabaluk avyarat imbitigin ako, nendawi wenggelek agirik o. Hambeyak Lois inim, hisa Eunike inim, iperen endak avyarat umbutugwa ndatak, harogo avyarat ombasiga andi, an nilup aro. <sup>6</sup> Anderogoma, an ninggis hunggul vakbagagya neyagek, Ala eyavup ambi ogarinok yiluk, Averiniki anye wokhogogi ako, hali nagaup iri halok monggalisagwi ako hak, Averiniki anye hendawima andi ombok erogo okhedanok yiluk, yukhisiga. <sup>7</sup> Andi, At Ala en nendawi nenalon werek menda wokneragetek. Ata, Averiniki anye okbininggu hegek nenalon dek dugwit ogagu dogop inim, avakwa enendawi hunik oginivup inim, nenendawi werek inim, wokneragagi.

<sup>8</sup> Anderogoma, Nenasin Inis Ombok ninim hunik dugwit, niniluk mondok dogop wene yugirigya dogop ako hanggadi habuk. Eke, an wene andi yugirigya lagagis vaga heda maknitugwa ako † ogo, hanggadi habuk. Ata sek wene ako yugurugwi vaga anggin-mbanggin nenovaga bininalagwi ako, an nadik dek. Ala anye woknirigya hegek, niperen ndatak anggin hugu dogosogom. <sup>9</sup> At Ala en nenagap wendatya laga-

girik, nit At aburi ake denek dogoguluk, neneyanggup yukneragagi. Nit ambi ogagagup vaga andi dek. Ata, At okbininaup imbitigi ako ndatak, nenabwa en okbininggu dugwit, nenagap wendatigi. At aigwak abet en okbininaliga menda ako andi, o yi ao wakegetek hegek, "Keretus Yesus vaga okbisayogon o," yiluk, hol-ogo bininggigi ako, <sup>10</sup> yogak yi nenagap wendarisiga menda Keretus Yesus wagagi ako vaga sigam agagi. At hambugwi adem nenovaga denggelek welagagup ako, dek erogo baluk, sek wene vaga niniluk mondok-mondok dogop wene ako ombok vaga sigam agagi.

<sup>11</sup> Sek wene Yesus ninim hunik dugwit, niniluk mondok dogop wene andi, yi awi ndi awi yugeregek lagya, mamuleregek lagya, ogagya dogogiluk, lakbigik menda denogo baninggigi. <sup>12</sup> Denogo baninggirikmu, ogarit lagya neyagek, avakwa en anggin okbanilagwi ovara, nanggadi embetetek agirik. An nendawi at ova-ga vanggabaluk avyarat imbitigis Yesus ako andi, an ovok nelup aro. Eke, an ogagya dogogiluk, yavup ningimu okbaninggigi ako Nenasin warup ako wagetek hegek, dek arisogon andi dek. "Yugurugu dogosogon aro," yiluk, avyarat ombasiga.

<sup>13</sup> Wene Ala wene modo menda yukhugu lagagis ako wane-wane haren des erogo vagago dugwit, yugirigya dogwen. Yugirigya dugwit, Keretus Yesus avyarat imbita, eke, avakwa hinim hendawi hunik okbugu, ogagya dogwen. <sup>14</sup> Eve menda Ala en hinggimu bagagagi ako, Averiniki nenendawima agarik ako en anye okbagagya hegek, des erogo vagogo dogwen.

<sup>15</sup> It o Asia agarwikmu ovok erogo ap Vigelus ogo, ap Heromogenes ogo, an hekbaniluk wunggugwa ako andi, hat helup aro.

<sup>16</sup> Arap Onesivorus andi, an mbusi heda mago neyagek, anggadi en hekbanenggetek hunik adigat nendawi aik wakbani wagek ogagagirikmu, at amwa agarwik ovok erogo Nenasin aigwak abet en okbugu dogopwak. <sup>17</sup> At o Oroma nunggwigya lagagirik mondok belalnetek adigat lagya dugwit, avuk agagup. <sup>18</sup> At o Epesus dugwit iya erogo yonggatnita lagagi ako hat mondok helup aro. O havis arup hudi vaga Nenasin en ap andi, aigwak abet en okbapwak ai.

### Keretus Yesus inim hunik dugwit, endawi wadok dek dogop wene

**2** Nabut hat verak, Keretus Yesus ninim hunik dugwit, habwa en anye okbagagya hegek, hendawi wadok dek dugwit ogarit lagya dogwen. <sup>2</sup> Avakwa

† Paulus en wene 'Ala en at abut denek Mesias ako, Yesus aro' yugirigya, eke, wene 'It weram Yakuri dek menda Yesus ovaga vanggabaluk avyarat umbutu-selok, Ala en enagap wendarisogon' yugirigya, ogagya lagagi vaga it Oroma menda inim, Yakuri menda inim, enaninis wisane agya lagagimu, it Oroma menda heda marogo mabisalagwima mabagagwa.

wisane inivaga yi wene ndi wene yukhugu neyagek hunggigin ako, it ap enandogon sek, avakwa des erogo mamuleraup sek inigin halok, it ogo vagago dugwit avakwa yugurugu dogopwak yiluk, mamulirigya dogwen.

<sup>3</sup> Yegen werek menda anggin-mbanggin hegek enendawi mbuk dugwit welagwi hak, hat Keretus Yesus aot yegen werek menda eyave hak dugwit, ninim ndatak wugu dogosogom. <sup>4</sup> Ap yegen werek menda en, ndup ogagu dugwit, nowa ndup mamunogogi ako endawi sek nombarupwak yiluk, at adik eyavup inim, angge-angge inim, hekbaluk, ndup ogarup adigat endawi wenggelek dugwit ogarit landiga aro. <sup>5</sup> Eke, *olah raga* ogagu dugwit, ap ambi, "Sa endak onngo hedami?" yiluk, wakhugu dugwit, "Anderogo ogaru o," yiluk, wene yugup ako ndatak ogasigadek halok, onngo hedalgadek. <sup>6</sup> Ap ambi inggis anye vaga yavup ogagya halok, enggen yugup ako at endak hedaup sek. <sup>7</sup> An yukhisiga yi ako vaga hendawi wenggelit lagya dogwen. Hat ovok erogo yedok hanok yiluk, Nenasin en helup okbagasogon.

<sup>8</sup> An sek wene yugaliga ako andi, yi: Ala en Daut ombao vivis inis ombok dogosogon yagagi ako, Yesus aro. Eke, At Yesus ako Ala en hambuluk lendagwima en iluk erogo mendok okbagagi. At Yesus ako vaga hendawi wenggelek dogwen. <sup>9</sup> An wene andi yugirigya neyalok, anggin-mbanggin okbanenggek adigat ogarit wagagwa, wagagwa, atok vaga, "Ap mondok weyak ogasiga o," yiluk, heda marogo mabanunggugwa yoma agirik ovara, Ala wene verak, heda marup meyan. <sup>10</sup> Anderogoma, it avakwa Ala miginipigi enendawi Keretus Yesus ovaga vanggabuluk, avyarat umbutu-selok, enagap wendakbaluk abinak mondok-mondok dogopwak yiluk, anggin-mbanggin okbanunggu-sigik, ovok erogo it enake nendawi mbuk dugwit waliga.

<sup>11</sup> Wene yi andi avyarat:

"Nit At ninim hambusogon halok, At ninim niniluk dogogup o.

<sup>12</sup> Anggin-mbanggin okbinunggu-sigik, nenendawi mbuk dugwit, welagwi halok, nit at avema siyalek dugwit, avakwa nin nenavema bisiluk, yerogo nderogo yugurugu dogogup o.

Niren 'At nininggut o', yugu niniselok, At ogo 'Hit an ninggut o', yuknerayogon o.

<sup>13</sup> Nit At yagaliga andi adik ogasagwi ovara hegek,

At yagaliga andi ndatak at ogasiga o.

Andi, At itok inggut akluk adik ogarup meyan o," yiluk, yagalagwi ako andi mondok avyarat o.

**Ala eyavup ogarit lagu dugwit, ogagu dogop wene**

<sup>14</sup> Wene yukhisiga yi ako andi, avakwa en enendawi wenggenggu dogopwak yiluk, yugirigya dogwen. Wene maduk yup hegek wenemuk yugwi ako vaga it hulisagwi ako un enam warogo nadok-hadok okbise-

lagwi atma, "Anderogo ogarubuk o," yiluk, Ala ivaga enaruk watya dogwen. <sup>15</sup> Ap ambi yavup eve sek ogagya dugwit, anggadi ombasigadek ako hak, hat avyarat wene Yesus avok ako mamulirigya dugwit, hendawi en hologo adik ambi inim lobalogo yugeregetek At ane adigat des erogo yugirigya heyalok, Ala en endawi sek hombarupwak yiluk, eve sek erogo ogagya dogwen.

<sup>16</sup> Wene des erogo yegetek enane agil amok amburup werek yagan nagwis vaga sek okhedaup dek weyak ogarup adigat okbininup atma, hekbaup aro.

<sup>17</sup> It ap enawin amu wisane hunggu lagarik, eneyave vaga ombok mbigalisiga ako hak, it ap andi, enane huluk wene ako anderogo at ombok mbigalit landiga. It huluk wene yagan nelagwi menda ako andi, it ap Himeneyus Viletus inim akluk yagan nelagwi. <sup>18</sup> It ap andi, avyarat wene Yesus avok ako nomalogo hekbaluk, "Avakwa hambuluk lendagwima en vage iniluk erogo mendok okbogogi o," yiluk, yugu dugwit, it nin Yesus Keretus avyarat umbutugwa menda ako enendawi avut dagalisagwi ovara, hegek, <sup>19</sup> Ala imbitigi andi, mondok avyarat atma arisogon andi, yi:

"Nenasin ako At aburi halok andi, elup agarik aro."

Eke, ambi,

"Yi ap ndi ap ovok erogo, 'Ala abut inis ombok denogo bagagi andi, Yesus aro,' yugu-selok,

It weyak ogasagwi ako mbo baupwak,"

yiluk, Ala imbitigi ako, mondok dek agatek dogosogon o. †

<sup>20</sup> Ala aburi ovok dambulik andi o ombok valek ndatak agarwik. O ombok valek ilim andi, mbusi *emas* vaga inim, mbusi *perak* vaga inim, sogolowak andi menda adigat ogovak higerik menda dek. Ata, nin yo vaga, nin wen-vaga, ogovak higerik agarik. Sogolowak eve segedok halok andi, iya menda ambi ogarup yiluk, denek agarik. Eke, nin halok andi, we ugun ogagek yup yiluk agarik. <sup>21</sup> Anderogo at agarik atma, ap ambi sogolowak horek mondok sek agarik ndatak, at omaluk mbo bagya halok, at asin ake yi menda ndi menda sek iya dombok ogagya dogopwak yiluk, mondok denek agarik.

<sup>22</sup> Andi halok, ap sawe enendawi nelagwi ako ndatak, hat anderogo okbagagya hao en, hekbaluk wunggu dogwen. Eve sek halok ogasagwi inim, enendawi Yesus vaga vanggabuluk avyarat ombasagwi inim, avakwa enabwa ombasagwi inim, enendawi ambiat dambulik dogop inim, it avakwa enendawi eve vaga, "Nenasin Yesus aro," yiluk, yagalagwi ako, hinim akluk it ogasagwi andi menda adigat musek lagya dogwen. <sup>23</sup> Ap enunggut dugwit avoloklok wene vaga onngo-onngo yugu dugwit war-wat yagalagwi ako hat helupma, helabugu dogwen.

† Yunani enane vaga andi yerogo yagaliga: Ala ogarup imbitigi andi, o owak wombalek wadokdek andi ndatak, mondok wadokdek dogosogon.

<sup>24</sup> Ap ambi Nenasin ayeloman halok, war-wat yup andi moga. Ata, yi avakwa ndi avakwa ovok erogo en-dawi sagain vaga oginipu, wene sek mamulirigya, weyak okbamwi ovara, onngo yugeregetek mbup iris, ogagya dogop.

<sup>25</sup> It hinim ogorek dugwit, wene adik yagan nagwis ako, mbo bisiluk, avyarat wene Yesus avok enelup arupwak yiluk, Ala en okbisaup hegek ogarup ai? yiluk, hane seve erogo mamulirigya dogwen. <sup>26</sup> Ala en anderogo okbugu halok, sile ombasiga menda ogagu dogopwak yiluk, heda magogo bogogi hegek, enendawi werek akluk, heda mago ako visilogo wunggu dogosogom o.

### O havis avakwa nggarogo dogop wene

**3** Andi atma, an wene ambi helup arinyok yiluk, yukhisogon o. O havis oklarup hudi vaga anggin mondok iya erogo nenovaga ari wasogon. <sup>2</sup> Andi hudi vaga ogarup ako, avakwa enendawi enanggidik agwi, yoparip adigat hogoup ombarit lagwi, "Wi!" vok yukneraupwak yiluk wogobategek lagwi, enendawi siyabategek lagwi, avakwa miyuk-meyak erogo bigik lagwi, inisa-enasin enane des erogo hunggitek nagwis, wogeraup ovara, wa yegetek lagwi, Ala wene sagalogo baik lagwi, ogagu dogosogom. <sup>3</sup> Andi ogarit lagu dugwit, enowa-enaot enabwa dek umbutwi, wene adem enendawima werek halok, ap ako inim dambulup enanggon umbutwi, ogagu dogosogom o. Avakwa enavok mbalit lagwi, ogarup oginipu halok sovalogo bagetek mondok ogarit lagwi, enaninis adigat dugwit, avakwa mondok enarit lagwi, sek ogarup mondok enanggon ombarit lagwi, <sup>4</sup> avakwa enaruguluk, inil yonggonipwis, enendawi holhegetek ugun-ugun ogarit lagwi, "An nadigat iya," yiluk, wogokbategek lagwi, Ala inim hunik dogop embetetek enendawi ninggya halok musek laup adigat umbutwi, andi menda adigat ogarit nagu dogosogom. <sup>5</sup> Eke, andi ogarit lagu dugwit, Ala wene wokbaluk ogarit lendagwi elesenggen ovagak okhedelagwi ovara, enendawi andi, "Ala wene andi anye dek, nenanggon o," ombakluk, ogarit lagu dogosogom. It ap andi ogagu-selok, inim horok-horok arubuk.

<sup>6</sup> It ap andi en enamwa nungguguluk, enane amburup nditik yugurugu dogomundik, nunggugu-selok, it akwa weyak ogagu lagagwa vaga enomaluk wisane enovaga durik agarwik ako, enendawi ndaik enendawi ninggya halok musek lagu-sigik, it ap andi en enane seve erogo yugurugu dugwit, enendawi nomalinivis-agwi. <sup>7</sup> It akwa andi en enane hunik-hunik yugu dugwit, "Ala wene andi, ambi mamuneranes o," yiluk, yagalagwi ovara, avyarat wene Yesus avok ako inilup asagwi dek.

<sup>8</sup> O muk erogo it ap Yanes, Yamberes iperen en Musa ako, "Nenanggon o," yiluk, yagagwa ako hak, yogak it ap andi, avyarat wene Yesus avok ako, "Nenanggon o,"

yiluk, yagalagwi. It enendawi mondok weyak adigat ombasagwi atma, it wene avyarat ombakluk ogasagwi yugwi ako enavut mbanggu-selok weyak at ogagusugup. <sup>9</sup> It ap Yanes Yamberes iperen en ogarit lagagwa sigam agagi ako hak, it ap andi ogo, enendawi obak ugun wes dugwit, yagan nagwis ako avakwa ovok inivaga sigam agya halok, ambi inim ogagu dogosogom buk.

### Ogagya dogopwak yiluk, atok vaga yugogogi wene

<sup>10</sup> Hat verak, an wene mamulirigya, an ogarit lagya, ogarup nendawi wenggenggu, nendawi At ovaga vanggabaluk avyarat imbita, weyak okbanunggu-sigik, nendawi wadok dek agirik, avakwa nendawi hunik okbugu, anggin-mbanggin novaga agya hegek, nendawi mbuk dugwit wigya, ogarit lagya neyagya lagagin.

<sup>11</sup> An o Andiokiya, Ikoniyum, Lisera inim, werekma, edup-mbedup okbanunggu-sigik, wakhidigya lagagis ako ovok helup aro. Iya erogo okbanunggu-sigik, nendawi mbuk dugwit wigya neyagek ovara, Nasin en naga gap wendatnitigi. <sup>12</sup> Yi avakwa ndi avakwa Keretus Yesus inim hunik dugwit, Ala wene wokbaluk ogarit lagu dogosogom umbutu-selok, edup-mbedup erogo bigik nagu dogosogom aro.

<sup>13</sup> Anderogo ovara, it avakwa weyak ogasagwi menda inim, enane huluk yagalagwi menda inim, weyak ambi inim ombok ogarit nagu dugwit, ir-it enambokan dagalhidugu dogosogom. <sup>14</sup> Eke, hat verak, yi wene ndi wene, "Yi avyarat o," yiluk, mamulhedagagin ako, nggirik-nggerok erogo vagogo dogwen. Sani en mamulhogogwa ako helup aro. <sup>15</sup> Eke, hat Ala Wene Mbalek † madukma en hilup agindik. Ala wene andi, Keretus Yesus vaga vanggabaluk avyarat umbutu niniselok, nenagap wendarup ako ninelup okbininaliga.

<sup>16</sup> Ala Wene dirup mbalek ovok erogo Averiniki avakwa enendawima des iri lagagirik, yugirigya hegek, dirup mbanggugwarikmu, wene mbalek yi ako vaga en avakwa mamulirugwi, weyak ogagu-selok enaruk watya, enane adik yagan nagwis ako hol inipwis, eke, sek adigat ogagu dogop yugirigya, ogagu dogopwak yiluk, Ala Wene mbalek agarik o. <sup>17</sup> At Ala en dirup mbalek wokneragagi ako andi, nit Ala aburi dugwit, yi menda ndi menda sek ogagu dogopwak yiluk, dik-duk erogo bininggigi.

**4** Avakwa At avema bisaup yiluk, Nenasin Keretus Yesus sigam ari wagya lagagirik, it iniluk agarwik inim, hombagagwa inim, enowak dili warup Keretus Yesus inim, Ala inim, iperen inivaga an wene yi yukhisogon o.

---

† *Ala Wene Mbalek Paulus yagagi ako, o andi hudi vaga Ala Wene Endak Mbalek adigat welagagi. Andi, Musa wene inim, Navinavi wene inim, Ndawi wene inim, andi adigat welagagi. Ala Wene Vivis Dirup Mbalek ako ao hegek yagagi. Ala Wene Endak Mbalek ako, Yesus ao wagatek hegek dirup watugwa ovara, angelekma wene wisane Yesus avok dirup watugwa.*



<sup>2</sup> Ala wene yugeregek lagya dogwen. O sek hegek, o weyak hegek, ugun yugirigya dogonyok yiluk, vipuk erek dogwen. "E o," yumwak yiluk yugirigya, weyak ogagu-selok enanggadi watya, enendawi aik wak- bugu, ogagya dugwit, hendawi mondok hora yiluk mamulirigya dogwen.

<sup>3</sup> Avakwa wene adem Ala aburi vagago dogop modo wene ako hulup, "Nenanggon o," yup hudi vanggo yi wasogon. Vanggo yi wagya halok, iren, "Wene ngga yugu samwi?" yiluk, enaruk huliit nagu dugwit, wene it enendawi hogop ombasagwi adigat yuknerapwak yiluk, guru-guru homakbugu dogosogom. <sup>4</sup> It avakwa andi en avyarat wene Yesus avok halok, enaruk nggedal hedelok, mupilin halok adigat mbililit nagu dogosogom.

<sup>5</sup> Anderogo ovara, hat verak, yi wene ndi wene wagya hao en, hendawi suam watya dogwen. Edup- mbedup okbagagu-sigik, hendawi mbuk dugwit wigya, ap sek wene yugeregek landagwi hak, hat ndatak yugeregek lagya, eke, hat Ala eyavup ogagya dogonyok yiluk, mendok okbagagagwa ako weralogo ogagya, ogagya dogwen.

<sup>6</sup> Eke, an verak, Ala ake yiluk, narusogon andi mon- dok vulogo baninggigi werekma, an hambup ako vage vanggalek agarik. <sup>7</sup> Ap ndup ogasagwi hak, an Ala wene sek erogo ogarigiluk, ndup ogagya lagi. Hudi atok vaga vupuk lendagwi ako hak, an vage hudi atok vaga ari wagi o. Nit Yesus avyarat ombakluk musek lendagwi ako andi, an sek erogo vagogo welagagis.

<sup>8</sup> Eke, yogak at wene atma nggedok owak dilisiga Ne- nasin en it avakwa yavup sek okbagu-selok, onngo ng- gare-nggare mendago *mahkota* yikbisaliga menda, At warup hudi an ambi yikbanupwak yiluk, baninggigi agarik o. An nadik yikbanisogon dek. Ata, yi avakwa ndi avakwa en, "At sigam ari warupwak dek, ai," yiluk, sokhelagwi ako ovok erogo yikbisayogon.

#### Timotius des erogo ogagya dogop wene

<sup>9</sup> [It nin ovok hekbaniluk wungguguwama, hat] hodo erogo nadema warigiluk ya wal nda wal ogagya dog- wen. <sup>10</sup> Andi, ap Demas wen-vaga menda adigat en- dawi hunik agagima, hekbaniluk o Tesalonika winggi- gi. Eke, ap Kerekes o Nggalatiya lagya, ap Titus o Dala- matiya lagya, ogagu-sigik, <sup>11</sup> ap Lukas adigat ninim agarik. Ap Markus ako yavup an yonggatnita dogop

sek atma, hat wagya dugwit, wegek-wegek omano.

<sup>12</sup> Ap Tikikus ako, o Epesus lakbagi. <sup>13</sup> Hat wagya dug- wit halok, sogwes yum o Terowas ap Karupus umwa hegek wagagis ako inim, nambuku virik-verek ogarek ako inim, eke, mbuku ndomba agamut vaga dirup mbalek andi iyama, andi inim, ovok erogo woknom- bolok omano.

<sup>14</sup> Ap mbusi vaga yi menda ndi menda ogovak hi- girisiga Alekander ako en wene nit yugerelagwi ako at mondok anggon dombok imbita dugwit, weyak iya erogo okbaninggigima, harogo weyak okbagagwi en, suam watya dogwen. At okbaninggigi ako andi, Nasin en onngo ndatak wogirisogon.

<sup>16</sup> [Endak, it Yakuri menda en enane novaga banung- gugwarikmu, it Oroma menda en] navok mbang- gusim, naswei ambi mondok nadema wagetek ovok at hekbanunggugwa ovara, Nasin Yesus en andi, ninim welagagi. Ninim dugwit, it avakwa weram Yakuri dek menda ovok erogo hulupwak yiluk, anen sek wene ambi wombabagatek ovok saborogo yugirigya do- gogiluk, nanye okbaninggigi. Anderogoma, weyak ok- banup embetao ako *singa* † elagapma en diyalisagwi hak, diyaniugwa. Eke, naswei hekbaniluk wunggugwa ako weyak enovaga bugu hao en, Ala yugisiga.

<sup>18</sup> Yi weyak ndi weyak okbanup ombasagwi ako okba- nunggu sao en, Nasin en nagap wendarisogon. Eke, At avema bisaligama mbogot vaga andoma enewogogo bani layogon o. At inis mondok-mondok siyalek at do- gopwak! Amin.

#### Heyaga wakbagagi wene

<sup>19</sup> Pirikila, Akwila iperen, eke, ap Onesivorus abur-og- wa inim, wa yugeranok yiluk yukhisiga o. <sup>20</sup> Ap Eratus o Korendus andoma mbup yagas. Ap Torovimus aup agagirikmu, o Miletus andoma hegek wagagis. <sup>21</sup> O sogwes ogagya mbeda ao vanggo yi wagetek hegek, hat hodo erogo nadema warup hendawi wenggenggu dogwen.

Ap Ebulus ogo, Pudes ogo, Linus ogo, Kolaudiya ogo, eke, nenowa-nenasin Ala aburi ogo, it ovok erogo en wa yukhigao.

<sup>22</sup> Nenasin Yesus habwa en okbagagya dugwit, hinim at dogopwak o. Ai wa!

† *At singga andi, vus ombok. At agarom andi wam inim, sapi in- im, ap inim, swa bagas inim, naliga.*

# Titus

**1** Nabut Titus wai.

An Paulus Ala ayeloman Yesus Keretus en lakbigik menda baninggigi ako yukhisogon o.

It avakwa Ala en miginipigi ako enendawi Yesus avyarat ombakluk des erogo wugwi, eke, avyarat wene ako wokbaluk, enendawi eve vaga ogarit lagwi, ogagu dogopwak yiluk, lakbigik menda baninggigi.

<sup>2</sup> Avyarat wene nit nenendawi Yesus ovaga vanggaluk, avyarat umbutu-niniselok, niniluk mondok-mondok dogosogon o, Ala en yagagi ako, okninivupwak yiluk, nenendawi vonggaluk wenggelek agurik.

Ala huluk yagaligadek avyarat adigat yagaliga ako en, "Iniluk mondok-mondok dogosogom o," yiluk, o yi ao wakegetek hegek, hologo bagagi ako, o muk erogo hologo bagagi ovara, <sup>3</sup> "O andi hudi vaga sigam asogon," imbitigi ako nenagap wendarisiga menda Ala en, "Paulus An nawene yugirigya dogopwak o," yiluk, yavup ninggimu baninggigi ako avakwa wisane yugirigya vaga, sigam aga o.

<sup>4</sup> Ai nabut Titus wai. Niperen Yesus avyarat ombasagwi ako vaga hat nabut dombok agagindikmu, wene yi yukhisogon.

Nenasin Ala, nenagap wendarisiga menda Yesus Keretus Ala en denogo lakba wagagi ako iperen habwa en okhitwis, hendawi ugun wadok dek adenggen dogonyok yiluk, okbagagwi, ogagu dogopwak.

**Titus o Kereta dugwit, ogagya dogop yugogogi wene**

<sup>5</sup> An ogagetek baluk wagagis ako hologo bugu, eke, o kota adik-adik Ala aburi enasini dogopwak yiluk, "Ap andi menda mondok okbisaup," yukhogogis ako mondok okbugu, ogagya dogonyok yiluk, hat ovok o Kereta bagaluk, an wulu wagagis. <sup>6</sup> Ala aburi enasini dogopwak yiluk mondok okbisaup ako andi, avakwa en weyak ogagatek vaga enane enovaga biselagwitek halok, enogwa ambiat wogo halok, enaburi avyarat ombasagwi halok, avakwa en, "Ap andi aburi en ugun-ugun ogarit nagu dugwit, inisai-enasini enane hulisagwi dek ovara, enaruk wakitek ayai!" yagalagwi dek halok, adigat mondok okbisaup sek.

<sup>7</sup> It ap Ala aburi enarum dogop ako andi, Ala eyavup ogasagwi atma, weyak ogagu-selok avakwa enane enovaga bisagunen, sek adigat ogarit lagu dogopwak o. It ombasagwi adigat ogarup umbutwi, enaninis mbikit agwi, amburup nenek oginivisiga menda enagaum erogo nungwi, war-wat yugwi, avakwa enayoparip hedaguluk, wewes okbugwis, ogasagwi halok, ap andi

menda mondok okbisaup dek. <sup>8</sup> Ata, ap enaganiya isagu-selok, sek ogarup enendawi hunik umbutu-selok, enendawi werek halok, atma nggedok ogagu-selok, Ala wene wokbaluk sek adigat ogagu-selok, ogarup agya hegek ovara, enendawi yunggubaluk, mbup yugu-selok, ap andi menda mondok okbisaup sek.

<sup>9</sup> Avyarat wene Yesus avok mamulik andi, it ndatak nggirik-nggerok vagogo iniselok mondok okbisaup sek aro. Vagago dugwit, wene adem Ala aburi vagago dogop modo wene andi vaga avakwa enendawi aik watbugu dogopwak. Eke, it nin modo wene ako waup enanggon ombasagwi halok, wapwak yiluk, ambi inim enaruk watu dogopwak.

<sup>10</sup> Ap enane, "E o," yiluk, hunggitek dugwit, enane amburup dititik yagan nagwis, avakwa enambutmu unggwi, ogasagwi andi, it eneyave wisane ovara, it Yakuri menda nin en huluk wene yugurugu dugwit, 'Henagap wendarupwak yiluk, henagamut mbales,' yiluk, yagalagwi menda andi, eneve iya iren ogo anderogo ogarit nelagwi. <sup>11</sup> It ap andi, wene mamulup dek menda mamulirugu dugwit, ap enabut-enogwa wisane inim enendawi avut dagauk-mbagauk oginivit lendagwi. Eke, it avakwa enangge hedaguluk, enanggadi arup menda hegek, ogasagwi. Anderogo atma, it enane mondok dek erogo bugu dogwen. <sup>12</sup> Ap navi Kereta menda ambi en iri dugwit,

"It ap o Kereta menda andi, mondok enane huluk yagalagwi menda aro.

Yangge edup en ap ugun hivirinivisiga hak, it anderogo dugwit,

enanggatek en enovadek agarwik o,"

yiluk, <sup>13</sup> yugeragagi ako andi, avyarat yagagi o. Anderogoma, it huluk wene musek lendagwi andi, Yesus Keretus wene avyarat umbutugwa ako mondok wadok dek vagogo dogopwak yiluk, hane anye vaga enaruk watya dogwen. <sup>14</sup> Eke, Yakuri menda enarivit mbilinisagwi wene inim, it ap avyarat wene hekbaluk, enendawi ugun wenggelogo, "Yerogo ogarup, nderogo ogarup," yagan nelagwi wene ako inim, "Dibaup moga," yiluk, hane anye vaga enaruk watya dogwen.

<sup>15</sup> It avakwa enendawi sek adigat dugwit weyak ombasagwi dek, Averiniki enendawima yi sek, yi weyak, yugirigya hegek ogasagwi halok, yi menda ndi menda Ala en naup moga dek bagagima, it huluk wene yagalagwi menda en, "Naup moga," yugu-sigik nunggu-selok, enendawi weyak asigadek. Sek aro. Eke, it avakwa Yesus avyarat embetetek weyak adigat ogasagwi

halok andi, it ambi nano vaga enendawi sek okhed-abuk. It ogarup enendawima wenggelisagwi inim, enendawi ombasagwi inim, andi weyak adigat dogosogon. <sup>16</sup> It ap huluk wene ['Henagap wendarupwak yiluk, henagamut mbalup,' eke, 'Andi naup moga,'] mamuleralagwi menda andi en yugu dugwit, "Ala ninelup," yagalagwi ovara, it ogarit lendagwi vaga en, "Ala nenanggon," umbutu dugwit, yagalagwi, yiluk, yedok iniselagwi. Ala wene hunggitek sovalogo baik lagu dugwit, sek ambi ogasagudek weyak adigat ogasagwima, alon edok werek iniselagwi.

### Modo wene halok adigat mamulirigya dogop wene

**2** Hat verak, Ala aburi Yesus ovaga vanggabuluk nggarogo ogarit lagu dogop modo wene ako ndatak mamulirigya dogwen. <sup>2</sup> It ap enanggok andi, enendawi suam watwis, enovavut sek agwi, enendawi werek agwi, it enendawi Yesus avyarat ombasagwi ako wadok dek agwi, anderogo dogopwak yiluk, yugirigya dogwen. Avakwa ovok erogo avyarat enendawi hunik okbugwis, eke, anggin enovaga agya halok enendawi mbuk dugwit, wugwi, ogagu dogopwak yiluk, yugirigya dogwen.

<sup>3</sup> It akwa enanggok andi, yi menda ndi menda ogagu dugwit, Ala agayuk wutu dogopwak yiluk, ap enanggok yugeraup yukhigis ako ndatak yugirigya dogwen. Enabis atok vaga wolok nagwis, amburup nenek oginivisiga menda enagaum erogo nungwi, andi ogagu dogop dek. Ata, eve wene halok adigat mamulirugu dogopwak yiluk, yugirigya dogwen. <sup>4</sup> Avakwa en Ala wene miyuk-meyan erogo bagu sao en, it akwa ndugum ako en enaguni inim, eneyagi inim, enendawi hunik agwi, enendawi werek agwi, avakwa enabwa en sek okbugwis, enawi sek erogo unde wakedugwi, akwa enendawi sek adigat dugwit, enaguni enavema seve yiluk, enane hunggwis, ogagu dogopwak yiluk, it akwa enanggok ako en akwa ndugum mamulirugu dogopwak.

<sup>6</sup> Eke, it ap sawe andi, anderogo enendawi werek dogopwak yiluk, enaruk watya dogwen. <sup>7</sup> Avakwa hat vaga il wakhegek ogagu dogopwak yiluk, hat yi ogagek ndi ogagek ogagya dugwit, sek adigat ogarit lagya dogwen. Ogarit lagya dugwit, wene mamuleraliga ako, hat hane inim lobalogo ugun-ugun mamulirigya, hagayuk dek un enda-enda wene adigat yugirigya, ogagya dogobuk. <sup>8</sup> Ata, hat wene yugirigya dugwit it ap hane waup "Nenanggon," ombasagwi ako en, 'Hat wene weyak yagas,' yiluk, nenavok yusogombuk ma, it enanggadi arupwak yiluk, hane sek adigat yugirigya dogwen.

<sup>9</sup> It avakwa enayeloman ako andi, enasini en yugurugwi ako, enavema seve yiluk, enane hobaluk, wene onngo yugeregetek iniselok, enasini enendawi hunik dogopwak yiluk, yugirigya dogwen. <sup>10</sup> It avakwa enayeloman ako andi, enasini enangge enonggop

wugu dogop dek. It ako andi, yi ogagek ndi ogagek ogagu dugwit sek ogarit lagwi vaga avakwa nin ako en, "Nenagap wendarisiga menda Ala wene wasogom," ombarupwak yiluk, "Henasini enangge wegetek vipak erogo dogones," yiluk, yugirigya dogwen.

<sup>11</sup> Andi, Ala nenabwa en okbininaliga wene ako, avakwa enagap wendarupwak yiluk, it ovok erogo enake sigam agagi. <sup>12</sup> Sigam agya halok, wene andi vaga Ala en, "Hit o wen-vaga yoma dugwit Ala henalon embetetek weyak ogasagwi inim, wen-vaga ogarup henendawi ninggya inim, hekbaluk, henendawi werek akluk, weyak ogagetek sek adigat dugwit, Ala wene wokbaluk ogarit lagu dogones o," yiluk, yukneraliga.

<sup>13</sup> Yukneraligama, yogak ogagu dugwit, Nenasin Ala ombok nenagap wendarisiga menda Yesus Keretus, mondok abinak werek dugwit sigam ari warup ako vaga nenendawi vonggabuluk wenggelek werekma, nenadenggen vaga sokhelagwi o.

<sup>14</sup> Nit yi weyak ndi weyak ogasagwi ako ogagu dogoguvun yiluk, At Yesus ako nit avyarat ombasagwi menda nenonggo mbalogo heda visibininigiluk, At eyave wogeragagi. Eke, "An naburi nake denek dugwit, sek ogarup enendawi adenggen vaga ogarit lagu dogopwak," ombakluk, nenomaluk horogo bininiligiluk, nit nenake At eyave wogeragagi.

<sup>15</sup> Yi wene ndi wene yukhisiga yi, yugirigya dogwen. Ala en hat yavup yi andok okbagagagima, hane anye vaga enaruk watya, enanggadi watya, ogagya dogwen. Eke, ap ambi en hat sovalogo bagaup meyan.

### Ala aburi halok ogagu dogop wene

**3** Avakwa en it o arum agarwik *pemerintah* inim, it ap o vagogo agarwik inim, enavema dugwit, enane hunggwis, eke, sek ogarup ambi werek agya halok, "Ogagu dogosogom o," umbutwi, ogagu dogopwak yiluk enelup erogo yugirigya dogwen.

<sup>2</sup> Ap ambi miyuk-meyan erogo bagwi, war-wat yugwi, ogarubuk. Ata, enendawi yanggalek dugwit, yi ap ndi ap ovok erogo enendawi sovalek vaga woginipu dogopwak yiluk, yugirigya dogwen.

<sup>3</sup> Nit ogo, muk anderogo ndatak, wes ovagak werekma, wene yuknirugwi ako hunggitek, sup adikmu nomo yagan lagwi, ap ambi ayeloman yugugu halok, "E o," yiluk, ogasiga andi hak, nit nenendawi ninggya halok ogarup nenendawi hogop ombasagwi ako dombok ogagwi, ogagu lagagup. Yi menda ndi menda ogarit lagu dugwit, weyak dombok ogagwi, nanggonhanggon yugwi, naninis-haninis yugwi, andi menda adigat ogagu lagagup ovara, <sup>4</sup> nenagap wendarisiga menda Ala en yi avakwa ndi avakwa enabwa en sek okbininaup ako, sigam ari wagya lagagirik, <sup>5</sup> nenagap wendakninipigi. Nit sek ogagu lagagup vaga nenagap wendakninipigibuk. Ata, At aigwak abet en nit Yesus avyarat ombasagwi ako nenendawi weyak horogo baluk, swi endarogo bininggu, Averiniki en nenendawi

swi ogovak higitnhipu, ogagagi andi vaga nenagap wendakninipigi.

<sup>6</sup> At nenagap wendarisiga menda Yesus Keretus vaga Ala en Averiniki nggilup-nggilup erogo wokneragagi.

<sup>7</sup> At Ala nenabwa en okbininggigi vaga, "Wene enovaga bisaup dek o," yiluk, mondok sek okbininggu laga-girik, ap ambi asin eyase hedaliga hak, nit niniluk mondok-mondok dogop nenape wenggelek ako hedaguluk, Averiniki nggilup-nggilup erogo wokneragagi.

<sup>8</sup> An wene yukhisiga yi, avyarat o. It avakwa enendawi Ala ovaga vanggaluk, avyarat ombasagwi ako enendawi dibaluk, yi yavup ndi yavup sek menda ogagu dogopwak yiluk, an yukhisiga yi, ninggi-nanggi hane anye vaga yugirigya dogwen. Avakwa ovok erogo "Wene yi, sek aro," yiluk, welagwi vaga sek ambi okhedaup atma, yugirigya dogwen.

<sup>9</sup> Ap wes ovagak enunggut dugwit wene onngo-onggo yugwi inim, ap enadem mbilinggis inim, Musa wene mbalek vaga, "Yerogo-nderogo," yugu dugwit wunumuk yugwi inim, andi ogarit lagu dugwit, atok vaga andoma ambi okhedaup dek hegek un enam warogo yugusim, hekbaup aro. <sup>10</sup> Ap ogotbisaliga menda ako en eve wene hekbaluk, weyak adigat ogarit laga vaga weyak onngo ovaga horabetagas hegek,

ogarit landiga helupma, elap mberen vaga aruk wat-baluk, hekbaup aro.

### Wene atok vaga yugogogi wene

<sup>12</sup> An o sogwes ogagya mbeda o Nikopolis andoma dogop imbitirikmu, an en ap Aretemas a, ap Tikikus a, ambi lakba wagya neyalok, andoma werekma, hat hodo erogo nadema warinok yiluk, ogagya dogwen. <sup>13</sup> Ap Apolos ako inim, wene amburup mbalisiga menda ap Senas ako inim, hodo erogo lakbisa wagya dugwit, it enangge-enangge dek halok, wogerano. <sup>14</sup> It nit menda andi en, avakwa enangge dek halok, † okbugu dogopwak yiluk, yavup sek erogo ogarup mamulhidugu dogopwak. Andi ogagu-selok, enggen yigitek dogosogom buk o.

<sup>15</sup> It ap ninim agurik ovok erogo an ninim en "Wa," yukhisagwi o. Eke, it Yesus Keretus avyarat umbutu dugwit, enendawi hunik okbininalagwi hinim agipik andoma ovok erogo "At Paulus en 'Wa,' yukheraga o," yiluk, yugerano.

Ala henabwa en okbugugu dogopwak o. Nabut wa!

---

† 'Enangge dek' yagagi andi, adem andi yi menda ndi menda ndugerek-ndagarek ogasagwi ako menda. Wakhegek, erom a, is a, yum a, yaga andugun, peram a, ata yavup okhedaup meyan halok a, anderogo wane-wane dek halok, nit ap Kerisen menda en okbisaup.

# Yakobus

**1** Hit Yakop aburi enombawi wigalek hininis unggul 12, yi awi ndi awi sak yagagup ako, an Yakobus en Nenasin Ala, Nenowa Yesus Keretus inis ombok, enayeloman dugwit, "Wa," yukheraliga o.

**Avyarat ombasagwi inim, enendawi werék inim, yuger-agagi wene**

<sup>2</sup> Nowa-nasin. Anggin-mbanggin adik-adik menda henovaga agya halok, henendawi mondok adenggen umbutu dogwes. <sup>3</sup> Hit avyarat umbutu hiniselok, henavut mbangguma, anggin-mbanggin henovaga agya hegek, henendawi horaik dugwit, "Nenendawi ndipuk-wadok dek oknavupwak yiluk, ogagya higi," yiluk, adenggen umbutu dogwes. <sup>4</sup> Anggin mbanggin henovaga agya hegek, hit henendawi ndipuk-wadok dek horaik dugwit ogagu dogosogon halok, hit henendawi hoda okhinipu, eke mondok sek okhinipu, henendawi werék okhinipu, ogagya dogosogon o. <sup>5</sup> Ogagya dogosogon ovara, hiren ogarup ambi henunggut halok andi, Ala yugeres. Yugugu hiniselok, At Ala endawi mbuk dek sagain vaga yi ap ndi ap ovok at wogeraliga ako en ogarumwak yiluk, hinelup okhinivisogon o. <sup>6</sup> Hit Ala yugugu dugwit, henendawi yunggup yegetek mondok avyarat umbutu dugwit, yugugu dogwes. Ap ambi endawi yunggubaluk ogagya dugwit, Ala yugugu halok andi, o havut wagya dugwit is mogoliluk ogasiga andi wane-wane, ap ako endawi anderogo at agarik. <sup>7</sup> Ap andi endawi mberen dugwit, yi ogarup ndi ogarup endawi wenggelit landigama, endawi seyalek dogosogonbuk. Ap andi Ala yuguguma, 'An nendawi mberen halok, at woknirisogon dek higi,' yiluk, imbitya dogopwak.

**Ininggis dek, ininggis werék wene**

<sup>9</sup> Hit nasuwi Ala aburi hininggis dekma, hininis sovalek agipik ako, hininis Ala il vaga siyalek agarik atma, henendawi sovalek dugwit, adenggen umbutu dogwes. <sup>10</sup> Eke, hit nin hininggis werékma, hininis siyalek agipik ako, Ala il vaga hininis sovalek isaligama, "Yo angga hedangga dek asiga andi hak, nininis anderogo at dek arisogonma, sek aro," yiluk, henendawi sovalek dugwit, adenggen umbutu dogwes. <sup>11</sup> Andi, mo daga wagya dugwit, mo idup en yo angga-hedangga dis iri dugwit, mbuk agya lagarik mbililis erogo wambigya dugwit, elose weyak asiga hak, it ap ining-

gis werék okhedaguluk ogarit lagu-selok, eneyave anderogo at dek arusogon o.

**Nenendawi avut mbanggu ogagya halok, ogagu dogop wene**

<sup>12</sup> Hit ap akwa henavut mbanggu hegek ndipuk-wadok dek agipik halok, 'An sek at agirik' umbutu dogwes. Hit ap akwa henavut mbanggu hegek, ndipuk-wadok dek agipik ako sek ogagu hiniselok, nggenak iris nggudit-nggudit mendago makota yikbiselagwi ako hak, Ala en "Hit ap akwa henendawi hunik okbanilagwi ako, An en hiniluk mondok-mondok dogop menda wokherayogon o," yiluk, avok yagagi ako wokherayogon.

<sup>13</sup> At Ala en, "An weyak ambi ogarisogon," ombasigadek, eke ap akwa weyak ogarupwak yiluk, enendawi nggagalogo bugu, okbisaligadekma, ap ambi endawi nggagangu halok, "Yi Ala en nendawi nggagalogo baniliga," yiluk, yup andi mondok dek o. <sup>14</sup> Nit nenendawi nggagalisiga andi, ap ambi weyak ogarupwak yiluk, ane agil-amok likelok landiga ako hak, nit nenendawi en at, weyak ogarup hogop, 'Ai' umbutu dugwit ogasagwi o. <sup>15</sup> Eke, hwa ambi eyak avula akluk, endaklagya lagarik, andi en, avyak ako hambisiga hak, nit nenendawi en at, weyak ogarup hogop, 'Ai,' umbutu dugwit halok, weyak ako nenendawi ombok agya lagarik, neneyave at hambup okninivisiga.

<sup>16</sup> Nowa-nasin, hit an nendawi hunik ako, hit henendawi nomalhedabuk. <sup>17</sup> Nenabwa en sek okbininiliga inim, wokneraup ombasiga ako mondok wane-wane wokneraliga inim, ovok erogo mbogot vaga en woknera wambu wandiga. Yi awi ndi awi ovok erogo awiya ogasiga adem andi, At nenasin Ala en at, woknera wambu wandiga. At ambi agek ogagya dugwit, ndugwis ambi vaga mo munggumu hak agya, ndugwis ambi vaga mo yasigama hak agya, ogasiga dek o, at mondok-mondok itok awiya adigat agarik. <sup>18</sup> At Ala en yi menda ndi menda ogagagi ako sovalek hegek, nit At angge enek dogopwak yiluk mikninipu lagagirik **wene avyarat yagagi** vaga okbininggigi.

**"Henaruk adigat hulisagwi a, eyave inim avyarat ogasagwi a?" yugeragagi wene**

<sup>19</sup> Nowa-nasin, hit an nendawi hunik ako, wene yi des erogo wugu dogwes. Nit eyave mondok sek adigat ogagu dogop Ala en ninimbitigi ako andi, nenaninis

vaga ogarup dek atma, hit ovok at wene yiluk-wuluk erogo henaruk hunggu dogop sek ovara, yup halok andi, dibaluk yugwi, henaninis yiluk-wuluk erogo wing-gitek, des erogo ogagwi, ogagu dogwes. <sup>21</sup> Andi halok, ogarup dek menda bo-bo ugup ovagak hegek ugun ogagwi, eke yi weyak ndi weyak ogagwi, ogasagwi ako ovok at hekbaluk, henendawi sagain vaga dugwit, nenagap wendarup wene Ala en nenendawima awi yakbininiliga wene ako, adigat des erogo wugu dogwes.

<sup>22</sup> Ala wene henaruk hobaluk ogagatek halok andi, hit at henambutmu dagalhedelagwi atma, henaruk adigat hunggik ogagu dogop andi moga o. Ata, henaruk hobaluk, eyave inim at ogagu dogwes. <sup>23</sup> Hit Ala wene dibaluk, ogagetek dugwit, un henaruk adigat hulisagwi halok andi, ap ambi wukagak vaga elose bikaliga ako hak, hit aro. <sup>24</sup> Eloze bikhigya lagarik, lagya dugwit, "Nelose anderogo higi," yiluk, endawi wenggengitek vage unggut asiga ovara, <sup>25</sup> Ala en wene denggalogo dik-duk erogo yukneragagi ako vaga, visilogo sigam erogo bininiliga wene ako, hit sek erogo yenaga wugu dogomundik, henunggut agetek des erogo wokbaluk, ogagu dogosogon halok, At Ala en henendawi adenggen at okbigagayogon o.

<sup>26</sup> Hit ambi en, "An Ala wene dibaluk ogasiga o," yagalagwi ovara, henabya atok vaga ugun yagan nelagwi ako henelagap des erogo aruwam welagetek halok, hit henambutmu dagalhedugu dugwit, "An Ala wene dibaluk, ogasiga o," yagalagwi ako andi, un enam warogo at ogagu hinigis. <sup>27</sup> Nenasin Ala il vaga At ane dibaluk eyave mondok sek adigat ogagu dogop andi, it avyak hwavyak wenaborangge inim, akwa sogwa inim, enendawi wakedugu-selok, enabwa en yonggarinipwis, eke it ap akwa enendawi weyak en weyak ogarupwak yiluk, henendawi nggagalhinivit wagwi ini-sawen, henendawi suwam wakidugwi, ogagu dogwes.

### Hit ap enelose vaga adigat dibisabuk wene

**2** Nowa-nasin. Hit henendawi nenowa inis ombok Yesus Keretus mondok siyalek agarik ako vaga ovaga vanggalbaluk, avyarat ombakluk, ogarit lagu dugwit, ap akwa enelose vaga dibisiluk, ambi sek okbagwi, eke ambi henanggon okbagwi, ogagu dogobuk o. <sup>2</sup> Ap ambi mbusi emas amumulip cincin ambelat enggen ovagak inim, yum mondok sek inim, yikbaluk, hit samban ogasagwima nunggu wagya, eke ap ambi inggis dek yum weyak yirik nunggu wagya, ogagu-selok, <sup>3</sup> ap ambi yum eyave sek yirik ako agayuk wukbaluk, yugu dugwit, "Nasin o, mbanggu-vaga sekma yenam hora yima o," yugwi, eke ap inggis dek ako agayuk wutitek dugwit, "Un andenam mendek dogomi a, nggulumu wen vaga andenam hora yimi a?" yugwi, ogagu hiniselok, <sup>4</sup> hit henendawi en ap ambi weyak, ap ambi sek, umbutu dugwit, yagalagwi ako dek? Eke, enelose vaga dibisiluk, okbiselagwima, ap wene owak

dilisigama ogasagwi ako hak, ogagu dugwit, weyak at hologo belagwi ako dek?

<sup>5</sup> Nowa-nasin, hit an nendawi hunik ako, wene yi des erogo henaruk hunggu dogwes. It ap ininggis dek umbutu-sigik, Ala en miginipigi ako andi, it Yesus avyarat ombasagwi ako vaga Ala en it ininggis werek enombasiga. Eke, ap ovok erogo, "Nasin ai," yiluk, "Enendawi hunik okbanunggu-selok, navema bisayogon," yiluk, avok yagagi ako, Ala avema bisaligama mavorangge hak andok okbugu, ogarupwak yiluk, miginipigi. <sup>6</sup> Ala en it at miginipigi hegek, hiren ap ininggis dek halok, mbidarogo biselagwi. Mbidarogo bugu hinigik, wiyik-nom weyak-nom okhinipu dugwit, likenombolok wene owak dilisagwima bigi lendagwi ako andi, it ap ininggis werek en okhinivisagwi ako dek? <sup>7</sup> Eke, it ininggis werek menda en Yesus inis siyalek agarik wokheragagi ako, mbidarogo belagwi!

<sup>8</sup> Ala wene warek wane-wane ogagu dugwit, "Hit heneyave henendawi hunik okhedelagwi ako hak, it hinim agipik ako anderogo at henendawi hunik oginipu dogwes o," yiluk, nenasin inis ombok en wene denggalogo yukneragagi ako ogagu hiniselok andi, sek at ogasagwi ovara, <sup>9</sup> ap akwa enelose vaga dibisiluk, okbiselagwi halok andi, weyak ogasagwi aro. Andi ogasagwi vaga wene denggalek sagalogo belagwima, Ala en, "Hit weyak ogasagwi o," yiluk, yukherayogon o. <sup>10</sup> Hit Ala en wene denggalogo yukneragagi ako ovok erogo ogagu dugwit ovara, wene ambiat ogagetek hiniselok andi, wene andi ovok erogo ogagetekma, weyak at ogasagwi o. <sup>11</sup> At Ala en, "Hwa ap enogwa hegek ogarup moga o," iri dugwit, "Ap warup moga o," inim yagagirikmu, hit ambi hwa ogagatek dugwit, ap watwis hiniselok andi, Ala wene yugup sagalogo belagwima, weyak ogasagwi andi aro.

<sup>12</sup> It ap akwa, "Ala wene yugup visilogo bininaliga wene ako andi vaga nenowak dilisogon o," yiluk, enendawi wenggenggu dugwit, enane yugwi, ogarit lagwi, ogasagwi ako hak, hirogo, ogagu dogwes. <sup>13</sup> Hit ap akwa enabwa en sek okbigitek hiniselok, Ala en at henowak dinggu dugwit, henabwa en sek okbigigayogon dek o. Eke, ap akwa enabwa en sek okbugwis hiniselok andi, henowak dilup ako, henalon dek at dogosogon o.

### Avyarat ombasagwi ovara, eyave inim ogagetek halok, yugeragagi wene

<sup>14</sup> Nowa-nasin o. Hiren, "An nendawi avyarat ombasiga o," yagalagwi ovara, eyave ogagetek hiniselok, nano ogaruguluk yagalagwi embetep? Ala wene eyave ogagetek dugwit, un avyarat ombasagwi vaga adigat Ala en henagap wendarisogon embetep? <sup>15</sup> Henarup ambi a, henowa ambi a, asum inim, o hutun-howam nelagwi menda inim, agarik dek halok, <sup>16</sup> hit ambi en, eyave sek dogopwak yiluk, ambi wogigitek dugwit, ane adigat "Ai nowa. Hagarom iya erogo ninggya, hasum

sek dombok yikhidigya, hendawi adenggen vaga elak o," yiluk, yugugu hiniselok, andi sek embetep? Dek, un at yagalagwi o. <sup>17</sup> Anderogo hak, nit nenendawi avyarat ombasagwi ako wane-wane eve inim ogagetek dugwit, avyarat adigat umbutu niniselok, nit ambi okbininup dek atma, un enam warogo avyarat ombasagwi o.

<sup>18</sup> Anderogo ovara, hit ambi en, "Hat avyarat ombasiga ovara, an andi eve inim ogasiga o," yiluk, yugu hini-girikmu, avyak wai. Hit avyarat ombasagwi ako, eve inim ogagetek hiniselok, "Yi ap avyarat embetetek aro," henombasagwi ovara, an andi, avyarat imbitya dugwit, eve inim at ogasigama, "Yi ap avyarat ombasiga, yi" nombasagwi, yi helagwi? <sup>19</sup> Hiren, "Ala andi, adigat agarik avyarat ombasagwi," yiluk, ombasagwi andi sek at ovara, it madis inim wene andi anderogo at avyarat umbutu dugwit, enalon en enowak wuruk-wuruk yagalagwi ovara, hit andi avyarat umbutu dugwit, mbup erek adigat agipik hinigis o.

<sup>20</sup> Nowa-nasin, hit ap wes hak yagan nelagwi. Eve ogagetek hegek, avyarat ombakluk, mbup erek hiniselok andi, "Yi un enam warogo at avyarat ombasagwi o," yiluk, embetetek agipik yi? <sup>21</sup> Nit nenombao Averaham ako en Ala ake anggom warogo hali hunisagwima, ogovak higi-rogo baluk, at abut Isak Ala ake bagiluk ogagagi ako vaga, at Ala en, "Ap yi endawi mot o," yiluk, wogogi. <sup>22</sup> Ala avyarat imbitya dugwit, eve inim ogagya lagagimu andi yedok higyo. Eke, eve at ogagagi vaga at endawi avyarat imbitigi ako dek agetek, mondok atma at agagi o. <sup>23</sup> Andi ogagagi vaga, Ala wene dirup warek yi: "Ap Averaham en Ala avyarat ombakluk, endawi At ovaga vanggabagagi vaga, Ala en 'Ap yi endawi mot aro,'" yiluk, Ala wene dirup warek ako atma des iri lagagimu, At Ala en, "Ap Averaham ako andi, An naswe aro," yiluk, yagagi. <sup>24</sup> Andi halok, nenendawi avyarat umbutu dugwit ogasagwi ovara, eve inim ogagetek hegek, Ala en nenendawi mot nenombarisogonbuk o. Ata, avyarat umbutu dugwit, eve inim ogasagwi vaga, nenendawi mot okbininaliga helagwi o.

<sup>25</sup> Andi ogagagi wane-wane hwa yanenggek landiga menda Rahab ako en, it ap Yakuri menda o yokaguluk wagagwa ako initwis hawen yiluk, umwa hwilakbugu lagagirik, sup digot vaga lakbigigi ako vaga, at Ala en, "Hwa yi endawi mot o," yiluk, wogogi. <sup>†26</sup> Neneyave yi hegek, nenendawi nggigis erogo lagya halok, "Ap andi hombagas o," yagalagwi ako ndatak nenendawi avyarat ombasagwi ovara, Ala wene andi eve inim ogagetek halok andi, un enam warogo at avyarat ombasagwi o.

#### Nenane vaga weyak ogasagwi wene

**3** Nowa-nasin. Ala en nenowak dinggu dugwit, anggin ombok erogo nit ap akwa mamuleralagwi

† Kejadian 22 yokanes. †† Yosua 2 yokanes.

menda ako nenovaga bininayogon ninelup atma, hit wisane, "An guru dogosogon o," ombarubuk. <sup>2</sup> Nit ovok erogo yi weyak ndi weyak ogasagwi menda aro. Nit mondok sek duklurik en, nit nenane yagalagwi atok vaga weyak agya duklipuk. Nit nenane yagalagwi atok vaga weyak agya duklipuk en, neneyave nininggis-ninisok vaga en weyak ogarup okninivisiga ako ovok erogo sovalogo bagu duklu o.

<sup>3</sup> Anderogo hak, wam kuda woginiviluk lagu dugwit, yo bogalek elagapma baluk, atok venak-venak vaga mbunggwi yidibaluk, nit laup ombasagwima akoma woginiviluk lendagwi. <sup>4</sup> Eke, mburis kapal layar ako mondok ombok atma, o havut anye ombok erogo iri dugwit, wolok landiga ovara, mburis andok pilot ako en, "Andoma laup," imbitya dugwit, abi amot okhegek yupwak yiluk, yo mondok maduk elakas vokot sivinik agarik ako vaga nomalogo wolok landiga o. <sup>5</sup> Andi hak, nenabya aro. Nininggis ninisok ombok hegek, nenabya maduk ako en yagalagwi vaga wene ndugwi ombok wigya landiga o.

Hali enggen maduk en, yavup sakni ombok hali naliga ako, henendawi dibas. <sup>6</sup> Nenabya andi hali abya hak aro. Yi weyak ndi weyak inis unggul ovok erogo adem andi, nenabya aro. Nenabya andi neneyave atok hunik atma, neneyave ovok at weyak erogo bininaliga. Hali munukmu en hali enggen wolok nenabya vaga yevedogo ba wendagwi vaga, nit ap akwa wen vaga menda ogasagwi ovok at ogarit lagu dugwit, weyak adigat ogarit lagu dogopwak yiluk, nenovaga yevedogo bininggik landiga adem andi, nenabya aro.

<sup>7</sup> Swa-bagas, ndimbu-nggusa, mindom-mbas, dukikan, yi menda ndi menda ogagagi ako, ovok erogo vago inil yonggoninivisagwima, yonggoninivup sek ovara, <sup>8</sup> nenabya andi, il yonggunup andi meya o. Nenabya andi mondok weyak, ap akwa iniruguluk heda nalis oangga hak mondok hobo-hobo erogo agarik atma, sovalogo baup dek aro.

<sup>9</sup> Nenane venak vaga nenasin Ala inis siyabagwi, eke venak vaga ap akwa Ala elose wane-wane ogovak higi-rogo bigigi helan, vudilogo bugwis, ogasagwi o.

<sup>10</sup> Nenelagap ambi at en wulu wagya dugwit, Ala inis siyabagwi, andi en, vudilogo bugwis, ogasagwima anderogo ogarup mondok moga o, nowa-nasin. <sup>11</sup> Is liris ambi at elola en, ambi sek menda wulu wagya, eke ambi eda menda wulu wagya, ogasiga dek o! <sup>12</sup> Eke, nggaris en saup yugu, sawe en nggaris yugu, ogarup sek embetep? Ata, is eda menda en, is sek menda wulu warup, sek embetep? Anderogo mondok ogasiga dek, nowa-nasin.

#### Mbogot vaga agarik ako en nenendawi werek okbininiliga wene

<sup>13</sup> Hit ap ambi henanggelekma endawi werek dugwit, yi wene ndi wene vage yedok haliga halok, ap andi endawi werek helagwima, endawi sovalek dugwit sek og-

arit lagya hinil havovok yiluk, ogarit lagya dogopwak o.<sup>14</sup> Anderogo ovara, hit henaninis umbutu dugwit, henendawi lakot dugwit yagan nagwis, "An hologo baliga adik ogarup," umbutu dugwit, yagan nagwis, ogasagwima, henendawi wogobetaup andi moga o. **Ala yagaliga wene** hegek, avut dagalisagwima, huluk wene molalogo yagan nelagwi aro.<sup>15</sup> Hit henaswe ambi aninis okbagu dugwit, henendawi lakot yagan nagwis, "An hologo baliga adigat ogarup," umbutu dugwit, ogarit nagwis, ogagu hiniselok, mondok nadok-hadok agya dugwit, yi weyak ndi weyak ovok at agya helagwi ako andi, At endawi werek mbogot vaga agarik Ala ako en hologo bugu hegek ogasagwi dek. Ata, at sile en it ap akwa wen vaga menda enendawi hologo bugu hegek, henendawi ninggya halok, eyave at ogasagwi hinigis o.

<sup>17</sup> Eke, At endawi werek mbogot vaga agarik ako en hologo bininaliga ako andi, adem ombok andi, nit nenendawi weyak agetek mondok sek adigat dogop. Aswe ambetaga andi, ap akwa sek ugun dambulik dogopwak yiluk, moga yugurugwi; nenendawi sagain vaga yugurugwi; yuknirugu-selok, "E o," yiluk, ogarit lagwi; ap akwa enabwa en sek okbugwis; yo enggen eyave yiklandiga ako hak, nit anderogo at sek ogarit lagwi; ap ambi sek okbagwi, ap ambi weyak okbagwi, ogagetek wane-wane okbugwis; nenendawi lakot dugwit yugeregetek, nenendawi sagain vaga adigat yugurugwi; ogagu dogopwak yiluk, okbininaliga o.<sup>18</sup> It ap akwa enendawi dambubigik nelagwi ako en enendawi dambulik dogopwak yiluk okbigik nagu dugwit, enggen yupwak yiluk awi angge yasagwi ako hak, ap akwa sek adigat ogagu dogopwak yiluk, enendawima mabigik nagwis, agarwik o.

#### Ala avema seve yup wene

**4** Hit yawi bagwi, winimuk yugwi, ogasagwi adem andi ngga vaga embetep? Henendawi naliga adem ovok erogo henendawima dugwit, "An nendak ogarisogon, hat hendak ogarisogon," henendawima en nidi-hidi yugu dugwit, ogasagwi ako dek?<sup>2</sup> Yi menda ndi menda waup henendawi naliga ovara, waup dek agya halok, ap at wasagwi. Eke, yi menda ndi menda hogop ombasagwi ovara, wegetek halok andi, winimuk yugwi, yawi-bagwi, ogasagwi. Hit hogop ombasagwi ako, Ala nggino yugegetekma, wegetek at agipik o.<sup>3</sup> Eke, hit nin en Ala wokherapwak yiluk, nggino yugisagwi ovara, henendawi naliga ako amusek lagu dugwit, dek erogo betaguluk, henendawi mondok adik hobaluk yagalagwima, wokheraligadek o.

<sup>4</sup> Hwa ambi en ap ya hedegek nda hedegek ogarit landiga hak ogasagwi yi, it ap akwa wen vaga menda weyak ogasagwi inim, weyak ombasagwi inim, ako hinim henendawi hunik okhidugu hiniselok, Ala hit mberen ogot hedelagwi ako henunggutmu, ogasagwi? Anderogo atma, ap ambi, "It ap wen vaga menda

weyak ogasagwi inim, weyak ombasagwi inim, ako ninim hunhedayogon o," imbitya dugwit, ogagya halok, Ala im ogot hedeliga aro.<sup>5</sup> "Ala en Averiniki nenendawima mabininggigi hegek, nenendawi naliga ako amusek lagu niniselok, Averiniki ako en, 'Ai', yiluk, endawi wakedaliga o," yiluk, Ala wene dirup watigi ako andi, un watigi embetep?<sup>6</sup> Averiniki endawi anderogo at wakedaliga ovara, weyak hekbapwak yiluk, Ala endawi hunik en ombok at okbininaliga.

"It ap akwa en enendawi wogobetelagwi halok, Ala en ogorogo bisaliga ovara,

enendawi sovalek agarwik halok andi, Ala endawi hunik en ombok at okbisaliga,"<sup>†</sup> yiluk, Ala wene dirup warek agarik o.

<sup>7</sup> Anderogo atma, Ala avema seve eres. Ala avema seve yiluk, werekma, at sile madis ako en, weyak okhinivi wagya halok, hinim ndup sumbutu dogwes. Hinim ndup sumbutu dogosogon halok, at hoda wilisogon.<sup>8</sup> Hit Ala hinim horok-horok dogosogon halok, At Ala ogo hinim at dogosogon. Hit weyak ogasagwi yi, hininggis hutwis, eke henendawi mberen yi, henendawi ambi at okbaluk, yi weyak ndi weyak hekbagwi, ogagu dogwes.<sup>9</sup> Hit weyak ogasagwi ako vaga, henendawi mburup yugu dugwit, yup yagu dogwes. Hit enda yagwi, henadenggen yugwi, ogasagwi andi, hekbisilik, henendawi mburup yugu dugwit, de wene yugu dogwes.<sup>10</sup> Ala avema henendawi seve eres. Seve yugu hiniselok, At en hit siyabigigayogon o.

#### Ap akwa enavok mbalup andi moga wene

<sup>11</sup> Nowa-nasin o. Henane huluk molalogo navok-havok yup andi moga. Hit ambi en henowa-henasin henane huluk molalogo enavok mbanggwis, enowak dinggis, ogasagwi andi, "Ala en wene denggalogo yukneragagi andi weyak yagagi o," yiluk, ogagu dugwit, At Ala wene owak dilisagwi hak ogasagwima, hit wene denggalek ogasagwi menda dek o. Hit Ala wene owak dilisagwi menda at henombasagwima, anderogo ogarubuk.<sup>12</sup> Wene denggalogo yukneragagi ako, nenowak dilisiga ako andi, At Ala adik aro. At adik en nenagap wendatu, dek erogo binininggu, ogarup sek ovara, hit Ala hak okhidugu dugwit, henowa-henasin enowak diluguluk ogasagwi ya? Moga, nowa-nasin.

#### Ala en sek imbitya halok, ogagu dogop wene

<sup>13</sup> Avyak! Hit wene mbanggu dugwit, "Yogak a, heveret a, o kota andoma lagu dogomundik, yoparip wonggalhedaguluk, yi menda ndi menda hunit lagu ninigik satu tahun at ogarusogon o," yiluk, yagalagwi ako, henendawi dibagu dogwes.<sup>14</sup> Hit heveret okhinivup ako henunggut dugwit, yugwi hinigis. Nihiluk agurik ako andi, isogo agarero hak aro. Isogo agarero dagasiga ako andi, sidok inggya ninil helagwi ovara, dek asiga ako hak andi, neneyave anderogo at

<sup>†</sup> 4:6. Amsal 3:34 yokanes.



okninivisiga o. <sup>15</sup> Andi halok, hiren yugu dugwit, "Nenasin en sek imbitya halok, neneyave sek dugwit, 'Yerogo ogarup nderogo ogarup'," yugu dogop andi sek. <sup>16</sup> Hivis ogarup henunggut dugwit, hinelup ovagak okhidugu dugwit wogobetelagwi andi, weyak at ogagu hinigis. <sup>17</sup> Eke, hit ambi sek ogarup hinelup dugwit ogagetek hiniselok andi, weyak aro.

#### Ininggis werek menda hurimbis yugeragagi wene

**5** Hit ap hininggis werek yi, henaruk hunggu dogwes. Hit idup yagan wakidugu dogop hudi vanggo yi wandigama, yup inim, na inim, yakidugu dogwes. <sup>2</sup> Henangge iya ako andi weyak lagya, henasum sek ako andi, hudup-hudup en elo mbanggya, <sup>3</sup> henayoparip enggen emas inim, verak inim, ogovak higirik ako andi, vage isip vaklagya ogarit landiga. Henayoparip isip vaklaga andi vaga, henabet heda, hwilakbetaluk welagagup ako, sigam arisogon. Eke, isip vaklarit landiga hak, hit henagap anderogo at, hali en nenggek layogon. O vivis oklarup ako vage vanggo yi wandigama, yi menda ndi menda henendawi hunik wonggalogo betugu lagagupikmu, henanggadi en henayup yakidugu dogosogon.

<sup>4</sup> Wii! Iren hit heneyavup okbigigalagwi ako, onngo wane-wane wogirugu lagetekma, winimuk yukherelagwi. It nin heneyavumu en enggen mbalogo wolok wokhera wendagwi ako, inim onngo sek erogo wogeregetekma, winimuk yukheralagwi andi, nenasin ombok adigat anye werek ako, vage aruk hulisiga. <sup>5</sup> Hit wen vaga menda henangge-henangge vaga sek adigat dogop umbutu dugwit, henendawi hogop menda adigat amusek nagu lagagup. Wam amok werek agya halok, naguluk wasagwi ako hak, hit hininggis werek okhedelagwima, onngo hinirisogon. <sup>6</sup> It ap akwa enendawi sek ako en wene onngo yukheregetek inigik, hiren henane huluk at enovaga bisiluk, initu lagagup.

#### Anggin enovaga agya hegek, enendawi horaik dugwit, samban ogagu dogop wene

<sup>7</sup> Anderogo atma, nowa-nasin, nenowa warisogon atma, henendawi hora yiluk dogwes. Ap ambi en erom awi yakbagya lagarik, musu higya, hivi higya, ogagya dugwit, lengge yupwak yiluk endawi hora yiluk, sokhigya agarik ako dibas. <sup>8</sup> Andi wane-wane, hit hinim henendawi horaik dogwes. Nenasin warup ako vage vanggo yi wagarikmu, henendawi ndipuk-wadok dek okbetaluk dogwes. <sup>9</sup> Nowa-nasin o. Ala en weyak onngo henovaga okbigiga wagya hawen, henane mbaket yugu dugwit ap avok mbanggu dogobuk o. Hinelup dogop! Nenowak dilisogon ako andi, warigiluk vage sup mbanggutmu mendek agarik!

<sup>10</sup> Nowa-nasin. It ap o endak erogo Ala en yugirigya hegek wene yugurugu lagagwa navi-navi ako, wiyiknom weyak-nom okbugu-sigik, enendawi horaik

wadok dek dugwit yugurugu lagagwa ako hak, hit enagut wakhegek wane-wane ogagu dogwes. <sup>11</sup> It anggin enovaga agya hegek, enendawi horaik hiniselok, Ala adenggen enovaga bugu lagagi ako hinelup aro. Ap Ayup inim anggin ovaga agya hegek, endawi horaik wadok dek welagagi ako andi, ovok henaruk hunggugup. Ala en ap akwa ovok enabwa en sek okbisaligama, ap Ayup anggin ovaga agya hegek endawi hora yiluk mondok wigya lagagimu, Ala en atok vaga okbagagi ako andi, hinelup aro. †

<sup>12</sup> Anderogo atma, nowa-nasin, an wene iya ambi yukherayogon o. Ala inis ugun yup andi moga. Mbogot inis inim, wen inis inim, yi menda ndi menda inis ovok at inis vaga "Yukeraliga o," yiluk, yugeraup andi moga. Hit weyak yagalagwi vaga, Ala en weyak onngo henovaga bugugu hawen, "E o," imbitya halok andi, "E o," at yup. Eke, "Dek o," imbitya halok andi, "Dek o," yup.

<sup>13</sup> Ap ambi henanggelekma en anggin-mbanggin ovaga agya halok, samban ogagya dogopwak. Eke, ap ambi endawi adenggen imbitya halok, ndawi vaga Ala inis siyabagya dogopwak. <sup>14</sup> Eke, ap ambi aup idup warek halok, ap *Ala aburi vagago agarwik menda* enayonggo yugeraup. Enayonggo yugurugu dogomundik, wagu hiniselok, ap aup warek ako amburup ovaga ndibaluk, Ala inis vaga ake samban ogagu dogopwak. <sup>15</sup> Eke, it enendawi Ala avyarat umbutu dugwit samban ogagu hiniselok, nenasin en ap aup warek ako legego sek okbayogon o. At weyak ogagya halok, weyak ako dek okbayogon o. <sup>16</sup> Anderogo halok, hit weyak ogasagwi ako, at ambi en at ambi adema aruk holek hegek vaganggwis, at ambi en at ambi ake samban ogagya, ogagu dogomwi vaga, aup idup okhinipu halok, sek okhinipu dogosogon o. Ap ambi endawi mot Ala inim hunik dugwit samban ogagya halok, Ala anye iya atma, atma ogarisogon o.

<sup>17</sup> At ap Eliya andi, nit ndatak welagagi. At "Musu wambu warubuk," yiluk, ane avyarat des erogo samban ogagagirikmu, musu wen vaga wambu wagetek hegek, tiga tahun okbaluk, saut enam hudi welagagi. <sup>18</sup> Andi okbaluk, vivis samban ogagya lagagimu, musu ombok erogo wambu wagya dugwit, yo heda awi ako mondok iluk agya dugwit, enggen yogogi o.

<sup>19</sup> Nowa-nasin. Ap ambi henanggelekma *Ala wene* wokbaluk, vivis "Nanggon," yiluk, endawi nomaliluk lagya halok, hit ambi en ap ako endawi yonggonogo wolok wagu hiniselok, <sup>20</sup> Ala en iri dugwit, "Ap andi weyak ogasiga ako hekbaluk, an nane wapwak yiluk, endawi yonggonogo wolok wagen vaga, ap andi hambuluk lendagwima lagyama, at weyak menda dek erogo agap wendarupwak yiluk, ogagen atma, sek at ogagen o," yiluk, wa yukherayogon o.

Wene Yakobus en dirup watigi ako, andi aro

† 5:11: Ayup 1:21, 2:10 yokanes.

# 1 Yaya

## At Eve Wene Yesus en niniluk okninivisiga wene

**1** Mbogot-wen yi, ao wakhegetek hegek, At endak erogo welagagi awakwa iniluk oginivisiga menda Eve Wene ako, avok vagalogo yukherelagwi o. At ane nenaruk hunggwis, eke ninil eyave en hugwi, ogarit lagya ako dibagwi, eyave nininggis vagatwis, ogagagup ako at yukheralagwi o. <sup>2</sup> At mondok iluk agarik menda sigam agya lagagimu, ninil hagagup ako at vagalogo yukherelagwi. Eke, nit modok-modok niniluk dogoguluk, okninivisiga menda Yesus ako, nenasin Ala inim welagagi. At sigam agagi ako, "Yi aro," yiluk, yukheralagwi. <sup>3</sup> Nit nenasin Ala abut Yesus Keretus inim hunik agurik. Hunik werékma, hit ogo, ninim nendawi ambiat hunik dogoguluk, ninil hugwi, nenaruk hunggwis, ogagagup ako at yukherelagwi. <sup>4</sup> Eke, vagalogo yukherelagwi yi ako ovok erogo, nit nendawi adenggen modok ombok arupwak yiluk, dirup yi, warisagwi.

## At Ala o awiya hak agarik wene

<sup>5</sup> At Ala abut Yesus ako en yuknirigya dugwit, "At Ala andi, o awiya hak agarik atma, At endawima o hwiserek ovagak agarik modok dek o," yiluk, yukneregagi ako, nenaruk hobaluk, yukherelagwi andi aro. <sup>6</sup> Anderogo atma, nit o hwiserek vaga nagu dugwit, "An Ala inim hunik agirik o," yugu niniselok, avyarat wene ako wane-wane ogagetek dugwit yagalagwima, nenane huluk at yagalagwi. <sup>7</sup> Anderogo ovara, At Ala o awiya vaga agarik andi hak, nit o awiya vaga lagu niniselok andi, nenaswei ninim nendawi hunik werékma, At abut Yesus amuya vaga nenomaluk ovok dek erogo bininggik ogagya dogosogon.

<sup>8</sup> Nit weyak ogagu dugwit arova, "Nit weyak ogasagwidek o," yugwi niniselok, huluk at nenambukmu dagal hedelagwima, avyarat wene Yesus avok ako nendawima agarik modok dek aro. <sup>9</sup> Eke, nit nenomaluk avyarat vaganggu niniselok andi, At mondok des erogo atma nggedok sek adigat ogasiga menda atma, nit sek ogagatek weyak adigat ogarit lendagwi ako nenomaluk dek erogo bagya, eke weyak nendawima agarik ako horogo bininggu, ogagya dogosogon. <sup>10</sup> "Nit modok weyak ogwasagwidek aro," yugwi halok, At Yesus huluk yagaliga menda okbelagwi atma, At Yesus awene ako nit nendawima agarik modok dek aro.

## Keretus nenake ogasiga wene

**2** Naburi o. Hit weyak ogagwi hinisaowen, wene yi, dirup mbalheraliga o. Anderogo ovara, nit ambi en weyak ogagwi niniselok, At atma nggedok sek adigat ogasiga Yesus Keretus ako en nit nenvokot agya dugwit, nenake wene wolok Nenasin yuguri lagek ogasiga o. <sup>2</sup> At Yesus ako, nenomaluk dek erogo baluk, Ala ninim dambulogo bininaup nenake ogasiga andi, At aro. Nit nenadigat nenomaluk dek erogo baluk, Ala ninim dambulogo bininaup yiluk, nenake ogasiga andi dek o. Ata, nit yi awakwa ndi awakwa o wen vaga yoma agurik ovok erogo nenomaluk dek erogo baluk, Ala ninim dambulogo bininaup yiluk, nenake ogasiga.

<sup>3</sup> Ala en, "Yerogo ogwarup, nderogo ogwarup," wene yukneragagi ako wane-wane ogasagwi vaga, "It ap yi, avyarat Ala inilup inugup o," yiluk, yagalagwi. <sup>4</sup> Yagalagwi ovara, ap ambi en Ala wene yukneraliga ako ogagetek dugwit, "An Ala nilup aro," iri halok andi, avyarat wene Yesus avok ako at endawima dek. At endawima dek hegek irisim atma, ap andi huluk yagaliga menda araro. <sup>5</sup> Eke, ap ambi en Ala wene yugup ako wane-wane ogagya halok andi, ap andi modok avyarat Ala endawi hunik wisane ogasiga. "Nit Ala ninim hunik agurwik o," yugu dugwit, At Yesus Ala wene yugup ako wane-wane ogagagi hak, nit ogo, Ala wene yugup wane-wane ogasagwi andi vaga, Ala ninim avyarat hunik agurwik ninelup arisagwi.

## Wene swi menda ogagu dogop wene

<sup>7</sup> Naswei nendawi hunik yi, wai. Anen, "Yerogo ogagu dogones o," yiluk, dirup warisiga yi andi, wene o muk erogo Yesus en "Yerogo ogagu dogones o," yiluk, yagagi ako at dirup warisiga. Wene yi, wene swi menda dek o. Wene yi, o muk erogo Yesus en yagagi henaruk hobaluk avyarat umbutugup ako at dirup mbalheraliga. <sup>8</sup> Mbalheraliga ovara, o hup dek agya hegek, o awiya eve sek menda nunggu wagya dugwit, wene muk yugup ako At Keretus en ogarit lagya, eke, hiren nendawi-hendawi hunik okhedegek nagwis, ogasagwi vaga sigam asiga. Andi atma, wene swi yugup ovagak halok, dirup mbalheraliga o.

<sup>9</sup> Ap ambi sa en, "An o awiya vaga landiga o," iri dugwit ovara, at asuwe Ala wene waliga menda anggon imbita halok, ap andi, endawi ao hwiserek ovagak agarik. <sup>10</sup> Eke, ap ambi en at asuwe Ala wene waliga

menda endawi hunik ogagya halok andi, at o awiya vage lagyama, lagya dugwit, owak dede iri dugwit weyak ogwasogon dek o. <sup>11</sup> Eke, ap ambi en at asuwe Ala wene waliga menda anggon imbitya halok andi, ap andi, endawi o hwiserek vage lagyama, o hwiserek ako en at il mbuk erogo bagagi atma, "An o andoma vikit landiga," embetetek at agarik o.

<sup>12</sup> Naburi nendawi hunik yi wai. Hit henendawi Ala abut ovaga vanggabaluk avyarat ombasagwi ako vage, Ala en henomaluk dek erogo bigigi atma, henake dirup yi, mbalheraliga o.

<sup>13</sup> Nasini yi wai. At o endak yi dekma ndi dekma en werek adigat hegek, yogak hudi itok modok agarik hit hinilup agagupikmu,

henake dirup yi, mbalheraliga.

Narwi yi, wai. At Sile weyak okninivisiga ako hit vage sovalogo bagep atma, dirup yi, mbalheraliga.

<sup>14</sup> Hit An naburi nendawi hunik yi, wai. Nenasin Ala henelup agagupikmu, dirup yi mbalheraliga.

Hit nasini yi wai. At o endak yi dekma ndi dekma en werek adigat hegek, yogak hudi itok modok agarik hit hinilup agagupikmu,

dirup yi, mbalheraliga.

Hit an naori yi, wai. Hit Ala wene henendawima hidugu lagagupik, henendawi hoda agagup ako vage en at Sile weyak okninivisiga ako sovalogo bagagup atma,

dirup yi, mbalheraliga o.

<sup>15</sup> It ap wen vage menda en enendawi ningga halok wenggebaluk ogasagwi inim, yi menda ndi menda wen vage weyak menda inim, ovok erogo henendawi hunik dogobuk. It ap wen vage menda en enendawi wenggebaluk ogasagwi ako henendawi hunik umbutwi hiniselok, Nenasin inim henendawi hunik ogagu dogosogom mondok dek aro.

<sup>16</sup> It ap wen vage menda en enendawi ninggya halok musek lagwi ako inim, inil hugu dugwit hogop ombasagwi ako inim, ogarit nagu dogopwak yiluk, Nenasin en ombasigadek. Eke, iren, "An wenggelisiga adigat iya o," yiluk, wogobategek nagwis ako ogo, ogarit nagu dogopwak yiluk, Nenasin en ombasigadek o. Ata, it ap wen vage menda en at, enendawi wenggebaluk, ogasagwi o. <sup>17</sup> It ap wen vage menda en enendawi wenggebaluk ogasagwi inim, yi menda ndi menda enendawi ninggya halok musek lagwi inim, ovok erogo dek arisogon. Dek arisogon ovara, Ala endawi ombasiga menda ako, hit wane-wane ogagwi hiniselok andi, modok-modok hiniluk at dogogup o.

### Keretus Ogorek menda en yagan warup wene

<sup>18</sup> Naburi nendawi hunik yi wai. O havis vage ogarup ako vage vango yagas o. Eke, "Vivis it nin At Ala denogo mondok okbagagi Keretus ako, inim mondok

ogorek menda wasogon," hit henaruk hunggugup. Hit hunggugup ako, yogak Keretus Ogorek ako menda eneyave wisane vage mondok yagao. It mondok yagao agarwik andi vage, "Wi! O havis vage ogarup ako vage vango yagas highi," yiluk, ombasagwi. <sup>19</sup> It ap Keretus Ogorek andi, endak ninim homagu lagagup ovara, "It andi, nit menda dek o," yiluk, hetbiniluk wunggugwa. "It ap andi, nit menda aro," yiluk ombatlipmu en, ninim at duklip ovara, Ala en, "It andi, ovok erogo hit menda dek, hunogo menda agarwik, yiluk, sigam arupwak," yiluk, imbitigi vage anderogo hekininiluk wunggugwa.

<sup>20</sup> Anderogo ovara, hit andi, At Yesus Keretus mondok sek adik denek ako en hit denogo bigiluk, Ala Averiniki wokheragagimu, avyarat wene ako hit ovok erogo hinilup at hinigis o. <sup>21</sup> Avyarat wene Yesus avok ako hit hinilup atma, dirup yi mbalheraliga. Eke, adem avyarat wene ako vage en, huluk wene yagalagwi mondok dek andi, hit hinilup aro.

<sup>22</sup> Ap huluk yagaliga menda andi, sa embetep? Dek o. Ap ambi en, "Yesus andi, nenowa inis ombok Keretus Ala en denogo bagagi ako, at dek aro," iri halok, ap huluk yagaliga menda araro. "Yesus andi, nenowa inis ombok Keretus Ala en denogo bagagi ako, at dek aro," yagalagwi ako vage Ala abut Yesus inim, asin Ala inim, "Nenanggon o," yiluk, hekelagwi. Hekbelagwima, Keretus Ogorek menda it aro. <sup>23</sup> Abut Yesus hekelagwi halok, asin ogo hekelagwi, eke, "Yesus andi, nenowa inis ombok Keretus Ala en denogo bagagi ako, araro," yiluk, welagwi halok andi, asin ogo welagwi, aro.

<sup>24</sup> Hit andi, wene o muk endak erogo henaruk hobaluk, wagagup ako, henendawima modok wenggelek dugwit, vagogo dogones o. Modok wadok dek vagogo hiniselok, Nenasin Ala abut iperen hinim hunik at dogosogom o. <sup>25</sup> Nit okbininaup Yesus en avyarat nggatuk erogo yagagi ako andi, "Hit modok-modok hiniluk dogovovok yiluk, okbigigayogon o," yiluk, yukneregagi andi aro.

<sup>26</sup> Iren henambutmu ungu dugwit, nomalhinivit lagwi isawen, dirup yi mbalheraliga o. <sup>27</sup> Naburi o. Ala Averiniki henovaga wombabigiga wagagi henendawima werekma, ap ambi en hit mamulheraup dek aro. At Ala Averiniki en yi wene ndi wene ovok erogo mamulhirigya dugwit, huluk wene mamulheraligadek avyarat adigat mamulheraliga. Avyarat adigat mamulheraliga atma, at mamulheraliga ako andi, wane-wane ogagu dugwit, Keretus hinim mondok-mondok hunik okhedugu dugwit, vagago dogones o.

<sup>28</sup> Anderogo atma, naburi. (Hit Yesus inim mondik hunik at okhedugu dogones.) Havis At warup ako hudi vage nit nenanggadi dek nenendawi seyalek dogoguluk, yogak en hit Yesus inim mondok hunik at okhedugu dogones. <sup>29</sup> At Keretus andi, At atma nggedok sek adigat ogasiga henelup atma, it avakwa sek ogasagwi ako, "Yi At Ala en at endaginipigi highi o," yiluk, hinilup arusogom o.

**“Hit Ala aburi aro,” yugeragagi wene**

**3** At Ala en, “Hit An naburi aro,” yuknirigya andi vaga At nenasin nenabwa ombok modok wisane ombasiga andi, dibas. Nit avyarat At aburi agurik o. It avakwa wen vaga menda adigat musek lendagwi ako en endak Ala yedok hegetek welagagwa andi vaga, yogak ogo, nit At aburi yedok ninigitek at agarwik.

<sup>2</sup> Naswei o. Hit An nendawi hunik atma, wene ambi yukherayogon. Nit yogak at Ala aburi agurik o. Eke, nit hivis nggarogo okbininaup ako, nit ao sigam hegetek ovara, At wagya halok, “At eve anderogo agarik,” yiluk, yedok hagup ako ndatak at neneve okbininup ninilup o. <sup>3</sup> Nit okbininup ako nenape wenggelek agurik halok, At Keretus endawi sek adigat agarik ako ovagak, nit wane-wane nenomaluk horogo nenendawi sek adigat okhedugu dogosogom.

<sup>4</sup> Ap weyak ogasagwi andi, Ala wene yugup ako at sagalisagwi atma, ap ambi weyak ogarit lagya halok andi, Ala wene yugup ako at weyak erogo baliga. <sup>5</sup> At Keretus weyak modok ogasigadek atma, nit nenomaluk dek erogo bininaigen yiluk, wambu wagagi ako henelup at agipik. <sup>6</sup> Anderogo atma, ap ambi at Keretus inim hunik agarik halok andi, at o ndugurek-ndagarek weyak ogarit landigadek. Eke, ap ambi weyak ogarit landiga menda halok andi, Keretus il higya, eyave elup agya, ogagetek at agarik o.

<sup>7</sup> Naburi nenendawi hunik yi, wai. It avakwa ugun en hit nomalhinivit wagwi hinisaowen, dibagu dogwes o. Ap ambi weyak ogagetek sek adigat ogarit lagya halok, at Keretus weyak ogasigadek modok sek adigat agarik ako ovagak agarik o. <sup>8</sup> At Sile o muk endak en weyak ogarit wulu wandiga aratma, ap ambi weyak adigat ogarit lagya halok, at Sile abut at agarik. Eke, at Sile ako weyak adigat ogarit landigama, At Ala abut wambu wagagi ako andi, at Sile en ogasiga ako modok dek erogo bagiluk, wambu wagagi.

<sup>9</sup> Ap ambi Ala en endagya halok, endawi swi vaga At Ala andogon at waliga atma, at weyak ogagya dogosogon dek o. At Ala en at endagagirikmu, at o ndugurek-ndagarek weyak ogarit lagya dogosogon dek aro.

<sup>10</sup> Ala aburi inim, Sile aburi inim, nano vaga ninelup arup ako yerogo: It avakwa sek ogagetek weyak adigat ogagwi, enowa-enaot inim enendawi hunik oginipitek enanggon umbutwi, ogagu-selok andi, Ala aburi erogo dek andi yedogat iniselagwi.

**Nendawi-hendawi hunik ogagu dogop wene**

<sup>11</sup> O endak en Yesus wene yuknirigya hunggu lagagup ako andi, “Nendawi-hendawi hunik ogagu dogones o,” yiluk, yukneragagi andi aro. <sup>12</sup> At Hain en ogagagi ako ovagak, hit anderogo ogarup moga o. At Sile weyak oknininivisiga ako abut aratma, aot modok watigi. Nano yiluk aot watigi embetep? Dek. At Hain

weyak adigat ogasiga menda atma, aot sek adigat ogagya higya lagagirik, aninis en at aot watigi.

<sup>13</sup> Anderogo halok, naswei o. It avakwa wen vaga menda adigat musek lendagwi ako en enanggon hinumbutwi iniselok, “Wi,” yiluk, henalon ombarubuk.

<sup>14</sup> Nit nenendawi nggorak ndatak welagagup ovara, Ala en nenendawi niniluk okbininggigi ako, avyarat mondok niniluk agurik halok, nit nenaswi nenarupwi Ala wene welagwi menda ninim nenendawi hunik oginivisagwi ako vaga yedok helagwi o. Ap ambi sa en avakwa endawi hunik oginivisigadek halok andi, at endawi nggorak ovagak ao agarik. <sup>15</sup> Ap ambi at asuwe Ala wene waliga menda anggon imbita halok, at avakwa inirisiga menda araro. Eke, avakwa inirisiga menda ako andi, at modok-modok iniluk dogop menda andok okhedgetek andi, henelup aro.

<sup>16</sup> Nano ogasagwi vaga nenaswei ninim nenendawi hunik okbugwis ako ninelup arup embetep? Dek o. At Yesus endawi hunik en, “An avakwa enake narupwak aro,” imbita lagagirik, nenake hombagagi andi wane-wane, nit ogo, “Nenaswi enabwa en enake hambup sek aro,” yiluk, umbutu dogones. <sup>17</sup> Ap ambi yi menda ndi menda werek en, aswe ambi yi menda ndi menda dek il haliga ovara, abwa embetetek, “Nanggon,” yiluk, hekbagya halok, Ala en avakwa enabwa ombasiga ako menda endawima agarik modok dek aro. <sup>18</sup> Naburi nendawi hunik yi wai. Nit nenane vaga en adigat, “Avakwa ninim nenendawi hunik agurik o,” yiluk, yup moga o. Ata, nenendawi vaga en enabwa ombok wisane erogo umbutu dugwit, sek okbigik lagu dogosogom o.

**Ala ivaga nenalon dek dugwit, yugurup wene**

<sup>19</sup> Nit ogasagwi menda ako Ala ivaga wenggelagya dugwit, weyak ambi ogagyo vaga nenendawi en nenanggadi wakbininggu halok, nenalon ombasagwi. Nenalon ombasagwi ovara, nit yi ogagek ndi ogagek ogasagwi menda ako inim, nenendawima oknininivisiga menda ako inim, ovok erogo at Ala elup. At ovok ilup atma, nit Ala ivaga, “An avakwa enabwa en sek okbigik lagya lagagis ako vaga Hat Ala yagaliga menda ako an wane-wane ogagya lagagis o,” ombakluk, nenalon dek dugwit, at yugurup sek aro.

<sup>21</sup> Naswei nendawi hunik yi wai. Nit weyak ambi ogagatek vaga nenendawima en nenanggadi wakbininggitek halok, Ala ivaga nenalon ombarup dek o. <sup>22</sup> Anderogo atma, At Ala en, “Yerogo ogwarup, nderogo ogwarup,” yiluk, yukneraliga menda wene inim, nit ogarup endawi sek ombasiga menda ako inim, wane-wane ogagu niniselok, nit yi menda ndi menda woknerapwak yiluk, nggino yugisagwi ako, at woknirigya dogosogon aro.

<sup>23</sup> At Ala en “Hit henendawi An nabut Yesus Keretus ovaga vanggabuluk avyarat umbutwi, eke, Anen yukheragagis ako wane-wane hit-hit henendawi hunik

oginipwis, ogagu dogones o," yiluk, wene ombok yukneraliga ako, andi aro. <sup>24</sup> Wene, "Yerogo ogwarup, nderogo ogwarup," yukneraliga menda wene ako, hit ambi en wane-wane ogagwi hiniselok, At hit hinim hunik agarik, eke, hit At inim hunik agipik o. Eke, Ala Averiniki wokneragagi nenendawima yuknirigya andi vaga At Ala avyarat nit ninim hunik agarik ako ninelup agurik o.

**"Averiniki en iri halok yagalagwi a, ata Keretus Ogorek iri halok yagalagwi a?" wene**

**4** Naswei nendawi hunik yi wai. Avakwa huluk wene yugerelagwi menda wisane en yi awi ndi awi ovok erogo yugeregek lendagwi atma, ap ambi henadema wagya dugwit, "Ala Averiniki en yuknirigya halok, yukhera wagyo o," yiluk, yukhera wagu iniselok, enane avyarat umbutu dugwit ugun waup moga o. Ata, "At Ala Averiniki en avyarat lakbisa wagao atma yagan wendagwi a, ata it enendawi en wenggebaluk yagan wendagwi a?" yiluk, enavut mbabaluk enane hunggu dogop sek aro. <sup>2</sup> Eke, "Ala Averiniki enendawima dugwit, yagan wendagwi a," yiluk, yedok hugu dogop ako yerogo: "At Yesus andi, Ala en denogo baluk lakba wagagi Keretus ako at avyarat wen vaga wambu wagya lagagirik, eve ap at endaklagagi o," yiluk, vagganggu iniselok, "Ap andi, Ala en avyarat lakbisa wagagi Averiniki enendawima dugwit, yugwi inugup o," yiluk, enane hunggu dogop sek. <sup>3</sup> Anderogo ovara, it ap andi en, "Yesus andi, at Ala en denogo baluk lakba wagagi Keretus ako eve ap at endaklagagi," vagalisagwidek iniselok andi, "Ap andi, Ala en lakbisa wagetek, it enadik en, enendawi wenggebaluk yugeregek wagao," ombarop. "O hivis erogo Keretus Ogorek menda wagya dogomindik, 'Yesus wagya lagagirik, ap at endaklagagi andi dek o,' yiluk, yagan wagya dogosogon o," yiluk, yugwi henaruk hunggugup ako, "Ovok waga yi at inugup o," yiluk, ombarop.

<sup>4</sup> Naburi nendawi hunik yi wai. It avakwa Keretus Ogorek menda Ala wene enanggon ombasagwi ako, enendawima agarik andi, anye dek ovara, hit andi, hit Ala aburi atma, at Ala Averiniki anye mondok wisane henendawima agarik andi en, it ap huluk wene yugerelagwi menda ako sovalogo bugugup o. <sup>5</sup> It Keretus Ogorek menda andi, wen vaga menda atma, iren wene wen vaga menda enane yugu-selok, it ap wen vaga menda nin en enane yagalagwi ako enaruk hulisagwi. <sup>6</sup> Eke, nit andi, Ala aburi atma, nit nenane yagalagwi ako, it avyarat Ala inilup menda ako en enadigat enaruk hulisagwi. Eke, Ala aburi dek halok andi, nit nenane yagalagwi ako hulisagudek aro. Nit nenane hulisagwi a, ata hulisagwidek a, andi vaga niren, "Ala Averiniki avyarat adigat yagaliga ako it enendawima agarik a, ata, madis ane huluk yagaliga ako enendawima agarik a," yiluk, ninilup asagwi.

**Ala en avakwa endawi hunik ogonivisiga wene**

<sup>7</sup> Naswei nendawi hunik yi, wai. Avakwa nenendawi hunik ogonupu dogoguluk, Ala en at okbiniliga atma, nendawi-hendawi hunik ogagu dogones o. Ap ambi sa en nendawi-hendawi hunik ogagwi iniselok, Ala en at endaginipigi ma, At aburi dugwit, At Ala andi avyarat inilup at agarwik o. <sup>8</sup> Eke, at Ala en yi ap ndi ap ovok erogo enabwa imbitya dugwit, endawi hunik ombok erogo oginivisigama, ap ambi sa en nendawi-hendawi hunik oginivisagwidek halok andi, it Ala inunggut at agarwik o.

<sup>9</sup> Nit Ala abut vaga mondok-mondok niniluk dogoguluk, Ala en At abut ambiat ako wen vaga lakba wagagi. At abut ambiat lakba wagagi andi vaga, Ala avyarat nenabwa imbitya dugwit, endawi hunik oknininivisiga ako andi, yedok helagwi. <sup>10</sup> Nenaswei nenendawi hunik okbisaup ako andi, ngga ndatak embetep? Dek o. Niren Ala nenendawi hunik ogagetek. Ata, Ala nenabwa en endawi hunik okbininggu lagagirik, nenomaluk dek erogo bagya dugwit, ninim dambubininupwak yiluk, At abut at lakba wagagi. <sup>11</sup> Anderogoma, naswei, At Ala en anderogo at nenabwa imbitya dugwit, endawi hunik okbininggigirikmu, nit ogo wane-wane nendawi-hendawi hunik ogagu dogop sek aro. <sup>12</sup> Nit ovok erogo Ala eyave ninil hegetek at agurik ovara, nit nendawi-hendawi hunik ogagu niniselok andi, Ala ninim mondok hunik dogosogon o. Anderogo werekma, nit nenendawi Ala inim hunik arup Ala imbitigi ako andi, mondok avyarat ogagu dogosogom o.

<sup>13</sup> At Ala en Averiniki wokneragagi nenendawima werek andi vaga, At Ala avyarat nit ninim hunik agarik, eke nit At ninim hunik agurik, ako ninelup aro. <sup>14</sup> Eke, nenasin en yi avakwa ndi avakwa enagap wendarupwak yiluk, At abut lakba wagagi ako ninil hugu lagagurik, vagalogo yukherelagwi. <sup>15</sup> Ap ambi sa en, "Yesus andi, Ala abut aro," yiluk, vagganggu halok, Ala at inim hunik agarik, eke, at andi, Ala inim hunik agarik o. <sup>16</sup> At Ala nenabwa imbitya dugwit, endawi hunik okninipigi ako, nit avyarat ombasagwi. Eke, nit nenabwa imbitigi andi vaga nit nenendawi at ovaga vaggabaluk, agurik.

At Ala en yi ap ndi ap ovok erogo nenabwa imbitya dugwit, endawi hunik ombok erogo oknininivisigama, hit nendawi-hendawi hunik oginipwis hiniselok, Ala hit hinim hunik agarik, eke, hit Ala hinim hunik agipik o.

<sup>17</sup> Nit Ala inim hunik dugwit, Keretus ogagya lagagi ako hak, nit o wema yoma dugwit anderogo mondok avyarat nendawi-hendawi hunik okhedugu dogosogom. Nendawi-hendawi hunik okhedugu dogosogom andi vaga, o vivis nenowak dininivup ako hudi vaga, nenalon dek nenendawi seyalek hora yisogom o. <sup>18</sup> Nit nenendawi Ala ninim hunik halok, nit nenalon dek dogosogom. Nit weyak ogagu niniselok, Ala en weyak onngo okninivup ako vaga nenalon agurik ovara, nit

avyarat nenendawi Ala inim hunik ogagu niniselok, nenalon ombasagwi ako dek asiga. Ap ambi en ao alon ombasiga halok andi, at endawi Ala inim hunik ogasiga ako, ao hoda erogo ogagatek.

<sup>19</sup> Endak At Ala en nit nenabwa imbita dugwit, endawi hunik okninipigirikmu, yogak nit ogo anderogo at avakwa enabwa umbutu dugwit, nenendawi hunik ogonupu dogosogom o. <sup>20</sup> Ap ambi at asuwe Ala wene waliga menda il higya dugwit ovara, endawi hunik ogasigadek halok, At Ala il hegetek atma nggarogongan endawi Ala inim hunik ogarup embetep? Modok meyan atma, at asuwe anggon imbitya dugwit, "An Ala nendawi hunik agirik o," iri halok, ap andi huluk yagaliga menda aro. <sup>21</sup> At Yesus en iri dugwit, "Hit Ala nenendawi hunik ogagwi hiniselok, henaswei ogo enabwa umbutu dugwit, nenendawi hunik ogonupu dogones o," yiluk, wene yukneragagi ako andi aro.

#### Avyarat ombasagwi vaga avakwa Ala ogorek agarwik ako sovalogo bugu dogop wene

**5** Niren, "Yesus andi, nenowa inis ombok Keretus Ala en denogo bagagi ako, araro," yiluk, avyarat umbutwi niniselok, Ala enat endakninipigirikmu, nit At aburi at agurik. Eke, nenasin Ala nenendawi hunik ogagu dugwit halok andi, aburi endago ako inim nenendawi hunik oginivisagwi. <sup>2</sup> Anderogo atma, nit nenendawi Ala inim hunik dugwit, wene "Yerogo ogarup, nderogo ogarup," yukneragagi ako ogagu dugwit halok, nit at aburi nenendawi hunik oginivisagwi.

<sup>3</sup> Nit At Ala nenendawi hunik ogasagwi halok andi, niren At "Yerogo ogarup, nderogo ogarup," yukneraliga ako andi, ogasagwi o. Eke, At Ala en wene, "Yerogo ogwarup, nderogo ogwarup," yukneraliga ako andi, anggin modok dek aro. <sup>4</sup> Andi, nit Ala endakninipigi ako en it avakwa wen vaga menda Ala ogorek agarwik ako sovalogo biselagwi. It avakwa wen vaga menda Ala ogorek agarwik sovalogo biselagwi ako andi, nit Yesus ovaga vanggabuluk avyarat ombasagwi vaga enat sovalogo bisiluk, nit siyalek at agurik.

<sup>5</sup> Sani en it ap wen vaga menda Ala ogorek agarwik ako, sovalogo biselagwi embetep? Dek. Niren, "Yesus andi, Ala abut aro," yiluk, avyarat ombasagwi ako enat sovalogo biselagwi.

#### Ala en abut avok vagalogo yukneragagi wene

<sup>6</sup> At ima wombabagya hagagup ako inim, eke, hambigya dugwit, amuya wambigya hagagup ako inim, andi, Yesus Keretus eyave aro. Ima wombabagya hagagup ako adigat andi dek o. Ata, at amuya wombaga-gagi ako † inim hugu lagagurik, "Yi Yesus Keretus avyarat o," yiluk, umbutugup. Eke, Ala Averiniki ako andi, Ala yagaliga wane-wane avyarat adigat yagaligama, aren

† At Yesus amuya wombagagi wene ako yerogo: At Yesus hambigya hegek, o wen mbogot hwis iris, o wadok iris, ogagya hagagwa ako aro. Matius 27:45-55 yokhanes.

ogo, "Yi Yesus Keretus avyarat o," yiluk, avok vagalogo yukneraliga.

<sup>7</sup> Anderogo atma, wene henggam agarik. Wene ambi andi, Ala Averiniki en yukneraliga ako. Wene ambi andi, ima wombabagya hagagup ako, †† eke, wene ambi andi, amuya wambigya ninil hagagup ako, wene henggam andi at agarik. Wene henggam andi at agarik ovara, adem ambiat, "Yesus andi, nenowa inis ombok Keretus Ala en denogo bagagi ako, araro," yiluk, ninelup aruguluk, agarik. <sup>9</sup> Ala en wene yuknirigya dugwit, "Yesus andi, An nabut aro," yiluk, yukneraliga. Anderogo atma, Avakwa en vagalogo yuknirugwi iniselok andi, avyarat ombakluk waup sek ombasagwi ovara, nit avyarat ombaruguluk Ala en wene yuknirigya dugwit, "Yesus andi, An nabut aro," yiluk, yukneraliga andi, modok iyama, "Yi avyarat o," yiluk, wugu dogosogom.

<sup>10</sup> Nit nenendawi Ala abut ovaga vanggabuluk, avyarat umbutwi niniselok, nenendawima en, "Yi Ala abut avyarat wigo," yiluk, ombasagwi. Eke, it Ala avyarat embetetek dugwit, wene At Abut avok vagalogo yugeragagi ako ogo avyarat embetetekma, Ala huluk yagaliga ovagak okbelagwi o. <sup>11</sup> At Ala en wene vagalogo yukneragagi ako yi aro: Nit niniluk modok-modok dogoguluk, Ala en okbininggigima, at abut wugu niniselok, modok-modok niniluk dogosogom. <sup>12</sup> Eke, ap ambi sa en Ala abut waliga halok, niniluk modok-modok dogosogom ovara, ap ambi sa en Ala abut waligadek halok andi, iluk dogosogom modok dek aro.

#### Niniluk modok-modok dogop wene

<sup>13</sup> Hit nenendawi Ala abut ovaga vanggabuluk avyarat ombasagwi ako, Ala en hiniluk modok-modok dogop andok okbininggigi henelup arovovok yiluk, dirup yi mbalheraliga o. <sup>14</sup> At Ala endawi ombasiga ako wane-wane woknerapwak yiluk, nggino yugugu niniselok, At aruk hulisiga andi ninilupma, nenalon embetetek At nggino yugugu dogosogom. <sup>15</sup> Andi en, niren at nggino yugugwis ako, at avyarat aruk hulisiga ninilup atma, nit nggino yugisagwi ako andi avyarat woknerayogon ninilup aro.

<sup>16</sup> Yi weyak ndi weyak ogasagwi ako andi, ovok erogo inis weyak arovara, weyak menda andi adem mberen agarik. Weyak menda adem ambi andi, enasam helok Ala en enomaluk ako dek erogo baup ndak ovara, adem ambi andi, mondok weyak atma, Ala en omaluk andi dek erogo baup mondok dek, mondok-mondok hambup menda at agarik o. Anderogo atma, ap ambi en mondok weyak hambup menda ako andi mikbetaluk ogarit lagya halok, ap ako ake Ala yugeravovok yiluk, yukheraliga dek. Ata, henasuwe ambi weyak

†† Ima wombabagya hagagwa wene ako, yerogo: At Yohanes en Yesus ima wombabagya hegek, Ala Averiniki swa suwa ovagak Yesus ovaga wambu wagya, eke Ala ane mbogot vaga en iris, ogagya hagagwa ako aro. Lukas 3:21 yokhanes.

menda ogagya hinil helagwi halok, weyak ogagya andi Ala en nenomaluk dek erogo bininaup ndak ako menda halok, Ala en ap ako omaluk dek erogo baluk, iluk mondok dogop menda okbapwak yiluk, "Ap ako ake Ala yugugu dogones o," yiluk, yukheraliga.

<sup>18</sup> Ap ambi Ala en endatigi halok, At weyak ogarit landigadek andi, ninelup aro. Ala abut Yesus en ap andi, des erogo at vagogo agarik atma, at Sile mondok weyak ogasiga ako en ap andi, weyak okbayogon mondok dek aro. <sup>19</sup> Yi avakwa ndi avakwa weyak ogasagwi ako ovok erogo at weyak ogonivisiga Sile ako avema agarwik ninelup ovara, nit andi, Ala aburi at agurik o.

<sup>20</sup> At Ala abut wambu wagya lagagirik, Ala modok avyarat agarik ako nit dibapwak yiluk ninelup okbininggigi. Eke, At modok avyarat agarik Ala, abut Yesus Keretus iperen ninim nenendawi mondok hunik at agurik o. At Yesus Keretus andi, at mondok avyarat agarik Ala ako aratma, niniluk modok dogop andok okbininiliga menda adem araro.

<sup>21</sup> Naburi nendawi hunik yi wa! At Ala mondok avyarat agarik ako hekbaluk, avoloma huvuwak adik ambi mikbaluk, inis siyabagwi hinisaowen, dibagu dogwes yiluk, yukheraliga o.

Ai naburi wa!

## 2 Yohanes

**1** Ai wa narup †. Hat Ala en mikhitigi ako inim, hat heyagi inim, †† an Yohanes en wene ambi yukherayogon. An Ala aburi heneyaga agirik yi ako en hit avyarat nendawi hunik okhinivisigama, yukheraliga. Anen adigat nendawi hunik okhinivisiga andi dek o. Ata, it avakwa en avyarat wene Yesus avok wene wagagwa ako ovok ninim en nenendawi hunik okhinivisagwi o.

<sup>2</sup> Avyarat wene Yesus avok wogogup ako nenendawima agarik atma nit nenendawi hunik okhinivisagwi. Eke, avyarat wene ako mondok-mondok ninim dogosogon o. <sup>3</sup> Nit avyarat wene Yesus avok ako wokbaluk, musek lagu dugwit, nenaswei ninim nendawihendawi hunik ogarit lagwi ninigik, nenasin Ala At abut Yesus Keretus inim nenabwa en okbinunggis, enaigwak abet en okbinunggis, nenendawi sek wadok dek adenggen dogoguluk, okbinunggis, ogagu dogopwak.

### Keretus wene mamulik ogagu dogop wene

<sup>4</sup> At nenasin Ala en, "Yerogo ogares o," yiluk, avyarat wene yukneregagi ako hat heyagi nin hinim wane-wane ogarit lendagwi naruk hunggu lagirik, an nendawi modok adenggen wisane ombasiga.

<sup>5</sup> Eke, narup o. Yogak ambi ogagya dogonyok yiluk, yukhisogon. "Nendawi-hendawi hunik ogagu dogones o," yiluk, yukhisiga yi ako andi, wene swi menda dek. O endak en Yesus wene yuknirigya hunggu lagagup ako at yukhisiga o. <sup>6</sup> Nendawi-hendawi hunik ogagu dogop ako andi, Ala wene yugup wane-wane ogagu dogop andi aro. Eke, nendawi-hendawi hunik ogarit lagu dogop wene andi, o endak en Yesus wene yuknirigya hunggu lagagup ako at yukheraliga.

† 'Narup' yagagi ako, adem andi gereja o andoma homarisagwi akova yiluk yagagi. Eke adem 'hat heyagi' yagagi andi, it avakwa Ala aburi o andoma homarisagwi akova yiluk yagagi. †† Yohanes en 'Narup' yagagi ako, eke, 'Heyagi inim,' yagagi ako, adem andi avakwa Ala aburi o gereja

<sup>7</sup> It ap nin en, enane huluk yugu dugwit, "At Yesus andi, Ala en denogo baluk lakba wagagi Keretus ako ap ovagak wen vaga yoma endaklagetek o," yiluk, avakwa enambutmu dagaguluk yugeregek lendagwi menda yi awi ndi awi eneyave wisane at agarwik. It ap andi, Ala abut denogo mondok okbagagi Keretus ako, inim mondok ogorek agarwik. It ako Keretus Ogorek menda hak dugwit, huluk-huluk at avakwa enambutmu dagalisagwi atma, <sup>8</sup> hit Ala aburi henendawi des erogo suwam wakhidugu dogones. Niren wene Yesus avok yukheragagup wagagup ako, hiren hininggut akuluk mbo bagwi hiniselok, sek ogasagwi vaga Ala en onngo wane-wane wokheraup imbitigi ako, dek erogo bayogon. Anderogo atma, Ala en onngo wokheraup imbitigi ako, dek erogo bagu-sawen, henendawi des erogo suwam wakhidugu dogones o.

<sup>9</sup> Ap ambi Keretus wene mamulik ako adigat vagago dek at endawi wenggebaluk, wene adik inim lobalogo yugeregek lagya halok, at Ala inim hunik dugwit yagaliga dek o. Ata, Keretus wene mamulik ako wane-wane ogagya halok andi, nenasin Ala abut iperen inim hunik dugwit yagaliga ombarusogom. <sup>10</sup> Ap ambi wene yi menda dek wene adik menda wolok yukhera waga halok, hai warogo henamwa mabaup moga.

<sup>11</sup> Hai warogo henamwa mabagwi hiniselok, at omaluk hit hinim wane-wane at lobalhedagup.

### Atok vaga wa yugeragagi wene

<sup>12</sup> An wene wisane yukheraup yiluk agirik ovara, dirup mbalheraup nanggon oknitama, henadema waga dogomindik, ninim nenelose hubaluk, nenadenggen vaga wene sek erogo mbalup hogop ombasiga o.

<sup>13</sup> Howa Ala mitigi eyagi ako ninim dugwit, hai wakhinivisagwi o. Wa!



## 3 Yohanes

<sup>1</sup> Nasuwe Nggayus wai. An Ala aburi eneyaga agirik Yohanes yi en, hat nasuwe nendawi mondok avyarat hunik atma, wene ambi yukhisogon o.

<sup>2</sup> Nasuwe nendawi hunik. Hat Ala wene des erogo musek lagya dugwit, hendawi eyave sek erogo wenggebaluk ogarit landiga. Anderogo ndatak, hat heyave edup dek modok sek adigat dugwit, yi menda ndi menda ogasiga ako sek adigat higya dogonyok yiluk, hake samban ogasiga. <sup>3</sup> Hat avyarat wene Yesus avok ako wokbaluk, ogarit landiga ako, naswei Ala aburi nin nadoma wagu lagaorik, "At Nggayus ako avyarat wene des erogo wane-wane at ogarit landiga o," yiluk, mbilinogo yukniri wagu lagaoma, an nendawi adenggen wisane at ombasiga. <sup>4</sup> Yi menda ndi menda ogarit lendagwi ako andi, nadenggen herok maduk at ombasiga ovara, an naburi ako en, avyarat wene Yesus avok ako wokbaluk, mondok wane-wane ogarit lendagwi naruk hunggu neyalok andi, nendawi adenggen ombok wisane ombasiga.

### Ala aburi yonggat-yonggat ogagu dogop wene

<sup>5</sup> Nasuwe nendawi hunik, an wene ambi yukhisogon o. Hat ndugurek-ndagarek nenaswei Ala aburi ako sek okbugu dugwit, nenaswei nin huru ininis hunggut menda hadema wagu iniselok, modok iya erogo ok-bisaliga ako vaga, "Wa!" yukhisiga. <sup>6</sup> It ako en eneyami vaga wagu lagaorik, Ala aburi o *gereja* homasagwima yoma inivaga mbilinggu dugwit, "Ap Nggayus endawi hunik okninipu dugwit, anderogo okbininggas o," yiluk, yukneragao. Yukneragaoma, ap huru ininis hunggut menda nin ambi hat Nggayus hadema wagu iniselok, Ala endawi sek hombarupwak yiluk, enangge ambi dek halok, wogirigya dogomindik, lakbisaup andi sek aro.

<sup>7</sup> It ap andi, Keretus wene yugeregek laguluk, nagu dugwit, "It ap avyarat ombasagwidek menda enangge waup nenanggon o," yiluk, yagaorikmu, hat yonggarinipu dogop andi, sek at yiluk, yukhisiga o, nasuwe. <sup>8</sup> It ap avyarat wene Yesus avok ako ombok mbigalit lagya dogopwak yiluk, ogarit lagwi ako en, "Ninim wane-wane ogasagwi o," yiluk, nenombarupwak yiluk, yonggarinipu dogop andi sek aro.

### Ap Diyotereves weyak ogagagi wene

<sup>9</sup> Ala aburi *nggereya* andoma homasagwima ako, enake dirup maduk ambi mbalogo lakba wagagis

ovara, ap Diyotereves ako en, "Enanggelekma ap ombok an nadigat dogosogon," yiluk, endawi hogop imbita dugwit, nane wegetek. <sup>10</sup> Anderogo atma, nit weyak ogagetek ninigik ovara, ap Diyotereves en ane modok weyak nenovaga bininggigima, an wagya dogomindik, at yagagi ako sigam erogo mbilinogo yukhugu neyayogon. At Diyotereves en ane weyak andi adigat nenovaga baluk, mbup yagaliga andi dek. Ata, at weyak ogasiga ambi yi: nenaswei Ala ayelomani ako wagu iniselok, at Diyotereves en eneyave woginipitek. Eke, woginipitek dugwit, it nin wogonuvup ombasagwi ako, at Diyotereves en "Wogonuvup dek o," yiluk, yugeraliga. Yugirigya dugwit, it wogonuvup ombasagwi ako inim, enanggelekma en wibisaliga atma, des erogo yukhugu neyayogon.

<sup>11</sup> Nasuwe nendawi hunik yi wai! It weyak ogasagwi ako hat wane-wane ogagya dogobuk. Ata, it ap sek ogasagwi ako wane-wane adigat ogarit lagya dogwen. Ap ambi sek ogasiga halok andi, avyarat Ala abut at agarik ombarup ovara, at weyak adigat ogasiga ako en andi, Ala modok dibagetek at agarik o.

### Ap Demeterius sek ogagagi wene

<sup>12</sup> Ap Demeterius ako, avyarat wene Yesus avok ako dibaluk, wane-wane ogarit lagya halok, Ala inim, it avakwa ovok erogo inim, iren, "Ap andi, modok sek aro," yiluk, yagalagwi. Eke, nit huluk dek, avyarat yagalagwi hat helup atma, nit ogo, ap andi, iya erogo ogagya helagwi andi vaga, yukhisagwi o.

### Atok vaga heyaga watbagagi wene

<sup>13</sup> An wene wisane yukhurup imbiti ovara, dirup mbalhirup nanggon oknitama, <sup>14</sup> an hodo erogo hadema wagya dogomindik, nit mberen nenelose hubaluk, wene wane-wane mbalup hogop ombasiga o.

<sup>15</sup> Ala hinim werekma, hendawi sek wadok dek adenggen dogogun o.

Haswei ninim agarwik ako en "Wa," yukhugu lagaorik, heyaga watbagagao. Eke, an naswei hinim agarwik ako andi, "Yohanes en adik-adik hiniis erogombo 'Wa,' yukheragasma," hat Nggayus en yugerano. An Yohanes en hat Nggayus ovok at yukhigis o. Nasuwe wa!

# Wayu

<sup>1</sup> At Ala en yi ogarup ndi ogarup vage mbikit ogarup wene ako, yi aro. Wene yi nit at ayelomani ninelup okbinapwak yiluk, Ala en nenowa inis ombok denogo mendok okbagagi Yesus Keretus ako yugugu lagagimu, aren vagalogo yukneraliga yi aro. Ala en Yesus Keretus yugugu lagagimu, Ala ayeloman an Yohanes ako nelup okbanupwak yiluk, Yesus Keretus en at ayonggo *malaikat* ambi wombaba wagagi.

<sup>2</sup> Eke, *malaikat* wombaba wagagi ako en, an yuknugu lagagimu, Ala wene Yesus Keretus en vagalogo yuknugu hagagis ako ovok erogo mbilinogo dirup mbanggigis yi aro. <sup>3</sup> Anderogo atma, wene yi ogarup ako mondok horok vanggo yagarikmu, it awakwa en hivis ogarup wene dirup mbalek yi, bikhegek mbilinogo yugurugwi-selok, Ala en adenggen enovaga bugu dogosogon. Eke, yugurugwi inigik, enaruk hobaluk, des erogo wugwi-selok, it ogo Ala en adenggen enovaga bugu dogosogon o.

## Yesus aburi *gereja 7* vaga homarisagwi ako wa yugeragagi wene

<sup>4</sup> Wa. An Yohanes en hit Yesus aburi o *Propinsi Asia gereja 7* vaga homarisagwi ako, wa yukheraliga o.

Nenasin Ala inim, Averiniki inim, At Yesus Keretus inim, it ovok erogo enendawi henabwa en okbugugwis, eke, henendawi ugun seyalek wadok dek adenggen dogovovok yiluk, okbugugwis, ogagu dogopwak o.

At Ala andi, endak welagagi, yogak agarik, hivis dogosogon mondok itok agarik. Eke, Ala Averiniki andi, at andogon adem 7 ogasiga ako Ala ane yugaligama avema agarik. At Yesus Keretus andi, avyarat wene adigat mondok des erogo vagalogo yugaliga menda araro.

At Yesus Keretus ako hambuluk lendagwi enangelekma en at endak mendek iri lagagirik, yogak it ap wen vaga menda enasini ininis werek menda ako enasin inis ombok agarik o. At nenabwa en endawi hunik okninipigi. At amuya vaga nenomaluk visilogo bininggigi. <sup>6</sup> Eke, nit awakwa at avema dugwit, *imam-imam* hak at asin Ala ake ogagu dogoguluk, denogo bininggigi. Anderogo okbininggigirikmu, at anye wisane atma, nit yi ovok erogo at inis adigat siyabagwi, at ane adigat hunggwis, mondok-mondok ogagu dogosogom o, yiluk, amin!

<sup>7</sup> Dibagu dogones! At Yesus hena anggelekma wagya halok, it awakwa o wen vaga agarwik ininis unggul adik-adik At watugwa ako menda inim ovok erogo

enadik-enadik en inil hugu dogomundik, yup yarusogom atma, avyarat yukheraliga o. Amin.

<sup>8</sup> Endak welagagi, yogak agarik, hivis dogosogon At anye adigat agarik nenasin Ala en iri dugwit, "O muk endak erogo welagagis adem *Alpa* inim, eke, hivis atok vaga mondok dogop *Omega* inim, andi an aro," yiluk, yagaliga o.

## Yohanes o Vatmos dugwit, abi hagagi wene

<sup>9</sup> Hit anggin-mbanggin henovaga bugugu inigik ovara, "Ala avema bininggigima, sek aro," yiluk, Yesus hinim hunik henendawi wadok dek dugwit, welagwi. An henaswe Yohanes ogo, anderogo wane-wane anggin-mbanggin okbanunggu inigik, wigya lagagis. Andi, anen Ala wene yugirigya, eke, Yesus wene iri lagagi ako vagalogo yugirigya, ogasiga ako vaga, is yanggadek ilim is enggema o inis Vatmos bani wagagwa andoma welagagis. <sup>10</sup> Andoma werekma, o samban vaga Ala Averiniki nendawima des iri lagagimu, nambukmu en ane ombok ogasiga *trompet* ako ovagak ane ombok iri naruk hunggis. <sup>11</sup> Hunggu neyagek, yuknugu dugwit, "Vivis ogarup inuk hugu neyagek, mbuku virik-verek ogarek vaga dirup mbalup. Dirup mbanggya dogomindik, it Ala aburi o Epesus inim, Simirana inim, Veragamus inim, Siyatira inim, Saridis inim, Viladelipiya inim, Laodokiya inim, *gereja 7* vaga homarisagwi ako ovok erogo bikhapwak yiluk, lakbain o," yiluk, yuknugu hunggis.

<sup>12</sup> Naruk hunggu lagirik, "Sa en yuknisiga," yiluk, eyave nil haigen yiluk, neloke endenogo bikhigya lagirik, hali yevedogo bagek 7 mbusi emas vaga ogovak higurik higi. <sup>13</sup> Eke, hali yevedogo bagek 7 ogovak higurik ako anggelekma ilim andenam awakwa enelose ovagak ambi werek higi. Ap ako andi, asum adup ung-gumu en isokmu hudi yirik, eke mbup nggetalek mbusi emas menda ogo eyave vaga yirik higi. <sup>14</sup> At iris andi, swa yanggwi iris mudu ako ovagak higi. At il andi, hali abya wuluk yagaliga ovagak higi. <sup>15</sup> Eke, at isok andi, mbusi *tembaga* hali hunikmu mabagwi iniselok, mudu dede erogo yiklagarikmu, amumulip wisane ogasiga hak, isok anderogo at amumulip wisane ogagya higi. At ane andi, is satut ane wisane yagaliga ovagak, At ane anderogo at iri higi. <sup>16</sup> At inggis amotkan vaga dadiwap 7 vagogo agarik higi. Mbus-inggarep erasul ovagak venak-venak ovat marek elagapma sisik erek, eke, At elose andi, mo ovagak, amumulip ogagya higi o.

<sup>17</sup> At eyave anderogo ogarek nil higya lagirik, an Yohanes nggorak ovagak at avema ndun yi lagi. Ndun yi lagya lagima, At inggis amotkan vaga vaknita dugwit, "Endak erogo welagagis inim, havis atok vaga mondok dogop inim, andi An atma, halon ombarubuk.

<sup>18</sup> Niluk nitok agirik An aro. Yokneyan! An endak hombagagis ovara, yogak andi, niluk modok-modok agirik o. Hambisagwi inim, Hambuluk Lendagwima inim, iperen An nadigat vagogo dugwit, sup huririsagwi hunsi vagogo agirik o.

<sup>19</sup> "Anderogo atma, an hali yevedogo bagek 7 ogovak higririk ako anggelekma ogarit lagya hil hegen inim, yogak ogasiga hil haliga inim, eke, havis oklarup hil hayogon inim, ovok erogo dirup warogo bagya dogwen o. <sup>20</sup> Dadiwap 7 ninggis amotkan vaga hegen ako inim, eke, hali yevedogo bagek 7 mbusi emas vaga ogovak higririk hegen ako inim, andi wene hwilago ovagak werékma, adem des erogo yukhisogon: Dadiwap 7 ako andi, it *malaikat* 7 An naburi *gereja* 7 vaga homarisagwi enengge agarwik ako at inigin. Eke, hali yevedogo bagek 7 ako andi, An naburi *gereja* 7 vaga homarisagwima ako at inigin o," yiluk, yuknugu higi o.

#### At aburi o Epesus homarisagwi ako yugeragagi wene

**2** Yuknugu higya lagirik, werékma, At Yesus dadiwap 7 inggis amotkan vaga vagago agarik ako en ambi inim yuknigas. Yuknugu dugwit, "An wene ambi yukhisogon. Yukhugu dogomima, At *malaikat* An naburi o Epesus homarisagwi enengge agarik ako en aburi yugerapwak yiluk, dirup warogo lakbanok yiluk, yukhisogon o.

"An yi, ninggis amotkan vaga dadiwap 7 vagogo dugwit, hali yevedogo bagek mbusi emas vaga ogovak higririk 7 anggelekma landiga An ako en, it An naburi o Epesus menda wene yi yugeraliga:

<sup>2</sup> Hit An naburi o Epesus ogarit lendagwi ako an nelup aro. Hit an namusek wagu dugwit, henanyedek okhinipu hegek hekbagetek mondok hunik adigat ogarit lagwi, it ap weyak menda nit nenanggelekma yoma dogop mondok dek o, yiluk, henanggon umbutwi, ogarit lendagwi ako andi, an nilup aro. Eke, it ap nin lakbigik menda dek ovara, wagu lagaorik, 'Ala en lakbinini waga o,' yiluk, yugurugwi selok, hiren enavut mbabaluk, 'Yi huluk yagan wagao,' yiluk, mbo bisalagwi ako andi, an nilup aro. <sup>3</sup> Eke, An ninis adigat yi awi ndi awi wigak yumwak yiluk, ogarit lagwi vaga anggin-mbanggin okbigigik lagu-sigik, henendawi wadok dek hora yiluk wugu dugwit, sadida okhinipu hegek mondok hunik adigat ogarit lendagwi ako andi, An nelup aro.

<sup>4</sup> Nilup arovara, weyak ambi ogagu hinigis ako andi, yukherayogon. Endak hit nendawi-hendawi hunik wisane dugwit okbanunggu lagagup ovara, yogak andi, ninim hunik dek mbo banunggwis hinugu lagirik, yukhirigi o. <sup>5</sup> Hit endak An ninim hunik dugwit, henen-

dawi adenggen vaga nane musek lagu lagagup ako hekbaluk, yogak mondok adik ogarit lendagwi. Hit adik ogarit lendagwi ako, henasam helok, henomaduk mbo bagu dogomundik, yunggululuk heneyami vaga wakluk, endak hit nendawi-hendawi hunik wisane dugwit okbanunggu lagagup ako wane-wane ogarit lagu dogones. Hit henasam hegetek henomaduk mbo bagatek hiniselok andi, An wagya dogomindik, hali yevedogo bagek mbusi emas vaga ogovak higririk hit menda ako, avoloma en nggigilogo wibayogon. <sup>6</sup> Eke, ambi sek ogagu hinigis ako andi, yi: It ap Nikolaus ane musek nagu dugwit, ogarit lendagwi andi, An nanggon adigat ombasiga ako, hit wane-wane henanggon ombasagwi ako andi sek aro.

<sup>7</sup> Henaruk werék a dek a? Henaruk werék halok, Ala Averiniki en An naburi yi awi ndi awi homasagwima yugeraliga ako andi, des erogo at hunggu dogones. Eke, hit ap sani en An nane mbo bagetek mondok henendawi wadok dek vagago dugwit des erogo musek lagu hiniselok, yo enggen awakwa iniluk oginivisiga menda Ala eyavupmu agarik ako, <sup>†</sup> 'It naup sek at,' yugerayogon o, yiluk, wene yi yigi ako ovok erogo at *malaikat* An naburi o Epesus homarisagwi enengge agarik ako en aburi yugerapwak yiluk, dirup warogo lakbain o," yiluk, yuknigas.

#### Yesus aburi o Simirana homarisagwi ako yugeragagi wene

<sup>8</sup> Anderogo yuknugu lagarik, ambi yuknugu dugwit, "At *malaikat* An naburi o Simirana homarisagwi enengge agarik ako en aburi yugerapwak yiluk, dirup warogo lakbanok yiluk, yukhisogon o.

"An endak erogo welagagis, havis atok vaga mondok dogosogon, eke, hombagagis ovara, niluk akluk agirik yi, wene yi it An naburi o Simirana menda yugeraliga:

<sup>9</sup> Hit An naburi o Simirana ogarit lendagwi ako, An nelup aro. Hit anggin-mbanggin henovaga agya dugwit, hininggis dek asiga ovara, eloma menda vaga hininggis werék ovagak agipik ako An nelup aro. Eke, it Yakuri dek menda Sile ogasiga wane-wane ogwaruguluk homarisagwi ako menda en, we un huluk, 'Nit Yakuri menda aro,' yiluk, An naburi o Simirana menda enane wiyiknom-weyaknom erogo bigigalagwi andi, nelup adigat agirik. <sup>10</sup> At Sile en hit henavut mbaligiluk, awakwa enendawi nggagunggu lagagimu, hit nin heda marogo mabisalagwima mabugugwis, eke nogo 10 vaga anggin-mbanggin okbigigasogom ovara, henalon habuk. Anggin-mbanggin anderogo okbugugu inigik, hiren 'Hambup hudi arup sek aro,' yiluk, An nane mondok vagago dogosogom halok andi, mondok-mondok hiniluk dogop menda nggudit-nggudit mendarek hak onngo yikbigigayogon o.

<sup>†</sup> YO ENNGEN AVAKWA INILUK OGINIVISIGA MENDA ALA EYAVUPMU AGARIK AKO, *Ogagagi Wene* 2:4, 3:1, *Wayu* 22:2, 14, 19 *yokhanes*.

<sup>11</sup> Henaruk werek a dek a? Henaruk werek halok, Ala Averiniki en An naburi yi awi ndi awi homasagwima yugeraliga ako andi, des erogo at hunggu dogones. Eke, hit ap sani en anggin-mbanggin ako menda heno- vaga agya hegek ovara, An nane mbo bagetek mon- dok henendawi wadok dek vagago dugwit des erogo musek lagu hiniselok, ndugwis mberen vaga hambu- sogom dek o, yiluk, wene yi yigi ako ovok erogo at *malaikat* An naburi o Simirana homarisagwi enengge agarik ako en aburi yugerapwak yiluk dirup warogo lakbain o," yiluk, yuknigas.

#### Yesus aburi o Veragamus homarisagwi ako yugeraga- gi wene

<sup>12</sup> Yuknugu lagarik, ambi yuknugu dugwit, "At *malaikat* An naburi o Veragamus homarisagwi enengge agarik ako en aburi yugerapwak yiluk, dirup warogo lakbanok yiluk, yukhisogon o.

"An mbusinggarep erasul ovagak venak-venak ovat marek vagago agirik ako en, it An naburi o Veragamus menda wene yi yugeraliga:

<sup>13</sup> Hit at Sile anye werek dugwit o vagago agarikmu agipik andi an nelup. Sile vagago agarikmu akoma agipik ovara hegek, An nane wogogup ako mondok vagago agipik. Eke, An nabut ambi nane des erogo wokbaluk hutun-howam yugeregek lagya lagagi inis Andipas ako, watugwa. Hit henangelekma Sile agarikmu henawi *kota* andoma at watugwa. Watu lagagwama, hit henendawi avyarat ombakluk, An nane wogogup ako, 'Musek laup nenanggon o,' yiluk, yup ovara, dek o. 'Nit nenowa Keretus atma, at ane wigo ako andi, mondok at vagogo dogosogom o,' yiluk, yug- wi hinigis o.

<sup>14</sup> Anderogo at yugwi hinigis ovara, wene ambi yipi- nipi ogagu hinigis ako andi, yukheraliga. O endak ero- go en at Mbileyam en it awakwa Iserali menda Ala wene mbo baluk madis anggom warek nunggwii, eke, akwa we un ugun-ugun oginivit lagwi, ogagu dogop- wak yiluk, at Mbileyam en ap Mbalak mamulogogi. Mamulugu lagagimu, ap Mbalak en Iserali menda ma- muleragagi. Wene ako, hit An naburi o Veragamus agipik henangelekma it ambetap hinim homarisagwi nin en wene ako musek lendagwi. <sup>15</sup> Anderogo ndatak, hit nin en at Nikolaus ane musek lendagwi. <sup>16</sup> Andero- go ogagwi hinigirikmu, henasam helok, hit weyak ogasagwi ako andi, mbo bagu dogones o. Mbo bagetek hiniselok andi, An hodo erogo wagya dogo- mindik, mbusinggarep erasul An nelagapma agarik yi ako vaga hiniri wambu wasogon o.

<sup>17</sup> Henaruk werek a dek a? Henaruk werek halok, Ala Averiniki en An naburi yi awi ndi awi homasagwima yugeraliga ako andi, des erogo at hunggu dogones. Hit ap sani en An nane mbo bagetek mondok henen- dawi wadok dek vagago dugwit des erogo musek lagu

hiniselok, an onngo mberen wokherayogon. Ambi an- di, erom mbogot vaga menda inis *mana* hwilago agarik ako wokherayogon. Ambi andi, hininis swi salo- go helep mudu yanggwi hak ako vaga dirup warogo wokherayogon. Hininis warek ako andi, it nin andi in- ilup asogombuk, ovara, it ininis warek wogerayogon ako adigat inilup asogon, yiluk, wene yi yigi ako ovok erogo at *malaikat* Ala aburi o Veragamus homarisagwi enengge agarik ako en aburi yugerapwak yiluk dirup warogo lakbain."

#### Yesus aburi o Siyatira homarisagwi ako yugeragagi wene

<sup>18</sup> Yuknugu lagarik, ambi yuknugu dugwit, "At *malaikat* An naburi o Siyatira homarisagwi enengge agarik ako en aburi yugerapwak yiluk, dirup warogo lakbanok yiluk, yukhisogon o.

"An Ala Abut, nil hali abya wuluk yagaliga ovagak dugwit, an nisok andi, mbusi *tembaga* amumulip wisane ogasiga hak, nisok anderogo wane-wane wisane ogasiga ako en, it An naburi o Siyatira menda wene yi yugeraliga:

<sup>19</sup> Hit An naburi o Siyatira ogarit lendagwi ako An nelup aro. Hit awakwa henendawi hunik oginipwis, avyarat ombakluk henendawi novaga vanggabagwi, henaswei yonggar-inigik nagwis, anggin-mbanggin okbugugu hinigik, henendawi wadok dek dugwit wug- wi, ogarit lagwi ako ovok nelup aro. Eke, endak herok maduk at ogagu lagagup ovara, yogak ombok erogo ogarit lagwi andi, nelup adigat ovara, <sup>20</sup> maduk ambi yipi-nipi ogagu hinigirikmu, yukheraliga.

Hwa Isebel ako en ane huluk iri dugwit, 'An *navi*, Ala Averiniki en yuknugu hegek Ala wene yukheraliga menda aro,' yiluk, yukheraliga ovara, hit mber- eregetek, 'Sek aro,' yiluk hetbagwi hinigirikmu, modok an nanggon oknita halok yukheraliga. Hwa ako en an nayelomani eneyave wisane nomaliniviluk lagya dug- wit, akwa we ugun-ugun oginivit lagwi, eke, madis anggom warek nunggwii, ogarit lagu dogopwak yiluk, mamuleraliga ako andi, modok an nanggon aro.

<sup>21</sup> At hwa andi, asam helok, omaluk mbo baup yiluk, hekbagagis ovara, aren 'An okneraup, embetek lagya ako hekbaup nanggon o,' yiluk, ogarit landiga. <sup>22</sup> Ogar- it lagyama, edup en yimbilok-mendalok iri dogopwak yiluk, an anggin ombok ovaga okbayogon. Okbaga- ya dugwit, it nin hwa andi inim weyak ogarit lendagwi ako ogo, enasam helok enomaduk mbo bagatek iniselok, it anderogo at anggin mondok durik-marek erogo enovaga ndan okbugu neyasogom.

<sup>23</sup> Hwa andi, eyagi at ane welagwi menda ako it ovok erogo enarit lagya neyasogom. Enarit lagya neyalok, it An naburi yi awi ndi awi homasagwima ako ovok en, 'Nit nenendawi ombasagwi inim, nenendawi hobaluk ogarit lagwi inim, ovok erogo dibininiluk onngo wane-

wane wokneraliga Yesus andi, arat higyo o,' yiluk, An neyave enelup arusogom o.

<sup>24</sup> Eke, hit nin o Siyatira agipik ako, hwa ako ane inim, Sile ogasiga mbauk hwilago yagalagwi wene inim, hit musek lagatek hekbagagup andi, An wene ambi yi yukheraliga: 'Anen angginn menda ambi henovaga bigigaup embetetek ovara, <sup>25</sup> An warup hudi andi hit An nane avyarat ombakluk wogogup ako mondok wadok dek vagago dogones,' yiluk, yukheraliga.

<sup>26</sup> Hit ap sani en An nane mbo bagetek henendawi modok wadok dek vagogo dugwit, An ogarup ombasiga ako ogarit lagu-sigik, o havis ari wagya halok, An yerogo okbisayogon: An nasin en avakwa ininis unggul dombok navema bisiluk An enasin dogogiluk, mondok okbaninggigi ako ndatak, an okbisayogon. It anderogo at, yi avakwa ndi avakwa enavema bisiluk, it enasini dogopwak yiluk, mondok okbisayogon o. O muk erogo Ala en Yesus avok iri dugwit,

'Mbusi manggen bogalek inggimu dugwit, ane anye vaga wene yugirigya,

Eke, yi menda ndi menda wen nggabok vaga ogovak higririk ako, lekkelok savulbagusim yuvulik-nggalalek yagaliga hak, ogarogo bugu,

ogarisogon o,' † yiluk, yagagi ako wane-wane an okbaninggigi, eke it anderogo at, yi avakwa ndi avakwa enavema bisiluk, enane enanye vaga yugurugu dogosogom o. <sup>28</sup> Eke, it Ala wene modok wadok dek vagogo werekma, An wagya dogomindik, o yanggo yigiluk ogagya hegek wap amumulip ogasiga ako at wogora wasogon o. †† <sup>29</sup> Henaruk werek a dek a? Henaruk werek halok, Ala Averiniki en An naburi yi awi ndi awi homasagwima yugeraliga ako andi, des erogo at hunggu dogones o, yiluk, wene yigi ako ovok erogo at *malaikat* An naburi o Siyatira homarisagwi enengge agarik ako en aburi yugerapwak yiluk dirup warogo lakbain."

**Yesus aburi o Saridis homarisagwi ako yugeragagi wene**

**3** Yuknugu lagarik, ambi yuknugu dugwit, "At *malaikat* An naburi o Saridis homarisagwi enengge agarik ako en aburi yugerapwak yiluk, dirup warogo lakbanok yiluk, yukhisogon o.

"An dadiwap 7 ninggimu vagogo dugwit, Ala Averiniki ogasiga menda andogon adem 7 ako ogo vagago agirik yi ako en, it an aburi o Saridis menda wene yi yugeraliga:

Hit An naburi o Saridis ogarit lendagwi ako An nelup aro. Avakwa en henavok yugu dugwit, 'Ap iluk anye landiga hak, it Yesus aburi *gereja* andi vaga homarisagwi ako modok enanye at agarwik inigup o,' yiluk, yagalagwi ovara, hit anderogo ogasagwi dek andi an nelup. Hit andi, an namusek lagu dugwit, modok

† Mazmur 2:9 †† Bilangan 24:17, 2 Petrus 1:19, Wahyu 22:16, yokhanes.

henanyedek henendawi nggorak ovagak sek ogasagwidek weyak ogasagwi andi, An nelup. <sup>2</sup> Hit ogarit lendagwi ako An nasin Ala en, 'Sek at ogasagwi,' henembetetekma, hit modok henanyedek hambup ovagak okhivisiga ako hodo erogo iniluk akluk, Ala wene maduk musek lagu hinigis ako ombok erogo musek lagu dogovovok yiluk, henanye okhedomanes. <sup>3</sup> It endak sek wene an navok ako mamulhirugwi inigik, henaruk hobaluk wagagup ako henendawi wenggeles. Henendawi wenggebaluk, henomaduk mbo bagu dogomundik, wene hunggugup ako at des erogo vagogo dogovovok yiluk yukheraliga. Eke, hiren hiniluk erogo henanye okhedegetek halok andi, ap onggop wagiluk wandiga hak, An hininggut hinigik, supuk erogo hit Saridis menda angginn okbigigagiluk henadema wasogon o.

<sup>4</sup> Anderogo ovara, hit Saridis menda nin ambukumat henasum mudis okhedegetek sek adigat ogarit nagwis atma, 'Hit sek aro,' yiluk, henasum mudu eyave yirik ninim nagu dogosogom. <sup>5</sup> Eke, hit sani en An nane mbo bagetek modok henendawi wadok dek vagogo dugwit, des erogo musek lagu hiniselok, An wagya dogomindik, avakwa modok-modok iniluk dogop ininis mbuku vaga dirup mbalek agarik ako, An horisogon dek. It anderogo at enasum modok mudu yikbugu dogomindik, An nasin inim, At ayonggo *malaikat* inim, inil vaga, 'It ap yi, An naori aro,' yiluk, yugerayogon.

<sup>6</sup> Henaruk werek a dek a? Henaruk werek halok, Ala Averiniki en An naburi yi awi ndi awi homasagwima yugeraliga ako andi, des erogo at hunggu dogones. Wene yi yigi ako ovok erogo at *malaikat* An naburi o Epesus homarisagwi enengge agarik ako en aburi yugerapwak yiluk, dirup warogo lakbain o," yiluk, yuknigas.

**Yesus aburi o Viladelipiya homarisagwi ako yugeragagi wene**

<sup>7</sup> Yuknugu lagarik, wene ambi yuknugu dugwit, "At *malaikat* An naburi o Viladelipiya homarisagwi enengge agarik ako en aburi yugerapwak yiluk, dirup warogo lakbanok yiluk, yukhisogon o.

"An huluk yagaligadek avyarat adigat yagaliga Ala ake nadik denek agirik yi ako en, Daut agunci ako vagogo dugwit, † sup hurutu neyalok avakwa en larup meyan, eke, latya neyalok avakwa en hururup meyan, an nadigat vagago agirik yi ako en, it An naburi o Viladelipiya menda wene yi yugeraliga:

<sup>8</sup> Hit An naburi o Viladelipiya ogarit lendagwi ako An nelup aro. Hit An ninis weyak erogo bagatek, sek erogo vagogo dugwit, henanye maduk agarik ako vaga An nane musek lendagwi. Anderogo atma, hit ambi

† Daut ako, o muk Yesus ao wagatek hegek, avakwa Iserali menda at avema bisiluk, enasin inis ombok welagagi. Anderogo ndatak, yogak Yesus inis ombok dugwit, avakwa At avema bisaliga. Mbuku Lukas 1:32 yokhanes.

ogagu dogopwak yiluk, sup hurugo bigigis ako, avakwa en larogo bigigaup modok dek aro.

<sup>9</sup> It ap Sile ogasiga menda wane-wane ogagu dogoguluk, homasagwi ako, it Yakuri menda dek hegek we un huluk, 'Nit Yakuri menda aro,' yiluk, yagalagwi ako, an sovalogo bugu neyasogom. Iren, hit henadema 'Ala avyarat endawi hunik okhinipu higyo,' yiluk, hit An naburi o Viladelipiya menda henavema seve yi warupwak yiluk, okbugu neyasogom o. <sup>10</sup> Eke, 'Hit henendawi wadok dek horaik dugwit ogagu dogones o,' yiluk, yukheragagis ako, hobaluk des erogo at ogasagwima, hivi yi avakwa ndi avakwa wen vaga agarwik ovok erogo enavut mbalik en yiluk, anggin-mbanggin enovaga bisa warup hudi ako vaga, hit An naburi andi, henovaga arugwi en yiluk, An en heneyaga dogosogon.

<sup>11</sup> An vage mbikit warisogon o. Eke, wagya dogomindik, hit An nane avyarat ombakluk wagagup ako des erogo vagogo hiniselok, nggudit-nggudit mendarek ako menda yikbigiga warisogonma, avakwa en wugu isawen, dibaluk, suwam watu dogones. <sup>12</sup> It sani en An nane mbo bagetek modok enendawi wadok dek vagogo dugwit, des erogo musek lagu iniselok, An wagya dogomindik, o anye dogopwak yiluk, sirup ilim ngguvulisagwi hak, it avakwa andi, An nasin Ala awi valekma anderogo at mondok okbisayogon. Okbisiluk, it Ala aburi yedok inisapwak yiluk, An nasin Ala inis inim, An nasin Ala awi valek o kota Yerusalem swi menda nasin Ala mbogot vaga en wombaba wasogon ako inis inim, eke, An ninis swi salek ako inim, enadik-enadik enovaga dirup mbalogo bisayogon. Bisayogon werekma, it hivi andoma en wulusogon lasogom modok dek o.

<sup>13</sup> Henaruk werek a dek a? Henaruk werek halok, Ala Averiniki en An naburi yi awi ndi awi homasagwima yugeraliga ako andi, des erogo at hunggu dogones. Wene yi yigi ako ovok erogo at *malaikat* An naburi o Viladelipiya homarisagwi enengge agarik ako en aburi yugerapwak yiluk, dirup warogo lakbain o," yiluk, yuknigas.

#### Yesus aburi o Laodokiya homarisagwi ako yugeragagi wene

<sup>14</sup> Yuknugu lagarik, ambi yuknugu dugwit, "At *malaikat* An naburi o Laodokiya homarisagwi enengge agarik ako en aburi yugerapwak yiluk, dirup warogo lakbanok yiluk, yukhisogon o.

"At Ala en wen-mbogot werek ogarup imbitya hegek, wakhagagis adem An atma, avyarat wene adigat modok des erogo avyarat vagalogo yugeraliga An Amin yi ako en, it An naburi o Laodokiya menda wene yi yugeraliga:

<sup>15</sup> Hit An naburi o Laodokiya ogarit lendagwi ako An nelup aro. Henendawi hol dek edup erogo dek we un is saragas nudik ovagak agipik hinigirikmu, henendawi

edup dogop ombasagwi halok, edup at dogop, eke, henendawi hol dogop ombasagwi halok, hol at dogop, ogagu dogop sek at ombasiga. <sup>16</sup> Ogagu dogop sek at ombasiga ovara, henendawi edup dek, hol dek, we un is saragas nudik ovagak agipikma, is aidek halok enelagapma en suvurogo beyakhelagwi andi hak, hit ako an nelagapma en suvurogo beyakhinisaup ombasiga o.

<sup>17</sup> Hit ako andi, henendawi weyak, hininggis dek, hinil mbuk, henagap mbedan, henanggadi werek, anderogo hinisalisa ovara, dibagatek dugwit, hiren, 'Nininggis mondok werek, nenangge dek ambi andi dek, ovok erogo werek,' yiluk, yagalagwima, <sup>18</sup> hit sek erogo ambi inim ogagu dogovovok yiluk yukheraliga. Hit henagap mbedan nagwis atma avakwa en inil hinuguselok, henanggadi agu-sawen, henasum mudu yanggwi hak yikhedaguluk an nadema hunhedavovok yiluk, yukheraliga. Hinil mbuk ako sek akluk yi menda ndi menda hinil hapwak yiluk, amburup hinil mu baup an nadema hunhedavovok yiluk, yukheraliga. Eke, eyave menda vaga hininggis werek arovovok yiluk, An nayoparip mbusi emas eyave hali vaga werago ako menda inim an nadema onngo hunhedavovok yiluk, yukheraliga.

<sup>19</sup> It avakwa An nendawi hunik oginivisiga ako andi, enaruk watya, enendawi wengelupwak yiluk yo yawi inita, ogasigama, enasam helok, enomaduk nggatuk erogo mbo bapwak. <sup>20</sup> An sup mbanggutmu mendek dugwit, hit henendawima an sup nggolen-nggolen ogasiga ako dibas. Ap ambi An sup nggolen-nggolen ogagya ako, aruk hobaluk, endawima sup hutbigya halok, An adema nunggigya dogomindik, niperen nendawi ambiat dambulik naswe-haswe dugwit, erom nunggu dogosogom o.

<sup>21</sup> Eke, An nasin yuknogogi ako mbo bagatek modok wotok erogo okbaluk, At wene yugeraligama niperen horaik agurik. Anderogo wane-wane, it sani en An nane mbo bagetek modok enendawi wadok dek vagogo dugwit, des erogo musek lagu iniselok, it ogo An nane yugeraligama ninim horaik dogoguluk, 'Nadema omanes,' yiluk, yugerayogon.

<sup>22</sup> Henaruk werek a dek a? Henaruk werek halok, Ala Averiniki en An naburi yi awi ndi awi homasagwima yugeraliga ako andi, des erogo at hunggu dogones. Wene yi yigi ako ovok erogo at *malaikat* An naburi o Laodokiya homarisagwi enengge agarik ako en aburi yugerapwak yiluk, dirup warogo lakbain o," yiluk, yuknigas.

#### Mbogot vaga Ala inis siyabagwi inigigi wene

**4** Andi yuknugu lagama, nabi ambi higya dugwit, o mbogot vaga andoma sup mbanggut ambi hurik higi. Higya neyagek, akoma en ap ambi en ane ombok ogasiga *trompet* ako hak, ane ombok endak yuknugu hunggis ako ambi inim yuknugu dugwit, "Yogak oga-

rup hegen ako okbaluk, hivis ogarup ako yukhisogon yiluk dagama o," yiluk, yuknigas. <sup>2</sup> Ao at andenam yuknuguma, Ala Averiniki nendawima dis iri lagarik, woknombolok bani anggas higi. Bani anggas werema, mbogot vaga andoma wene yugeraligama *kursi* sek vaga, ap ambi horaik werak higi.

<sup>3</sup> O awiya amumulip herek damok ogasiga hak, ap horaik agarik ako andi, helep onngo ombok elose mondok sek *yaspis* ovagak, helep *sardis* ovagak, ogarek werak higi. Eke, at horaik agarikmu yuwaru mondok abinak helep *zamrud* ovagak yilin-walin werak higi. <sup>4</sup> Werema, it mbogot vaga agarwik enanggok ap ombok-ombok eneyave 24 en At wene yugeraliga menda ako ilim hegek, it wene yugerelagwima *kursi* sek ako vaga 24 walinogo horaik dugwit, enasum yanggwi hak yirik, eke, nggudit-nggudit mbusi emas vaga enunggul vaga yirik, okbaluk inigis.

<sup>5</sup> At wene yugeraligama andoma en o bigavok yovalevet higya hegek, unggulane yagan wulu wagya higi. Eke, wene yugeraligama elosema vikit andenam yunda 7 yevedek werak higi. Yunda 7 yevedek ako andi, Ala Averiniki andogon adem 7 ogasiga ako arat. <sup>6</sup> Wene yugeraligama *kursi* sek avema andenam *kaca yendela* modok eyave obak inamut ombok yanggadek *laut* ovagak ovara, elose wukagak mondok awiya ogasiga ovagak higi.

Eke, o andenam awakwa en iniselagwidek menda eneyave 4 enavilis enambot enombandu venak-venak andoma inil yago wisane werema, wene yugeraligama ilim andenam walinek werak inigis. <sup>7</sup> Eneyave ako andi, ambi yangge *singga* elose ovagak, ambi *sapi* nggulok elose ovagak, ambi andi, elose awakwa enelose ovagak, eke, ambi andi, swa eram mbongga amik wigalek ako ovagak, werak inigis. <sup>8</sup> Awakwa en iniselagwidek menda eneyave 4 ako andi, enadik-enadik enamik 6 werak atma, eneyave inim enamik avema andenam inim ovok at inil yago werak inigis. It ako mbup yegetek hutun-howam enane yugu dugwit,

"Nenasin Ala hanye adigat agindik,

Hat mondok sek adik denek,

Muk welagagin,

Yogak agindik,

Hivis dogogun,

Hat mondok sek adik denek aro,"

yiluk, yugigik adigat ogagu inigis. <sup>9</sup> Ogagu dugwit, At modok-modok iluk itok agarik wene yugeraligama horaik agarik ako, "Wa," yiluk, inis siyabagwi, hai watwis, ogagu inigis. <sup>10</sup> Ogagu-sigik, it enanggok ap ombok-ombok eneyave 24 ako en At modok-modok iluk itok agarik wene yugeraligama *kursi* sek vaga horaik agarik ako, avema seve yiluk, siyabagek ogagu inigis. Siyabagek ogagu dugwit,

"Nenasin Ala wa.

Hat hendawi wenggebaluk,

yi menda ndi menda ovok erogo werak ogarisogon o,

yiluk, ogagagin.

Hat hadigat mondok eve ombok atma,

Yi awakwa ndi awakwa ovok Hat havema seve yiluk,

Hinis siyabagagwi,

Hai watwis,

ogagu dogopwak o,"

yiluk, nggudit-nggudit mendarek yirik ako, nggolalogo At avema ba wagwi inigis.

### Ndomba Eyak en buku virik-verek ogarek wigya haggi wene

<sup>5</sup> Andi ogasagwi inugu lagirik, ambi higya dugwit, mbuku virik-verek ogarek ambi adup venak-venak dirup mbalekma, At wene yugeraligama *kursi* sek vaga horaik agarik ako inggis amotkan vagogo agarik higi. Eke, mbuku virik-verek vaga dirup warek ako, inil hagup en yiluk, *lilin* amburup ako vaga ambi heda mabagek ambi heda mabagek, ogarit heda 7 vaga marek ogarek higi. <sup>2</sup> Higya neyagek, *malaikat* anye werak ambi en ane ombok iri dugwit, "Mbuku mbalek virik-verek ogarek yi, ap ambi sa en heda visilogo bikhaup sek o?" <sup>3</sup> Iri lagama, mbogot vaga inim, wen vaga inim, wen avema inim, awakwa wisane at agarwik ovara, it ambi en heda visilogo bikha warup sek inigitek atma, ambi bikha wagya hegetek o.

<sup>4</sup> Ap ambi visilogo bikha warup sek inigitek atma, visilogo bikha wagetek at welagama, "Nit ap ovok weyak ogasagwi mendama, nit visilogo bikhaup meyan at higi o," yiluk, nendawi modok wakhidigya dugwit, yup ombok yagi. <sup>5</sup> Ao yup yigya lagima, mbogot vaga agarwik enanggok ap ombok-ombok ako ambi en an yuknugu dugwit, "Yup yarup moga o. Yo ambi aruknuk dargasiga andi hak, inis unggul Yekura en Daut ombao yangge *singga* ovagak endaklagagi ako, ayegen anye agagirikmu, aren mbuku virik-verek heda 7 marek ako, visilogo bikhaup sek atma, bikha wigya hayogon o."

<sup>6</sup> Yuknugu lagama, enanggok ap ombok-ombok 24 ako inim, awakwa en iniselagwidek menda eneyave 4 ako inim, wene yugeraligama andenam walinek inigik, Ndomba Eyak ambi eyave warek hak ovara, it enanggelekma mendek higi. Wam Ndomba Eyak ako andi, aruk adema aik 7, eke, il 7, agarik higi. Aruk adema aik 7 inim, il 7 inim, ako andi, Ala Averiniki andogon adem 7 ogasiga ako o wen vaga yi awi ndi awi lak-bisaliga ako aro.

<sup>7</sup> Andi en, an Yohanes en higya dugwit, Ndomba Eyak ako wagya lagarik, wene yugeraligama *kursi* sek vaga horaik mbuku inggis amotkan vagogo agarik ako inggimu en wigya higi. <sup>8</sup> Wigya lagama, it awakwa en iniselagwidek menda eneyave 4 ako inim, mbogot vaga agarwik enanggok ap ombok-ombok eneyave 24 ako inim, Ndomba Eyak ako avema seve yagagwa. Seve yiluk, it enanggok ap ombok-ombok ako en *nggindar* inim, sogolowak mbusi *emas* vaga mendarek

amben eyave sek menda nudik ako inim, enadik-enadik vagogo dugwit, ndawi vaga yugugwis inigis o. Amben eyave sek menda sogolowak mbusi emas vaga nudik ako andi, it Ala aburi At ake denek samban ogasagwi enane nudik ovagak higi. <sup>9</sup> It awakwa en iniselagwidek menda eneyave 4 ako inim, mbogot vaga agarwik enanggok ap ombok-ombok eneyave 24 ako inim, ndawi swi menda watugwa. Ndawi swi menda watu dugwit, ndawi eyave yi watao:

"It awakwa ininis unggul adik-adik inim,  
enane adik-adik inim,  
enagamut adik-adik inim,  
Enanggelekma en ambitap nggigilogo Ala aburi arupwak yiluk,

Hat hatu lagagwama,  
hamwiya vaga enonggo mbanggigin andi vaga mbuku virik-verek heda marek ako,  
haren wogogo wigya dogomindik visilup sek aro.

<sup>10</sup> It awakwa ininis unggul adik-adik enanggelekma en hat hamuya vaga enonggo mbanggigin ako,  
nenasin Ala avema bisiluk,

*Imam* hak At ake ogagu dogopwak yiluk denogo mondok okbigigindikmu,

Ininis ombok dugwit, awakwa wen vaga yagamu andoma agarwik ako enavema bisiluk, 'Yi ogares, ndi ogares,' yugurugu dogosogom o,"

yiluk, ndawi swi menda watwis naruk hunggis.

<sup>11</sup> Andi ogagu inugu neyagek, it *malaikat* eneyave wisane yoangga hedangga leyalek hak nit nininggis dinggilup meyan andi ndatak inigis. It malaikat ako en, wene yugeraligama *kursi* sek ako inim, it awakwa en iniselagwidek menda eneyave ako inim, it mbogot vaga agarwik enanggok ap ombok-ombok ako inim, ilim werek inigik, malaikat ako en walinogo enane ombok vaga ndawi watao. Ndawi eyave watao andi yi:

<sup>12</sup> "Ndomba Eyak watugwa ako,

Yi awakwa ndi awakwa avema seve yi nungugwi,  
'At inggis mondok werek,  
Yi wene ndi wene ovok ilup,  
At adik mondok anye aro,'  
yiluk, agayuk wutwis,  
inis siyabagwi,  
hai watwis,

Ogagu dogop sek aro,"  
yiluk, ndawi watao. <sup>13</sup> Anderogo hak, it mbogot vaga agarwik inim, wen vaga agarwik inim, wen avema agarwik inim, is ombok yanggadek laut endawima nagwis inim, Ala en ogovakhigitigi yi menda ndi menda yi awakwa ndi awakwa ovok erogo enane ombok vaga ndawi watao. Ndawi eyave watao ako andi yi o:

"At wene yukneraligama horaik agarik ako inim,

At Ndomba Eyak ako inim,  
iperen enanye mondok werek atma,  
Enavema seve yiluk,  
hai watwis,  
enagayuk wutwis,

ininis siyabugwis,  
modok-modok ogagu dogosogom o,"  
yiluk, ndawi watao. <sup>14</sup> Ndawi watu-sigik, it iniselagwidek menda eneyave 4 ako en, "Avyarat yagao o," yiluk, "Amin," yugwi, eke, it enanggok ap ombok-ombok 24 ako en enavema seve yiluk, ininis siyabugwis, ogagu inigis o.

**Mbuku virik-verek heda 7 marek ako visinggigi wene**

**6** Andi ogagwi inugu neyagek, Ndomba Eyak ako en mbuku virik-verek heda 7 marek ako ambi endak marek visinggigi. Visinggu hegek, awakwa iniselagwidek menda eneyave 4 ako ambi en ane o unggulane ovagak iri dugwit, "Oma," iris naruk hunggis. <sup>2</sup> Naruk hunggu lagirik, nil neyagek, *kuda* iris mudu swa yanggwi ovagak atma, ambor vaga ambi horaik ayegen inggimu wigya higi. Wigya lagama, nggudit-nggudit ambi yikbaluk, lakbagya lagama, awakwa sovalbisaigen yiluk, ndup ogari laga higi.

<sup>3</sup> Okbaluk, Ndomba Eyak ako en heda endak marek visinggu lagarik, ambi marek ako visinggu higi. Visinggu hegek, eneyave 4 ako enaswe ambi en iri dugwit, "Oma," iris naruk hunggu lagirik, nil neyagek, <sup>4</sup> *kuda* adik ambi iris mudu hali abya hak atma, ambor vaga ambi horaik wagya higi. Wagya lagama, Ala en, "It awakwa o wen vaga yagamu andoma enendawi ugun seyalek adenggen nagu dogop dek. Ata, ir-it war-wat yugu dogopwak o," yiluk, Ala en at *kuda* ambor vaga wagya ako andok dogop mendek okbagya dugwit, mbusinggarep erasul adup ambi wogogu higi o.

<sup>5</sup> Eke, Ndomba Eyak ako en heda mberen marek ako visinggu lagarik, ambi marek visinggu higi. Visinggu hegek, awakwa iniselagwidek menda eneyave 4 ako enaswe ambi en iri dugwit, "Oma," iris naruk hunggu lagirik, nil neyagek *kuda* mudis ovagak atma, ambor vaga ambi horaik anggin wakhegek ako menda inggimu wolok wagya higi. <sup>6</sup> Wolok wagyama it awakwa iniselagwidek menda eneyave 4 ako, enanggelekma en ane ambi iri dugwit, "*Tepung gandum kaleng* ambiat yidik ako andi, onngo ombok yoparip ndugwis ambiat vaga it yavup ogasagwi onngo wogorelagwi wane-wane ako vaga hunggu dogosogom. Eke, *beras kaleng* henggam yidik ako andi, wane-wane onngo ombok yoparip ndugwis ambiat vaga it yavup ogasagwi onngo wogorelagwi ako vaga hunggu dogosogom. Anderogo ovara, yo *saitun* amburup inim, anggur amburup inim andi, weyak erogo baup moga o," yiluk, iri higi.

<sup>7</sup> Andi okbaluk, Ndomba Eyak ako en heda henggam marek ako visinggu lagarik, ambi marek ako visinggas. Visinggu hegek, awakwa iniselagwidek menda eneyave 4 ako enaswe ambi en iri dugwit, "Oma," iris naruk hunggis. Iri lagirik, <sup>8</sup> nil neyagek, ap hambigiluk ogagya dugwit, elose mudu deyalogo baliga andi hak, *kuda* iris anderogo at ambi inis Hambisagwi Andok



ako *kuda* ambor vaga horaik wagya higi. Wagya hegek, ambi inis Hambuluk Lendagwima ambetaga labo erogo wagya higi. Iperen wagu lagaoma, iren awakwa o wen vaga nin mogologo hetbugu dugwit, nin mogologo *seperempat* ako segowa vaga enarit lagwi, hambupwak yiluk, uvup erogo bugwis, adwanggak idup-idup ogwarogo bugwis, eke, wam nggusa inim, yangge do inim en, hivirinuvupwak yiluk, enaninis ogwarogo bugwis, ogarit lagu dogopwak yiluk, andok okbugu higi.

<sup>9</sup> Andi okbaluk, Ndomba Eyak ako en heda 4 marek visinggu lagarik, ambi marek ako visinggu higi Visinggu lagama, it awakwa Ala wene wokbaluk, Keretus awene mondok des erogo vagalogo yugeregek laguselok, initu lagagwa ako, enanggela Ala ake warogo hali hunisagwima avema andenam werek inigis. <sup>10</sup> It initu lagagwa enanggela ako en enane ombok yugugu dugwit, "Nenasin Hini ombok Ala wai. Hat hadik modok ombok avyarat adik denek agindik atma, it awakwa o wen vaga menda en ninitugwa nenamuya wambegek lagagi ako, enowak dilogo ongo inititek heyagek, ndugwis maren arisogon o," yiluk, yugugu inigis. Yugugu lagaoma, <sup>11</sup> "Dek o. Hit henowa-henasin inim, it hinim Ala wene modok dibaluk musek lagwi inim, hit hinitugwa ndatak inurusogom halok andi, ongo ambivaga dambup erogo inirisogon atma, we un ndugwis ambiat mbauk dogosogon o," yiluk, enasum mudu adup enadik-enadik yikbugu inigis.

<sup>12</sup> Andi okbaluk, Ndomba Eyak ako en heda 5 marek visinggu lagarik, ambi marek ako visinggas. Visinggu lagama, o wadok ombok yukul-yukul iris, hain hali agadya mbetalek hak mo il hwis iris, saut muya ovagak agya, <sup>13</sup> o havut endengga ombok wagya dugwit yo widis enggen ao bao hegek heralogo wen vaga ya ndun nda ndun wambegek wandiga hak, dadiwap mbogot vaga en wen vaga wambu wagya higi.

<sup>14</sup> Wambu wagya lagama, mbuku virik-verek ogasagwi andi hak mbogot nggago iri dugwit, virik-verek ari lagya, eke, ndom inim, is enggema wen hudi mbalekma inim, ovok erogo wolok adikmu ari lagek ogagya higi.

<sup>15</sup> Andi ogagya higya lagirik, it awakwa wen vaga menda enasini ininis ombok inim, ap ombok-ombok inim, it ap ndugandok inim, ap ininggis werek inim, ap enane anye inim, awakwa enayeloman inim, awakwa un agarwik menda inim, ovok en yugu dugwit, "Ala Yesus iperen enaninis en okbininup hudi vage vanggo yagarikmu, nit niniluk dogop dek at helagwi o," yiluk, enalon en, "Nggoma lauk?" yiluk, wis elola inim, helep elola inim, hwilak lari lagao. Hwilak lari lagu lagaorik, "At wene yugeraligama horaik agarik ako inim, Ndomba Eyak inim, iperen nit ninisagup en, ndom yi vaga inim, helep ombok yi vaga inim, nit sopalniniu o," yiluk, ndom inim, helep inim, yugugwis inigis.

Iserali menda eneyave 144,000 denogo bogogi wene

<sup>7</sup> Andi ogagwi inugu lagirik, an Yohanes en malaikat eneyave 4 inigis. It malaikat eneyave 4 ako, o wema yoma atok venak-venak 4 mendek agarwik inigis. Mendek werekma, o wen atok venak-venak 4 ako o havut wane-wane 4 at warit wulu wandigama, o wen vaga inim, is ombok yanggadek laut inim, yoangga-hedangga inim, o havut en avolok ogarit lagya hawen, o havut vagago agarwik inigis. <sup>2</sup> Inugu lagirik, werekma, *malaikat* adik ambi mo il daga wandigama en wulu wagya higi. Wulu wagya dugwit, Ala iluk agarik ako aburi denogo bisiluk, amburup yedok erogo okbigik wolok wagya higi. Wolok wagya lagarik, it *malaikat* eneyave 4 wen inim, is ombok yanggadek laut inim, weyak erogo baup andok okbogogi ako, ane ombok vaga yugirigya dugwit, <sup>3</sup> "Nit nenasin Ala ayelomani denek ako yedok dogopwak yiluk, amburup enembet vaga erabigitek neyagek, wen inim, is ombok yanggadek laut inim, yoangga-heda angga inim, weyak erogo baup moga o," yiluk, yugirigya higi. <sup>4</sup> Yugirigya lagama, ane ambi iri dugwit, "It Iserali vaga Yakup aburi wigalek ininis unggul adik-adik ovok eneyave dambup erogo 144.000 denogo bisayogon o," yiluk, iris naruk hunggu lagirik,

<sup>5</sup> inis unggul Yekura menda 12.000 denogo bugu, inis unggul Uruben menda 12.000 denogo bugu, inis unggul Nggat menda 12.000 denogo bugu, <sup>6</sup> inis unggul Asiyet menda 12.000 denogo bugu, inis unggul Naptali menda 12.000 denogo bugu, inis unggul Manase menda 12.000 denogo bugu, <sup>7</sup> inis unggul Simeyon menda 12.000 denogo bugu, inis unggul Lewi menda 12.000 denogo bugu, inis unggul Isakat menda 12.000 denogo bugu, <sup>8</sup> inis unggul Sebulon menda 12.000 denogo bugu, inis unggul Yusup menda 12.000 denogo bugu, inis unggul Benyamin menda 12.000 denogo bugu, ogagya dugwit, ayelomani denek ako yedok dogopwak yiluk, amburup enembet vaga erabigik laga ako andi, eneyave dambup erogo 144.000 at inigis o.

**Avakwa wisane homago inigigi wene**

<sup>9</sup> Andi ogagya higya lagirik, it awakwa ininis unggul adik-adik inim, enane adik-adik inim, enagamut adik-adik inim, enanggelekma en ambi nggigik homago ako andi, eneyave wisane ininggis dinggilup ogo modok meyan inigis. It awakwa andi, enasum adup mudu yanggwi iris hak yikbaluk yo ndila angga hedalek ininggimu vagago dugwit, At wene yugeraligama *kursi* sek vaga horaik agarik ako inim, Ndomba Eyak ako inim, iperen enavema mendek yiluk, <sup>10</sup> enane ombok yugu dugwit, "Wene yugeraligama horaik agindik Hat nenasin Ala ako inim, Hat Ndomba Eyak ako inim,

Hiperen en nenagap wendatugupma, wa," yiluk, yugurugwi inigis. <sup>11</sup> Yugurugwi inigik, At wene yugeraligama inim, it mbogot vaga agarwik enanggok ap ombok-ombok eneyave 24 ako inim, it avakwa en iniselagwidek menda eneyave 4 ako inim, ilim werék inigik, it *malaikat* yilin-walin ogarek mendek agarwik ako ovok erogo At wene yugeraligama horaik agarik ako, enape samulik avema seve yiluk, Ala inis siyabagwi inigis. <sup>12</sup> Ala inis siyabagu dugwit, ndawi eyave yi watao:

"Avyarat Amin!

Hat nenasin Ala atma,

Yi wene ndi wene ovok hilup,

Hat hadik mondok hanye aro,

yiluk, 'Wa,' yukhugu dugwit,

hagayuk wutwis,

hinis siyabagagwi,

hai watwis,

Modok-modok ogagu dogosogom o,

amin,"

yiluk, yugugwis inigis.

<sup>13</sup> Yugugu lagaoma, it mbogot vaga agarwik enanggok ambi en an yuknugu dugwit, "It avakwa enasum mudu yirik andi, sani? Eke, nggoma en wagao embeten?"

<sup>14</sup> Yuknugu lagama, "Nasin. An nunggut atma, haren enat eru," yugugu lagima, aren an yuknugu dugwit, "Dek o. It yi, avakwa anggin-mbanggin modok wisane okbugu inigik, enanggelekma en wulu wagao ako eneyave yi aro. It ako andi, enasum mondok mudu arupwak yiluk, Ndomba Eyak amuya ako vaga enasum hothedagao. Hothedagaorikmu,

<sup>15</sup> 'Wene yugeraligama Ala ivaga andoma dugwit, Hutun-howam Ala awi valekma ake ogagu-sigik, At wene yugeraligama *kursi* sek vaga horaik agarik nenasin Ala ako en weyak enovaga agya hawen, avema bisiluk agarik o.

<sup>16</sup> Eke, wene yugeraligama ilim adigat agarik Ndomba Eyak ako en eneyave des erogo at vagenombogo agarik.

Iniluk modok dogopwak yiluk, is il eyave mudis wogenombolok layogonma,

Erom uvup ogonupu, is uvup ogonupu, mo edup en inita, o heket en enanyedek erogo bugu,

ogwasogon modok dek o.

It yup yagwi iniselok, Ala en at yup oangga dek erogo bisayogon o,"

yiluk, yuknugu higi.

**Heda marek vivis mago ako wotok erogo visinggu hagagi wene**

**8** Ndomba Eyak ako en heda vivis marek 7 ako visinggu lagama, *setengah jam* ovagak agya dugwit, mbogot vaga andoma enane dek, enavologane dek, inisogane dek, mbauk adigat ogagya higi. <sup>2</sup> Ogagya la-

garik, it *malaikat* eneyave 7 Ala avema mendek agarwik ako ane ombok ogasiga *trompet* 7 wogirigya higi.

<sup>3</sup> Higya neyagek, *malaikat* adik ambi sogolowak mbusi emas vaga ogovak higirik inggimu wolok, Ala ake warogo hali hunisagwima mendek yi wagya higi. Mendek yi wagya lagama, amben eyave segedok menda wisane wogugu higi. Wogugu lagama, Ala ake hali hunisagwima mbusi emas vaga ogovak higirik Ala wene yugeraligama avema akoma, amben eyave segedok menda ako inim, it Ala aburi ake denek samban ogasagwi enane yugugwis ako inim, Ala ake bagya higi. <sup>4</sup> At *malaikat* en Ala ake anderogo bagya hegek, amben eyave sek menda hali ninggama yuvuk inim, Ala aburi samban ogasagwi enane yugugwis inim, inggimu en Ala adema inggya higi.

<sup>5</sup> Ako ogagya higya neyagek, at *malaikat* ako en amben eyave sek menda sogolowak vaga nudik welaga ako, hali hunisigama akoma en hali hunik wigya lagarik, sogolowak ako vaga mabaluk, wen vaga mbo wombaba wagya higi. Wen vaga mbo wombaba wagya lagama, o unggulane iris, o bigavok yovalevet higya, ogagya hegek, o wen wadok yukul-yukul ogagya higi.

**Ane ombok ogasiga *trompet* ako ane ogagwi hunggigi wene**

<sup>6</sup> Andi ogagya higya lagirik, it *malaikat* eneyave 7 enadik-enadik ane ombok ogasiga menda *trompet* wogeraga vagogo agarwik ako, ane ogwaruguluk, dikduk dak-duk ogagwi inigis.

<sup>7</sup> Ane ombok ogasiga *trompet* vagogo agarwik ako, ambi endak *trompet* ane ogagya lagama, musu hol es *salyu* inim, hali inim, amuya inim, nanggibuk-hang-gibuk erogo baluk, o wen vaga mbo wombabaik wagya higi. Wombabaik wagalagama, wen inim, yo inim, nin agako higiogo mberen hekbaluk, nin ambi higirek hali ninggya dugwit, yoangga-heda angga swi ogo ovok erogo nenggek lagya higi.

<sup>8</sup> Malaikat ambi ane ombok ogasiga *trompet* ako, ane ogagya lagama, okbaluk, enaswe ambi en *trompet* ane ogagya hegek, ndom ombok ambi hali wuluk yagan is ombok yanggadek laut ako vaga mbeyak ha wambigya higi. Mbeyak ha wambigya lagama, is ombok yanggadek nin agako higiogo mberen hekbagya dugwit, nin ambi higirek ako amuya ogwarogo bagya higi. <sup>9</sup> Ogwarogo bagarikmu, yi menda ndi menda iluk menda is elola agarik ako nin mberen higiogo hekbagya dugwit, nin agako higiogo ako hambit lagwi, eke, yi mburis ndi mburis is agakoma nagwis ako nin mberen higiogo hekbagya dugwit, nin agako higiogo ako windilek-hedalek oklarit lagya, ogwagya higi.

<sup>10</sup> Malaikat mberen ane ombok ogasiga *trompet* ako, ane ogagu lagaoma, okbaluk, at ambi en *trompet* ane ogagya hegek, dadiwap ombok ambi hali wuluk ya-

galiga ako ovagak mbogot vaga en wuluk yagan wambu wagya higi. Wambu wagya lagarik, is landigama inim, iliris wulu wandigama inim, ovok erogo nin mberen higi rogo hekbagya dugwit, nin agako higirek ako eda erogo baik lagya higi. <sup>11</sup> Dadiwap ako andi, inis Eda atma, is nin agako higirek ako eda ogwarogo baik lagarikmu, awakwa nunggu lagaorik, eneve wisane hambit lagwi inigis.

<sup>12</sup> Malaikat henggam ane ombok ogasiga *trompet* ako, ane ogagu lagaoma, at ambi en *trompet* ane ogagya hegek, mo il awiya inim, saut awiya inim, dadiwap awiya inim, venak agako higirek ako, abya dek ogwarogo bagya higi. Abye dek ogwarogo bagya lagama, o dingga ako awiya maduk agya, eke, o hup halok, o modok hwis iris, ogagya dogopwak yiluk, mo il awiya inim, saut awiya inim, dadiwap awiya inim, nin mberen higi rogo hekbagya dugwit, nin agako higirek ako, awiya dek agya higi.

<sup>13</sup> Andi agya higya neyagek, swa eram mbongga mbogot ilim yoma wigak-wigak yagan lagya dugwit, ane ombok vaga iri higi. Iri dugwit, "Malaikat eneyave 7 ako, it eneyave 4 ane ombok ogasiga *trompet* ane vage ogagao ovara, eneyave henggam andi, ane ogwaruguluk, modok diduk ogasagwi. Ogasagwima, it awakwa ovok erogo wen vaga agarwik andi, ayai, enabwa, enabwa o," yiluk, ane ombok vaga yagan lagya naruk hunggis.

**Ane ombok ogasiga *trompet* 5 vaga ogagya dugwit, awakwa mondok angginn okbisaup henggam ako ambi okbugu hagagi wene**

**9** Hunggu lagirik, werekma, *malaikat* eneyave 4 ane ombok ogasiga *trompet* ako ane ogagu lagaoma, okbaluk, at *malaikat* ambi en *trompet* ane ogagya hegek, dadiwap ambi mbogot vaga en wen vaga wambu wagya higi. Dadiwap wambu waga ako, hambuluk lendagwima nggilin elola yagamu andoma adigat sup hurigiluk, hunsi wigya higi. <sup>2</sup> Hunsi wigya lagarik, hambuluk lendagwima nggilin elo ako dadiwap ako en sup huritas. Sup hurutu lagama, helep yugup yuvuk yendok ogasiga hak, nggilin elola en yuvuk wisane daga wagya dugwit, mo il inim, o ilim yoma inim, hwis erogo bagya higi. <sup>3</sup> Higya neyagek, yuvuk anggelekma en idam wisane daga wagu lagaorik, hagudi aik hiviriniparikmu edup helagwi hak, idam ako en awakwa aik hivirinivit lagwi vaga edup en yagan watu dogopwak yiluk, enanye okbugu higi.

<sup>4</sup> Enanye okbugu lagarik, yugirigya dugwit, "Yoangga yi menda ndi menda angga ako ovok erogo henaik libilogo nenggek nagu dogop moga. Ata, it awakwa Ala en amburup enembet vaga hondalekdek halok adigat henaik hivirinivit nagu dogones. <sup>5</sup> Eke, eneyave hambupwak yiluk, hivirinivup andi moga. Ata, we un edup en yagan watwis inigik, saut 5 nggao yupwak yiluk, henaik hivirinivit nagu dogones," yiluk, yugirigya higi.

Yugirigya lagama, hagudi ako en aik hivirinitarikmu edup en yagan warisagwi hak, wane-wane at aik hivirinivit lagusigik, edup en yimbilok-mendalok yagan lagu inigis. <sup>6</sup> Andi hudi vaga it awakwa edup en yagan watu dugwit, "Mbikit hambik dek ai, nano yiluk niluk agirik," yusogom ovara, hambup enadema ari wasogon mondok dekma, hambebetek un iniluk adigat dugwit, yimbilok-mendalok adigat yugu dogosogom.

<sup>7</sup> Idam ako andi, enelose ap ndatak ovara, iniris andi, akwa iniris dalwik ako ovagak, eke, aik andi, yangge *singga* aik ako ovagak, agarwik inigis. *Kuda* ambor vaga hora yiluk ndup sumburuguluk, diduk ogwarogo biselagwi hak, it idam eneyave ako andi, anderogo at diduk ogwarogo bugu dugwit, nggudit-nggudit mbusi emas vaga ogovak higerik inim, <sup>9</sup> sin mbusi vaga yago inim, yikbugu higi. Eke, ndup sumburuguluk, *kuda* adonggop vaga yidibaluk, *kereta* likhelok ndup sumburi nunggugu dugwit, *kuda* eneyave wisane atma enavulagane wisane yagan lagwi enaruk hulisagwi hak, anderogo at idam ako enamik wigak-wigak yagan lagu dugwit, enamik ane andi, ane ombok yagan lagwi inigis.

<sup>10</sup> Enagya andi, hagudi aik ako ovagak atma, aik awakwa hivirinipu halok, edup en yagan watwis inigik, saut 5 nggao iri higi. <sup>11</sup> Eke, at *malaikat* hambuluk lendagwima nggilin elola vagogo agarik ako andi, it idam enowa inis ombok vagago agarik araro. At inis andi, awakwa Iberani enane vaga, "Abadon," yagalagwi, eke, Yunani enane vaga, "Apoliyon," yagalagwi. †

<sup>12</sup> "Awakwa mondok angginn okbisaup menda ako, ambi idam en vage ogagya hegen ako arovara, mberen andi ao ogagetek atma, hil dogwen o," yiluk, yuknugu higi.

**Ane ombok ogasiga *trompet* 6 vaga ogagya dugwit, awakwa mondok angginn okbisaup henggam ako ambi inim okbugu hagagi wene**

<sup>13</sup> Yuknugu lagama, nil werekma, *malaikat* eneyave 5 ane ombok ogasiga *trompet* ako ane ogagu lagaoma, okbaluk, at ambi en *trompet* ane ogaga. Ogagya lagama, amben eyave sek menda Ala siyabamunda hali hunisagwima mbusi emas vaga ogovak higerik Ala ave ma agarik ako, atok-atokma *sapi* aik ovagak aik ombok 4 akoma en ane ambi iri higi. <sup>14</sup> Iri dugwit, "*Malaikat* eneyave 4 is ombok Evarat omban vaga heda marek agarwik ako, hodo erogo heda visilogo lakbisin," yiluk, at *malaikat* *trompet* ane ogaga ako yugogogi. <sup>15</sup> Yugugu lagama, it *malaikat* eneyave 4 ako en *tahun* andi vaga, saut andi vaga, ndugwis andi vaga, mo il andi vaga, modok wane-wane ari lagya halok, awakwa nin mberen higi rogo hetbugu dugwit, nin ambi agako higi rogo ako enarit lagu dogopwak yiluk, vipuk ogwarogo bogogi ako at enarit lagu dogopwak yiluk, visilogo hekbugu higi. <sup>16</sup> Higya lagirik, "It

† Nit nenane vaga andi, "Dek Erogo Bisaliga," yiluk, yagalagwi.

*malaikat* 4 enaori yegen werek menda *kuda* ambot vaga hora yugu lagaorik, ndup sumburi lagao ako andi, eneyave dua ratus juta aro," yiluk, iris naruk hunggis.

<sup>17</sup> Eke, *kuda* inim, ap eneyave *kuda* ambot vaga horaik agarwik inim, nabi higya dugwit, inigis ako andi yi o. Enarin yirik ako andi, heda melaka enggen mudu ovagak, mbogot mudis ovagak, eke vule angga mudu ovagak, enarin elose anderogo at highi. *Kuda* ininggul ako andi, yangge *singga* unggul ako ovagak atma, adwanggak idup-mbidup erogo baik lapwak yiluk, enelagapma en hali abya inim, yuvuk inim, helep *belerang* agap sule sukup yagaliga menda inim, wulu wagya highi. <sup>18</sup> Enelagapma en wulu waga ako vaga en, adwanggak idup-mbidup erogo baik lagarikmu, awakwa nin highirogo mberen hekbugu dugwit, nin ambi agako highirogo andi aup edup en mondok hambit lagu inigis.

<sup>19</sup> It *kuda* enelagapma en hali wulu wagya ovara, it enagya andi, mbas awigovak unggul ako ovagak en awakwa enarit lagaorikmu, enelagap inim, enagya inim, andi mondok anye wisane at inigis o.

<sup>20</sup> It nin edup en hambegetek hetbigas iniluk agarwik ako en it weyak ogasagwi ako enasam hegetek at inigis. Iren, "Nit anderogo at hambit lagu ninisau, nenomadis ako andi, ininis siyabagwi, madis ininis wogobugwis, ogasagwi ako menda mbo basogom," yup sek hegek ovara, dek, enasam hegetek ao ogarit lagao. It enomadis andi, yi menda ndi menda inil helagwi dek, enane enaruk hulisagwidek, sup lendagwidek, ogwasagwidek hegek we un inam warogo enomadis mbusi *emas* vaga, mbusi *perak* ako vaga, mbusi *sembaga* ako vaga, helep vaga, yo vaga, ogovak highirik atma, mbo baup sek ovara, dek, enasam hegetek ao ogarit lagwi inigis. <sup>21</sup> Eke, "Awakwa initwis, mum vaga initwis, ovat vaga initwis, awakwa ugun ogonupwis, enonggop wugwi, ogasagwi menda ovok erogo nenasam helok, mbo basogom o," yiluk, yup sek arovara, mbo bagetek enendawi hunik dugwit, ogarit lagwi inigis.

#### Malaikat en mbuku maduk veralek wolok wagagirik Yohanes wogogogi wene

**10** Ogwasagwi ako an Yohanes en inugu lagirik, werekma, *malaikat* anye werek ambi, ayum hena vaga virik-verek ogarek mbogot vaga en wambu wagya highi. Unggul vaga andi, yuwaru danggulik. Eloase andi, mo il ovagak, eke, isok andi, yo mot adup vaga hali abya wuluk herek yagaliga ovagak iri highi. <sup>2</sup> At inggimu mbuku virik-verek ogarek maduk ambi mbigabaluk agarik highi. Isok amotkan is ombok yanggadek *laut* ako agakoma bagya, eke, isok hwarenggan wen vaga bagya, okbaluk, <sup>3</sup> yangge *singga* ane mondok ndun yagaliga hak, ane ombok anderogo iri lagama, o unggulane ndugwis 7 hudi iris naruk hunggis. <sup>4</sup> O unggulane ndugwis 7 vaga iris naruk hobaluk, iris ako dirup mbalik en yiluk ogagyaim, mbogot vaga en

ane ambi yuknugu dugwit, "O unggulane ndugwis 7 vaga iris hunggin ako andi, dirup mbalubuk. Ata, henda wima adigat hwilakbaluk dogwen o," yiluk, yuknugu highi.

<sup>5</sup> Yuknugu lagama, nil neyagek, *malaikat* isok ambi is ombok yanggadek *laut* agakoma bagya, ambi wen vaga bagya, okbaluk, mendek agarik highi ako en, mbogot inim, mbogot vaga agarwik inim, wen inim, wen vaga agarwik inim, is ombok yanggadek *laut* inim, is ombok yanggadek *laut* endawima agarwik inim, ovok erogo wakhagagi mondok-mondok itok iluk agarik ako inis vaga iri dugwit, "Ala en anggin okbisaup andi, epimbo ogarisogonbuk. Mbikit ogarisogon!" yiluk, avyarat ombarupwak yiluk, inggis amotkan mbogot vaga ilikbagya highi. <sup>7</sup> Iri lagarik, malaikat ako en ambi iri dugwit, "It *malaikat* eneve 6 en ane ombok ogasiga *trompet* ako ovok enane ogagaorikmu, ambi 7 ako, *trompet* ane ogagya halok, wene mbauk hwilago Ala en at ayelomani *navi-navi* yugeragagi ako, atma arisogon o!" yiluk, iris naruk hunggis.

<sup>8</sup> Naruk hunggu lagirik, werekma, mbogot vaga andoma en ane ambi yuknugu highi ako en ambi inim an Yohanes yuknugu dugwit, "Mbuku mbalek ako heda elak. At *malaikat* isok venak wen vaga bagya, venak is ombok yanggadek *laut* vaga bagya, okbaluk, mendek agarik ako adema lagya dogomindik, mbuku mbalek inggimu mbigabaluk agarik andi, heda elak."

<sup>9</sup> Yuknugu lagama, *malaikat* ako adema lagya lagirik, "Mbuku maduk andi, wokniru o," yugugu lagima, at malaikat ako en woknigas. Woknugu dugwit, "Hidigya dogomindik namin. Ningga heyagek, habis vaga nggin amburup hak ai weyak hayogon ovara, halotma andi, eda arit lagya hayogon," yiluk, yuknugu highi.

<sup>10</sup> Yuknugu lagama, mbuku *malaikat* inggimu agarik ako vagarogo ninggya neyagek, nabis vaga nggin amburup hak ai weyak highi ovara, nalotma andi, eda arit lagya highi.

<sup>11</sup> Mbuku ako an Yohanes ninggya lagima, mbogot vaga ane yuknugu highi ako en ambi inim yuknugu dugwit, "Awakwa ininis unggul adik-adik inim, enagamut adik-adik inim, enane adik-adik inim, ap ininis ombok inim, yi awakwa ndi awakwa wisane, vivis oginivisogon wene andi, yugirigya dogwen o," yiluk, yuknugu highi.

#### Ap mberen Ala wene yugurugwi selok, initugwa wene

**11** Andi yuknugu higya lagirik, werekma, wakhegek wanggun *meter* ogovak highirik ambi woknugu dugwit, "Ala awi valekma inim, Ala ake warogo hali hunisagwima inim, adup maren hudi yiluk, *meter* wal okha lak. Eke, awakwa Ala awi valekma siyabagek ogarit nunggugusim akoma, eneyave hinggis dinggil inivit elak. <sup>2</sup> Ogwarit lagya dugwit, Ala awi valekma mbumbumu ako *meter* wal okhabuk. It awakwa weram Yakuri dek menda en o *kota* eyave adik

denek agarikmu akoma inisok sovalogo bigik lagu dugwit, Ala awi valekma mbumbumu andoma inim sovalogo bigik lagu-sigik, saut 42 hudi hekbagarikmu, *meter* wal okhaup moga. <sup>3</sup> Eke, it ap eneyave mberen An Ala nane vagalogo yugurugu dogopwak yiluk, lakbisayogon ako en enasum libilik weyak menda yirik dugwit, An Ala nane yugurugwi-sigik, ndugwis 1.260 hudi dogosogon o," yiluk, yuknugu highi.

<sup>4</sup> It ap eneyave mberen andi, yo *saitun* mberen ovagak, hali yevedogo bagek mberen ovagak, dugwit, nenasin inis ombok yi menda ndi menda adem andok ako elokwema agarwik andi, it ap andi aro. <sup>5</sup> It ap mberen andi, enelagapma en hali wuluk yagan wulu wagya dugwit, it inim ogorek agarwik ako inirisagwi atma, "Ap mberen andi, inirusogom o," yiluk, inirup yiluk ogagusigik, it enelagapma en hali wuluk yagan wulu wagya dugwit, it inirup ogasagwi eneyave ako hali abya yevedogo hali nunggu inigis o. <sup>6</sup> It ap eneyave mberen ako andi, enendawi hobaluk, "O hivi vaga wene yugurugu dogopim musu wambu warubuk o," yiluk, yugwi iniselok, musu wagetek mbup iris, "Is yi, amuya aru o," yugwi iniselok, amuya at agya, eke, "O wen vaga yoma adwanggak wisane oklaru o," yugwi iniselok, adwanggak wisane agya, anderogo at it ap mberen ako ogarit lagu dogopwak yiluk, Ala en andok okbugu highi.

<sup>7</sup> Higya lagima, At wene yuknugu ako en ambi inim yuknugu dugwit, "Wene yugurugu dogopwak yiluk, lakbisayogon ako hivi erogo yugeramundikmu, yangge do ovagak aninis werek ambi hambuluk lendagwima nggilin elola en daga warisogon. Daga wagya dogomindik, ap eneyave mberen ako hait enombolok enambetaga lagya dugwit, hivirinivisogon. Hivirinipu halok, hambugu dogomwima, <sup>8</sup> eneyave o *kota* ombok enowa yo winik vaga warogo bagagwarikmu sup ombok yago ako vaga, vidis agu dogopwak yiluk, mbo bisasogom. O *kota* ombok ako, it nin wene atok lovarogo yugu dugwit, 'O Sodom inim, o Mesir inim,' yiluk, yagalagwima, akoma at eneyave mbo bisasogom. <sup>9</sup> Mbo bugu dogomundik, it avakwa ininis ungkul adik-adik inim, enane adik-adik inim, enagamut adik-adik inim, yi avakwa ndi avakwa ovok en, 'Vok!' yiluk, bigisa warusogom. *Tiga setengah hari* vaga wen sabisaup sek hegek ovara, 'Hekbisines,' yiluk, sabigitek dogosogom.

<sup>10</sup> "Eke, it avakwa wen vaga agarwik ako ovok en, 'It ap Ala wene yagalagwi mberen yi en enane yugu lagaoga vaga nit edup-mbedup mondok wisane okbinilin nagu lagaorikmu, Nabirok! Sek at hombagao o,' yiluk, enadenggen ogagwi, yi menda ndi menda un at wokwok yugwi, ogarusogom o," yiluk, yuknugu highi.

<sup>11</sup> Higya lagirik, nil neyagek, *tiga setengah hari* okbaluk, Ala en elagap agarero ap mberen ako enendawima mabugu lagama, iniluk akluk, mondok yagao. Mondok yugu lagaoma, avakwa inil agarwik ako enendawi obak agu dugwit enalon wisane agwi inigis.

<sup>12</sup> Enalon wisane inigik, mbogot vaga en ane ombok iri dugwit, "Dagamanis," yugirigya lagama, enaruk hobaluk, it inim ogorek ako inil inigik, mbogot anggelekma hena vaga unggwi inigis.

<sup>13</sup> Ao unggu-sigik, o wadok ombok ogagya hegek, o *kota* andoma avakwa enawi wisane valek ako nin hekbagya, nin agako *sepersepuluh* higiroyo masok-dang-gok erogo lagya, ogagya dugwit, avakwa ovok eneyave *tujuh ribu* at sopalinipu lagama, it nin hetbigas ako enalon en At mbogot vaga agarik Ala ako mondok siyabagwi inigis.

<sup>14</sup> Inugu lagirik, nil werekma, At mbogot vaga en ane iris ako ambi inim yuknugu dugwit, "Avakwa mondok anggin okbisaup menda ako andi, mberen vage ogagya hegen ovara, ambiat ako hodo erogo ogarigiluk ogagyama, hil dogwen o," yiluk, yuknugu highi.

**Ane ombok ogasiga *trompet* 7 vaga ogagya dugwit, avakwa mondok anggin okbisaup henggam ako ambi hivi okbugu hagagi wene**

<sup>15</sup> Yuknugu lagama, nil werekma, *malaikat* 6 ane ombok ogasiga *trompet* ako ane ogagu lagaoma, ambi ako en *trompet* ako ane ogaga. Ogagya lagama, it mbogot vaga andoma en enane ombok yugu dugwit, "O wema andoma *pemerintah* enavema agarwik avakwa ovok erogo ako,

At Nenasin inim, At denogo mondok okbogogi Kere-tus inim,

iperen enane hunggu dogoguluk, enavema ari wa-gao o.

Ari wagwi iniselok, Keretus ako en enowa inis ombok dugwit,

mondok-mondok wene yugirigya dogosogon o," yiluk, yugwi inigis.

<sup>16</sup> Yugu lagaoma, nil neyagek, it mbogot vaga agarwik enanggok ap ombok-ombok eneyave 24 wene yugerelagwima *kursi* sek vaga Ala avema horaik agarwik ako en enelose samup Ala avema ndun yi lagu lagaorik, siyabagao. Siyabagu dugwit, ndawi yerogo watugwa:

<sup>17</sup> "Hat Hanye Hadigat agindik Nenasin Ala, Endak welagagin, yogak mondok agindik, hararo. Yogak hat Hini ombok dugwit,

Hat hanye wisane atma,  
Avakwa ovok erogo havema bisiluk,  
Wene yugirigya dogosogon andi vaga,  
Nit 'Wa, wa,' yukhisagwi o.

<sup>18</sup> Yi avakwa ndi avakwa ininis unggul adik-adik en, enaninis umbutu dugwit,

'At nenowa inis ombok dogop nenanggon o,'  
yiluk, yagan wagwi ako,  
Haninis enovaga bugu,  
it hambit lagagwa ako enowak dilogo bugu,  
It hayelomani *navi-navi* inim,  
haburi hake denek ako inim,

it hini siyabagalagwi inim,  
 ininis dek ininis werék ovok erogo  
 sek ogagu-selok onngo wogirigya,  
 eke, it o wen vaga andoma weyak ogwarogo biselag-  
 wi ako, dek erogo bugu,

Ogwarup hudi vage vanggo yi wagarikmu, wa,"  
 yiluk, yugugwis inigis.

<sup>19</sup>Yugugu lagaoma, Ala awi valek mbogot vaga ako-  
 ma sup hut lagya lagama, wene Ala en nggatuk erogo  
 yugeragagi 10 *hukum* mbalek yo *peti* ogarek vaga  
 yidik agarik ako, sigam agya higi. Sigam agya hegek, o  
 bigavok ogagya, unggulane iris, o wadok iris, musu  
 hol es salyu mondok yuvulogombo wambigya, ogagya  
 higi o.

Hwa inim, mbas inim, iperen en ogagwi inigigi wene

**12** Ogagya higya lagirik, mbogot vaga andoma  
 ninilup arup menda modok iya erogo ambi og-  
 wagya higi. Higya dugwit, hwa ambi saut eyave vaga  
 mendek werékma, sogwes yum hak andi, mo il at yirik,  
 eke, unggul vaga nggudit-nggudit mendarek  
 anggelekma dadiwap 12 hudi hunik agarik higi. <sup>2</sup>Hwa  
 ako, avula werékma, eyak iluk igya dugwit endak  
 hedagiluk edup en yagan watya dugwit, na iri higi.

<sup>3</sup>Na iri lagama, mbogot vaga andoma ninilup arup  
 enalon werék menda adik ambi ogwagya higi. Higya  
 dugwit, mbas ombok awigovak ovagak agamut mudu  
 swa ngenak iris ovagak atma, eyave ambiat arovara,  
 unggul 7. Unggul ako vaga aruk adema aik 10 yago  
 werék higi, eke, unggul 7 ako vaga nggudit-nggudit  
 maduk sivovo ovagak mendarek ovok erogo yirik higi.  
<sup>4</sup>At mbas ako agya vaga dadiwap mbogot vaga agarik  
 ako nin mberen inigik, nin ambi agako higiromo ako  
 vedalogo wen vaga mbo wombabaik wagya higi. Hi-  
 gya lagirik, mbas ombok ako en, "Hwa ako eyak en-  
 daklagya halok, nayogon o," yiluk, hwa ako adema  
 hanjalek welaga. <sup>5</sup>Hanjalak welaga ovara, at hwa ako  
 en ap at endaklagya lagama, avyak ako haru ogo  
 wolok wene yueraligama At Ala adema ba inggya hi-  
 gi. Avyak ako yi ap akwa ndi avakwa ovok erogo  
 enasin inis ombok dugwit ane anye vaga wene yugiri-  
 gya dogosogon. <sup>16</sup>Eke, avyak ako ba ingga lagama, isa  
 ako, dogopim Ala en dikduk okbagarikmu harumu  
 avakwa dekma andoma hoda laga werékma, Ala en  
 eyaga hegek, ndugwis 1.260 hudi ari lagya higi.

<sup>7</sup>Andi ogagya higya lagirik, o mbogot vaga andoma  
 ndup sumbutu inigis. At Mikael aori *malaikat* menda  
 inim en at mbas ombok awigovak ovagak ako, aori  
*malaikat* weyak menda inim mbogot vaga andoma  
 ndup sumbutu dugwit war-wat yugu inigis. <sup>8</sup>Ndup  
 sumbutu dugwit, iren mbas ombok ako aori inim  
 enanye dek erogo bugu lagaorik, "O mbogot vaga  
 yoma dogop dek o," yiluk, <sup>9</sup>at mbas ombok ako aori  
 inim haryogo wen vaga mbo wombabisa wagwi inigis.

At mbas ombok awigovak ovagak wombaba waga ako  
 andi, o muk en yi avakwa ndi avakwa ovok erogo  
 enambutmu dagasiga menda inis Sile ako andi, inis  
 ambi *setan* aratma, at aori inim ovok erogo mbogot  
 vaga en haryogo wen vaga wombabisa wagwi inigis.

<sup>10</sup>Haryogo wombabisa wagu lagaoma, ane ombok  
 ambi mbogot vaga andoma en iri dugwit,  
 "At Ala ivaga nenaswei Ala aburi hutun-howam huluk  
 wene enovaga bisaliga ako, vage wombaba wagarik-  
 mu,

At Ala anye vaga Sile sovalogo baluk, aburi enagap  
 wendatya,

Nenasin Ala en it yi avakwa ndi avakwa ovok At ave-  
 ma bugu,

At abut denogo bagagi Keretus ako, enasin inis om-  
 bok dugwit wene yugirigya,

Ogagu dogop hudi ako, ovok oklandiga yi aro.

<sup>11</sup>It nenaswei Ala aburi ako andi, 'Ninirup halok sek  
 aro,' yiluk, inugutek hegek Sile aburi en initao,

Wam Ndomba Eyak amuya winggigi ako enendawi  
 andi vaga vanggaluk dugwit,

Yesus wene iri lagagi ako vagalogo yugeregek nagwis  
 vaga

Sile sovalogo bagao o.

<sup>12</sup>Hat mbogot inim, hit mbogot vaga agipik inim,  
 henendawi adenggen umbutu dogones o.

Eke, hit wen vaga agipik ako inim, is ombok yang-  
 gadek laut vaga agipik ako inim, hit ako andi,

Henanggelekma at Sile wombaba waga ako en, 'An  
 dek okbanup andi, o vage horok ari wandiga o,' yiluk,  
 Aninis wisane en hit avakwa sale-vale erogo bigigayo-  
 gon atma,

Henabwa o!"

yiluk, iri higi.

<sup>13</sup>Eke, at mbas ombok ako en, "An wen vaga modok  
 at mbo wombabani waga higi," imbitya lagarik, hwa  
 ako amusek laga. At hwa eyak avyak endak laga ako at  
 amusek laga. <sup>14</sup>Amusek lagya lagama, watya hawen, o  
 at hwa ako dogopim Ala en dikduk okbagarikmu haru-  
 mu avakwa dekma akoma lapwak yiluk, Ala en swa er-  
 am mbongga amik ndatak, hwa ako, amik werék ok-  
 bagya lagama, wigak-wigak yagan o akoma laga. O  
 akoma lagya lagarik werékma, Ala en eyaga hegek,  
*tiga setengah tahun* ogagya higi.

<sup>15</sup>Eke, lagya hegek, is en hwa andi wolok lapwak  
 yiluk, is ombok nggut landiga hak, at mbas ombok ako  
 elagapma en is suvurogo adoma lakbagas. <sup>16</sup>Lakba-  
 gas ovara, wen ako en hwa ako yonggat higya dugwit,  
 elagap bisak baluk, is ombok mbas elagapma en su-  
 vurogo lakbagas ako, wen elo mbedekma andoma  
 wombabagya higi.

<sup>17</sup>Andi ogagya lagama, at mbas ombok ako en hwa  
 ako inim aninis wisane iri lagarik, hwa ako eyagi nin in-  
 im ndup sumburi lagya higi. At hwa eyagi andi, at Ala  
 en wene yukneraliga menda des erogo ogarit lagwi in-  
 im, Yesus en vagalogo yugeragagi wene avyarat om-

† *Mazmur 2:9 yokhanes.*

bakluk musek lagwi inim, at hwa eyagi andi it aro.

<sup>18</sup>Eke at mbas ako andi, is ombok yanggadek laut omban vaga mendek yi lagya lagarik werek higi.

### Yangge do ovagak aninis werek ambi en ogagya hagagi wene

**13** Andi ogagya higya lagirik, yangge do hak aninis werek ambi is ombok yanggadek *laut* endawima en wulu wagya higi. At yangge do hak ako andi, aruk adema aik 10, eke, unggul 7, werek higi. Aik 10 ako vaga nggudit-nggudit sivovo ovagak mendarek ovok yirik, eke, unggul 7 ako vaga Ala inis wiyiknom-weyaknom erogo bagao dirup mbalek ovok agarik higi.

<sup>2</sup>Yangge do ovagak aninis wisane ima en wulu wagya higi eyave ako andi, yangge *harimau* ovagak. At isok andi, ombok wam *beruang* isok ovagak, eke, elagap ako andi, yangge *singga* elagap ban ogarek ako ovagak werek higi. At mbas ombok awigovak ovagak ako en, "An nanye vaga ogarit lagya, an wene yugeraligama dugwit, wene yugirigya, ogagya dogonyok yiluk, ovok erogo hat handok okbagagi o," yiluk, yugugu higi.

<sup>3</sup>Yugugu higya lagirik, yangge unggul nin ako hegek, unggul ambi ako watu lagama, modok hambigiluk ogwagya higi. Mondok hambigiluk ogagya ovara, sek agya lagarik, it avakwa wen vaga menda ovok erogo, "Vok!" yugugu dugwit, at adigat amusek lagu inigis. <sup>4</sup>Eke, mbas ombok ako en at yangge do hak ima en wulu waga ako, awene yugigas ma, avakwa en mbas ombok ako at inis ombok yiluk, inis siyabagao. Eke, yangge ako ogo inis siyabagu dugwit, "Yangge yi ndatak ambi agarwik modok dekma, sani en at inim ndup sumburup embetep? Modok dek aro," yiluk, at inis siyabagwi inigis.

<sup>5</sup>At yangge aninis werek ima en wulu waga ako siyabatigya dugwit, Ala wiyiknom-weyaknom erogo bagya, eke, avakwa enasin inis ombok dugwit wene yugirigya, ogagya dogopwak yiluk, saut 42 nggao yigiluk, hek bagya higi. <sup>6</sup>Ogagya dugwit, yangge ako en at Ala eyave inim, at inis inim, at agarikmu inim, eke, it mbogot vaga agarwik menda inim, it ovok erogo at ane vaga wiyiknom-weyaknom erogo bigik lagya higi.

<sup>7</sup>It ap ininis unggul adik-adik inim, enane adik-adik inim, enagamut adik-adik inim, yi avakwa ndi avakwa ovok erogo at yangge ako en enasin inis ombok dugwit avema sovalogo bisapwak yiluk, mondok okbagya higi. Eke, at yangge ako en it Yesus aburi ake denek ako inim ndup sumbutu dugwit, inirit lagya dogopwak yiluk, mondok okbagya higi. <sup>8</sup>At Ala en o muk mbogot-wen yi ao wakhegetek dugwit, "It avakwa mondok-mondok iniluk okbisaup o," yiluk, ininis Ndomba Eyak watugwa ako ambuku vaga dirup watigi. It avakwa ininis mbuku vaga dirup mbalek agarik dek halok andi, it ovok erogo at yangge ako inis siyabagwi inigis.

<sup>9</sup>"It heda maginivup denek halok heda maginipwis,

Hambupwak yiluk mbusi segowa vaga enarup denek halok, initwis,

Ogwagu dogosogom o, yiluk, yagagi ako at oginivit lasogom ma, oginivit lagusigik, it Ala aburi ake denek ako en, enendawi hora yiluk, enendawi wadok dek dugwit, wugu dogopwak o.

"Henaruk werek a dek a? Henaruk werek halok, wene andi des erogo at hunggu dogones o," yiluk, yuknugu higi.

### Yangge do ovagak adik ambi en ogagya hagagi wene

<sup>11</sup>Andi okbaluk, hivis en yangge do ovagak adik ambi wen elola en daga wagya higi. At yangge ako aruk adema aik mberen ndomba aik ovagak ovara, ane andi, mbas ombok ane ako ovagak iri higi. <sup>12</sup>Yangge endak is yanggadekma en daga waga awene yugugu lagama, yangge vivis ako wene anye menda yugigas ako wigya lagarik, it avakwa wen vaga agarwik ovok erogo yugeraga. Yugirigya dugwit, "Hit en yangge endak daga waga unggul ambi watu lagaoma, hambigiluk ogaga ovara, sek aga ako adigat inis siyabagu dogones o," yiluk, ane anye vaga abet erogo yugirigya higi. <sup>13</sup>Eke, yangge hivis wen elola daga waga ako en nggarogo ogarubuk menda iya erogo ogarit lagya dugwit, avakwa ovok inivaga hali hunik mbogot vaga en wen vaga wombaba wagya higi. <sup>14</sup>At yangge endak daga waga ane yugigas vaga, yangge vivis ako en nggarogo ogarubuk menda iya erogo ogarit lagya dugwit, avakwa wen vaga agarwik ako Yesus amusek lagup en yiluk, enambutmu inggya dugwit ane huluk yugirigya higi. Avakwa wen vaga agarwik ako enambutmu inggya dugwit, "Yangge hak ambi mbusi segowa vaga watao ovara, iluk aga ako, agut wakhegek huvuwak ambi ogovak higi rogo baluk, at adigat inis siyabagu dogones o," yiluk, it yugirigya higi.

<sup>15</sup>Yugirigya lagama, yangge endak daga waga agut wakhegek huvuwak ogovak higririk ako ane yumwak yiluk, yangge vivis ako en elagap agarero endawima vup erogo mabaup andok okbagas ma, vup erogo mabagya higi. At agarero endawima vup erogo ma bagya lagama, agut wakhegek ogovak higririk ako ane werek agya lagarik, it avakwa at inis siyabagetek ako aninis en enarit lagya higi.

<sup>16</sup>At yangge andi en it ap ininis werek inim, ininis dek inim, ininggis werek inim, ininggis dek inim, un agarwik menda inim, avakwa enayeloman inim, ovok erogo enelup agek ambi ininggis amotkan vaga a, enembet vaga a, dirup mbalogo bogogi. Dirup mbalogo bugu lagarik, yugirigya dugwit, <sup>17</sup>"It avakwa andi, yangge endak daga waga ako, at inis a, ata at *anomora*, eneyave vaga dirup mbalek agarwik dek halok andi, enangge onngo mbalirigwi, eke, yi menda ndi menda hunggis, ogagu dogop modok moga o," yiluk, wene mbilinogo yugirigya higi.

<sup>18</sup> Higya lagirik, at wene yuknugu ako en ambi inim yuknugu higya dugwit, "Wene mbilinogo yugiriga hegen ako andi, it ap enendawi werek en adigat sigam hugu dogosogom. At yangge ako en dirup mbanggas ako andi, ap ambi inis *anomor* dirup mbalek 666 atma, it awakwa enendawi werek halok, 'Nomor weyak andi, yi at higi o,' yiluk, dibagu dogopwak o," yiluk, yuknugu higi.

#### Ndawi swi menda viyanggis inigigi wene

**14** Yuknugu higya lagirik, werekma, at Ndomba Eyak ako ndom Sion vaga mendek werekma nil higi. Eke, it awakwa 144.000 ako, enembet vaga Ndomba Eyak inis inim, At asin inis inim, iperen ininis enadik-enadik enembet vaga dirip mbalek menda ako, Ndomba Eyak inim mendek werekma inigis. <sup>2</sup> Inugu lagirik, is satut wambigya dugwit ane ombok iris, o ung-gulane ombok erogo ogagya, ogagya ako ovagak, mbogot vaga en nggindar ombok wisane ane ogasagwi ako ovagak, ane ombok ambi iris naruk hunggis.

<sup>3</sup> Hunggu lagirik, At wene yugeraligama agarik eyave ako inim, it awakwa en iniselagwidek menda eneyave 4 ako inim, eke, it mbogot vaga agarwik enanggok ap ombok-ombok 24 ako inim, werek inigik, it eneyave 144.000 ako en enadoma dugwit, ndawi swi menda watwis inigis. Eke, ndawi watwis inigis ako andi, it awakwa ugun en mamulbaluk viyalup mondok meyan o. Ata, At Ala en, it eneyave 144.000 awakwa wen vaga menda enangelekma en enomaluk dek okbagya dugwit enonggo mbalogo enagap wendatigi ako en adigat viyalup andi sek atma, viyanggis inigis o.

<sup>4</sup> It ap 144.000 ako andi, enendawi sek adik denek dugwit, akwa inim mondok dambulik dek at agarwik. It Ndomba Eyak ako adigat inim lendagwi. Yi menda ndi menda endak menda Ala ake belagwi hak, awakwa nin inigik, it ako adigat Ala inim, At Ndomba Eyak inim, enake denek dogopwak yiluk, enonggo mbalogo enagap wendatigi. <sup>5</sup> It ako huluk wene ambi mondok yagalagudek atma, weyak ambi enovaga mondok dek at inigis o.

#### Malaikat eneyave henggam en ogagwi inigigi wene

<sup>6</sup> Andi inugu lagirik, werekma, *malaikat* adik ambi en mbogot ilim yoma lagya higi. At malaikat adik andi en, wene dek asigadek mondok itok agarik Sek Wene Yesus avok ako, awakwa wen vaga menda ininis unggul adik-adik inim, enane adik-adik inim, enagamut adik-adik inim, yi awakwa ndi awakwa wen vaga agipik ovok erogo yugeragiluk mbogot ilim yoma lagya higi. <sup>7</sup> Lagya dugwit, "Mbogot inim, wen inim, is ombok yanggadek laut inim, is liris wulu wandigama inim, At Ala en adigat wakhagagi atma, at avema seve yiluk, at inis siyabagu dogones. Yogak Ala en henowak dilhinivup hudi vage horok vanggo yagarikmu, henalon en At Ala agayuk wutu dugwit, At avema seve yiluk,

inis siyabagu dogones," yiluk, ane ombok vaga yagan lagya higi.

<sup>8</sup> Yagan lagya lagama, aswe ambi wagya dugwit, "It awakwa o *kota* ombok Babel andi, hwa yanenggek ovagak agarwik. It hwa yanenggek ovagak atma, amburup nenek ogivisiga nelok, ugun-ugun ogarit lendagwi hak, enendawi ninggya halok weyak ugun ogarit nelagwi. Ogarit nagu dugwit, 'Nit ogasagwi yi, it yi awakwa ndi awakwa ininis unggul dombok ovok erogo wane-wane ogagu dogopwak o,' yiluk, mamulerelagwima, enawi inim, eneyave inim, mondok dek erogo bigis o. Mondok dek erogo bigis o," yiluk, iris naruk hunggis.

<sup>9</sup> It *malaikat* mberen ako wene andi, yugurugu lagaoma, adik ambi wagya lagarik, ane ombok vaga iri dugwit, "It awakwa en yangge do ovagak ako inim, at agut wakhegek huvuwak ogovak higerik ako inim, ininis siyabugu dugwit, it enaburi yedok hapwak yiluk, ininggis vaga a, enembet vaga a, yangge inis dirup mbalek agarik halok, <sup>10</sup> aninis modok wisane enovaga bugu dogosogon. Anggur amburup is inim nudik dek, ata amburup adigat nudik nunggu dugwit eda wisane helagwi hak, At Ala en it awakwa andi, enabwa embetetek aninis mondok wisane enovaga bugu dogosogon. Aninis wisane enovaga bugu dugwit, hali monggalek helep enggen *belerang* inim hora okbugu dogomima, it Ala ake denek agarwik *malaikat* inim, At Ndomba Eyak inim, inil inigik, mondok edup wisane en yagan yimbilok-mendalok yugu dogosogom o," yiluk, iris naruk hunggis.

<sup>11</sup> "It awakwa ininggis vaga a, enembet vaga a, yangge inis dirup mbalek dugwit, yangge inim, at agut wakhegek huvuwak ogovak higerik ako inim, ininis siyabugu dogosogon ako, hali hunik helep enggen inim enovaga dan okbayogon yuvuk ako nggatuk yegetek modok-modok enovaga en wunggu dogosogon. Wunggu hegek, dingga inim, o hup inim, sat yanggal hedegetek modok-modok yagan watu dogosogom o," yiluk, iris naruk hunggis.

<sup>12</sup> Iris naruk hunggu lagima, At ane yuknugu ako en, "It enendawi Yesus ovaga vanggaluk, ane yugup ndatak ogarit lagwi, eke, Ala en, yerogo ogwarup nderogo ogwarup, yagagi wene des erogo musek lagwi, ogasagwi At aburi ake denek ako, edup-mbedup enovaga bisasogom. Edup-mbedup enovaga bugu-sigik ovara, enendawi wadok dek dugwit, wugu dogopwak o," yiluk, yuknugu higi.

<sup>13</sup> Andi yuknugu lagama, mbogot vaga en wene ambi inim yuknugu dugwit, "Yogak en, it ap Nenasin inis ombok inim hunik dugwit hambisagwi ako, enendawi adenggen at umbutu dogosogom o, yiluk, dirup mbalu," yuknigas. Yuknugu lagama, Ala Averiniki en, "Avyarat o. It hambugu-selok, iniluk dugwit, sadida oginipu hegek yavup ogarit lendagwi ako, Ala en unggut akluk hekbisayogon dekma, enendawi



adenggen umbutu dugwit, sat yanggal hidugu dogosogom o," yiluk, iris naruk hunggis.

#### Enggen hoda agarikmu, mbanggya hagagi wene

<sup>14</sup> Wene iris ako naruk hunggu lagirik, werekma, awakwa enelose ovagak ambi nggudit-nggudit mendarek mbusi *emas* menda unggul vaga yirik, eke, yaga *savit* ovat wisane inggimu vagogo dugwit, hena mudu vaga horaik agarik nil higi. <sup>15</sup> Higya lagima, *malaikat* adik ambi Ala awi valekma en wulu wagya lagarik, ane ombok vaga At hena vaga horaik agarik ako yugugu dugwit, "O wen vaga yagamu andoma enggen yugup modok hoda aga vage mbalup hudi agarikmu, heyaga *savit* hedelok, hodo erogo enggen mbali wambilak o," yiluk, yugigas. <sup>16</sup> Yugugu lagama, At hena vaga horaik agarik ako en eyaga *savit* ako vaga o wen vaga andoma enggen yugup modok hoda aga ako, ovok erogo enggen mbali wambigya higi.

<sup>17</sup> Wambigya lagama, mbogot vaga Ala awi valekma akoma en *malaikat* adik ambi wulu wagya lagarik, at ogo, yaga *savit* ovat wisane inggimu werek higi.

<sup>18</sup> Andi en, *malaikat* adik ambi hali hunisiga menda vagago agarik ako hali hunisigama akoma en wulu wagya lagarik, at *malaikat* eyaga *savit* ovat wisane endak inggimu wulu waga ako, yugugu dugwit, "O wen vaga yagamu andoma *anggur* enggen yugup ako, mondok hoda agarikmu, heyaga *savit* ovat wisane andi vaga mbalogo yidi wambilak o," yiluk, yugugu higi.

<sup>19</sup> Yugugu lagama, at *malaikat* ako en *anggur* enggen mbalik en yiluk eyaga *savit* ako wolok wen vaga wambu wagya higi. Wambu wagya lagarik, *anggur* enggen ako ovok erogo mbalogo baluk, wonggalogo Ala aninis en sovalinivupwak yiluk, sovalinivisigama ombok akoma mabagya higi.

<sup>20</sup> Mabagya lagama, *anggur* enggen amburup sovalinivisigama o *kota* leget weram akoma sovalbugu hegek, awakwa enamuya is nggut hak yanggadit inggya dugwit, aguruk wisane *kuda* unggul wane-wane agya lagarik, atok o adumu *tiga ratus kilometer* wane-wane ari lagya higi.

#### Atok vaga edup-mbedup okbugu hagagi wene

**15** Andi okbaluk, havis mbogot vaga andoma ninilup arup enalon werek menda modok iya ogagya higi. Ogagya higya dugwit, *malaikat* eneyave 7 en atok vaga awakwa edup ogonuvupwak yiluk, adwanggak adem 7 andok agarwik inigis. It *malaikat* 7 yi en awakwa edup ogonuvupwak yiluk, adwanggak adem 7 enovaga bisa warimi ako, atok vaga okbisaup menda aro. Atok vaga okbugu iniselok, okbaluk, Ala aninis ombasiga ako wotok erogo dek agya dogo-mindik, endawi seve yisogon, higi.

<sup>2</sup> Higya lagirik, inamut ombok yanggadek *laut* ovagak ovara, elose wukagak *kaca yendela* ogarek herek damok ogasiga angelekma en hali abya wunggu higi.

Higya lagirik, werekma, awakwa inamut ombok yanggadek ako omban vaga mendek agarwik inigis. It awakwa ako en yangge endak daga waga ako inim, agut wakhegek huvuwak ogovak higririk ako inim, ininisi siyabagatek. Eke, at inis ininggis enembet vaga dirup warup ako wegetek dugwit, Ala inis adigat siyabagao ako en, inamut ombok yanggadek ako omban vaga mendek agarwik inigis. Nggindar ombok Ala en wogeraga ininggimu vagogo dugwit, nggindar ako ane ogagwi, <sup>3</sup> eke, Ala inis siyabagu dugwit, ndawi watwis, ogagu-sigis. Ndawi watu dugwit, ndawi Ndomba Eyak ako en yagagi inim, ndawi Ala ayeloman Musa en yagagi inim, watu-sigis. Ndawi watao andi eyave yerogo:

"Nenasin Ala hanye adigat agindik,

Hat ogasiga ako andi,

mondok iya erogo ogagya,

nggarogo ogarubuk menda ogagya,

Yi awakwa ndi awakwa enasin hini ombok dugwit, mondok eyave atma nggedok adigat ogagya,

ogasiga o.

<sup>4</sup> Nenasin o,

Hat hadigat sek adik denekma,

Awakwa ovok erogo hat hagayuk wutwis,

Hat hini siyabagagwi,

ogarusogom o.

Hat modok atma nggedok adigat ogasiga ako, sigam agyama,

yi awakwa ndi awakwa ovok erogo

Havema seve yi wakluk,

hini siyabagagu dogosogom o,"

yiluk, ndawi watwis inigis.

<sup>5</sup> Andi watwis inugu lagirik, Ala ninim agarik ombarupwak yiluk, Ala awi eravo valek mbogot vaga agarik ako, sup hurik higi. <sup>6</sup> Higya lagirik, akoma en *malaikat* eneyave 7 ako en awakwa edup-mbedup okbisaup adwanggak adem 7 ako, wolok wulu wagu inigis. It ako sogwes yum adup modok mudu abya amumulip ogarek yirik, eke, mbup nggetalek obak mbusi emas vaga ogovak higririk eneyave vaga yirik agarwik inigis.

<sup>7</sup> Inugu lagirik, nil neyagek, it awakwa en iniselag-widek menda eneyave 4 ako ambi en sogolowak mbusi emas vaga ogovak higririk 7 akoma it *malaikat* eneyave 7 ako wogirigya higi. Sogolowak 7 ako at Ala iluk modok itok agarik aninis awakwa enovaga bisamwak yiluk, elagap vaga erogo nudik higi.

<sup>8</sup> Wogirigya lagama, Ala modok anye wisanema, eyave awiya wisane ogagya vaga en yuvuk wisane wunggu dugwit, Ala awi valekma akoma hobo-hobo agya higi. It *malaikat* eneyave 7 ako en edup okbisaup adwanggak adem 7 awakwa enovaga okbisaup ako, wotok erogo okbigitek inigik, awakwa o mbogot vaga andoma Ala awi valekma andoma nunggup dek at agya higi.

## Ala aninis sogolowak vaga nudik hagagi wene

**16** Andi ogagya higya lagirik, Ala awi valekma en ane ombok ambi it *malaikat* eneyave 7 ako yugirigya dugwit, "Ala aninis sogolowak 7 vaga nudik andi, wolok, awakwa wen vaga agarwik andi, enovaga ndilogo wombabisa elales o," yiluk, yugirigya hunggis.

<sup>2</sup> Yugirigya lagama, at *malaikat* ambi en Ala aninis sogolowak vaga nudik ako, wolok wen vaga ndilogo wombabagya higi. Ndilogo wombabagya lagama, it awakwa yangge inis enembet vaga dirup mbalek agarwik ako inim, at agut wakhegek ogovak higirik inis siyabagwi ako inim, ovok erogo himbis edup ombok enovaga ndan iri lagama, awakwa en agoda wisane yugwi inigis.

<sup>3</sup> Malaikat en Ala aninis sogolowak vaga nudik ako ndilogo wombabagya lagama, aswe ambi en sogolowak vaga nudik ako is ombok yanggadek laut ako vaga ndilogo wombabagya higi. Ndilogo wombabagya lagama, is ako ap nggorak enamuya ovagak agya dugwit, is endawima yi menda ndi menda iniluk agaruk menda ovok erogo hambit lagwi inigis.

<sup>4</sup> Malaikat mberen ako en Ala aninis sogolowak vaga nudik ako, mondok ndilogo wombabagu lagaoma, aswe ambi en sogolowak vaga nudik ako wolok is landigama inim, is liri-liris wulu wandigama inim, ndilogo wombabagya higi. Ndilogo wombabagya lagama, is andi ovok erogo muya ovagak agya lagama, <sup>5</sup> at *malaikat* is andi, vagago agarik ako en iri dugwit, "Endak welagagin, yogak agindik, Hat nasin Ala hadik denek sek adigat dugwit, mondok eyave atma nggedok adigat ogasiga atma, It weyak ogwagao enowak ndilogo onggonggo haninis enovaga baliga yi andi, sek at ogagya heyagi o.

<sup>6</sup> It Hat Ala haburi hake denek inim, *navi-navi* inim, enamuya erogo initungwa ako,

Onggo awakwa enamuya yi, is ovagak nunggu dogopwak yiluk, okbigin atma, sek at ogwagen o," yiluk, iri higi.

<sup>7</sup> Iri lagama, Ala ake warogo hali hunisagwima ako ma en ane iri dugwit,

"Wene andi, avyarat yagas o.

Hanye wisane adigat agindik nenasin Ala harat o. Awakwa ogasagwi enowak ndinggu dugwit,

onggo modok wane-wane atma nggedok adigat okbisaliga atma, avyarat yagas o," yiluk, iris naruk hunggis.

<sup>8</sup> Malaikat eneyave 3 ako en Ala aninis sogolowak vaga nudik ako ndilogo wombabagu lagaoma, ambi en sogolowak vaga nudik ako mo il vaga ndilogo lakbagas. Ndilogo lakbagya lagama, mo ako edup wisane agya dugwit, mo edup en awakwa yagal inivit lagya dogopwak yiluk, anye okbagya higi. <sup>9</sup> Okbagya lagama,

avakwa yagal inivit lagya halok, iren yugu dugwit, "Idup-mbedup yerogo obininaliga atma, nenomaluk mbo baluk, Ala inis siyabagu dogosogom o," yiluk, yup sek arovara, hegek, enasam hegetek, enomaluk enendawi hunik okbetaluk dugwit, at edup-mbedup okbisaliga vagogo agarik Ala ako inis wiyiknom-weyaknom erogo baik lagwi inigis.

<sup>10</sup> Eke, it *malaikat* eneyave 4 ako en Ala aninis sogolowak vaga nudik ako awakwa enovaga ndilogo wombabagu lagaoma, aswe ambi en sogolowak vaga ako yangge do ovagak ako wene yugaligama akoma ndilogo wombabagya higi. Ndilogo wombabagya higya lagirik, nil neyagek, yangge ako avema bisaligama andoma o hwis iri lagama, at avema dugwit, ane welagwi menda ako, aup edup ombok enovaga agya, womak edup ombok enovaga ndan iris, oginipas. Oginipas ako, edup en enabya yaun hivotu dugwit, "Nenomaluk mbo basogon o," yiluk, mbo baup sek arovara, hegek, enomaluk enendawi hunik okbetaluk dugwit, Ala inis wiyiknom-weyaknom erogo bagwi inigis.

<sup>12</sup> It *malaikat* eneyave 5 ako en Ala aninis sogolowak vaga nudik ako sogolowak enadik-enadik ndilogo wombabagu lagaoma, aswe ambi en sogolowak vaga nudik ako is ombok inis Evarat vaga ndilogo wombabagya higi. Ndilogo wombabagya lagama, is ako betlaga. Is betlaga andi vaga it ap ininis ombok mo il wulu wandigama en warupwak yiluk, enarup yagogo bugu higi. <sup>13</sup> Higya lagirik, nil neyagek, duk ovagak madis weyak adigat eneyave henggam wulu wagwi inigis. Duk ovagak ambi andi, mbas ombok awigovak ovagak ako elagapma en wulu wagya, duk ovagak ambi, yangge do ovagak aninis werek ima en wulu waga ako elagapma en wulu wagya, eke, duk ovagak ambi andi yangge do ovagak vivis wen elola daga waga ako huluk wene molalogo yugaligama menda ako elagapma en wulu wagya, wulu wagwi inigis. <sup>14</sup> It duk ovagak enelagapma en wulu wagao ako andi, madis Sile aori atma, awakwa enamusek warupwak yiluk, nggarogo ogarubuk menda ogarit lagwi inigis. Eke, it yi ap ndi ap ininis ombok o wen vaga agarwik ovok erogo At Ala ako inim ndup sumburuguluk homari warupwak yiluk, it duk ovagak ako andi yonggo lagwi inigis. Homari wagu dogomindik, At Anye Adigat Agarik Ala awakwa enowak ndilogo okbisaup hudi ako vaga, ndup sumburuguluk ogagu inigis.

<sup>15</sup> Andi higya lagirik, Nenasin en yuknugu dugwit, "Dibas! An ap onggop waliga ovagak mbikit supuk erogo warisogonma, awakwa inivaga ombokma en henagap mbedan lagwi hiniselok, henanggadi agwi hinisaowen, dibagu dogwes o. Henasum modok nggitik-nggetok okbetaluk, an nabyam werekma, An wagya neyalok, henendawi adenggen okhinipu hagup o," yiluk, yuknugu higi.

<sup>16</sup> Eke, it madis duk ovagak ako en ap wen vaga ininis ombok ovok erogo o inis Iberani enane vaga Haramagedon akoma at homakbisa wagwi inigis.

<sup>17</sup> Malaikat eneyave 6 ako en Ala aninis sogolowak vaga nudik ako modok ndilogo wombabagu lagaoma, ambi en sogolowak vaga nudik ako o ilim herok hena vaga yenam ndilogo wombabagya higi. Ndilogo wombabagya lagama, Ala wene yugeraligama Ala awi valekma en ane ombok ambi iri dugwit, "Ovok erogo ogwagi o," yiluk, iri higi. <sup>18</sup> Iri lagama, o bigavok modok hunik-hunik ogagya, o unggulane ombok wisane iris, o wadok modok ombok ogagya, higi. O wadok andi, muk awakwa wakhagagi hudi en, waga-waga, yogak hudi vaga anderogo ogagatek ovara, o wadok modok ombok wisane ogarit wagya dugwit, wen modok avut enden-vanden ogagya higi.

<sup>19</sup> Andi ogagya higya lagirik, werekma, o *kota* ombok ako wen modok mbet lagya dugwit, henggam etap mogolagya, eke, yi awi ndi awi wen vaga *kota-kota* ako ovok erogo mondok masok-dangkok erogo dek erogo bagya, ogagya higi. Ogagya hegek, At Ala en, "O *kota* ombok Babel ako andi, at weyak ogasiga onggonggur amburup nudik hak An naninis adigat ombasiga nudik ako, yogak at ovaga ndilogo baliga," yiluk, ndilogo wombabagya higi. <sup>20</sup> Ndilogo wombabagya hegek, is enggema wen hudi mbalekma inim, ndomdom inim, ovok erogo dek agya higi. <sup>21</sup> Dek agya hegek, o musu hol es *salyu* ombok-ombok adigat anggin wakhigya dugwit, 40 *kilo* hak mbogot vaga en awakwa enovaga wombabaik wagya lagama, modok iya erogo hambit lagu inigis. Hambit lagu dugwit, "Musu hol es *salyu* vaga ninirisiga yi, Ala nenanggon o," yiluk, Ala inis wiyiknom-weyaknom erogo bagu inigis.

#### Hwa yanenggek en ogagya hagagi wene

**17** Andi yugwi inugu lagirik, werekma, it *malaikat* eneyave 7 Ala aninis nudik 7 vagogo welagao ako, aswe ambi an nadema wagya higi. Wagya lagarik, yuknugu dugwit, "It awakwa o *kota* Babel is venak-venak huri wasigama o ugun valek ako andi, hwa yanenggek ako ovagak atma, yi ap ndi ap ininis ombok en inim weyak ogarit wendagwi. Eke, yi awakwa ndi awakwa wen vaga agarwik ovok erogo amburup nelok nenek-nenek yagan nelagwi hak, hwa ako bikha nungguluk, nidi-hidi yugwi, ogasagwima, At Ala en hwa ako weyak onggongvaga hora okbagya hil hanok en, oma," yiluk, yuknugu higi.

<sup>3</sup> Higya lagirik, werekma, Ala Averiniki nendawima des iri lagama, *malaikat* en woknombolok harumu awakwa dekma andoma bani laga. Bani lagya lagarik werekma, yangge do hak aninis werek is *laut* en daga waga ako, iris mudu hali abya ovagak, unggul 7, aruk adema aik 10 agarik ako, ambor vaga hwa ambi horaik agarik higi. Ala wiyiknom-weyaknom erogo bagu dug-

wit, yagalagwi ako menda wisane yangge eyave ako vaga dirup warek agarik higi. <sup>4</sup> Eke, hwa ako sogwes yum erom mayugwe mudis ovagak inim, saup mudu ovagak inim, modok eyave sek adigat yirik, eke, mbusi emas inim, helep enggen elose sek onggongvok ombok menda *permata* inim, *mutiara* inim, ako vaga ogovak higririk ovok erogo ovaga diduk ogagya higi. At weyak ogarit landiga inim, "Oknerapwak," ombarit landiga menda inim, ovok erogo sogolowak mbusi emas ogovak higririk vaga is nudik ovagak hwa ako inggimu vagogo agarik higi.

<sup>5</sup> Eke, hwa ako embet vaga wene adem hwilogo menda ambi dirup warek yerogo higi:

"Avakwa wen vaga menda weyak mbobo ugup hegek ugun ogarit lendagwi ako inim,

It akwa yanenggek menda inim,

ako inisa o *kota* ombok Babel an aro,"

yiluk, embet vaga dirup warek andi higi. <sup>6</sup> At hwa ako en, it Ala aburi ake denek inim, it Yesus ogagya lagagi wene mbo bagetek modok musek lendagwi inim, eneyave initu lagarik, enamuya anggur amburup hak nelok, nenek ogagya higi. Higya lagirik, an Yohanes en "Wi!" nalon imbiti.

<sup>7</sup> "Wi!" nalon imbita lagima, at *malaikat* woknombolok laga ako en, an yuknugu dugwit, "Hat nggarogo yiluk vok yagaliga? At hwa ako inim, at yangge do hak aninis werek unggul 7, eke, aik 10 ako ambor vaga hwa ako hora yiluk, wolok lagya hegen ako inim, iperen ogasagwi enawene mbauk hwilago agarik ako adem vagalogo yukhisogon.

<sup>8</sup> "Yangge do ovagak aninis werek hegen ako andi, endak welagagi ovara, dek agya lagarik, vivis, hambuluk lendagwima nggilin elola en daga warisogon. Daga warisogon ako, Ala en eloke dek erogo bagya hayogon o. Eke, mbogot-wen wakhagagi hudi en mbuku modok-modok iniluk okbisaup ako it awakwa ininis mbuku ako vaga Ala en dirup watitek, o wen vaga ao hambegetek iniluk agarwik ako en, yangge do ovagak ako sigam ari wagya inil hugu dogomundik, it ogo, 'Wi!' yiluk ombarusogom. Andi, at yangge do ovagak ako endak welagagi ovara, dek agagi umbutugwa menda sigam ari wagya inil hugu dogomundik, it 'Wi!' yiluk, ombarusogom o.

<sup>9</sup> "Wene yukhisogon yi ako andi, it ap enendawi werek en dibagu dogopwak. Yangge unggul 7 ako andi, ndom 7 atma, hwa andi vaga horaik agarik hegen. <sup>10</sup> Eke, ndom 7 vaga hwa horaik agarik hegen ako andi, ap ininis ombok eneyave 7 atma, eneyave 5 ako andi, vage eneloke dek agagwa ovara, ambi ako andi, ao mendek agarik, eke, ambi andi, havis mendek yisogon. Mendek iri dogomindik, ndugwis ambi dukluk, eloke dek at arisogon o.

<sup>11</sup> "Eke, yangge do hak aninis werek endak welagagi ovara, dek agagi ako andi, it ap ininis ombok eneyave 7 ako dek agwi iniselok, enavoloma yangge ako it ako

menda at aratma, ambi inim mendek iri dogomima, Ala en eloke modok dek erogo bayogon.

<sup>12</sup>“Eke, aik 10 hegen ako andi, it ap ininis ombok eneyave 10 aro. It ako, avakwa enavema dogopwak yiluk, ao andok okbigitek arovara, at Sile en avakwa it ap 10 ako enavema bisiluk, yangge ako inim we un sidok at vagago inigik, 1 jam agya helan, andok ok-bisayogon.

<sup>13</sup>“Andok okbugu dogomima, ininis ombok eneyave 10 ako en enendawi ambiat okbaluk, yangge ako yugugu dugwit, ‘Hat nenasin inis ombok dogenok yiluk, nenarwi ninim havema dogosogom o,’ yiluk, yugurusogom. <sup>14</sup>Yugurugu dogomundik, Ndomba Eyak ako sovalogo basogom yiluk, inim ndup awi wok-baluk sumburit lasogom. Sumburit lasogom ovara, Ndomba Eyak ako at aburi miginipu dogomindik, yonggo bisaup inim des erogo ogarit lagwi ako inim wunggu dugwit, yangge aori inim sovalogo bisayogon. Ndomba Eyak ako andi avakwa enasini ininis ombok inim, ininis werek inim, ovok erogo enasin inis ombok aratma, yangge aori inim sovalogo bisayogon,” yiluk, yuknugu higi.

<sup>15</sup>Yuknugu lagarik, ambi inim yuknugu dugwit, “Is hunik wandiga is venak-venak huri wasigama hwa yanenggek horaik agarik hegen ako andi, yi avakwa ndi avakwa ininis unggul adik-adik inim, enawi adik-adik inim, enagamut adik-adik inim, enane adik-adik inim, is wandiga hegen ako andi, it avakwa andi at inigin o. <sup>16</sup>Eke, it ap ininis ombok eneyave 10 ako inim, yangge ako inim en, ‘Hwa yanenggek yi, modok nenanggon o,’ yiluk, hwa angge-angge diduk ogarek ako nggolalogo hedugu dugwit, we un agap mbedan hegek warogo baluk, inyu nin andi nunggwii, eke, nin andi, hali hunbagwi, ogarusogom o. <sup>17</sup>Anderogo hegen andi, At Ala en yagagi ako atma nggedok yumwak yiluk, Ala en enendawima mabigigi. Ala en enendawima mabigigi ako, it ap ininis ombok eneyave 10 ako, enendawi ambiat okbaluk, aori inim en yangge ako enasin inis ombok dogopwak yiluk, ‘Hat havema dogosogom,’ yusogom. It yusogom andi, Ala imbitigi ako adigat ogarit lagu dogopwak yiluk, Ala en enendawima mabigigi,” yiluk, yuknugu higi.

<sup>18</sup>“Eke, hwa hegen ako andi, o kota ombok ako ovagak atma, yi ap ndi ap ininis ombok wen vaga agarwik ako ovok erogo at hwa yanenggek ako avema dugwit, ane hulisagwi o,” yiluk, yuknugu higi.

#### O kota Babel dek erogo bagya hagagi wene

**18** Andi yuknugu lagama, malaikat adik ambi mbogot vaga en wambu wagya higi. At andi, ane anye mondok wisane dugwit, at abinak o wen vaga awiya wisane ogarit wambu wagya higi. <sup>2</sup>Wambu wagya lagarik, ane modok anye vaga iri dugwit, “O kota ombok Babel ako, dek oklaga o. Mondok dek oklaga o.

It o kota Babel agarwik ako andi, hwa yanenggek ovagak atma,

Hwa ako en endawi ninggya halok, ‘Oknera omanes o,’ iri halok,

Yi ap ndi ap ininis unggul adik-adik ovok erogo, anggur amburup nelok, nenek-nenek yagan nelagwi hak,

ugun-ugun hwa ako ogari wagwi,

Yi ap ndi ap enasini ininis ombok o wen vaga agarwik ovok erogo hwa ako ogari nunggwii,

Eke, hwa ako en ap endawi ninggya halok, okba nonggegek ogasagwi vaga,

It avakwa yi awi ndi awi onngo hunisagwi menda andok agarwik ako, ininggis werek okhidugwi, oga-guselok,

O Babel ako dek oklaga atma,

Yogak Sile aori inim, yi madis ndi madis inim, yi swa ndi swa nelagwi dek menda nunggwii iniselok enagoda yagalagwi inim,

Ovok at enawi okheda nonggwagao o,” yiluk, ane ombok vaga iris naruk hunggis.

<sup>4</sup>Hunggu lagirik, werekma, mbogot vaga en ane adik ambi iri dugwit,

“Hit An naburi yi wai.

It o kota Babel enomaluk ako ovaga yaruk oklarit mbogot wane-wane ari inggya halok,

At Ala modok elup werekma,

Hinim weyak ogarit lagwi hiniselok, it weyak onngo enovaga bugu dugwit, hinim henovaga bugugu hawen,

o andoma nggelabisiluk, hoda wunggu dogones o.

<sup>6</sup>O Babel en hit avakwa okbugugu lagagwa ako, yogak hiren it onngo wane-wane okbugwis,

eke, o Babel en hit An naburi ndugwis ambi vaga weyak okbigilin lagu lagagwa ako hak,

Yogak it ogo ndugwis mberen vaga angginn enovaga bigik lagwi,

Eke, it hinim ogorek dugwit, enaninis is nudik ovagak ndugwis ambi vaga henovaga ndilogo bugugugwa ovara,

Yogak onngo hit henaninis ndugwis mberen vaga enovaga ndilogo bugwis,

Ogwagu dogones o.

<sup>7</sup>At Babel ako andi, hwa yanenggek ako ovagak atma, endawi imbitya dugwit,

‘An hwa sogwa agarik en nendawi wakhidigya dugwit, yup yasogon dek ovara, ap bikneya wandagwi eneyave wisane werekma,

An hwa ombok at higi, ombakluk, nendawi adenggen wisane ombasiga o,’ yiluk,

Endawi siyabatiga dugwit, inis siyalek iris-ovagangge ogarek adigat agarik ako avoloma adenggen dek agya dogomindik,

Endawi burup iris, edup en yagan yimbilok-mendalok watya, ogagya dogopwak yiluk, angginn modok ovaga hora okbagu dogones o.

<sup>8</sup> At ogarit landiga awene amburup mbalogo owak dilisogon nenasin Ala ako andi,  
 anye wisane atma,

At wogobetegek lagya onngo ndugwis ambiat vaga anggin ovaga agya dugwit, edup agya, erom uvup agya, endawi wakhidigya, ogagya hegek,  
 eyave vagarogo hali hunbasogom o,"  
 yiluk, yuknugu higi.

<sup>9</sup> Higya lagirik, werekma, ambi inim yuknugu dugwit, "It ap ininis ombok yi awi ndi awi o wen vaga agarwik en hwa ako bikha wagu lagarwik, inim sek erogo dugwit, okbagek adigat ogwasagwi ako en, hwa ako hali edup en na iris enaruk hobaluk, 'Nit ogo anderogo okbininggu hawen, nenalon o,' yiluk, o adumu hedarek andenam en mendek dugwit,  
 'O kota Babel yi, henabwa o!

Henanye wisane welagep ovara,  
 Weyak ogagya lagen onngo,  
 Ndugwis ambiat *satu jam* vaga anggin hovaga hora yi waga,

Henabwa o!  
 yiluk, o kota hwa yanenggek ako ovagak atma, hali ninggya yuvuk inil yokhugu dogomundik, enendawi wakhidugu dugwit, ayup yagu dogosogom o," yiluk, yuknugu higi.

<sup>11</sup> Yuknugu lagarik, ambi yuknugu dugwit, "It awakwa yi awi ndi awi onngo hunisagwi menda andok agarwik ako ogo, o kota Babel hwa yanenggek ovagak hali hunbagwi inil hugu dogomundik, enendawi wakhidugu dugwit, 'Ayai, nit nenomberam ako, sani-sani en hunheda nunggu warumwi?' <sup>12</sup> Nenangge mbusi *emas* inim, mbusi *perak* inim, helep enggen elose sek onngo ombok menda *permata* inim, *mutiara* inim, yum eyave sek adup inim, sogwes yum erom mayugwe mudis ovagak inim, saup mudu ovagak inim, yum onngo ombok menda inis *sutera* inim, yo amben eyave sek ogovak higirik inim, wam *gajah* aik vaga ogovak higirik inim, yi menda ndi menda yo eyave sek vaga ogovak higirik inim, mbusi *tembaga* vaga ogovak higirik inim, mbusi eyave ako vaga ogovak higirik inim, helep *pualam* vaga ogovak higirik inim, <sup>13</sup> *kayu manis* inim, henda-irica inim, amben eyave sek menda inim, enagamut eyave sek hapwak yiluk, yo *mur* amburup eralisagwi inim, yo yivi-nggami agamut ako inim, *anggur* amburup inim, *saitun* amburup inim, erom *tepung* inim, *gandum* enggen mbalek inim, wam *sapi-ndomba* inim, *kuda* inim, *kereta kuda* en likhelok lendagwi menda inim, awakwa enayeloman dogopwak yiluk eneyave hunhidugwi inim, onngo hunhedaguluk awakwa vaginipwis inim, yi menda ndi menda wolok wagu niniselok, "Ayai, sani-sani en hunheda warumwi?" ' yiluk, yusogom o.

<sup>14</sup> "Yugu dugwit, 'Hwa hat yi, yi menda ndi menda eyave segedok amburup werek adigat, "Namwa dogopwak dek ai," imbitya lagen ovara, yogak hangge

dek agindikmu, hivis ambi hil higya dogogun mondok dek o,' yiluk, yusogom.

<sup>15</sup> "It awakwa yi awi ndi awi onngo hunisagwi menda andok agarwik ako andi menda hunggu dugwit, ininggis werek okhudugu lagagwa ako, o kota Babel hwa yanenggek ovagak ako edup en na iris enaruk hobaluk, 'Nit ogo anderogo okbininggu hawen, nenalon o,' yiluk, enalon en o adumu hedarek andenam en mendek dugwit, abwa en ayup yagu dugwit,

<sup>16</sup> 'O kota ombok eyave agindik hat Babel yi, habwa o. Hayum erom mayugwe mudis ovagak inim, saup mudu ovagak inim, yirik dugwit,  
 mbusi emas inim, helep enggen elose sek onngo ombok menda *permata* inim, *mutiara* inim,  
 ako vaga hiris hovagangge diduk okhedolok lagya halok,

<sup>17</sup> ndugwis ambiat 1 jam vaga hat hangge-hangge iya ako dek agarikmu, habwa o,'  
 yiluk, yusogom o.

"Eke, it mburis ombok wolok lendagwi enasini inim, it mburis elola yidik lendagwi menda inim, lagu dugwit mburis wolok nelagwi menda inim, eke, mburis vaga hunhedegek lendagwi menda inim, ovok erogo o adumu hedarek andenam en mendek dugwit, <sup>18</sup> hwa yanenggek ovagak o kota Babel ako hali ninggya dugwit yuvuk inggya inil lakhugu dogomundik, 'Kota ombok eyave yerogo ambi agarik dekma, yi oklaga ai,' yiluk, <sup>19</sup> enendawi wakhedugu dugwit, wul ininggul vaga lisilogo wombabasogom. Wombabagu dugwit,  
 'O kota ombok eyave sek agindik yi, habwa o.

Awakwa ininis unggul adik-adik ovok erogo enangge-enangge yi awi ndi awi en mburis vaga wolok wagu iniselok,

Hunhedugu dugwit, ininggis werek okbugu lagen ovara,

Ndugwis ambiat 1 jam vaga at dek agindikmu, habwa o,'  
 yiluk, abwa en ayup yarusogom," yiluk, yuknugu higi.

<sup>20</sup> Yuknugu lagama, ane ambi iri dugwit,  
 "Hit mbogot vaga agipik menda, henadenggen umbutu dogones!

Hit Ala aburi ake denek inim, sek wene yugeregek lagu lagagup lakbogogi inim, *navi-navi* inim,

Hit ovok erogo o kota Babel yi en anggin okbugugu lagagwa ako

Ala en owak ndilogo onngo okbuguguma, henen-dawi adenggen umbutu dogones,"  
 yiluk, iris naruk hunggis.

<sup>21</sup> Hunggu lagirik, nil neyagek, *malaikat* anye werek ambi wagya lagarik, helep aveta legego is ombok yanggadakma *laut* vaga mbo wombabagya higi. Mbo wombabagya dugwit,

"Naninis vaga helep wombabagi yi hak, o kota ombok Babel anderogo at legego wombabagya neyalok, o ngga valek welagagi henen-dawi obak arisogon o.

<sup>22</sup> Hit o Babel agipik yi,

Avakwa o yi awi ndi awi onngo hunisagwi menda, inin dek hegek ovara, ap hit menda andi adigat ininis werek inigis.

Eke, henomadis ininis awakwa ininis unggul adik-adik ovok erogo yugeregek lagu dugwit, nomaliniviluk lagu inigis.

Anderogo lagu lagupikmu,

Nggindar ane ogagwi inim, ndawi viyanggis inim, ane ombok ogasiga *serulung o, trompet o*, ogagwi inim,

O *kota* andoma en ane ogarit lagwi hunggu lagep ako ambi inim hulusogom dek.

Yo *beras* yangganggu dugwit ane ndun-ndun iris, Hwa agasogo isagu dugwit, enadenggen en nane-hane yugwis,

ogasagwi ane ako, o andoma ambi inim enaruk hulup ogo mondok dek o.

Yi ap ndi ap en yi menda ndi menda ogarup ininggis anggat inim,

Hali abya yevedek inim,

o andoma ambi inim inil haup ogo mondok dek o," yiluk, iris naruk hunggis.

<sup>24</sup> It Ala aburi adik denek inim, *navi-navi* inim, initugwa ako, eke, yi awakwa ndi awakwa wen vaga agarwik initugwa ovok erogo enamuya winggigi onngo it o *kota* andi vaga agarwik ako, ovok dek okbisayogon.

#### Ala inis siyabagwi hagagi wene

**19** Andi hunggu lagirik, werekma, o mbogot vaga andoma awakwa wisane homago enane ombok ambivaga yagalagwi hak yugu dugwit,

"Nenasin Ala wa!

Hat hadik hanye wisane,

Nenagap wendatya,

Hinis modok siyalek,

agindik atma, haleluya!

<sup>2</sup> Hwa yanenggek modok iya erogo ogarit lagya ako en, 'Oknera omanes o,' iri halok,

Yi ap ndi ap ovok erogo weyak ogwari nonggegek ogasagwi vaga o wen vaga andoma weyak ogwarogo bagya lagagi ako onngo hwa ako ovaga hora okbagya,

Eke, hwa ako en hat hayelomani initigi ako, onngo at watya,

ogagindikmu,

Hat atma nggedok erogo awakwa des erogo enowak dinggu dugwit,

Hwa ako owak dilogo weyak onngo okbagindikmu, Wa!"

yiluk, <sup>3</sup> yugu-sigis. Yugu lagaorik, ambi yugu dugwit,

"O *kota* ombok hwa yanenggek ovagak ako,

Hali ninggya dugwit, yuvuk o ninggi-nanggi hunik-hunik ovaga yaruk inggya dogosogon o," yiluk,

Ambi inim, "Wa, haleluya,"

yiluk, yugu-sigis. <sup>4</sup> Yugu lagaoma, it mbogot vaga agarwik enanggok ap ombok-ombok eneyave 24 inim,

avakwa en iniselagwidek menda eneyave 4 ako inim, At wene yugeraligama *kursi* sek vaga horaik agarik Ala ako avema seve yiluk, inis siyabagu dugwit, "Nenasin wa," yiluk, "Haleluya, Amin," yugwi naruk hunggis.

#### Ndomba Eyak ogwa dambubugu dugwit, ogarup wene

<sup>5</sup> Yugwi naruk hunggu lagirik, werekma, wene yugeraligama en ane ambi iri dugwit,

"Hit Ala ayelomani en at henalon ombasagwi menda hininis werek inim, hininis dek inim,

ovok erogo nenasin Ala adigat inis siyabagu dogones o,"

yiluk, iri highi. <sup>6</sup> Iri lagama, awakwa wisane homago ambivaga enane ombok yugu dugwit, enane is satut ombok ane iris hak, eke o unggulane wisane ogagya hak, yugu dugwit,

"At Anye Adigat Agarik nenasin Ala ako,

Avakwa sek inim, weyak inim, ovok erogo avema

bisiluk, enasin inis ombok agarik aratma,

'Haleluya,' yiluk, inis siyabasogom o.

<sup>7</sup> At Ndomba Eyak ako ogwa dambubisaup hudi agya lagama, ogwa ako angge-angge diduk okhedolok wagyama,

Asum adup ambi modok segedok eyave mudu swa yanggwi hak abinak horek menda yikhedapwak yiluk, wogoguma

Nenadenggen en hai watu dugwit, inis siyabagu dogosogom o,"

yiluk, enane yugu-sigis. Eke, asum eyave adup ako andi, it Ala aburi ake denek en weyak ogagetek sek adigat ogarit nagwis ako hak at highi.

<sup>9</sup> Higya lagima, *malaikat* ako en an yuknugu dugwit, "Wene yi dirup waru: Ndomba Eyak ogwa dambubugu dugwit, agasogo isogo inim napwak yiluk, it enayonggo yugerasogom andi adigat inim nasogoma, enendawi adenggen umbutu dogosogom," yuknugu lagarik, ambi inim yuknugu dugwit, "Wene andi, Ala en avyarat yagas," yiluk, yuknigas.

<sup>10</sup> Yuknugu lagama, an Yohanes en *malaikat* ako avema seve yiluk, siyabagek ogarigiluk ogagyama, aren yuknugu dugwit, "Buk! An siyabanubuk! An inim, hat inim, hat hasuwei wene Yesus en yugirigya lagagi ako vagago agarwik inim, nit ovok ndatak Ala ayelomani agurik. Ala Averiniki en nenendawima yuknirigya hegek yugurugu dugwit, wene Yesus en vagalogo yagagi ako yugeralagwi aro. Anderogo atma, Ala avema seve yiluk, at adigat inis siyabagya dogwen," yiluk, yuknugu highi.

#### Ap kuda ambor vaga horaik wagagi wene

<sup>11</sup> Yuknugu higya lagirik, mbogot vaga sup hurik agarik hegek, ap ambi inis *Avyarat Adigat Yagaliga, Ala Yugisiga ako Dis Erogo Ogasiga* ako, *kuda* mudu swa yanggwi iris ovagak ambor vaga horaik wagya highi. Wagya dugwit, des erogo enowak dinggu dugwit, at-

ma nggedok erogo onngo wogirigya, ndup des erogo at sumbutu, ogarit waya higi.

<sup>12</sup> At il andi, hali abya wuluk yagaliga ovagak. At ung-gul vaga nggudit-nggudit mendarek wisane yirik, eke, At inis salek ambi eyave vaga dirup warek agarik ako, awakwa en dombalup meyan At adigat elup agarik.

<sup>13</sup> At asum ako awakwa enamuya yanggadak silup erogo erabaluk yikhedelok lagya, eke, At inis andi, Ala Wene yugu-sigis. <sup>14</sup> Waya hegek, it yegen werek mbogot vaga agarwik ako ovok erogo enasum adup modok segedok eyave mudu swa yanggwi hak horek menda yirik dugwit, enadik-enadik *kuda* iniris yanggwi hak ambot vaga hora yiluk, inim wagwi inigis.

<sup>15</sup> Inim wagu dugwit, At yi awakwa ndi awakwa ininis unggul adik-adik ovok erogo sovalogo bisaik en yiluk, mbusinggarep erasul ovagak ovat marek elagapma sisik erek lagya dugwit, sovalogo bugu higi. Sovalogo bisiluk, mbusi manggen bogalek ambi inggimu dugwit, At ane anye vaga wene yugirigya higi. At Anye Adigat Agarik Ala aninis en awakwa okbisaup ako andi, anggur amburup sovalisagwi hak aratma, at ako en awakwa anderogo at sovalogo bigik lagya higi. <sup>16</sup> Eke, at inis salek ambi yerogo:

Awakwa enasini ininis ombok inim, ininis werek inim, Ovok Erog Enasin Inis Ombok aro, yiluk, ako andi aratma, sogwes yum vaga inim, aganyenggen vaga inim, at inis andi, dirup warek agarik higi.

<sup>17</sup> Higya lagirik, at *malaikat* ambi mo vaga mendek dugwit, yi swa ndi swa o ilim yoma wigak-wigak yagan lendagwi ako yugeragagi. Yugirigya dugwit, "It ap ininis ombok inim, ndugandok inim, ap enova anggat inim, *kuda* inim, it *kuda* ambor vaga hora yiluk ndup sumburi lendagwi inim, awakwa enayeloman inim, awakwa un agarwik menda inim, ap ininis werek ininis dek inim, yi awakwa ndi awakwa ovok erogo Ala en enarogo baluk, henake vipuk erogo bagas ma, ininu navovok yiluk, homari wagu dogones o," yiluk, yugirigya higi o.

<sup>19</sup> Yugirigya lagama, yangge do ovagak aninis werek ima en wulu wagagi ako inim, awakwa enasini ap ombok-ombok ininis ombok inim, enarwi yegen werek inim, iren at *kuda* ambor vaga horaik agarik ako aori inim ndup sumburuguluk, homakbaluk inigis.

<sup>20</sup> Andi ogagu-sigik ovara, at yangge do ovagak aninis werek endak daga waga eyave ako vagatao. Eke, at yangge vivis wen elola en daga waga eyave ako inim, vagatao. At yangge vivis daga waga ako andi, nggarogo ogarubuk menda ogarit lagya dugwit, awakwa wisane huluk wene molalogo yugeragagi. Aren, awakwa enembet vaga yangge endak daga waga inis dirup warek wolok nagu dogopwak yiluk, eke, at agut huvuwak ogarek ako inis siyabapwak yiluk, nggarogo ogarubuk menda ogarit lagya dugwit, huluk wene molalogo yugeragagi. Yangge mberen vaginipu lagaorik iniluk ngga-nggan vagogo hali abya wuluk adigat og-

wasigama akoma lakbugu inigis. <sup>21</sup> Lakbugu inugu lagirik, At *kuda* ambor vaga horaik mbusinggarep erasul ovagak elagapma sisik erek ako vaga yangge enarwi yegen werek nin ako enarogo bigik lagya lagama, yi swa ndi swa ovok wagu lagaorik, awakwa enarek ako ininu-enamok mondok enagaum erogo nunggu inigis.

#### 1000 *sahun* vaga ogagu dogop wene

**20** Andi okbaluk, *malaikat* ambi Hambuluk Lendagwima Nggilin Elola sup *hunsi* inim, mbusi heda ombok inim, inggimu wolok, mbogot vaga en wambu waya higi. <sup>2</sup> Wambu waya lagarik, at mbas ombok awigovak ovagak o muk erogo awakwa enambutmu dagasiga menda Sile andi, inis ambi Setan aratma, at sovalogo bagya dugwit vagogo mbusi heda ako vaga makbaluk, 1000 *sahun* vaga dogopwak yiluk, <sup>3</sup> nggilin elola wombabagagi. Wombabaluk, at Sile ako yugugu dugwit, "O havis ndugwis ambiat visilogo hetbagaup ovara, yogak awakwa enambutmu enggetek 1000 *sahun* vaga heda marek yoma at dogwen o," yiluk, mbo wombabaluk, sup *hunsi* larogo bagya higi.

<sup>4</sup> Sup *hunsi* larogo bagya lagama, wene yugerelagwima *kursi* sek higya lagirik, it andi vaga horaik agarwik ako awakwa enowak dinggu dogopwak yiluk, andok okbugu higi. Andi higya lagirik, it Ala wene musek lagu dugwit, Yesus wene vagalogo yugeragagi ako avyarat ombakluk, yugeregek lagu-sigik, enunggul mbalogo bogogwa enanggela ako inigis. It andi en, "At yangge endak daga wagagi eyave inim, agut wakhegek huvuwak ogovak higirik ako inim, it ininis nit siyabagek ogarusogom dek. Eke, yangge inis ako andi, nit nenembet vaga inim, nininggis vaga inim, andi ogo, dirup mbalogo baup dek aro," yiluk, yugu iniselok, enunggul mbalogo bogogwa enanggela ako iniluk akluk Keretus inim ininis ombok dugwit, awakwa wene yugurugwi inigik, 1000 *sahun* at agya higi.

<sup>5</sup> Endak iniluk erogo mondok okbisaup ako it aro. Eke, it nin hambagagwa ako andi, 1000 *sahun* okbaluk, iniluk erogo mondok okbisaup yiluk agarwik inigis. <sup>6</sup> It enendak iniluk erogo mondok okbisaup ako, Ala ake denek dugwit, enendawi adenggen ombok at dogosogom. It andi, ndugwis mberen vaga hambusogom dek. It *imam-imam* hak dugwit, Keretus Ala iperen enake ogarit nagwis, eke, Keretus inim ininis ombok dugwit, awakwa wene yugurugwi, ogagusigik, 1000 *sahun* at agya higi.

#### Sile hali abyama lakbaup wene

<sup>7</sup> Andi higya lagirik, 1000 *sahun* okbaluk, Sile heda marek nggilin elola agarik ako visilogo ilikba waya higi. Visilogo ilikba waya lagama, yi awakwa ndi awakwa ininis unggul adik-adik o Nggok inim, o Magok inim, atok-atokma andoma ovok erogo homakbisiluk, enambutmu ingga dugwit, ndup ogarup ane huluk molalogo enendawima anggat erogo yugeregek lagya

higi. It avakwa ndup ogarup homarisagwi andi, avakwa is yinggi ovagak eve wisane anderogo at homagwi inigis.

<sup>9</sup>Inugu lagirik, o huris hovak ombok erogo baga-girikmu andoma at Sile en avakwa is yinggi hak eneyave wisane anderogo at homakbugu higi. Homak-bisiluk, iren it avyarat umbutugwa Ala aburi ako inim, o *kota* Ala endawi enabwa ombasigama ako inim, hwi salogo iniruguluk, avilis ambot walinggu-sigis. Walinggusim ovara, hali abya mbogot vaga en wuluk yagan wambu wagya dugwit, avakwa ako ovok erogo hali abya nenggek lagya dugwit dek erogo bigik lagya higi. <sup>10</sup>Eke, at avakwa enambutmu dagasiga menda Sile ako, vagogo hali abya wuluk adigat yagaligama at yangge aninis werek endak daga wagagi inim, at aswe havis daga wagagi huluk wene yagan lagya lagagi ako inim, iperen werekma akoma mbo lakbagya higi. Mbo lakbagya lagama, hup-dingga hali aik edup en mon-dok-mondok yagan yimbilok-mendalok yugwi inigis.

### O havis vaga enowak dilup wene

<sup>11</sup>Andi ogagwi inugu lagirik, Ala wene yugeraligama *kursi* sek ombok yanggwi mudu hak ako vaga at eyave andoma at horaik higi. Horaik hegek, mbogot-wen at elokwema dek agya lagama, andi okbaluk, havis avoloma ari wagya hegetek, mondok-mondok dek at agya higi. <sup>12</sup>Dek agya lagama, avakwa hambagagwa menda ininis werek inim, ininis dek inim, wene yugeraligama adema mendek werek inigis. Andoma werek inigik, mbuku nin adik-adik mbiganggu dugwit, mbuku ambi avakwa mondok-mondok iniluk okbisaup ininis dirup warek menda mbiganggu higi. Mbiganggu lagarik, avakwa hambagagwa ako hambegetek iniluk dugwit enandogon ogagu lagagwa mbuku vaga dirup warek ako bikhegek enowak dilogo onngo wane-wane okbugu higi. <sup>13</sup>Anderogo hak, it is en sovalinipigi is yanggadek laut endawima agarwik ako yege-dogo wulu wagwi, eke it hambagagwa hambuluk lendagwima agarwik ako inim, wulu wagwi, wulu wagu lagaoma Ala en it hambegetek iniluk dugwit enandogon ogagu lagagwa ako enowak dilogo onngo wane-wane okbugu higi.

<sup>14</sup>Andi ogagya higya lagirik, it nin iniluk okbisaup mbuku ako vaga ininis warek dek halok, hali abyama lakbugu dugwit, hambisagwi adem inim, Hambuluk Lendagwima inim, ovok erogo vagarogo hali abya wuluk adigat yagaligama akoma mbo lakbugu inigis. "Ndugwis mberen hambup," yiluk, dirup warek ako andi, ambi, we un iniluk dukluk, hambisagwi, eke, ambi, vivis hali abyama mondok-mondok lakbisayogon ako andi, andi aro.

### Mbogot-wen swi ogarek hagagi wene

21 Andi ogagya higya lagirik, werekma, mbogot-wen endak werek ogagagi ako inim, is ombok

yanggadek laut ako inim, dek agya hegek, avoloma mbogot-wen swi ogovak higririk ako ari wagya higi.

<sup>2</sup>Higya lagirik, hwa ambi agun hedagiluk, angge-angge diduk okhodolok wandiga hak, o *kota* mondok adik denek Yerusalem swi ogarek ako, Ala werekma mbogot vaga en wambu wagya higi.

<sup>3</sup>Wambu wagya lagarik, wene yugeraligama andoma en ane ombok ambi iri dugwit, "Ala avakwa enanggelekma dogopim akoma dogogiluk, eyave wambu wandiga andi, hanes o. At eyave ako aburi inim dugwit, iren, 'Hat nenasin Ala aro,' yiluk, yugugwis, eke, aren, 'Hit an naburi aro,' yiluk, yugirigya, ogagu dogosogom o. <sup>4</sup>Mbogot-wen endak ogarek ako vaga dugwit, enendawi anggin hugu lagagwa ako, dek agarikmu, swi ogarek ako vaga enasin Ala inim dugwit, yup owangga dek erogo bisamindikmu, hambugwi, de wene yugwi, enendawi wakhedugwis, edup hugwi, ogagu dogosogom mondok dek o," yiluk, iris naruk hunggis.

<sup>5</sup>Iris naruk hunggu lagarik, werekma, at wene yugeraligama *kursi* sek vaga horaik agarik ako en an yuknugu dugwit, "Anen, yi menda ndi menda ovok erogo swi werek ogarogo baliga yi, hanes!" yiluk, iri lagarik, ambi yuknugu dugwit, "An wene avyarat atma nggedok yagaliga atma, wene yi dirup waru," yiluk, yuknigas.

<sup>6</sup>Yuknugu lagarik, ambi inim yuknugu dugwit, "O muk endak erogo welagagis adem *Alpa* inim, eke, atok vaga mondok dogop *Omega* inim, andi An atma, yukhigis ako andi, vage ogagyama yiluk yukhisiga o.

"It avakwa is uvup oginipu halok, Anen is iniluk ogonivisiga menda liris wungguma en onngo dek we un at nodogo wogirigya dogosogon o. <sup>7</sup>It an nane mbo bagetek enendawi wadok dek vagago dugwit, des erogo musek lagu iniselok, mavorangge wogorelagwi hak, okbisaup wene haruk hunggin ako oginipu dogomindik, An enasin Ala at agya, eke, it An naburi at agwi, ogagu dogosogom. <sup>8</sup>Eke, it Ala wene musek laup enalon ombasagwi inim, avyarat ombarup enanggon ombasagwi inim, weyak mbobo ugup hegek ugun ogarit lendagwi inim, avakwa enasagwi inim, avakwa ugun oginivisagwi inim, mum vaga inirisagwi inim, ovat vaga inirisagwi inim, huvuwak ininis siyabelagwi inim, enane huluk yagalagwi inim, it ovok erogo it dogopim vipuk erogo bagagirikmu hali abya wuluk adigat ogwasigama akoma mbo lakbisayogon. Ndugwis mberen hambup ako andi, ambi, we un iniluk dukluk, hambisagwi, eke, ambi, vivis hali abyama mondok-mondok lakbisayogon ako andi, andi aro," yiluk, yuknugu higi.

### O Yerusalem swi ogarek hagagi wene

<sup>9</sup>Yuknugu lagama, *malaikat* eneyave 7 ako en avakwa edup okbisaup adwanggak adem 7 sogolowak vagma nudik vagogo welagao ako, ambi en nadema



wagya lagarik, yuknugu dugwit, "Ndomba Eyak ogwa hedaup hwayyak ako, hil hanok yiluk, oma o."

<sup>10</sup> Yuknugu lagarik, Ala Averiniki nendawima dis iri lagama, neyave woknombolok ndom ombok adup vaga bani inggya lagarik, o *kota* mondok adik denek Yerusalem swi ogarek ako Ala werekma mbogot vaga en wambu wagya, "Andi hil hanen," yiluk, yuknigas.

<sup>11</sup> Yuknugu lagama, helep onngo ombok wukagak ovagak inis *yaspis* ako menda amumulip ogasiga hak, elose wukagak mondok awiya ogasiga ovagak, o *kota* swi ogarek amumulip ogagya andi, Ala siyalek dugwit, awiya abinak ogarek agarik ako en at ogwagya highi.

<sup>12</sup> Eke, o *kota* leget eyave wogo andi, mondok iya adup erogo valekma, sup mbanggut leget mbalek 12 hudi, eke, sup mbanggut leget mbalek andok ako andi, *malaikat* eneyave 12 at agarwik inigis. Eke, sup mbanggut eyave vaga avakwa Iserali ininis unggul 12 menda ako ininis dirup mbalek agarik inigis. <sup>13</sup> O leget eyave vaga sup mbanggut mo il daga wandigama *timur* vikit henggam mbalek, eke, mo il huruk yi landigama *barat* vikit sup mbanggut henggam mbalek, o *utara* vikit sup mbanggut henggam mbalek, o *selatan* vikit ako andi, sup mbanggut henggam mbalek, agarik highi. <sup>14</sup> O leget eyave valek andi, helep owak bago 12 vaga valek highi. Eke, helep owak bago ako vaga, at Ndomba Eyak aori lakbogogi menda 12 ako ininis dirup warek agarik highi.

<sup>15</sup> Eke, At wene yuknigas ako en o *kota* inim, sup mbanggut leget mbalek ako inim, o leget wogo inim, adup maren hudi agarik yiluk, wakhegek wanggun *meter* mbusi emas vaga inggimu agarik highi. <sup>16</sup> Nil neyagek, at ako en o *kota* ako wakhegek ako vaga wal okhigya dugwit, atok winimen-wenamen inim, venak-venak inim, o owak adup iligik inim, andi *dua ribu dua ratus kilometer* hak wakhegek valek highi. O *kota* leget venak-venak wogo agarik ako andi, venak ambi adup, venak ambi dul, anderogo dek, adup wane-wane agarik highi.

<sup>17</sup> At *malaikat* ako en o *kota* valek wal okhigya lagarik, andi okbaluk, o leget eve adup iligikan ako adigat wal okhigya lagama, at wakhegek ako vaga wal okhagas ako andi, nit avakwa wal okhelagwi ako hak 65 *meter* at ogarek highi. <sup>18</sup> O leget eyave ako andi, helep *yaspis* ako vaga valek, eke, o *kota* ako andi, mbusi *emas* at menda vaga adigat wukagak mondok awiya ogasiga ovagak ako vaga valek highi.

<sup>19</sup> O *kota* ako, yi helep ndi helep eyave segedok halok adigat ovaga dikduk ogarek owak bagao highi. Helep owak wenamen ndalek andi, helep *yaspis*. Helep *yaspis* ovaga bago ako andi, helep *nilam*. Helep *nilam* ovaga bago ako andi, helep *mirah*. Helep *mirah* ovaga bago ako andi, helep *zamrud*. <sup>20</sup> Helep *zamrud* ovaga bago ako andi, helep *unam*. Helep *unam* ovaga bago ako andi, helep *sardis*. Helep *sardis* ovaga bago ako andi, helep *ratna cempaka*. Helep *ratna cempaka* ovaga bago ako andi, helep *beril*. Helep *beril* ovaga bago

ako andi, helep *krisolit*. Helep *krisolit* ovaga bago ako andi, helep *krisopras*. Helep *krisopras* ovaga bago ako andi, helep *lazuardi*. Helep *lazuardi* ovaga bago atok vaga ako andi, helep *kecubung*, helep elose eyave segedok vaga adigat ovaga dikduk ogarek valek highi.

<sup>21</sup> Sup mbanggut eyave 12 menda ako andi, helep onngo ombok menda inis *mutiara* vaga enadik-enadik ogarek highi. Sup mbanggut ambi, helep *mutiara* ambi ogarek atma, nin ogo, anderogo adigat ogarek highi. Eke, o *kota* ilim sup yago andi, mbusi emas at menda adigat wukagak mondok awiya ogasiga ovagak ndalek highi.

<sup>22</sup> At Anye Adigat Agarik Nenasin Ala inim, at Ndomba Eyak inim, Ala awi valek hak eneyave enanggelekma inim at werekma, it avakwa Ala ninim agarik ombarupwak yiluk, awi valek ako dek at highi.

<sup>23</sup> At Ala mondok siyalek eyave awiya abinak iya erogo ogagya ako vaga o *kota* andi, awiya ogagya, eke, hali yevedek ovagak andi, Ndomba Eyak en at awiya anderogo at ogagya, ogasagwima, it avakwa en, "Mo il inim, saut inim, awiya arupwak dek ai," yiluk, yegetek at inigis. <sup>24</sup> Yi avakwa ndi avakwa ininis unggul adik-adik ovok erogo o awiya andi vaga nagwis, eke, yi ap ndi ap ininis ombok wen vaga agarwik ovok erogo o awiya andi vaga enangge yi menda ndi menda onngo ombok menda hedelok nungugwi, ogagu inigis.

<sup>25</sup> O *kota* andoma o hup asigadek mondok-mondok dingga adigat werekma, sup mondok hurik at agarik highi. <sup>26</sup> Yi avakwa ndi avakwa ininis unggul adik-adik ovok erogo enangge-enangge wisane werek iniselok, vok yugalagwi menda hedelok, o *kota* andoma nungugugu inigis.

<sup>27</sup> Nungugugu inigis ovara, it weyak enendawima vago agarwik, weyak mbobo ugup hegek ugun ogarit nagwis, huluk yugwi, ogasagwi ako halok andi, nungugwi mondok inigibuk. Ata, it avakwa iniluk mondok-mondok okbisaup ininis mbuku vaga dirup warek Ndomba Eyak vagogo agarik andi halok adigat nungugugu inigis.

#### Is iniluk oginivisiga lagya hagagi wene

**22** Andi higya lagarik werekma, *malaikat* ako en, an yuknugu dugwit, "Is avakwa iniluk oginivisiga menda il mudis mondok apik sigam ako, hil yokhanen. Is andi, Ndomba Eyak Ala iperen wene yugerelagwima avema en, hudu-hudup erogo wunggu lagarik, <sup>2</sup> o *kota* sup swayavup ogarek agakorup lagya andi, hil yokhanen," yiluk, yuknigas. Yuknugu lagama, bikhigya, is ombok lagya ako omban yivikit-elavikit yo avakwa iniluk ogonivisiga menda awi yago ma, saut ambi vaga enggen wisane yiklagya, saut ambi vaga enggen wisane yiklagya, anderogo at ogarit *sahun* ambi vaga enggen adigat yugu hegek, saut 12 hudi agya highi. Eke, yo angga ako andi, yi avakwa ndi avakwa idup ogonupu hawen, sek oginivisiga enake at agarik highi.

<sup>3</sup>Yi menda ndi menda Ala en vudilogo bagagi weyak agarik ako ovok erogo sek erogo okbagas atma, o ako andi, sek adigat agarik highi.

Eke, at Ala inim, Ndomba Eyak inim, iperen wene yugerelagwima *kursi* sek o ilim andenam werekma, At ayelomani ovok erogo At avema seve yiluk dugwit, At ake adigat ogagwi inigis. <sup>4</sup>At Ala ake adigat ogagu dugwit, elose inil hugu inigik, At inis enembet vaga dirup warek agarik highi. <sup>5</sup>Andoma o hup asigadek, o dingga adigat agarik hegek, it avakwa en, o Ala awiya vaga nagu dogosogom atma, nagu dugwit, "O awiya arupwak yiluk, mo il wulu wagya, eke, hali yevetwis, ogarupwak dek ao," embetetek inigis. Eke, it ap ininis ombok *pemerintah* hak dugwit, mondok-mondok avakwa wene yugurugu dogosogom o.

#### Yesus warup wene

<sup>6</sup>Andi vaga, at wene yuknugu ako en ambi inim yuknugu dugwit, "Wene yi, avyarat atma nggedok yisogon, yiluk, yagaliga. Nenasin Inis Ombok Ala en it ap navi-navi ako Averiniki vaga yugeraligna. At ako en, an malaikat yi en, vage mbikit ogarup wene ako, at ayelomani yugeraligna lak bani wagama, wagi o," yuknugu highi.

<sup>7</sup>Yesus en iri dugwit, "Dibas! An vage mbikit warisogon o. Eke, havis ogarup wene hat Yohanes en dirup watin yi ako, it avakwa dibaluk, musek lagu iniselok, enendawi adenggen at hugu dogosogom o," yiluk, yuknugu highi.

<sup>8</sup>Wene yagan wagao naruk hunggu, oklarit wagao nil higya, oklaga ako andi, an Yohanes enat highi o. An naruk hunggu, nil higya, ogagya lagirik, at havis ogarup wene yuknigas *malaikat* ako inis siyabagya ogarigiluk, avema seve iri lagima, <sup>9</sup>aren an yuknugu dugwit, "Anderogo ogarubuk. It haswei *navi-navi* inim, it wene dirup watin yi dibaluk musek lendagwi ako inim, hat inim, an hit ovagak Ala ayeloman atma, Ala adigat inis siyabagya dogwen," yiluk, yuknigas.

<sup>10</sup>Yuknugu lagarik, "Havis ogarup wene yukhugu neyagek dirup watin ako, ogarup vage horok vanggo yi wagarikmu, wene andi, hwilakbaluk dogop moga. Ata, yi ap ndi ap yugeregek lagya dogwen.

<sup>11</sup>Yugeregek lagya heyagek ovara, it weyak ogagu dogop ombasagwi halok, weyak at okhedugu dogopwak. It ogarup dek menda hegek ugun-ugun ogarit lagu dogop ombasagwi halok, it andi ogo, ugun-ugun at ogarit lagu dogopwak. Eke, it nin weyak ogagetek sek adigat ogagu dogop ombasagwi halok, sek adigat ogarit lagu dogopwak. It nin Ala ake sek adik denek dogop ombasagwi halok, Ala ake adik denek at, dogopwak o," yiluk, yuknugu highi.

<sup>12</sup>Yuknugu higya lagirik, at Yesus en, "Dibas! O muk endak erogo welagagis adem *Alpa* inim, havis atok vaga mondok dogop *Omega* inim, andi An nadigat. An nadigatma, An vage mbikit wagya dogomindik, yi ap

ndi ap ogagu dogosogom vaga onngo wogeraup imbiti ako enadik-enadik wane-wane wogora warisogonma, dibagu dogopwak o," yiluk, yuknugu highi.

<sup>14</sup>Yuknugu higya lagirik, Yesus en ambi yuknugu dugwit, "It sogwes yum mudu hothedelagwi ako, yo iniluk oginivisiga enggen nunggwii, eke, o *kota* sup hurik adigat agarik yoma nadema nunggu wagwi, ogarup andok okbugu neyalok, enendawi adenggen embetek o *kota* nunggusogom. <sup>15</sup>It nunggusogom arova, it yangge ovagak ogasagwi inim, mum isa inim, avakwa ugun-ugun ogarit lendagwi menda inim, ap enaraligna menda inim, madis inis adup ogasagwi menda inim, eke, yi ap ndi ap huluk-huluk wene yup hogop umbutu dugwit, huluk-huluk yugeraligna inim, it andi, o *kota* andoma nonggogetek leget weram dogosogom o.

<sup>16</sup>Yuknugu lagirik, Yesus en ambi yuknugu dugwit, "Hit An naburi yi awi ndi awi homarit lendagwi ako, havis ogarup wene yi, vagalogo yukhera warupwak yiluk, nayonggo landiga menda *malaikat* ambi lakba wagi ako andi, An Yesus en aro. Yo aruknuk dagasiga andi hak, inis unggul Daut vaga wigalek ako, an aro. O yanggo yigiluk ogagya hegek wap amumulip ogasiga ako, an aro," yiluk, yuknigas.

<sup>17</sup>Yuknugu lagama, *malaikat* ako en ambi yuknugu dugwit, "It avakwa is uvup ogonupu halok, is iniluk oginivisiga ako menda onngo dek we un at nokheda warupwak yiluk, Ala Averiniki inim, Ndomba Eyak ogawa ako inim, iperen en, 'Omanes o,' yiluk, vage yugeraligna o. Eke, iperen enane hunggwis ako en, it ogo 'Na omanes,' yiluk, avakwa yugurugu dogopwak," yiluk, yuknugu highi.

#### Atok vaga yugugu hagagi wene

<sup>18</sup>An Yohanes en havis ogarup wene dirup watis yi, hit vivis henaruk hulusogom menda heneyave dombok, wene hurimbis yukheraligna: Wene higya lagirik dirup watis menda yi hegek, sa en wene hunogo menda ovaga lobalogo bagwi iniselok, Ala en edupmbedup adwanggak adem 7 higya lagirik dirup watis ako anggin enovaga lobalogo bisayogon. <sup>19</sup>Eke, at Ala en, "Iniluk oginivisiga menda yo enggen nunggwii, o *kota* sek adik denek akoma nunggugwi, ogagu dogop o," yiluk, yagagi mbuku yi vaga dirup warek agarik. Agarik ovara, havis ogarup wene yuknugu inigik dirup watis yi, avakwa en hobaluk, Ala wene nin andi wugu dugwit ovara, "Nin andi waup nenanggon o," yiluk, sagalogo mbo bagwi iniselok, At Ala en it ap andi, "Enggen ako naup dek," eke, "O *kota* akoma nunggup dek, hit weram at dogones o," yiluk, yugerayogon.

<sup>20</sup>Eke, wene yi ovok erogo vagalogo yukneraligna Yesus ako en, "Avyarat! An vage mbikit warisogon o," yiluk, yukneraligna. Anderogo iri lagama, anen, "Nasin Yesus, hat vage mbikit warisogon andi, segat. Hodo omano, Amin!" yigi.

<sup>21</sup> Nit nenasin Yesus ako en hit Ala aburi yi awi ndi awi homarisagwi ako, henabwa en sek okbugugu dug-wit, hinim at dogopwak o. Amin.